

DE OFFICIO
HOMINIS CHRIS-
TIANI IN PERSE-
CVTIONE CON-
STITVTI.

Auctore IOANNE LENSABO Bel-
liolano, Sacrae Theologiae Louanij
Professore.



LOVANII.
Apud Petrum Zangrium Tiletanum.
M. D. LXXVIII.

Cum Gratia & Privilegio Reg. Maiest.

P R Æ F A T I O.



A quorundam etiam nunc est cæca nimis opinio, ut ineptum ac stultū putent, Religionis causa, persecutionem pati: & torqueri ac mori vel-
le, cum liberè liceat abire, paululum aut re-
pressa lingua, aut ad potentioris cuiuspiam.
laxata voluntatem. Neque verò id sentiunt
aliquo nixi rationis vel authoritatis funda-
mento, sed ob id tantūmodo, quòd hac cor-
poris vita & luce, pecudum more, delectati,
non considerent, quanti facienda sit pietas,
qua Deo coniungimur, promissionemque
habet vitæ quæ nunc est & futuræ. Ac no-
men isti quidem Christianum gerunt, sed
reuera Gentilibus ijs similes sunt, de quibus
Tertullianus in Apologetico: Quidam, in-
quit, dementiam existimant, quòd, cum pos-
simus & sacrificare in præsentī, & illæsi ab-
ire, manente apud animum proposito, ob-
stinationē salutī præferamus. Datis scilicet
consilium (ait) quo vobis abutamur. Idcirco
iisdem Christianos desperatos ac perditos,
& sarmenticios ac semissios appellabant,
quod ad stipitem dimidij assis reuincti sar-
mentorū ambitu, exuri sese paterentur.
Sunt alij, qui cum Religionem primo ha-

P R A E F A T I O.

4. bendam loco fateantur, nullam tamen rationem postulare censent, vt ea proferatur, vbi ex persecutione vitæ periculum impendeat. Sat enim esse, si coram Deo, cui vni placere sufficiat, integritas fidei pura conscientia teneatur, nec Deum verba, sed loquentis animum inspicere. Denique suam hanc sententiā diuinarum etiam litterarum autoritate communire nituntur. Imitati sunt veteres hæreticos, qui cum reliquis suæ doctrinæ portentis hoc quoque coniunxerunt, vt martyria facienda esse negarent. Testatur hoc de Basilide Tertullianus, in libro quem de hæresibus scripsit, & Origenes in Ezechielem: Valentinianos ille quoque testis est, martyrij necessitatē elusisse, quacunque interpretatione. Quendam præterea Corpianum inter hæreticos numerat Optatus Mileuitanus, quod negaret debere esse martyria. Sed & Priscilliani commentum hoc fuit, qui sæculi gladio & totius fuit orbis autoritate damnatus. Cuius in dogmatibus propter occultandas turpitudines flagitiosas, etiam illa verba reperta sunt: Iura, periura, secretum prodere noli. Fuisse quoque Helchisitas Eusebius commemorat, qui fidem in persecutione verbo docere negandam, sed corde & animo conseruandam. Nec verò Eunomius & Vigilantius,

Basilus homilia in Gordium Martyrem.

Vide etiam Eusebium lib. 4. ecclesiast. hist. cap. 8.

lib. 4. ad Armenianum. Hieronymus ad Ctesiphontem.

Hæresi 70 apud Aug.

lib. 6. c. 18. & Aug. hæresi 10.

P R A E F A T I O.

tius, ab hoc errore fuisse videntur alieni;
 quorum vterque nullo dignas honore cre-
 didit reliquias martyrum. Quocirca aduer-
 sus Vigilantium scribens D. Hieronymus:
 Miror (inquit) quod non dicas nequaquam
 perpetranda esse martyria: Deum enim qui
 sanguinem taurorum hircorumque non
 quarat, multo magis hominum non requi-
 rere. Quod cum dixeris (imo etsi non dixe-
 ris) ita habebis quasi dixeris. Qui enim reli-
 quias martyrum asseris calcandas esse, pro-
 hibes & sanguinem fundi, qui nullo honore
 condignus est. Denique & D. Bernardus
 ætate sua fictos istiusmodi & duplici cordo
 homines hæreticos fuisse testatur: Quos *Serm. 69.*
 pluribus verbis depingens: Indixere (inquit) *in Cantua*
latebras sibi, firmauerunt sibi sermonem
nequam. Iura, periura, secretum prodere
 noli. Et hi tamen ipsi aliàs ne tenuiter qui-
 dem iurare sustinebant. Priores illi doctrinæ
 medicina sanandi magis erunt, quàm dispu-
 tatione refellendi, vt intelligant animæ sa-
 lutem, corporis incolumitati; & pietatem
 atque iustitiam, vitæ huic temporariæ mul-
 tis nominibus anteponendam esse: frustra-
 cum offensione Dei quandam huius tem-
 poris felicitatem seu potius felicitatis vm-
 bram retineri, quam semel amittere vel mo-
 riendo necesse sit. Ex quo illa D. Cypriani

23. 4. epist.
epistola 6.

PRÆFATIO.

clarissimi Martyris adhortatio est ad plebē
Thibari consistentem: Si mortem possemus
euadere, meritò mori timeremus: porrò au-
tem cum mortalem mori necesse sit, ample-
ctamur occasionem de diuina promissione
& dignatione venientē, & fungamur exitu
mortis cum præmio immortalitatis, nec ve-
reamur occidi, quos constat, quādo occidi-
mur, coronari. Nec verò amitti modo hanc
qualemcunque vitæ præsentis felicitatem
necesse est, verum etiam pro ea cupidius
quàm par sit, adamata, sempiternam infœli-
citem reportari. Non enim falli potuit is
cuius ea celebratissima vox est apud Chri-
stianos: Qui amat animam suam in hoc mū-
do, perdet eam. &: Quid proderit homini si
vniuersum mundum lucretur, animæ autem
suz detrimentum patiatur? His similibusque
rationibus adnitendum erit, vt iustitiæ di-
gnitate proposita, fructuque eius common-
strato, si colatur: detrimentoque grauissi-
mo, si violetur, præ illis fluxa hæc & caduca
bona contemnant, quorum amore cæcati,
& seculari duntaxat prudentia, non Chri-
stiana, qua sibi ad beatam æternitatē consu-
lere possint instructi, irridendā censent pio-
rum fortitudinē; qui & ipsam corporis vi-
tam profundere ac perdere malunt, quàm
id committere quod sit cum iustitiæ aut pie-
tatis

PRÆFATIO.

tatis violatione coniunctum. Quemadmodum hoc sanè septem Machabæi fratres præclare præstiterunt, è quibus qui tertio loco passus est, cum linguam iussus amputandam protulisset, dixit: E cælo ista possideo, sed *Lib. 2 Machab. ca. 7.* propter Dei leges, nunc hæc ipsa despicio: quoniam ab ipso me ea recepturum spero. Insigni prorsus exemplo fortitudinis, secuturos omnes pios instruens quanti facienda sit iustitia, quæ diuinarum legum observatione continetur: Quæ sic amanda est (inquit August.) ut ab eius operibus, etiam poenæ corporis nos cohibere non debeant, atque inter manus crudelium inimicorum, luceant opera nostra coram hominibus, ut quibus placere possint, glorificent patrem *Mach. 5.* nostrum qui in cælis est. Vnde ille fortissimus iustitiæ dilector exclamat: Quis nos separabit à charitate Christi? tribulatio? an angustia? an persecutio? an fames? an nuditas? *Roma. 8.* an periculum? an gladius? sicut scriptum est: Quoniã propter te mortificamur tota die, *Psalm. 43.* deputati sumus sicut oves occisionis. Sicut ergo ille est nequissimus (inquit) quem nec poenæ corporales deterrêt ab immûdis operibus sordidæ voluptatis: ita ille iustissimus, qui nec poenarû corporaliû terrore, reuocatur à sanctis operibus luminosissimæ charitatis. Hac inflâmatos aliquândo plurimos Dei

cultores, à Christo Deo, non solum colendo,
 verum etiam confitendo, metus ullus aut
 terror reuocare non potuit: blanditiæ nul-
 læ, promissio nulla dimouit: sed nec faculta-
 tum violenta subtractio, nec acerbitas vni-
 uersarum variarumq; poenarum, & ipsius mor-
 tis, quæ plus cæteris formidatur: Neque tunc
 ciuitas Christi, quamuis adhuc peregrinare-
 rur in terris, & haberet tam magnorum ag-
 mina populorum, aduersus impios persecu-
 tores suos pro temporali salute pugnavit,
 sed potius ut obtineret æternam, non repu-
 gnauit: ligabantur, includebantur, cadeban-
 tur, torquebantur, vrebantur, laniabantur,
 trucidabantur, & interea tamen multipli-
 cabantur. Non erat eis pro salute pugnare,
 nisi salutem pro Salvatore contemnere.
 Scio (inquit August. in libro Ciceronis 3.
 ni fallor, de Repub.) disputari, nullum bel-
 lum suscipi ab optima ciuitate, nisi aut pro
 fide, aut pro salute. Quid autem dicat, pro
 salute, vel quam salutem intelligi velit, alio
 loco demonstrans. Sed his poenis (inquit)
 quas etiam stultissimi sentiunt, egestate, ex-
 ilio, vinculis, verberibus elabuntur sæpe
 priuati, oblata mortis celeritate. Ciuitati-
 bus autem mors ipsa poena est, quæ videtur
 à poena singulos vindicare. Debet enim con-
 stituta sic esse ciuitas, ut æterna sit. Itaque
 nullus

lib. 22. de
 ciuit. cap. 6

nullus interitus est Reip. naturalis, vt homi-
 nis : in quo mors non modo necessaria est,
 verum etiam optanda per sepe. Ciuitas au-
 tem cum tollitur, deletur, extinguitur, simi-
 le est quodammodo (vt magnis parua con-
 feramus) ac si omnis hic mundus intereat ac
 concidat. Hoc ideo Cicero, quia mundum
 non interiturum cum Platonis sensit.
 Constat ergo eum pro ea salute bellum vo-
 luisse suscipi à ciuitate, qua sit vt maneat
 hic ciuitas (sicut dicit) æterna, quamuis mo-
 rientibus & nascentibus singulis, sicut per-
 enn timeris est opacitas oleæ vel lauri, atque hu-
 iusmodi cæterarum arborum, singulorum
 lapsu ortuque. Vnde merito queritur (ait)
 vtrum rectè fecerunt Saguntini, quando v-
 niuersam ciuitatem suam interire maluerunt
 quàm fidem frangere, qua cum ipsa Roma-
 na Repub. tenebantur, in quo suo facto lau-
 dabantur ab hominibus terrenæ Reipub. ci-
 uibus. Sed hi quomodo huic disputationi
 possent obedire, non video, vbi dicitur nul-
 lum suscipiendum esse bellum, nisi aut pro
 fide aut pro salute; nec dicitur, si simul in v-
 num periculum ista duo ita concurrerint,
 vt teneri alterum sine alterius amissione nõ
 possit, quid sit potius eligendum. Profecto
 enim Saguntini si salutem eligerent, fides
 eis fuerat deferenda : si fides tenenda, a-

mittenda utique salus, sicut & factum est. Salus autem ciuitatis Dei, talis est, ut cum fide ac per fidem teneri, vel potius acquiri possit; fide autem perdita, ad eam quisque venire non possit. Quæ cogitatio firmissimi ac patientissimi cordis tot ac tantos martyres fecit. Hæc Augustinus. Sed quoniam alij sunt, qui (sicuti significauimus) argumentis etiam disputandique subtilitate, nituntur probare quod dicunt, fierique sic oportere aut licere confirmant, contra hos operosius erit agendum, atque ante omnia demonstrandum, præter fidem, etiam fidei professionem homini Christiano quandoque necessariam esse.

H O M I N I

31

HOMINI CHRISTIANO PRÆTER INTERIOREM FIDEM,

etiam fidei professionem suo tempore neces-
sariam esse, non obstante perse-

cutionis metu.

CAPVT PRIMVM.



IGITUR CHRISTI Redemptoris humilitas, vsque ad probro-
sæ mortis perducta supplicium, su-
perbos quondam philosophos à
Christianæ religionis amplexu le-
gitur repulisse. Christum enim illi
contemnebant propter fragile corpus ex fœmina
sumptû, & maximè quidem propter crucis oppro-
brium: Idonei scilicet, qui sapientiâ, spretis atque
abiectis intimis (per quæ tamè nobis cælestis me-
dicina consuluit) de supernis haurirét. Itaque cum
propter superbiam credere nollét, Christiani fieri
minimè potuerunt. Sed fuere tolerabiliore loco
nonnulli, quibus iam quidè placebat ac probabatur
Christiana religio, quòd ea veræ virtutis ratione
salutisq; viam certissimè demonstrari perspicie-
bant. Verùm cum hanc adhuc iriderent gentes,
quibus nimirum prædicatio crucis erat stultitia,
(quæadmodum Apostolus ait) Prædicamus Chri-
stum crucifixum, Iudæis quidem scandalum, Gen-
tibus autem stultitiam; imò verò cum adhuc mul-
ti criminis loco ducerent esse Christianum, fiebat
vel irrisuonis, vel irarum suppliciorumq; metu, ve
quod probarent, animi iudicio, iamq; in secreto-
res cordis recessus admiserant, palam id profiteri
vererentur. Quo in numero fuerat apud Roma-
nos aliquando Rhetor Victorinus. Legebat enim
scripturam sanctam, Christianasq; litteras inuesti-
gabat studiosissimè ac perscrutabatur, & dicebat
Simpliciano Episcopo, non palam, sed familiarius
ac secretius: Noueris me iam esse Christianum.

Sed

Lib. 8. com-
fess. cap. 2.

Roma. 10.

Sed quod eius animo iam adlubuerat, id ne profiteretur publicitus, talemque se videri & haberi vellet, qualis pio salutarique desiderio tum erat, pudor & metus prohibebant. Amicos enim suos ve-
rebatur offendere, superbos (ait August.) dæmo-
nicolas, quorum ex culmine Babylonicae dignita-
tis, quasi ex cedris libani, quas nondum contriue-
rat Dominus, grauitur ruituras in se inimicitias
arbitrabatur. Quem nisi postea metum superasset,
ut quod crederet, id suscepto fidei sacramento, e-
tiam profiteretur, nunquam fuisset profecto Chri-
stianus. Idcirco cum Simpliciano saepius ille se Chri-
stianum esse diceret, hoc semper à viro sancto an-
diebat: Non credam, nec deputabo te inter Chri-
stianos, nisi in Ecclesia Christi te videro. Memi-
nerat enim ac tenebat ab Apostolo dictum esse: Si
confitearis in ore tuo Dominum Iesum, & in cor-
de tuo credideris quod Dominus eum suscitauit à
mortuis, saluus eris. Corde enim creditur ad iusti-
tiam, ore autem confessio fit ad salutem. Vnde e-
tiam illud est apud Psalmistam: Credidi propter
quod loquutus sum, ego autem humiliatus sum
nimis. hoc est (inquit Aug.) perfecte credidi. Non
enim perfecte credunt, qui quod credunt loqui no-
lunt. Ad ipsam enim fidem pertinet etiam illud
credere quod dictum est: Qui me confessus fuerit
coram hominibus, confitebor & ego eum coram
Angelis Dei. Itaque Victorinus, postquam (ut Aug.
ait) legendo & inhians auxit firmitatem, timuit-
que negari à Christo coram Angelis sanctis, si eum
timeret coram hominibus confiteri, reusque sibi
magni criminis apparuit, erubescendo de sacra-
mentis humilitatis verbi Dei, & non erubescendo
de sacris sacrilegis superbiorum daemonum, quae
imitator superbus acceperat, depuduit vanitati, &
erubuit veritati, subitoque & inopinatus ait Simpli-
ciano: Eamus in Ecclesiam, Christianus volo fie-
ri. Non iam amplius suorum irrisiōem, non iras
formi-

formidabat, & quam rem sibi ad æternæ salutis consecutionem necessariâ intelligebat, eam nullo persecutionis metu prætermisit. Neque sanè magnum adeo est, tñ Christianâ præ se ferre ac profiteri fidem, cum veneratione nōminis huius omnes applaudunt confitenti, magisq; persecutio timetur, si Christianus fieri nolis, quàm si te ad numerum Christianorum adiungas. Tum demum Christianæ fidei virtus elucet, cum aut humana gratia atque amicitia contemnitur, vt Deo placeatur, aut etiam temporaria potius ex persequentiū odijs damna sustinentur, quàm incurrantur æterna. Delicatus est, qui pacis tēpore videri vult Christianus aut Catholicus, neque magni æstimat Christū, pro ipsius tamen salute crucifixū, qui eius glorię causā nihil triste, nihil acerbū perpetiendum putet. Quod si tales à principio fideles omnes extitissent, quales nonnulli aut esse debere, aut certe esse posse, commota persecutione putant, quęnam obsecro Christo gloria in terris fuisset, primis exortæ Ecclesiæ temporib; quæ omnia penè persecutionum grauissimarum æstu feruebant? Atqui prædictum erat ita fore, vt suscepto in cælos auctore salutis, in omni breui terra, gloria eius illustris, vita & confessionibus sanctorum appareret: Exaltare (ait Propheta) super omnes cælos Deus, *Psal. 36.* & super omnem terram gloria tua. Itaque & Apostoli, sicuti id in mandatis habuerant, testes Christi *Act. 1.* fuerunt in omni Hierusalem & Iudæa & Samaria, & vsque ad vltimum terræ: & illorum temporum ceteri Christiani, in medio licet nationis prauæ; hoc est, suos inter hostes ac persecutores constituti, instar luminarium celestium, relucebant, ac cœcæ gentilitatis tenebras, suæ & vocis & vitæ comparatione damnabant. An fortè effusus fuerat in Christi discipulos spiritus sanctus, virtusq; ex alto tributa, vt occulti semper obscuriq; in ciuitate sederent, Christi q; prædicationem & crucem

2. ad Tim.
cap. 1.

Rom. ca. 4.

Epi. 18. 3.

Hebr. ca. 4.

cem erubescerent: ac non potius vt eam constāter
& intrepidè, etiam cum vitæ periculo, prædica-
rent, è qua non ignorarent mundo salutem ac vi-
tam prouenire? Quamobrem & Timotheo suo
scribit Gentium Apostolus: Noli erubescere testi-
monium Domini nostri, neque me vinctum eius,
sed collabora euangelio, sicut bonus miles Chri-
sti. Et aliàs de semetipso confitetur: Non erubesco
euangelium: virtus enim Dei est in salutem omni
credenti. Non erūt (inquit Leo) digni confessio-
ne filij & patris, quibus nunc caro Christi vere-
cundiam facit, probabūntque se nullam de signo
crucis sumpsisse virtutem, qui quod præferendum
frontibus acceperunt, promere labijs erubescunt.
Seruabāt igitur illud omnes, quod Sapiens Ecclē-
siasticus admonuit: Pro anima tua ne confundaris
dicere verum. Est enim confusio adducens pecca-
tum, & est confusio adducens gloriam & gratiam:
Prorsus id agebant omnes vt essent bonus odor
Christo, cuius vbique suauitate diffusa, veram iu-
stitiæ vitam multi conciperent. Quænam autem
esse potuisset Euangelij propagatio, quænam am-
plificatio Christianæ familiæ sequuta fuisset, cun-
ctis inimicitiarum metu, & cura vitæ huius con-
seruandæ, quasi prudenter, vt quorundam opinio
est, tacentibus? Tales fuerint sectariorum ætatis
nostræ patres, quos sese in eadem secum tunc sem-
per habuisse distitāt, cum de suarum Ecclesiarum
antiquitate premuntur. Si enim aliqui semper
(vti affirmant) fuere ipsorum per omnia in cre-
dendo, vel potius non credendo similes, profecto
& tam rari fuerunt, vt cæcus nullos faceret: &
tam illiterati aut meticulosi, vt nihil scriberent: &
tam obliiti denique gloriæ sui redemptoris, vt ni-
hil pro suæ religionis causa loquerentur. Sed hæ-
reticorum sanè per aliquot sæculorum curricula,
providentia fuerint vsi, ne persecutiones pateren-
tur: in quibus patres & maiores nostri sic clare-
runt

runt in eadem nobiscum fide; toto orbe terrarum, vt facile Christi vbique familia, domusque Dei suæ doctrinæ & professione, & defensione, atque admirabili propter eam patientiæ mansuetudinisque virtute notaretur. Facile enim in cōtemptum cælestis doctrina venisset, apud multitudinem præsertim hominum corruptorum, quæ nullos aut frigidos habere visa fuisset assertores. Cito quoque in hanc blasphemiam erupissent impura ora Gentilium, diuinum esse non posse, quod non diuino ac libero spiritu proferatur. Igitur sublata Christianismi professione inter eius inimicos, tollitur diuini nominis sanctificatio, Christi quoque honores: intercipitur atque impeditur hominum æterna salus, Ecclesiæque ædificatio, obscuratur Christi regnum, & Antichristi ac diaboli ciuitas longe lateque diffusa, superbè sola exultat atque efflorescit. Neque tum profectò satis, quamobrem à Prophetis dictum sit, intelligi potest: Mirabilis Deus in sanctis suis, Deus Israel ipse dabit virtutem & fortitudinē plebi suæ, benedictus Deus. Quod si Antiocho persequente lugendus deplorandusque reip. Iudaicæ status videbatur, cum, sicuti scriptum est, neque sabbata custodiebantur, neque dies solemnes patrij seruabantur, neque simpliciter Iudæum se quisquam esse confitebatur, non multo tristius ac turpius erit, post effusam spiritus gratiam, populo Christiano, si furentibus religionis & crucis inimicis dissimulent atque obmutescant omnes, nec se Christianum Catholicum simpliciter quisquam esse confiteatur? Crediderant è Iudæorum principibus Christo prædicante nonnulli, sed ne eijcerentur è synagogis, palam se Christi discipulos esse, præ se ferre ac confiteri verebantur. Quorum ea fuit iusta reprehensio, Euangelij quoque verbis consignata, quod magis amarent gloriam hominum quàm Dei. Cuius adeo præposteræ cupiditatis, ea quoque pernicies fuisse declaratur, vt & à creden-

Psal. 67.

Lib. 2. Mæ.
chab. c. 6.

Iacobi. 1. c.

credendo non paucos deterreret. Quomodo enim (ait Christus) vos potestis credere, qui gloriam ab inuicem accipitis: gloriam verò quæ à solo Deo est, non quæritis? Verus igitur Christianus, cui hoc vnicè propositum est, vt apud Deum gratiam ineat, neque hac vllam quæ sit ei cum homine, amicitiam potiore ducit, quod corde credit, id profiteri quoque oportune suoq; loco ac tempore non dubitat: Christum moribus, Christum voce ac verbis loquitur: neque irrifiones ac linguas sacrilegas moratus, in eius etiam cruce, sine omni rubore gloriatur, neque gloriæ eius quicquam decedere, neq; in proximis labascere fidem sua taciturnitate patietur: Postremò vel interrogatus confitendo, vel negare iussus moriendo, vel non impedita facultate fugiendo Christianum se esse, & prophanis sacris maculari nolle, testabitur.

Non licere Christiano homini aut suam negare fidem, aut profiteri alienam.

CAPVT SECVNDVM.

NVnquam verò aut neganda fides propria est, aut simulanda aliena, vt nos vel Christianos aut Catholicos esse diffiteamur, vel probari nobis hæreticorum placita, verbi factiue significatione monstremus. Sanè quia mendacium omne fugiendum est Christiano, cum nullum sit non contrarium veritati; nam sicut lux & tenebræ, pietas & impietas, iustitia & iniquitas, peccatum & rectè factū, sanitas & imbecillitas, vita & mors; ita sunt inter se veritas mendaciumq; contraria. Ideoq; vt illam amare, ita istud odisse debemus. Sed varij existunt mendaciorum gradus, nec defuere qui propter aliquam, piam præsertim, utilitatem, mentiri licere docerent. Imo quibusdam in rebus, Apostolicis ac sanctis viris (ait quidā) mulieribusque simulare, fingere, mentiri, summæ interdum

*Vide Aug.
cap. 30. li-
bri contra
mendacium.*

*Marcus
Marulus
li. 4. de re-
ligiosè vi-
uendi insti-
tutione.*

terdum pietatis ingentisq; prudentię fuit; contra
 nuq; vt se Cassiani probaret discipulum, sancto- *Vide Cassia-*
 rum monachorum & aliorum turbā inducit, quo- *num colla-*
 mendaciorum pietas probatorum hominum ro- *tiome 17. &*
 boraretur exemplis: Non attendunt isti vitiosum *cap. 15 vs-*
 esse suapte natura mendacium: quod autem eiusa *que ad 20.*
 modi sit, nullo id casu licitum esse: nec verò vllō *et à ca. 21.*
 in genere vitiorum parua probari posse, si magnas *vsq; ad 25*
 damnemus; cauendūque esse ne postquam ada- *Lib. 4. Tuf.*
 miserimus initia, tum progressus consummatione-
 nemq; excludere nequeamus. Rectē in Tusculanis
 Cicero: Tu modum adhibes vitio? & rursus: Qui
 modum vitio quærit, similiter facit, vt si posse pu-
 tet eum, qui se ē Leucade præcipitauerit, sustinere
 se cum velit. Quæq; crescentia perniciofa sunt;
 eadem sunt vitiosa nascentia. Denique qui mo-
 dum (inquit) apponit vitio, is partem suscipit vi-
 tiorum. Quis autem non videat in procliuī esse,
 vt is qui fas esse putet quandoque mentiri, pro-
 pter vtilitatem quæ inde capiatur, idem tum id
 maximè faciendum censeat, cum ex confessione
 fidei, in certum periculum mortis, vita vocetur?
 Ideoque Augustinus affirmat, nonnullos, cum ad
 officium hominis iusti pertinere censerent, quan-
 doque mentiri, eousque progressos esse, vt & pe-
 ierare, & de rebus ad Dei cultum pertinentibus, an
 de ipsa Dei natura falsum aliquid dicere, nonnum- *Eucbir. 18.*
 quam bonum piumq; opus esse contenderent. Sed
 cum omnia damnanda sint, atque omni etiam ca- *cap. 7.*
 su cauenda mendacia, quemadmodum Sapiens
 Ecclesiasticus insinuat, dicens: Noli velle mentiri
 omne mendacium; tum ea præcipuè vitanda sunt,
 quæ perniciofa iure vocantur: propterea quod vel
 Deo iniuriā afferant, vel graue homini conciliene
 nocumentum. Porro iniuriam irrogari Christo
 negatione fidei Christianæ, ex eo perspicitur,
 quod Christū neget, quisquis sese negauerit Chri-
 stianum. Neque enim Petrus, cū adhuc esset in-

firmior, ob aliud Christum negauisse censendus est, quàm quia se negauerit eius esse discipulum. Nisi autem crimé hoc esset Christum negare, non *Math. 10.* diceret in euangelio Christus ipse: Qui me negauerit coram hominibus, negabo & ego eum coram patre meo, qui est in cælis. Quod quantopère exhorruerint sancti Dei homines & inuicti milites Christi, cum alij multi, tum præclarè Gordius Martyr sua & morte & voce declarauit. Suadentibus enim quibusdam, vt lingua negaret fidem, quam corde retineret: Mox ille, Negé ego Deum meum (inquit) in cuius cultu sum æducatus? Nonne cælum, sol & luna lumé mihi clauderét suum? Credam profecto humum quam pedibus tero, mihi ruituram. Nolite errare, Deus nequaquàm irrideri potest. Ex ore nostro nos iudicat, ex nostris, inquã, verbis nos seruat & dānat. Nonne tremendā Domini sententiã audiuiſtis: Qui me negabit corā hominibus, negabo & ego eum corā patre meo qui in cælis est? Cætera apud D. Basiliū. Quibus iungendū est, *vide Ense-*
bii lib. 4. quod Beatus Iustinus ait in primo suæ defensionis
Ecclesiasti. libro, cuiusdā Ptolomæi Christiani constantiã re-
Mist. c. 17. ferēs, in libera suæ religionis cōfessione, insidiosè licet interrogaretur, vt eum perimendi oblata videretur occasio: Tanti (inquit ille) boni conscius, diuinam religionem præ se tulit: & de Christi magisterio ac totius boni institutionibus, publica cōfessione testatus est. Qui enim negat quod est, sine dubio culpabile iudicat esse quod negat. Atque ne hoc quisquam inter gentiles quidē faciendum esse putet, cum de crucis agitur confessione, non inter hæreticos præclarè suo nobis exemplo, fortis & pij Catholici demonstraui officium B. Satorius, procurator domus sæuissimi illius Hunnerici regis Vandalorum. Cui cum præter pollicitationes & minas regias, vt Catholicam abnegaret fidem, etiam vxor diceret: Cognoscit Deus, quia inuitus facturus es hoc, quod fortè voluntariè aliquan-

aliquanti fecerunt. Ille Beati Iob voce respondit: Tanquam vna ex insipientibus mulieribus loqueris. Formidarem mulier, si sola esset huius vitæ amara dulcedo: Si diligeres maritum, nunquam ad secundam mortem proprium attraheres virum. Distrahant filios, separent vxorem, auferant substantiam, mei domini ego securus de promissis verba tenebo. Si quis non dimiserit vxorem, filios, agros, aut domum, meus non poterit esse discipulus. In eo vero cauendo genere mendacii, quo sibi quisque vel alteri perniciosus esse aut famæ detractiōe aut vitæ possit, admirabilis extitit mulier illa septies icta, cuius inuicti animi fortitudo D. Hieronymi litteris commendata est. Ea cum adulterij esset accusata, atque is iuuenis, quo cum adulterium commissum esse dicebatur, volens compendio mortis longos vitare cruciatus, in suum sanguinem mentitus, & in adulterij confessione percussus esset, illa sexu quidē infirmior, sed virtute fortior, neque extensione eculei, neque vitione pedum, neque fodicatione laterum, villōne alio tormento adigi potuit, vnde se fecisse, cuius sibi cōscia non esset, fateretur. Sed ad Christum oratione conuersa, à quo solo suam innocentiam patefieri posse ac defendi credebat: Tu (inquit) testis es Domine Iesu, cui occultum nihil est, qui es scrutator renum & cordis, non ideo me negare velle ne peream, sed ideo mentiri nolle ne peccem. Ac mox iuuenem alloquens, qui sua confessione non sibi modò, verum etiam illi, mortem parauerat: At tu (inquit) miser homo, si interire festinas, cur duos interimis innocentes? Equidem & ipsa cupio mori: cupio inuisum hoc corpus exuere, sed non quasi adultera. Hoc si tam fortiter illa fecit, ne suo mendacio adultera crederetur: quid perpetiendum est Christiano, ne sacrilegam impietatem mentiatur? aut si noluit ipsa sibi mortem vel infamiam consciscere, falsi confessione crimi-

*visor vis-
cēsis lib. 1.
de persecu-
tione Van-
dalica.*

*Hierony-
mus de mu-
liere sep-
ties icta.*

nis, quanto maiore fortitudine enitendum est Christiano, ne Christo iniuriam impio mendacio videatur irrogasse? Hæc semper Martyrum fortitudo fuit, & virtus inuicta, quæ nulla digna laude, nulla remuneranda corona est, si prudentius sibi, fidem propriam ore negando, aut alienam asserendo, cōsulerent. Proinde nec martyria esse vlla, nec edita celebrari in Ecclesia debuerūt, eo quod iustius (secundum istos) sapientiūque facerent Christiani, si persecutoribus suis neque se confessione detegerent, neque illos facerent homicidas, sed mentiendo potius & negando quod sint, & ipsi seruent incolumem carnis integritatem & cordis, & illos conceptum animo scelus implere non sinant. At non ita faciendum esse senserunt Martyres beati. Viderunt enim, tenueruntque quod scriptum est: Os quod mentitur occidit animam; ideoque in integro & incolumi corpore, animæ ruinam, mortemque grauissimam timuerunt: maluerunt animis viuere, vt hinc aliquādo & mortua corpora viuificarentur, quàm viuis corporibus, animarum suarum gestare funera, per quæ ipsa quandoque corpora æternæ morti traderentur. Hic verò præcipuè grauem animæ mortem formidabant, vbi tanta sacrilegæ negationis iniuria, proturbaretur è corde Christus. de quo, propterea quod vita nostra sit, dictum est à Propheta: Spiritus oris nostri Christus Dominus. Nō illud etiam nesciebant quod est in Psalmis: Odisti Domine omnes qui operantur iniquitatem: perdes omnes qui loquuntur mendacium. Subierunt itur humanum odium, vt diuinum euitarent, perditque ab homine non refugerunt ad tempus, ne à Deo in æternum perderentur. Altis inhærebat fixum radicibus illud: Nolite timere eos qui occidunt corpus, animam autem non possunt occidere: sed eum timete qui potest corpus & animam mittere in gehennam. & illud: Horrendum est incidere in ma-

Sap. 1.

Thren. 4.

Psal. 5.

Hebr. 10.

manus Dei viuentis. Idcirco & sic in Apocalypsi Martyres laudati sunt, vt diceretur inuentum non esse ipsorum in ore mendacium. Itaque morte pro nomine Christi & honore cōtemp̃ta, irreprehensibiles abierunt, ubi tentari à mendacibus vltèrius omnino non possint: quia mendaces amplius suis in cœtibus vel alienos, vel proximos non habebunt. Quocirca cum essent Augustini ætate quidam, qui sua post scelera rebaptizari volētes, profiterentur se esse paganos, ille hoc improbans vehementer: Cōsidera (inquit) quæso te, quàm execrabili- ter ab his fiat, vt quos malè viuentes Ecclesiastica disciplina corripimus, persuadeatur eis, vt ad lauachrum alterum veniant: atque vt id accipere mereantur, paganos se esse respōdeant. Quæ vox (inquit) ne procederet de ore Christiano, tantus Martyrum sanguis fusus est. Porro si aut negare verbo suam non licet fidem, aut alienam profiteri: multo erit sceleratius improbare expressè ac damnare quod pietatis est, cōuitiatq; dicere, etiam si quod dicitur animi repugnante sententia, compellente vero metu proferatur. Quo loco B. Polycarpi occurrit egregia virtus: qua, iurare iussus fortunam Cæsaris, conuitiatq; in Christum iacere, respondit: Octoginta & sex annis seruius ei, & nihil me læsit vnquam: quomodo possum maledicere & blasphemare regem meum, qui salutem mihi dedit? Cūmq; bestias diceret proconsul esse paratas, quibus obijceretur, nisi cum celeriter Christianismi pœniteret, dixit: Adhibeantur: nobis enim immobilis stat sententia, nec possumus de bono ad malum per pœnitudinem commutari.

*Consulatus
Eusebii
lib. 4. Ec-
clesiastica
hist. ca. 15.*

*Argumenta quadam partim ex scriptura de Iehu,
partim ex D. Ambrosio petita solvuntur.*

CAPVT TERTIVM.

Q Vid autē nobis Iehu proferunt ad exemplum mentiendi, quod seruum Baal se esse menti-

nis, quanto maiore fortitudine enitendum est Christiano, ne Christo iniuriam impio mendacio videatur irrogasse? Hæc semper Martyrum fortitudo fuit, & virtus inuicta, quæ nulla digna laude, nulla remuneranda corona est, si prudentius sibi, fidem propriam ore negando, aut alienam asserendo, cōsulerent. Proinde nec martyria esse vlla, nec edita celebrari in Ecclesia debuerūt, eo quod iustius (secundum istos) sapientiūque facerent Christiani, si persecutoribus suis neque se confessione detegerent, neque illos facerent homicidas, sed mentiendo potius & negando quod sint, & ipsi seruent incolumem carnis integritatem & cordis, & illos conceptum animo scelus implere non sinant. At non ita faciendum esse senserunt Martyres beati. Viderunt enim, tenueruntq; quod scriptum est: Os quod mentitur occidit animam; ideoque in integro & incolumi corpore, animæ ruinam, mortemq; grauissimam timuerunt: maluerūt animis viuere, vt hinc aliquādo & mortua corpora viuificarentur, quàm viuis corporibus, animarum suarum gestare funera, per quæ ipsa quoque corpora æternæ morti traderentur. Hic verò præcipuè grauem animæ mortem formidabant, vbi tanta sacrilegæ negationis iniuria, proturbaretur è corde Christus. de quo, propterea quod vita nostra sit, dictum est à Propheta: Spiritus oris nostri Christus Dominus. Nō illud etiam nesciebant quod est in Psalmis: Odisti Domine omnes qui operantur iniquitatem: perdes omnes qui loquuntur mendacium. Subierunt igitur humanum odium, vt diuinum euitarent, perditq; ab homine non refugerunt ad tempus, ne à Deo in æternum perderentur. Altis inhærebat fixum radicibus illud: Nolite timere eos qui occidunt corpus, animam autem non possunt occidere: sed eum timete qui potest corpus & animam mittere in gehennam. & illud: Horrendum est incidere in ma-

Sap. 1.

Ibren. 4.

Psalms. 5.

Hebr. 10.

manus Dei viuentis. Idcirco & sic in Apocalypsi
 Martyres laudati sunt, vt diceretur inuentum non *Apoc. 14.*
 esse ipforum in ore mendacium. Itaque morte pro
 nomine Christi & honore cōtempta, irreprehen-
 sibilis abierunt, ubi tentari à mendacibus vltius
 omnino non possint: quia mendaces amplius suis
 in cōtibus vel alienos, vel proximos non habe-
 bunt. Quocirca cum essent Augustini ætate qui-
 dam, qui sua post scelera rebaptizari volētes, pro-
 fiterentur se esse paganos, ille hoc improbens ve-
 hementer: Cōsidera (inquit) quæso te, quàm exe-
 crabiliter ab his fiat, vt quos malè viuentes Eccle-
 siastica disciplina corripimus, persuadeatur eis, vt
 ad lauachrum alterum veniant: atque vt id acci-
 pere mereantur, paganos se esse respōdeant. Quæ *Epist. 169.*
 vox (inquit) ne procederet de ore Christiano, tan-
 tus Martyrum sanguis fusus est. Porro si aut nega-
 re verbo suam non licet fidem, aut alienam profi-
 teri: multo erit sceleratius improbare exprescē ac
 damnare quod pietatis est, cōiunctū dicere, etiam
 si quod dicitur animi repugnante sententia, com-
 pellente vero metu proferatur. Quo loco B. Po-
 lycarpi occurrit egregia virtus: qua, iurare iussus
 fortunam Cæsaris, conuiatq; in Christum iacere,
 respondit: Octoginta & sex annis seruo ei, & nihil
me læsit vnquam: quomodo possum maledicere
 & blasphemare regem meum, qui salutem mihi
 dedit? Cūque bestias diceret proconsul esse pa-
 ratas, quibus obijceretur, nisi eum celeriter Chri-
 stianismi pœniteret, dixit: Adhibeantur nobis
 enim immobilis stat sententia, nec possumus de
 bono ad malum per pœnitudinem commutari.

*Consulatus
 Eusebii
 lib. 4. Ec-
 clesiastica
 hist. ca. 15.*

*Argumenta quadam partim ex scriptura de Iehu,
 partim ex D. Ambrosio petita soluntur.*

CAPVT TERTIVM.

Q Vid autē nobis Iehu proferunt ad exemplum
 mentiendi, quod seruum Baal se esse menti-

4. Reg. 10.

tus sit, vt eius cultores, Prophetas & Sacerdotes occideret? Ait enim ad populū: Coluit pater meus seruos Baal parum: ego autem eum colam amplius. Iussit deinde parari sacrificium impium, & ad cultum sacrilegum publico edicto conuocauit. Nunc (inquit) Prophetas Baal & vniuersos seruos eius, & cunctos sacerdotes ipsius vocate ad me: Nullus sit qui non veniat: Sacrificium enim grande est mihi Baal: quicumq; defuerit, non viuet. Porro (vt sacra narrat historia) Iehu faciebat hoc insidiosē, vt disperderet cultores Baal. Hæc igitur eius insidiosa simulatio, mendaxq; professio, si probāda erit, iustius multo serui Christi, tempore persecutionis, seruos dæmonum se velle esse simulabunt, cum sit grauius à seruis dæmonum Christi seruos occidi, quā insidijs cultores dæmonum circumuentos interire. Interfici enim isti iure potuerunt, sicuti & impium ē medio tolli cultum oportuit. At illorum interemptio præter grauē admodum oppressiōem innocētiae, grauissimā & impijssimā habet eius cui seruiunt iniuriā, eo quod Christum persequi censendi sunt, qui eius membra persequuntur. Quid enim ob aliud dictum existimabimus Saulo in Christi discipulos sæuiēti: Saule, Saule, quid me persequeris? Cum igitur sceleris & impietatis plena sit piorum oppressio, iusta autem esse possit impiorum: nōne iustius fuerit impium simulasse cultum, ne pij & Dei serui trucidentur, quā vt impiorum noxia turba deleatur? Iustius erit sane, si fas vnquam erit ad eum modum impio mendacio alienum præ se ferre furorem. Sed hoc vt licere videatur propter Iehu commemoratum exemplum, tot sanctorum celebrata martyria non sinunt, etiam si qualis ille Iehu fuisset, diuina omnino scriptura tacuisset. Nunc verò cum scriptum sit, eum non habuisse correctum cum Deo, sed adhuc vitulos Ieroboam coluisse: quid mirum est, si homo ad-

adhuc impius, impiam & sacrilegam simulationem non vitauit? Et eius quidem non nego zelum aduersus impios esse remuneratum. Sed quid ei profuit (inquit Augustinus) quod pro nonnulla obedientia, quam de domo Achab omnino delenda, pro cupiditate suae dominationis exhibuit, aliquantam mercedem transitoriam regni temporalis accepit? Sed ut fuisset eius aduersus impietatem zelus rectus, sinceræque obediendi, hac saltem ex parte, voluntas, non esset tamen consequens, ut omne id probandum esset, quod ad implendæ diuinæ huius voluntatis modum excogitauisset. Nam & obstetricum illarum, quibus in Ægypto sunt usæ Israeliticæ puerperæ, studium humanissimum natos conseruandi, iure laudatum est, ac domorum seu familiarum ædificatione donatum: nec probari tamen earum mendacium potuit, quo ad crudelitatis euitationem consulendum putauerunt. Num & furtum laudabimus eius, qui subtrahat locupleti quod egeno largiatur, quoniam eius laudanda est erga pauperem misericordia? Frequens est ut affectu aut zelo non malo quippiam peragatur non bene: cum vel imprudentia se, vel temeritas, vel ignorantia miscuerit. Itaque si & Vercellensis Eusebius hac in parte deliquisset, cum sese Arianæ perfidiæ dixit consentire, ut habet sermo inter Ambrosianos septuagesimus, quo Dionysium Martyrem Arianorum fraudibus ad impiam subscriptionem pertractum liberaret. Dixit enim, si quid memorato sermoni tribuendum est, hoc quidem sibi placere, quod illis, sed quod sibi filium Dionysium in subscribendo præposuerint, grauiter se moueri: Vos enim (inquit) qui dicitis filium Dei patri Deo æqualem esse non posse, cur mihi filium prætulistis? Qua illi ratione permoti, statim sancti Dionysii chirographum deleuerunt, priorem subscribendi locum Beato Eusebio deferentes, Quos ille

*Eusebij
Vercellen-
sis meminit
historia tri-
partita lib.
6. cap. 23.*

increpans & irridens, ait: Neque ergo me vestris
 sceleribus polluo, neque filium meum vobiscum
 participare permitto. Si igitur (quemadmodum
 illius sermonis verba præ se ferunt) eiusmodi bre-
 uissima simulatione ac dolo mentiendi, beatus ille
 vir vsus est, intentione sincerissima, neque solus
 ipse, neque primus est in numero etiam hominum
 optimorum, qui maculæ quippiam per impru-
 dentiam aut simplicitatem benefacere nitendo
 contraxerit. Quis enim neget Petrum Aposto-
 lum optima intentione fecisse, quod cum B. Pau-
 lus Antiochiæ fecisse commemorat? Prius enim
 (inquit) quàm venirent quidam à Iacobo, cum
 gentibus edebat: cum autem venissent, subtrahe-
 bat & segregabat se, timens eos qui ex circumci-
 sione erant. Et simulationi eius (inquit) consen-
 serunt cæteri Iudæi, ita ut & Barnabas duceretur
 ab ijs in illam simulationem. Ergo Beatus Petrus
 dum effugere nititur Iudæorum offendiculum,
 qui nefas adhuc esse censebant Iudæo cum genti-
 bus habere cōsuetudinem, neque posse Gentilem
 ad spem salutis admitti, nisi suscepto legis Mosai-
 cæ iugo: hos (inquam) cum veretur offendere,
 imprudens Gentibus, inter quas versabatur, scan-
 dalum parat: dum eas exemplo facti iudaizare co-
 git, opinionemque confirmat iudaizantium, non
 posse Gentiles per Christum salutem consequi,
 nisi Christianæ professioni legalis observatio mis-
 ceretur. Hinc igitur illi ab Gentium Apostolo in
 faciē resistitur. Quoniam (inquit) reprehensibilis
 erat. An fortè & ipsa reprehensio, non vera, sed fi-
 cta & simulata fuit? Sed falsa esse scriptura non po-
 test, quæ dicit: Quoniam reprehensibilis erat. Nec
 verò propterea Petrum corripuit Paulus, quod
 paternas traditiones observaret, quas adhuc Iu-
 da is inter Iudæos observare licebat: donec iam
 mortuæ Christianis, tâquam ad sepulchrum etiam
 cum honore perductæ fuissent: sed quoniâ gentes
 cogebar

cogebat iudaizare, quod nullo modo posset (inquit Aug.) nisi ea sic ageret, tanquam adhuc etiam post Domini aduentum necessaria saluti foret. Cum igitur & Petri Apostolorum principis lapsum eiusmodi teneamus iure à Paulo reprehensum, nihil erit mirum, si se quoque Eusebius rectè simulaturum putaverit Arianismum, quo suum filium Dionysium lucrifaceret, præsertim cum non esset diu simulandi propositum, ~~sed mox sese cum eorum confusione detegendi.~~ Sanè (iuxta illius quidem historiæ fidem) si credidisset Beatus Eusebius negare suam licere sibi fidem, ad effugienda tormenta tyrannicæ crudelitatis, non hæc omnia tanta fortitudine pertulisset. Sic enim scriptum est in illo sermone: Dicitur inter cætera passionis genera, hoc pœnale passionis supplicium pertulisse, ut dum interrogaretur ab Arianis, & se eorum communicare perfidiæ denegasset, ~~scalarum proclivi tractu, supinis pedibus ad imum usque pertraheretur: & iterum reuocatus ad summum, interrogatus denuò cum eadem respondisset, eadem pateretur: ac sic frequentem interrogationem, frequenter eiusmodi supplicium fuerit subsequutum.~~ In qua passione sancti Eusebij Martyris, licet fuerit ~~quassarum caput, elisum corpus, membra contracta, animus ramen fidei mansit inuictus:~~ Nam quanto plus illum Ariana perfidia corporaliter lacerabat, tanto magis eum Catholica integritas corporaliter refouebat. Hæc ille adscriptus Ambrosio sermo, cum sit Maximi. In quo apud Maximum integro, ista quæ protuli non reperiuntur. Sed quoniam quisquis ille est narrationis huius author, scripturam profert, qua simulationem Eusebij probet, breuiter id quoque expediendum est. Ait sanctus Paulus, inquit: Factus sum Iudæis tanquam Iudæus, ut Iudæos lucrifacerem. Ita Eusebius hæreticis hæreticum se esse mentitus est, ut de hæresi filium liberaret. Sic

Aug. epist.
3.9. 19

1. Cor. 9.

*Epist. præ-
cipue 19.*

nempe interpretatur Paulum Iudæis factum esse Iudæum, vt mendaci sit vsus simulatione erroris iudaizantium. Quam interpretationem refellit B. Augustinus, verumq; & genuinum Apostoli sensum eruditè persequitur. Quo loco inter cætera: Omnia (inquit) omnibus factus est Paulus, vt omnes lucrifaceret, non mentientis astu, sed compati-
tientis affectu, id est, non omnia mala hominum fallaciter agendo, sed aliorum omnium malis omnibus, tanquam si sua essent, misericordis medicinæ diligentiam procurando. & infra: Iudæis tanquam Iudæus fiebat, quando eos ab illo errore, quo vel in Christum credere nolebant, vel per vetera sacerdotia sua, cæremoniarumque obseruationes, se à peccatis posse mundari, fieriq; saluos existimabant, liberabat. Et rectè quidem ad hunc modum Augustinus. Nam & ijs qui sine lege erāt, se factum affirmat tanquam sine lege esset: Num igitur falsorum deorum se mentitus est esse cultorem? num aut Deum verum negauit mendaciter, aut ad impura sacrificia, Gentium more, properauit? Prorsus igitur & illis factus est, tanquam eodem ipse esset infelicitissimæ cæcitatibus loco, congruēs illis per misericordem compassionem, non per versipellem simulationem: sicuti fit sanus ægroto, tanquam ipse esset ægrotus: & pauperi diues, tanquam eadem ipse ægestate premeretur: Dum ille quidem ægroto sic compatitur, vt hoc impèdat humanitatis officium, quod sibi, si ægrota-
ret, impendi vellet: & hic tanquam si paupertatis ipse pondere grauaretur, ita pauperē benignæ liberalitatis solatio leuat. Sensem eundem Apostolicæ lectionis & ille commentarius expressit, qui D. Ambrosio inscribitur: Non videtur (inquit) quasi simulasse, vt omnibus fieret omnia, quod solent adulatores facere: sed non ita est. Vir enim diuinus & medicus spiritalis, sciens omnium causas & vulnera, magna industria confouet illos &
compa-

compatitur. Sic & D. Chrysostomus cum ipsum in locum est commentatus: Non simulauit (inquit) neque enim lucrum quæfisset eorum qui salui facti sunt, si simulasset: perditionem hypocrita quærit, & vt accipiat, simulat, non vt det quicquam. Paulus autem non ita, sed tanquam medicus, tanquam magister, tanquam pater: medicus laboranti, magister discipulo, pater filio ad correctionem consentit, non ad damnum, ita & ipse. ~~Et~~ hic quidem Chrysostomus in fine libri primi de sacerdotio, Paulum ait ~~fraude~~ quadam, sed vtili, submisisse se quandoque legi, eiusque consilij ratione multas Iudæorum myriades ad se allectauiffe. Nempe docet ille non omne genus fraudis fugiendum esse, sed existere quoddam, quo & in bello aduersus hostes, & in pace erga amicos vti liceat: Huius (inquit) fraudis magna vis est, modo ne fraudulentò animo fiat. Sed ipsam (inquit) tum ne fraudē quidem nominandam putauerim: verum œconomiam quandam potius, ac sapientiam, artemq̃, quæ possis è medijs, iisq̃ue imperuijs, desperatarum rerum angustijs, difficultatibusq̃, correctis emendatisq̃ animi vitijs, euadere. Eiusmodi fraudibus vtī declarat & medicos, cum ægros contigerit adduci non posse, vt præscripta & necessaria remedia sumant. Hoc igitur genere fraudis, à quo procul est astus mentiendi, haud grauatim admitto Beatum Apostolum vsum esse: qui cū legis vinculis per Christum esset expeditus, atque id de se certissimè sciret, tamen prudentissimo consilio inter Iudæos legis decreta seruauit, non seruare se finxit, ne non seruatiō legis offensio, Iudæorum animos ab euangelio, quod prædicabat, cogeret resilire. Sed moueant non iniuria quempiam, quæ D. Ambrosius libro de pœnitentia primo differuit: Diximus (ait) quid scriptum sit, colligamus sententiam. Omnis (inquit) qui me confessus fuerit, id est, ex quacunque vita, ex quocūque statu, qui me confessus fuerit, ha-

rit, habebit remuneratorem me confessionis suæ: Cum dicitur, omnis, nullus à remuneratione, qui fuerit confessus, excluditur. Non similiter omnis qui negauerit negabitur. potest enim fieri, vt aliquis victus supplicijs, sermone neget, corde adoret. Hæc imprimis verba nihil eorum causam adiuvant, qui tormenta non expectant, vt post victi & fatigati negent, sed vltronea negatione præueniunt, vt euitent. Non eos excusat Ambrosius, qui negandi meditantur disciplinam: sed eos quorum tormentis cecidit infirmitas, cum stare in confessione fortes decreuissent. Deinde neque hos sic excusat vt culpam tollat, sed vt minuat, ne, quemadmodum adiunxit, eadem causa putetur eius qui sponte neget, & eius quem tormēta inclinauerint ad sacrilegium, non voluntas. Nam sæpe (inquit) in hoc athletarum sæculari certamine etiam victos, quorum fuerint certamina probata, vulgus hominum cum victoribus coronare consuevit: maximè quos viderit aut fortè dolo, aut fraude excisos victoria. Christus ergo athletas suos, quos viderit grauibz paulisper cecidisse supplicijs, sine venia patietur manere? Nunquid non habebit remunerationē laboris, qui etiā quos proijcit, nō in æternū proijcit? Audis hic veniæ cōmemorationem, cui nullus esse potest locus, nisi culpa præcesserit. Ac ne parua & leuem, & quasi vnā de quotidianis culpam putes, vel in tormētis negasse, dicit eiusdē libri de pœnitētia ca. 10. hūc qui sic negauerit, semiuiuum relictum esse, tanquam ex vulnere grauissimo: ad eius similitudinem qui incidit in latrones, sed in eo tamen vitale adhuc aliquid fidem spirare: Qui (inquit) Deum penitus ex suo corde abijcit, ille mortuus est: qui ergo non penitus abijcit, sed per impressionem tormentorum, ad tempus negauit, semiuiuus est. Disputat autem hæc contra Nouatianos Ambrosius, qui lapsis omnibus in persequutione subtrahebāt pœnitentiæ me-

tiæ medicinam : & in animas inusitata crudelitate sæuientes , eos quoque qui ex infirmitate cecidissent , sine spe pacis & reconciliationis , desertos esse patiebantur . cumq; illud quod scriptum est : Qui negauerit me coram hominibus , negabo & ego eum corā patre meo ; ad suæ crudelitatis comprobationem proferre solerent : negat Ambrosius *Vide ca. 2. in fine lib. primi de penitentia.* de negantibus , vt de confitentibus , dictum eodem prorsus modo . Nam de confitentibus quidem latissimè patere sententiam , quæ omnes expressè complectatur : de negantibus verò , non dictū esse : Omnis qui negauerit ; sed , Qui negauerit ; non quia nō iure negari possit , quisquis negauerit : sed quod nonnulli essent negatores venia digni , qui fidem Christianam corde retinentes , hāc per impressionem tormentorum , tristes atque inuiti negassent . de quibus & cap. 4. sic loquitur : Sicut dixit Iudeis , Populus hic labijs me honorat , cor autem eorum longè est à me ; fortassè & de quibusdam lapsis dicat : Isti labijs me negarunt , sed corde mecum sunt , vicit eos pœna , nō auertit perfidia : Sine causa autem his aliqui veniā negant , quorū fidem eoque confectatus persecutor est , vt eam studeret expugnare tormentis : Negarunt semel , sed quotidie confitentur : negarunt sermone , sed confitentur gemitibus : nōne ita istud est , ac si quis captiuum victæ vrbs populum abducat ? Captiuus abducitur , sed inuitus , qui in alienas terras necessitate contendat , intimo non migret affectu : patriam secum animo vehat : querat copiam quemadmodum reuertatur . Quid ergo ? cum reuertitur , num est aliquis qui persuadeat eum non recipiendum ? minore honore , sed studio propensiore , ne habeat in quo insultet aduersarius . Similem habet D. Cyprianus de istiusmodi lapsis sententiam , qui per *Lib. 3. Epist. 23.* tormenta superantur : Quantum (inquit) ad animi mei sententiam pertinet , puto his indulgentiam Domini non defuturam , quos constat stetisse in acie,

acie, nomen Domini confessos esse; violentiam magistratuum & populi furentis incursum, immobilis fidei obstinatione vicisse: passos esse carcerē, diu inter minas proconsulis, & fremitum populi circumstantis, tormentis laniantibus, ac longa iteratione cruciantibus repugnasse: vt quod in nouissima infirmitate carnis subactum videtur, meritorum præcedentium defensione releuetur, & sic satis talibus gloriam perdidisse, non tamen debere noseis & veniæ locum claudere: quibus existimamus ad deprecandam clementiam Domini posse sufficere, quod triennio iugiter ac dolenter, vt scribitis, cum summa pœnitentiæ lamentatione planxerunt.

Nefas esse per fictam venerationis simulationem, infidelium sacris interesse.

CAPVT QVARTVM.

Porro si nefas est aut veram verbo negare, aut falsam & alienam laudando præ se ferre fidem, neque id profecto licebit, prophanis infidelium sacris interesse, seu sacrilega sese cum ijs communione coniungere. Quid enim interest, verbone ac voce clara idolum te venerari dicas? an id sacrificando, aut venerabundo alioqui gestu & motu corporis, apertissimè præ te feras? Aut minus sese hæreticum facto loquitur, qui hæreticorum frequentat cœnas sacrilegas, quàm is qui illas probari sibi verbo fateatur? Gentilium igitur ea fuerit philosophorum præclara constantia, qui cum simulachra deos non esse viderent, neque ijs sacrificari probarent magnopere, puriusq; fateatur coli deos sine simulachris quàm cum simulachris: tamen popularem insaniam in sacrificiis ludisq; obscœnis sequebatur, & à promiscua multitudine permultum opinione discreti, publicis nephandorum sacrorum ritibus miscebantur. Ipsos quoque dæmones, quos consideratis eorum vitijs,

Vide Aug. lib. 8. de ciuitate Dei cap. 4. & initio lib. de vera religione.

vitijis, deos esse persuadere sibi non poterant, non indignos tamen re ipsa diuinis testificabantur honoribus, ne offenderent populos (inquit Aug.) à lib. 8. de ciuitate. ca. 22. quibus ijs cernebant inueterata superstitione per tot sacra & templa serui. Sint hæc igitur eorum qui sine Deo & sine vera sapientia quondam philosophati sunt. At Christiani veri, contra proprium iudicium nunquā istiusmodi facienda putauerunt, propter populorum furorem, quos excitare aduersum seipsum vererentur. Quin potius ea palam coarguerunt, citiusque subeundam mortem, quā tale quicquam designaretur, non modo verbis verissimè docuerūt, verū etiam factis fortibus præclare testati sunt. Eorum vox est in Psalmo: Si oblitus sumus nomē Dei nostri, & si expādimus manus nostras ad Deū alienum: Nōne Deus requireret ista? Quoniā propter te mortificamur tota die: estimati sumus sicut oues occisionis. Ea q̃ fuit olim Ecclesiastica disciplinæ seueritas, vt qui vel metu tormentorum ac mortis sacrificassent, aut idola quoquo modo venerati essent, grauē subire poenitentiam cogerentur. At non defuere tamen Christiani nominis scriptores, qui & Ciceronem, si superis placet, hac in parte purgarent: dum eum niterentur etiam in cælo collocare: neque absurdum censerent, si eum beatam existimarent inter superos vitam agere. Quid nī? cū adeo præclara & rara videatur instructus fuisse cognitione diuinitatis? At idolis immolauit? verū id non ex suo iudicio fecit, sed ex consuetudine publica: quæ quoniam erat legibus confirmata, non poterat conuelli. Nam esse ficta quæ de dijs ferebantur, vel ex Ennij sacra historia poterat cognoscere. Egregia verò & digna Christiano homine defensio hæc est: Etiamne scribi ista ab eo qui sacras litteras profiteretur, sine rubore potuisse? Quasi videlicet scriptum non sit, Sacrificans dijs eradicabitur, præterquā Domino soli. Et quæ

Consulatur Auci-
rani concilij canones
vsq; ad decimum: Niceni. 11.
Erasmus in ea præfatione
qua præfixa est Questionibus
Tusculanis apud Ciceronem.

quæ immolant gentes, dæmonijs immolant: No-
 lo autem vos socios fieri dæmoniorum. Gratiam
 ille quidem & robur spiritus non acceperat, ne-
 que virtute fuerat indutus ex alto, vt posset etiam
 contempta morte, tantorum populorum tam ob-
 firmatæ consuetudini reluctari. Nondum ijs tem-
 poribus fulserat euangelij lux, qua multo post frui
 licuit Christianis. Sed non quia Christiani crimen
 est multo grauius, idcirco illius nullum fuit: Qui
 si verū, vt ille putat, Deum nō ignorauit, mirū est
 pro eius gloria non eū existimasse faciēdum, quod
 pro humana & sua facere non dubitauit, facien-
 dumq; suis etiam litteris indicauit. Ait enim in
 oratione pro Archia Poeta: Nisi multorum præ-
 ceptis, multisque litteris mihi ab adolescētia per-
 suasisset, nihil esse in vita magnopere expetēdum
 nisi laudem atque honestatem, in ea autem perse-
 quenda omnes cruciatus corporis, omnia pericula
 mortis atque exilij parui esse dicenda, nunquam
 me pro salute vestra in tot ac tantas dimicationes,
 atque in hos profligatorum hominum quotidia-
 nos impetus obiecissem. Verū hoc omisso, eiūs-
 que multis similibus, quos non modo non excu-
 sat diuinitatis cognitio, verū etiā accusat grauius:
 Quia cum Deum cognouissēt (inquit Apostolus)
 non sicut Deum glorificauerunt, aut gratias ege-
 runt: sed euanuerunt in cogitationibus suis, &
 obscuratum est insipiens cor eorū: dicentes enim
 se esse sapientes, stulti facti sunt: & mutauerūt glo-
 riam incorruptibilis Dei, in similitudinē imaginis
 corruptibilis hominis, & volucrum, & quadrupe-
 dum, & serpentium, & coluerūt, & seruierunt po-
 tius creaturæ quàm creatori. His igitur omis-
 sis, Christianum certè excusare nemo potest, si is fide
 animo retenta, cultus impij ritū simulauerit: neq;
 abs re Caietanus docuit cēsuras etiam Ecclesiās-
 ticas eum incurrisse, qui actū exteriorem infideli-
 tatis sine interiori peregerit. Quod si licuisset ali-
 quan-

Rom. c. 1.

In 2. 2.
quæst. 94.
art. 1.

quando, non comprehensio, nō interrogatio, non tormenta expectari debuissent: sed oborto persecutionis metu, vltro properare ad delubra deorū & sacrificia, magnæ prudentiæ fuisset. Atqui hoc ipsum D. Cyprianus vrget vehemēter ad exaggerationem criminis eorum Christianorū, qui fuerant in persecutione lapsi. Non expectauerunt saltem (inquit) vt interrogati negarent, vt thus accenderent apprehensi: ante ~~aciem multi victi~~, sine congressione prostrati, nec hoc sibi reliquerunt, vt sacrificare idolis viderentur inuiti: vltro ad forum currere: ad mortem sponte properare: quasi hoc olim cuperēt: quasi amplecterentur occasionem datam, quam semper optassent. Quot illic à magistratibus vespera vrgēte dilati sunt? quot ne differretur interitus, etiam rogauerunt? Quam vim potest talis obtendere qua crimen suum purget? cum vim magis ipse fecerit vt periret? Nonne quando ad capitolum sponte ventum est, quando vltro ad obsequium diri facinoris accessum est, labauit gressus, caligauit aspectus, tremuerūt viscera, brachia ~~conciderunt~~? non sensus obstupuit, sermo hæsit, lingua defecit? Stare illic potuit Dei seruus, & loqui, & renūciare Christo, qui iam diabolo renunciauerat & sæculo? Et diui quidem Cypriani hæc oratio, tamen si magnitudinem criminis eorum ostendit, qui nullo adhuc cōpellente, quasi phas esset, ad impium cultum accesserunt, fide nihilominus in cordis penetralibus inclusa: tamen generatim in eo delicti grauissimi rationem declarat esse sitā, quod renūciatur Christo, & cum diabolo rursus initur societas, cui antea renūciatum fuerat & sæculo. Quæ ratio criminis nec eos esse finit inculpatos, qui vel territi minis, vel fracti tormentis, corde licet ac animo repugnante, nefandis sacrificijs communicarunt, id est, adorare se & colere deos falsos, gētilitatis imitatione, simularunt. Vt igitur B. Petrus, cū verbo negasset Christum,

C

postea

Lib. 6. Tri-
par. hist. ca.
30.

Epist. 2.

postea fleuit amarè, animum licet à Christo nun-
quā gessisset auersum. Ita & B. Marcellus, vt alios
multos taceā, grauē de semetipso pœnitentiā, quod
vel inuitus thurificasset, exegit: & Castus atq; Æ-
mylius, (quorum D. Cyprianus meminit) in prima
congressione deuicti, per pœnitentiæ dolorem,
secundo in prælio victores euaserunt, vt fortiores
ignibus fierēt, qui ignibus antè cessissent, & vnde
superati prius essent, inde iam superarent. Quid?
quod ij quoque factum suum abolendum publica
pœnitentia putauerunt, qui decepti, & nullius sibi
culpæ cōscij, id simpliciter commiserunt, quod ad
cultum prophanum pertinebat? velut cum Iuliani
iussu milites, Romano more, donatiuū accepturi
ab Imperatore, thus in aram iuxta eum collocatam
imponerent, quidam occasione legis & antiquita-
tis, ne mente quidem perceperunt quod commi-
sere peccatum: & iidem tamen post, inter cibos &
pocula Christum inuocantes, admoniti quod eum
frustra inuocarēt, quē paulò antè, immisso in ignē
thure, negauissent, mox in publicum exilierunt,
cœperuntq; se proclamare Christianos, & igno-
ratiā facti lapsos, solamq; si id dici possit, manum
esse paganam, conscientia verò nihil simul egisse:
Quin & aurum quod acceperant, ante principem
proiecerunt, rogantes vt reciperet quod dedisset.
Sed quę nefaria fuit inter gētiles simulatio, eā inter
hereticos & schismaticos nihil est fortassè criminis
habitura? Imò verò etsi non erit par impietas, vna
tamē eademq; criminis est ratio. Cur sit idolo sa-
cificasse crimen, & schismaticas atque sacrilegas
cœnas non sit crimen adiisse? Illic apertè & sine
fuo Regi Christo renunciatur, hic sub Christi
professione, Christus deseritur & negatur, dum ab
eius corpore per schismaticæ professionis com-
munionem receditur. Scriptum est à Iohanne: Si
quis venit ad vos, & hanc doctrinam non affert,
nolite recipere in domum: nec Aue ei dixeritis.
Qui

Qui enim dicit illi Aue, communicat operibus eius malignis. Hoc si verissime dictum est, qui fieri potest vt nō communicet operibus malignis hæreticorum & schismaticorum, qui in eo ipso sese illis adiungit socium, quo ab ecclesiæ corpore, & idcirco à Christo capite, disiunguntur? Admonet etiā Paulus, & dicit: Vt filij lucis ambulate. Fructus enim lucis est in omni bonitate, & iustitia, & veritate: probātes quid sit beneplacitum Deo: & nolite communicare operibus infructuosis tenebrarum, magis autem redarguite. Si non licet igitur cum furibus, cum scortatoribus, cum ebriosis iungi societate in eo ipso in quo perditē agunt, meritoque talis peccator Psalmistæ voce increpatur: Tu verò odisti disciplinam, & proiecisti sermones meos retrorsum. Si videbas furem, currebas cum eo, & cum adulteris portionem tuam ponebas; multo minus liceat iungi schismaticis, in ijs præfertim, quæ propria schismatis esse noscuntur. An illa erunt opera tenebrarum, quæ terrena aliqua cupiditate patrantur: hæc quæ Christi familiæ & veritatis odiū excogitat, opera tenebrarum non erunt? Loquitur idem Apostolus alio in loco, & dicit: Nolite iugum ducere cum infidelibus: Quæ enim participatio iustitiæ cum iniquitate? aut quæ societas luci ad tenebras? quæ autē conuēctio Christi ad Belial? quæ pars fidei cū infidei? quis autem consensus templo Dei cum idolis? vos enim estis templum Dei viui, sicut dicit Dominus: Quoniam inhabitabo in illis, & inambulabo inter eos, & ero illorum Deus, & ipsi erunt mihi populus: propter quod exite de medio illorum & separamini, dicit Dominus, & immūdam ne tetigeritis, & ego recipiam vos. Si igitur tenebræ sunt non solum impia execramenta gentiliū, verūm etiā prophana conuenticula hæreticorū & schismaticorū: Si iniquitatis eadem plena sunt, & si à Belial duce ac principe gubernantur: fieri non potest vt illis Christia-

Ephes. 5.

Psalm. 49.

nus Catholicus misceatur, nisi & lucem cum tenebris, & iustitiam cum iniquitate, & Christum cum suo, coniuratissimo hoste, societate iungi posse putemus. Denique quando Core & Dathan & Abiron, contra Aaron sacrificandi sibi licentiam vëdicarunt, per Moysen præcepit Dominus, vt ab eis populus separaretur, ne facinorosis coniunctus, eodem & ipse perstringeretur facinore.

Numer. 16 Separamini (inquit) à tabernaculis hominū istorum durissimorum, & nolite tangere ex omnibus quæ ipsorum sunt, ne simul pereatis in peccato eorum. Hoc Dauid Propheta considerans, atque in semetipso officium & affectum pij fidelis exprimens, dicit: Odiui Ecclesiam malignantium, & cum iniqua gerentibus non introibo. Qui & alio loco pronunciat, malle se abiectum esse in domo Domini, quàm habitare in tabernaculis peccatorum: vbi videlicet communione sacrilega maculari necesse sit. Dixerit hic fortassè quispiam sat esse, si quis animo & affectu separetur: neque id probet, aut consentiat in id, quod contra Ecclesiam fieri non ignoret. Scilicet quia de consensu dubitari potest, vbi operis voluntaria communicatio cernitur. Etenim si voluntarium est, nec graui culpa vacat, quod vel inuitus quispiam, & adactus supplicij comminatione, vel Christum negat, vel idolo sacrificat: non potest à crimine voluntas aliena videri eius, qui se se vltro ingerat in schismatis communionem, etiam si secessionem improbet: ac quod foris contra Ecclesiam agitur, id fieri Catholico ritu in Ecclesia censeat oportere. Sunt autem quos allicit ipsa nouitas, vel impellit admiratio popularis, vt se hæreticorum cœtibus inserant, velut sermonis audiendi gratia. Quæ & ipsa est nefaria communio, & periculi plena curiositas. Vnde cum Eunomius, vir callidus, & dicendi peritus, virus suum publicis concionibus spargeret: multique

tique (vt fit) audiendi eius gratia confluerent, alij hominem experiri volentes, alij quid diceret audire; atque hac fama excitus quoque Theodosius, adire eundem Eunomium, eiusque auditor esse vellet: prudentissima eius coniux Placilla, cum retinuit. Nimirum quia & concursus, praefertim principum, erroris ministro authoritatem conciliat, atque non mediocriter attollit animos: & quia nouitius error plausibili sermone propinatus, non instructissimam mentem aut capit, aut perturbat facillime. Neque de nihilo ab Apostolo Gentium non vulgaris modo quispiam è plebe, verum etiam Episcopus ipse Timotheus, istiusmodi verbis admonitus sit: Prophana & vaniloquia deuita. Multum enim proficiunt ad impietatem, & sermo eorum, vt cancer serpit. Horum igitur cum haereticis & schismaticis istiusmodi communicatio, & participatio sacrilegae secessionis, licet insidiosam & fallacem non habeat simulationem, vt tales videri velint, ideoque minus habeat culpae: crimine tamen grauicarere non potest. Est etiam notandum, quod ait D. August. aliam esse causam eorum, qui in haereticos & schismaticos imprudenter incurrunt, ipsam esse Christi Ecclesiam existimantes: aliam eorum qui nouerunt non esse Catholicam, nisi eam, quae (sicut promissa est) toto terrarum orbe diffunditur: & cum hoc nouerint, eligunt, extra communionem unitatis corporis Christi, accipere baptismum Christi, ad eandem communionem, cum eo quod alibi acceperint, postea migraturi: Scientes enim (inquit) habituri sunt aduersus Ecclesiam baptismum Christi, vel eo ipso die, quo accipiunt. Quod si sceleratum est, quis est qui dicat: Permittatur mihi vno die scelus admittere? Si enim transiturus est ad Catholicam: quaero causam. Quid aliud respondurus est, nisi quia malum est esse in parte Donati, & non esse in Catholica unitate? Hoc igitur ma-

*Epiſt. 2. ad
Tim. cap. 2.*

*Aug. lib. 1.
contra Do-
natistas
ca. 4. & 5.*

lum quot diebus seceris, tot dierum malum facturus es : & dici potest maius malum fieri plurium dierum, minus autem paucorum : nullum autem malum fieri, dici non potest. Quid autem opus est hoc tam execrabile malum, vel vno die, vel vna hora committere? hoc enim qui sibi concedi vult, potest ab Ecclesia, vel ab ipso Deo petere, vt sibi vel vno die apostatare concedat. Nam cur vnus dici esse apostata timeat, & vnus dici esse schismaticus, hæreticusue non timeat: nulla causa est. Illi verò qui per ignorantiam ibi baptizantur, arbitantes ipsam esse Ecclesiam Christi, in istorum quidem comparatione minus peccant, sacrilegio tamen schismatis vulnerantur, non ideo non grauius, quod alij grauius. Hæc Augustinus. Et quo plenius perspiciatur, cur tantum in eo sceleris constituat, quod apud schismaticos atque in ipsa diuisione suscipiatur baptismi sacramentum (idem autem iudiciū est, si quis ceteris eorū sacris intersit, etiā si Catholico ritu peragantur,) adiungenda est D. Cypriani de scelere schismaticorum oratio, quam habet in eo libello, quem scripsit de simplicitate prælatorū: Vitate (inquit) quæso, vos eiusmodi homines, & à latere atque auribus vestra pernicioſa colloquia, velut contagium mortis arcete, sicut scriptū est: Sepi aures tuas spinis, & noli audire linguam nequam. Et iterum: Corruptunt ingenia bona, confabulationes pessimæ. Docet Dominus, & admonet à talibus recedendum: Cæci sunt (inquit) duces cæcorum. Cæcus autem cæcū ducens, simul in foueam cadent. Auersandus est talis, atque fugiendus, quisquis fuerit ab Ecclesia separatus. Peruersus est huiusmodi, & peccat, & est à semetipso dāmnatus. An esse sibi cū Christo videtur, qui aduersus sacerdotes Christi facit? qui se à cleri eius & plebis societate secernit? Arma ille contra Ecclesiam portat, cōtra Dei dispositionem repugnat; hostis altaris aduersus sacrificiū Christi re-

ſi rebellis, pro fide perfidus, pro religione ſacri-
 legus, inobſequens ſeruus, filius impius, frater ini-
 micus, contemptis episcopis, & Dei ſacerdotibus
 derelictis, conſtituere audet aliud altare, precem
 alteram illicitis vocibus facere, Dominicę hoſtię
 veritatē per falſa ſacrificia profanare: nec digna-
 tur ſcire, quoniam qui contra Dei ordinationem
 nititur, ob temeritatis audaciam, diuina animad-
 uerſione punitur. Sic Chore, & Dathā, & Abiron,
 qui ſibi contra Moysen & Aaron ſacerdotem ſa-
 crificandi licentiam vindicare conati ſunt, pœnas
 ſtatim pro ſuis conatibus pepēderunt. Terra com-
 pagibus ruptis in profundum ſinum patuit, ſtates
 atque viuentes recedentis ſoli hiatus abſorbuit.
 Nec tantū eos qui auctores fuerant, Dei indignan-
 tis ira percussit: ſed & cæteros ducētos quinquā-
 ginta participes eiufdem furoris & comites, qui
 coagulati cum ijsdem ſimul ad audaciam fuerant;
 exiens à Domino ignis properata ultione con-
 ſumpſit; admonens ſcilicet, & oftendens contra
 Deum fieri, quicquid improbi fuerint ad deſtruē-
 dam ordinationē Dei humana voluntate conati.
 Et ad eum quidem modum Cyprianus. Vt igitur
 illicita eſt ſchiſmatica ſeceſſio, & cœtus ij nepha-
 rij, atque (vt Cyprianus loquitur) conuenticula
 perditarum factionum, quę aduerſus Catholicam
 vnitatem celebrantur: & altare prophanum, quod
 contra altare Catholicę pietatis erigitur, & pre-
 ces alterę illicitę, quę contra Dominum & eius
 ordinationem, ſeparatim ab Eccleſia Dei, & Chri-
 ſti ſpōſa, ſpiritu diſſenſionis offerūtur: ita Catho-
 licis nefas eſt intereſſe, etiamſi quod illic accipi-
 tur vel auditur, ſanctū ſit ac bonum, & Chriſti, nō
 ipſorum. Poſteſt enim quod bonum eſt, accipi non
 bene: vti profeſſō non bene, ſed ſceieratē prorſus
 accipitur, ſi non modō cum offendiculo fratrum,
 quos quantum in nobis ſitum eſt, exemplo noſtro
 ſubuertimus; nec ſolum cum Eccleſiæ Chriſti in-

in iuria graui, cuius sic aduersariâ nostro concursu & præsentia honoramus: verum etiam cum ipsa in schismate consociatione, & nephariæ diuisionis participatione, quod bonum & sanctum est, accipitur. Quin & ipsis sacramentorum notis ac symbolis, cum ijs colligamur, & unum re ipsa corpus efficimur, cum quibus in sacramentis iisdem, ac precationibus communicamus. Quippe sacramenta & vincula sunt unitatis, & signa. Idcirco B. Apostolus, enumerans ea quæ ad Christi corporis faciunt unitatem & compagem, præter unum Deum, & unum redemptorem Christum, vnamque omnium fidem & spem, etiam baptismi posuit sacramentum: sub eo proculdubio cætera quoque sacramenta volens intelligi. De quo & alio in loco dicit: Omnes in unum corpus baptizati sumus. De Eucharistia verò scriptum est ab eodem: Multi unum corpus sumus, qui de vno pane & de vno calice participamus. Hæc igitur cum unitatis & vincula & signa sint, cum quibus unum esse non possumus, cum his consociari & communicare, in illis nullo pacto debemus. Si proinde per hæc ipsa se quisquam cum hæreticis & schismaticis societate coniunxerit, is profecto ab Ecclesiæ unitate atque visceribus semetipsum auulsiße non frustra videbitur. Cum etiam constet soli Ecclesiæ Christianæ sacra & sacramenta iure competere: quippe cui soli à sponso Christo tradita sint: efficitur hæc ipsa extra communionem Ecclesiæ & in schismate illicitè usurpari, siue ab ijs qui se per schisma diuiserunt, siue ab ijs qui cum illis in eiusmodi rerum usu communicant. Et sunt quidem eiusmodi nonnulla, quæ foris accipiuntur, quoniam & foris habentur: velut baptismus, velut Eucharistiæ sacramentum, quod etiam extra Ecclesiā ea potestate conficitur, quam secum foras extulit, qui se ab Ecclesia segregauit. Idcirco baptizati in schismate, si ad Ecclesiā redierint unitatem, rebaptizandi non sunt, sed per manuum impositionem, poenitentes recipiendi. Quædam

dam autē foris accipi non possunt, quia nec remanent foris: vt absolutio à peccatis, & quæcunq; iurisdictionis potestate tradūtur. Siquidem eo ipso, quo sese aliqui, semetipsos iudicantes, segregant, atque à communione Ecclesiæ matris palam abrumunt, ius omne Ecclesiasticæ potestatis amittunt; quod soli constat Ecclesiæ (vt suprâ dixi) competere. Sola quippe est, quæ in Petro Apostolorum principe clauēs accepit: quemadmodum (præter B. Augustinum & Ambrosium) Optatus quoque Mileuitanus asseruit, libro primo contra Parmenianū. Diui quoque Cypriani non improbata sententia est: Qui nec vnitatem spiritus, nec coniunctionem pacis obseruat, & se ab Ecclesiæ vinculo atque à sacerdotum collegio separat, episcopi nec potestatem potest habere, nec honorem, qui episcopatus ~~nec vnitatem~~ voluit tenere, nec pacem. lib. 4. Epistolarum, Epistola 2. Quamobrem si quis absolutionis gratia schismaticū adeat sacerdotem, non modo rem illicitam facit, verum etiam cum irrita & falsa pace dimittitur: baptisma verò, si quispiam postulet in schismate, atque id sic administretur, vt in forma sacramenti non discatur ab instituto Christi, nō sine crimine quidem is sacrilegæ communionis id egerit, at redit ille tamē baptizatus. Est autem, quod attinet ad baptismum, & reconciliationis sacramentum (quæ duo sunt ad salutem necessaria) vigilanter illud animaduertendum, si extrema necessitas inciderit imminente morte, vt vel sine baptismo, vel sine reconciliatione sit ex hac vita migrandum; vel ab heretico & schismatico sacramentū vtrumq; possendum; posse tum inter schismaticos vtrumq; suscipi, pace Catholica in animo conseruata. Neq; enim tum communicatur schismati, sed Ecclesiæ matri, cuius in tanta necessitate, minister est etiam schismaticus. Sicuti si quispiam erit hereticus episcopus vel pastor, quem adhuc Ecclesia toleret in

*Ambros. lib.
1. de peni-
tentia cap.
2. & 6.*

Geno. 10.

ministerio: quisquis ab eo vel baptizabitur, vel absoluetur, non eius heresi communicabit, sed Ecclesiæ Dei, à qua in ministerio toleratur. Quãobrem decretum est in Synodo Cõstantinopolitana ea quæ octaua est inter œcumenicas, ne clericus quisquam ante diligentem examinationem & synodicam sententiam à communione proprii patriarchæ se separet, licet criminalem quãlibet causam eius se nosse prætedat: nec recuset nomẽ eius referre inter diuina mysteria. Vt autem putemus in extrema, de qua dictum est, necessitate, baptismi sacramentum etiam ab apertè schismatico peti posse, facit Augustinus, qui tamen si magnum illius crimen existimet, qui sciens & prudens ad schisma se conferat, baptismi gratia suscipiendi, protinus eo suscepto, ad Catholicam rediturus, quemadmodum ex suprã citatis eius verbis cognosci potuit; idem ipse tamen in eo libro quem de baptismo scripsit contra Donatistas, hæc verba reliquit: Si quem fortè coegerit extrema necessitas, vbi Catholicum per quem accipiat non inuenit, & in anima pace catholica custodita, per aliquẽ extra vnitatẽ catholicã positũ acceperit, quod erat in ipsa Catholica vnitatem accepturus: si statim etiam de hac vita migrauerit, nõ eum nisi Catholicum deputamus. Si autẽ fuerit à corporali morte liberatus, cum se Catholicę congregationi, etiam corporali præsencia reddiderit, vnde nunquã corde discesserat, non solum non improbamus quod fecit, sed etiam securissimè verissimèq; laudamus: quia præsente Deum credidit cordi suo, vbi vnitatem seruabat, & sine sancti baptismi sacramento, quod vbiq; inuenit, non hominũ, sed Dei esse cognouit, noluit ex hac vita migrare. Hæc Augustinus. Quæ autem baptismi, eadem & reconciliationis est ratio, præsertim cum & schismaticus sacerdos ratam & efficacem sit absolutionem impensurus in eiusmodi necessitate, sicuti & quiuis simplex

simplex sacerdos, siue id fiat iure positiuo: quia
 pia mater Ecclesia hanc facultatem velit omni-
 bus sacerdotibus tunc esse communem, quemad-
 modum nonnulli sentiunt, siue (quod est verifi-
 milius) iure diuino. Cum enim ius hoc Sacerdo-
 tibus absoluendi potestatem cōcedat, citra restri-
 ctionem aut determinationem personarum, sed
 pōst Ecclesię auctoritate, iustissimis de causis gre-
 gum Christianorum diuisio facta sit, certatq; vni-
 cuique pastori designatio personarum, quas erga
 pastoris officio fungeretur: consequēs est, vt in ar-
 ticulo necessitatis ad illam diuini iuris indetermi-
 nationem, permissionēque redeatur. Quemad-
 modum urgente necessitate famis reductur ad na-
 turæ legem, quæ, quantum in ipsa est, facit om-
 nia communia, nec huius possessionem ab illius
 possessione disiungit. Iure quippe humano quis-
 que dicit: Hoc meum est, illud tuum. Atque vt
 possessionum, dominiorūque fieret inter ho-
 mines ista discretio, Reipub. tranquillitas, & pa-
 cifica inter mortales communicatio, & conui-
 ctus, atque omnino societatis in hac naturæ de-
 prauatione ratio postulabat. Verū vti hæc legi-
 bus humanis constituta possessionum distinctio,
 legi naturæ præiudicare non potest, quæ omnia
 facit in necessitate communia: ita nec illa Eccle-
 siastica potestate facta diuisio gregum Christia-
 norum & parochiarum: qua fit vt quiuis sacer-
 dos alium quemcunque nequeat absolvere, præ-
 iudicare non potest diuino iuri; quo cuiusque
 saluti prospectum est de vsu tam necessariæ po-
 testatis, quando neminem subtrahit pœnitentem
 cuiquam sacerdoti, sed quantum in ipso est,
 in quoslibet exerceri permisit concessam absol-
 uendi potestatem. Sed hæc tractare prolixius,
 non huius est instituti. Sit igitur hoc constitu-
 tum, cum schismaticis & separatis hæreticis, in ijs
 quæ sacra sunt, communicare nephas esse. Hinc

ab Eu-

- Historia* ab Eusebio laudatur Origenes, quod adhuc pene
Eccles. lib. puer cum ad Paulum Antiochenum, hæreseos fa-
6. cap. 2. mosissimum sectatorem, immensæ multitudines
 conuenirent, non solum hæreticorū, verū etiam
 Catholicorum non paucorū, flecti ille nō potuit,
 vt cum eo saltē in oratione cōsisteret: Ita (inquit)
 illi à prima ætate Ecclesiasticæ regulæ obseruatiā
 honorabilis fuit, & hæreticorum societas execra-
 bilis, sicut ipse in quodam loco operis sui dicit,
 quia hæreticorum execranda doctrina est. Hinc &
 in ecclesiasticis historijs, tot sanctorū vel fugę, vel
 passiones, & liberè aut facta, aut dicta multa cele-
 brantur, ne cōmunicarent cum hæreticis Arianis.
- Epist. 69.* Ipse quoque testis est Basilus, plurimis in ciuita-
 tibus populum cum mulieribus, & pueris, ipsisq;
 senibus, ante portas effusum, sub dio preces fun-
 dere solitum, omnes aëris iniurias magno animo
 sustinere, nec oratoria hæreticorum ingredi velle.
- Cap. 3.* Denique D. Aug. cōtra Epistolā fundamenti Ma-
 nichei scripturus, præfatur mitissimè se cū illis ac-
 turum, nihil durius acerbiusue dicturum, & om-
 ninò sese, quoad liceat, accommodaturum: Hac ta-
 men (inquit) lege seruata, vt vobiscum non orem,
vt conuenticula vobiscum non celebrem, vt Ma-
 nichæi nomē non accipiam. Quod enim semel di-
 ctum, iterum D. Cypriani verbis commendandum
 est: Deus vnus est, & Christus vnus, & vna Eccle-
 sia, & cathedra vna, super Petrum Domini voce
 fundata. Aliud altare constitui, aut sacerdotium
 nouum fieri, præter vnum altare, & vnum sa-
 cerdotium, non potest. Quisquis alibi collegerit,
 spargit. Adulterum est, impium est, sacrilegum
 est, quodcunque humano furore instituitur, vt
 dispositio diuina violetur. Procul ab eiusmodi
 hominum contagione discedite, & sermones eo-
 rum, velut cancer & pestem, fugiendo vitate. Et
Prima ad infra: Instruit Apostolus, dicens: Si quis aliter
Timoth. b. 6. docet, & non acquiescit sanis verbis Domini no-
 stri Ie-

ftri Iesu Christi, & doctrinæ eius, stupore elatus est; discedendum ab huiusmodi. Et iterum dicit ipse: Nemo vos decipiat inanibus verbis; pro- Ephe. 3.
pterea enim venit ira Dei super filios contumaciae, nolite ergo esse participes eorum. Vt igitur de Ecclesiæ legibus ac censuris nihil hoc loco dicamus, ex ipsa ratione, & Apostolica doctrina, omninoque ex diuina lege perspicitur, in sacrilegis hæreticorum & schismaticorum sacris, cum eis nullo pacto communicandum esse: Cum autem illud accesserit, vt ab eorum etiam se quisquam partibus stare fingat, secessionemque vel dogma hæreticum probari sibi etiam verbo confirmet, cui dubium esse potest, quin grauior multo sacrilegæ communicationis culpa reddatur? At, inquis, prouenire inde aliqua potest utilitas, vt nimirum dum hoc pacto inimicorum arcana innotescunt, doceantur postea, reuocenturque facilius, aut certè apud Catholicos validius reuincantur. Verum hoc nihil (inquam) est aliud, quàm si dicas: Mentiamur, vt hæreticos mendaces adducamus. Hoc autem quid est, nisi quod damnat Apostolus: Faciamus mala, vt eueniât bona? Deinde & hoc ea res habet nocuenti: Si enim hæreticos nos esse mentimur, quia eorum tanquam nostrasimul dogmata laudaturi; quisquis ea crediderit, moremque viuendi & colendi ritum similem animaduenerit, aut confirmabitur apud eos, aut ad eos celeriter transferetur. Quid autem hora superuentura pariat, vt inde postea liberentur, veradicientibus nobis, qui nobis fallentibus decepti sunt; & vtrum audire velint docentem, quem sic experti sunt mentientem, quis (inquit August.) nouerit certum? quis hoc esse ignoret incertum? Qui igitur eiusmodi simulatione prodesse nituntur, certam quidem verbo & exemplo perniciem adferunt, dum aut firmant in errore, aut in errorem pertrahunt, aut infirmis dubitationem

nem faciunt, fructus verò expectationem habene incertam: præsertim cum ij, qui se deceptos simulatione senserunt, magis illos simulatores postea odio dignos iudicent, quàm sequendos arbitrentur. Quamobrem ne illud quidem in Constantio Cōstantini patre probauero, si tamē euenit, quod libro 1. cap. 7. Tripartitæ historiæ ab Zozomeno refertur in hunc modum. Is probare volens quosdam in suo palatio Christianos, si boni & solidi essent viri, euocans vniuersos præcepit dicens, vt si quidem venirent ad sacrificadum, cuiusque colerēt deos, circa eum essent, & in cingulo permanerent. Si verò refugerent, egrederētur de palatio, gratias agentes quod minimè punirentur. Cumq; in vtroque apparuissent, alij quidem religionis desertores, alij verò diuina præsentibus præponentes, deliberauit ijs amicis & consiliarijs vti, qui in melioribus fideles constantesq; permanserant: Alios autem velut effæminatos auersatus, expulit à suo colloquio: credens nunquam eos erga principem fidos fore, qui fuerint Dei sui sic proptissimè desertores. Hoc igitur si Constantius fecit, (neque enim Zozomeno multum in historia sedes Apostolica tribuit) quāquam vtilitatem spectauerit aliquam, quid aliud tamen quàm infirmos tentauit quorundam animos, atque impulit ad ruinam, & quantum in ipso sitū fuit, omnes ad idololatriam incitauit? Beatus autē Apostolus, quātōpere vitari vellent istiusmodi offendicula infirmorū, declarauit in priore ad Corin.ca.8. dicens: Si quis viderit eum qui habet scientiam, in idolio recumbentem, nōne conscientia eius cū sit infirma, ædificabitur ad manducandum idolothyta? Et peribit infirmus in tua cōscientia frater, propter quē Christus mortuus est? Sic autē peccātes in fratres, & percutiētes conscientia eorū infirmā, in Christū peccatis. Quapropter si esca scādalizat fratrē meū, nō manducabo carnem in æternum, ne fratrē meū scādalizem. Quod

Ipsam historiam (ait Gregorius) sedes Apostolica recipere recusat, quoniam multa mendisur Epist. 195. ad Eulogium Episcopum Alexand.

Quòd Christus Dominus etiam ~~assumpserit~~ similitudinem carnis peccati, non se tamen simulauerit, aut mentitus sit peccatorem.

CAPVT QVINTVM.

Hic nobis obiecerit quispiam ipsius Christi omnium saluatoris simulationem, & si non verbi, saltē facti & operis vtile mendacium: quod videlicet cum peccator non esset, tamen suscepit similitudinem carnis peccati, & tanquam peccator non modò infantulus circumcisis sit, verum etiam postea à Iohanne baptismo pœnitentie baptizatus: omnia verò hæc, vt peccatores faceret saluos. Quod si ita est, cur non ad similem modum liceat schismatis in obseruatione facti, subire speciē ad schismaticos lucrificiendos? Ac propter ipsam quidem peccati similitudinem, in qua de peccato damnasse peccatum diceretur, calumniabantur Pelagiani, dici à Catholicis Christū carnis necessitate mentitum. Sed absit (inquit Aug.) vt iustum aduocatum dicamus, sicut isti calumniantur, carnis necessitate mentitum: sed dicimus eum in similitudine carnis peccati, de peccato damnasse peccatum. Quod fortasse isti (inquit) non intelligentes, & calumniandi cupiditate cœcati, quàm diuersis modis peccati nomen in scripturis sanctis poni soleat, ignorantes, peccatum Christi affirmare nos iactant. Dicimus itaque Christum & nullum habuisse peccatum, nec in anima, nec in carne, & suscipiēdo carnem in similitudine carnis peccati, de peccato damnasse peccatum. Quod subobscurè ab Apostolo dictum, duobus modis soluitur. Siue quia rerum similitudines soleant earum rerum nominibus nuncupari, quarum similes sunt, vt ipsam similitudinem carnis peccati, voluisse intelligatur Apostolus appellare peccatum. Siue quia sacrificia pro peccatis, peccata appellabantur in lege, quæ omnia figuræ fuerunt carnis

Lib. 3. contra Iulianum. tra 2. Epistolæ ad Romanos. cap. 6.

Rom. 8.

carnis Christi, quod est verum & vnicum sacrificium pro peccatis: his (vt opinor) Augustini verbis docemur, nō sic Christum carnis similitudinē suscepisse, vt se mentitus sit peccatorem: quod si fecisset, nec ipse haud dubiē peccato caruisset, alienæ quantūlibet salutis causa factū diceretur. Quāquam enim interest plurium rebus in agendis, quā causa, quo fine, quāue intentione quidque fiat: ea tamen quæ suapte natura constat esse vitiosa (quo in genere mēdaciū reperitur, siue hoc in verbis, siue in factis insit) nullo bono causæ obtentu, nullo quasi bono fine, nulla velut bona intentione facienda sunt. Sed quis aduocatum nostrum & mediatorē Christum dixerit intentione fallendi carnem suscepisse, carni peccatrici, excepto peccato, persimilem, quō nimirum, expers vitij cum esset, peccator crederetur? Est autem in eo culpa mentiētis quod fallere velit, siue fallat, siue non fallat, aliudq; gerat animo, & aliud verbis siue quibuscūbet significationibus enunciet. Sæpe enim mentitur aliquis, etiam si neminem fallat: Sed & multos falli contingit ex eo, quod tamen siue mendacio vel fiat, vel dicatur. Tametsi multos igitur cōspecto Christo, propter mortalem eius carnē ita falli contigerit, vt peccator esse crederetur: non tamen vt hoc persuaderet, voluit peccatorū esse similis, sed vt peccatores ab eo malo, cuius ipse gerebat quandam similitudinē, liberaret: perinde ac si quispiam militari habieū sumpto, castra ingrederetur, non quo putaretur miles, sed quo suorum quempiam à castris reuocaret, in quibus versari periculosē videretur. Vt enim non quisquis militi similis est, continuo se is militem esse mentitur aut simulat: ita consequens non est, vt qui peccatoris similitudinem gerat, is se quoque mentiatur aut simulet esse peccatorem. Vt Christum Iudas osculatus est, ita & Iudam Christus. Similis & vtraque parte facti species, & in hoc Christus Iudæ similis: sed

Aug. ca. 3. lib. de mendacio. Et enciridij ca. 22 Omnis qui mentitur (inquit) contra id quod animo sonat loquitur voluntate fallendi.

Amb. super illud: Et osculatus est eum.

sed ille mentitus est se amicum, osculo fallaci amicitiam simulans : Christus autem nec simulauit quod non erat, nec simulare nos docuit, sed noluit proditorem fugisse videri, quin plus etiam afficere & mouere voluit, cui amoris officia non denegauit. Illud quoque attendendum est, nunquam ita se Christum attéperasse ad peccatorum mores, neque ea se peccatoribus similitudine cōiunxisse, vt fieret aliquando peccati particeps, eaque ipsa faceret cum hominibus, propter quæ sunt & dicuntur peccatores, vt eorum hoc pacto consuleret saluti. Quomodo enim non potius vnà peccando, tenuisset in delictis? quomodo non serò postea reuocaret, qui prius eadē ipse fecisset? Contrarijs potius curauit contraria, & similis in multis quæ fieri sine peccato poterant, in cæteris præbuit sese dissimile, nostrisque vitijs suas vbique virtutes opposuit, nostraque vitia suis semper virtutibus coarguit quodammodo. Nunquid igitur ita peccatorem se Christus iustus simulauit, vt isti schisma, aut heresim, aut idololatriam simulari phas esse, aut etiam oportere arbitratur? Sociatur enim hi cōmunionē operis eius, vnde reuocare se alios postea posse frustra sperant: nec magis schismaticę separationis aut impij cultus maculā effugere queunt, quàm crimen cuitaret, qui cū scortatoribus scortaretur, aut cum temulentis se ipse expleret, aut cū furibus aut prædonibus curreret, hoc animo, vt illos postea ab eiusmodi peccatis auocaret. Iam verò quod & circumcisisus est & baptizatus, quanquam neque esset in corde quod circumcisio detraheret, neque quod repurgaret gratia, non mendacium, sed mysterium fuit. Causam quippe nostram ipse suscipiens peccatores in se transfigurauit, vt doceret hoc modo nos ablutione & circumcissione indigere. Hoc igitur facto præstitit, quod Paulus verbo, cum scriberet alios dicere: Ego sum Apollo; alios, ego Pauli; alios, ego Cephæ, non quod ita loqueretur,

aut ijs nominibus vterentur: Sed hæc (ait Apostolus) transfiguraui in me & Apollo, vt in nobis discatis ne quis aduersus alium infletur pro alio. Quanquam persona hæc peccatoris, non in factis modo saluatoris nostri, verum etiam interdum in verbis spectanda sit. Nā quo alioqui modo dicere putandus est quod loquitur in Psalmo: Longe à salute mea verba delictorum meorum? Nempe dicta nostra sua vocat, quod peccatorum causam & personam susceperat. Huius in Dauide figura præcessit, qui apud Achis regem simulauit mentiam. Immutauit enim os suum (ait scriptura) coram eis, & collabebatur inter manus eorum, & impingebat in ostia portæ, defluébantque saluæ eius in barbam: vsque adeo vt commotus Achis ad seruos dixerit: Vidistis hominē insanum? quare adduxistis eum ad me? An desunt nobis furiosi? Quod Dauidis factum, cum eo refertur ad quod præcipue significandum diuinitus ab eo susceptum est, mysterium, non facti mendacium esse, sublimi quadam consideratione perspicitur. Hic enim ille figurabatur, qui propter nos immutatus, stultitiæ & infantiæ criminationem non effugit. Ac generatim, sicuti annotauit Augustinus, quicquid figuratè aut fit aut dicitur, non est mendaciū: quia omnis enunciatio ad id quod enunciat referenda est. Omne autem figuratè dictum aut factum, hoc enunciat quod significat eis, quibus intelligendum, prolatum est. Proinde nec ea fuisse videbitur mendax simulatio, qua ad ficum tanquā poma quæsiturus accessit: quæ tamen in arbore nulla esse, vel ex ipso anni tempore scire potuerat. Cæterū quod diua Virgo purificationis cæremoniam secundum legis præscriptū obseruarit, cum tamen ipsa purgatione non egeret, quæ suscepto semine non peperit, plus habere videri possit quæstionis: eo quod tale quiddam de ea, quale supra de Christo diximus, non temerè fortasse videatur esse cogi-

Lib. 1. re-
gum 6. 21.

Cap. 5. lib.
de menda-
cio.

cogitandum: vt videlicet parientium communem personam portauerit, atque significarit in se, qua purificatione indigerent omnes, quæ suscep-
 pro semine parerent, & non sine carnis delectatione conciperent: sicut in sua persona filius significauit, qua circumcisione indigerent omnes, qui non concipiuntur sine voluntate carnis, & ideo nec sine peccato nascuntur. propter quod dictum est: Ecce enim in iniquitatibus conceptus sum, & in peccatis concepit me mater mea. Quamquam si cui hoc probatum sit, non habeam vnde facile reuincatur: præsertim cum dicat Venerabilis Beda: Vt nos a legis vinculo solueremur, sicut Christus, ita Beata Maria legi est spontè subiecta: non propter se igitur, sed propter nos purificationis legem beata Virgo seruauit. Nec verò sum nescius esse veteres nonnullos, qui omnem hunc purgationis ritum non ad matrem, sed ad natum referant: vnde illa sunt apud Leonem Epistola quarta ad Episcopos per Siciliam constitutos: Dominus (inquit) nullius indigens remissione peccati, nec quærens remedium renascendi, sic voluit baptizari quomodo voluit circumcidi, hostiamque pro se emundationis offerri: vt qui factus erat ex muliere (sicut Apostolus ait) fieret & sub lege, quam non venerat soluere, sed adimplere, & implendo finire. Ante Leonem quoque vehementer hoc D. Augustinus astruxit in quæst. super Leuiticum: Nec verò horum sensum repudiare quorundam more possimus, sed venerari debemus. In eoque nihil patimur nouæ difficultatis, cum, quod ad Christum attinet, sic debeat intelligi purificatus, vt & baptizatus, & circumciscus. Sed quoniam promptius est, vt de mulieris purgatione Leuiticus loqui videatur, dici poterit aliam seruandæ legis causam Beata Virgo sequuta, quàm legalem illam carnis emundationem, nimirum vt eius temporis sacrificio coleretur

Quæst. 40.
cap. 12.

Deus, gratiaēq; agerentur à puerpera. Adde quod omne sacrificium legis veteris, Christum significauit. Quare & illa emundationis oblatio, præfigurauit Christum, quatenus per eum à carnis concupiscentia repurgamur. Cur igitur non hoc quo-
Leo serm. que beata virgo veracissimè significaret, cum &
2. de Nati. ipsa inde purgationem traxerit vnde concepit, &
Domini. per eum quidem ipsum quem concepit?

*Soluitur obiectio de Naaman Siro,
& Salomone.*

CAPVT SEXTVM.

4. Regū 5. **M**oueat deinde fortasse quempiā de Naamā Siro diuinis literis scripta historia. Is enim cum esset ministerio Helizæi, lepræ contagio liberatus, velletq; in posterū Dei cultor esse, ad quem iam esset repudiata superstitione conuersus, quod eū angere postea potuisset, id voluit prophetae iudicio terminari: Hoc solum est (inquit) de quo depreceris Dominum pro seruo tuo. Quādo ingreditur dominus meus tēplum Rémon vt adoret, & illo innitente super manum meam, si adorauero in templo Remmon, adorante eo in eodem loco, vt ignoscat mihi dominus seruo tuo pro hac re. Cui propheta vno verbo omnē scrupulum eximens, respondit: Vade in pace, hoc est, nihil, id si facias, peccaueris. Est enim ridiculum quod annotauere nonnulli, quæstionem propositam noluisse prophetam dissoluere, sed serio Naaman de sua salute percontantem, sine responso, quasi se hic miscere nollit, dimisisse. Nunquid igitur permisisse propheta putandus est huic Siro, vt vnā cū impijs exteriore corporis gestu idola coleret, si tamen de vno Deo fidem corde inclusam retineret? minimè verò. Nam & antea professus erat, se dijs alienis in posterum sacrificia non esse facturū: Non faciet vltra seruus tuus (inquit) holocaustum aut victimā dijs alienis, nisi Domino.
 Et quo

Et quod sese palam vnius Dei cultorem esse inter infideles quoque demonstraret, ad ædificandum altare Domino, de terra Israelitica, duorum onus burdonum secum auexit. Non aliud igitur corde clausum habere voluit, aliud opere promptum atque manifestum, vt cum animo Dei cultor ac fidelis esset, tanquam propter odium declinandum, cæterorum in religione similis esse videretur. Neque id proinde permitti sibi voluit, vt habitu duntaxat gestuque corporis falso Deo cultum honoremq; deferret, ac sicuti quidam interpretati sunt, adorare sese simularet: sed id tantummodo, vt domino suo regi, etiam in templo, solitum ministerio corporis sui præberet obsequium: vt cum regem sibi innixum haberet, curuante sese illo, curuare se quoque ipse posset. Quæ incuruatio atque inclinatio corporis, nomine adorationis expressa est, eo tropo, quo signum, rei significatę nomen crebro suscipit: sicuti & alijs compluribus scripturę locis. Velut vbi dicitur Abraham *Genes. 12.* tribus viris conspectis adorasse in terram, id est, in terram sese incuruasse, & Iacob viso procul fratre *Genes. 33* Esau, progrediens & propinquans pronus in terram septies adorauit. Ioseph quoque fratres eius *Genes. 43.* proni in terram adorasse leguntur. Et Nathan propheta Dauidem regem. *3. Regum 1* Quamquam enim designata his locis adoratio ad honoris officium pertinebat, tamen nisi adorationis nomen corporis compositionem ac flexum quędam exprimeret, cuiusmodi solet honoris & venerationis signum esse, non diceretur hic aut ille in terram adorasse. Igitur propheta Siro illi rem per se licitam minimęque vitiosam permisit: quæ sicuti extra delubra deorum, ita prorsus & in ipsis fieri poterat sine peccato: præsertim cum iam Deo cæli constructo palam altari, satis constaret Naaman Dei alterius esse cultorem. Ioannes quoque Apostolus ante *Apoca. 16.* pedes Angeli cecidit vt adoraret, non simulatio-

Signum honoris accipit ipsius rei nomen.

ne diuini cultus, vt subsequente per angelum re-
prehensione prodesset ijs qui talē angelis honorē
deferendum arbitrabantur. Sed horū personam in
se suscipiēs, id egit flexu corporis, quod illi vitioso
cultu faciebāt: vt cū id mox prohiberetur facere, in
eo cæteri instruerētur, quorū ad sanandos animos
totum id mysticē gerebatur. Iam verò Salomonis
factum paulisper expendamus. Hinc enim aiunt li-
cuisse adorandi causa excelsa Iudæorū montiū ad-
ire: quę tamē excelsa quid aliud quàm schismaticā
habebāt ab vnico Dei altari secessionē? Quæ pro-
inde sic oderat Dominus, vt reges qui ea nō euer-
terēt culparētur, & qui ~~euererēt~~ laudarētur. Illud
autē Salomoni licuisse, exitus ipse orationis eius,
& sacrificiorū effectus declarasse videtur. Exaudi-
tus enim illic est, & sapientiā quā pro terrenis flu-
xīsque rebus poposcerat, impetrauit. Cur igitur ad
similē modū non liceat catholico hæreticorū sese
cōuenticulis inserere, vnaque schismatica sacra per-
agere: præsertim cū ijs nō alius, sed vnus idemque
Deus, (sicuti & in illis excelsis) adoretur? Verūm
quod hic respōdeatur, ipsa scriptura diuina submi-
nistrat. Nō enim illud Salomoni facere licuisse, ne-
que quod fecerit, à scriptura laudatū esse, verba illa
demonstrāt: Dilexit autē Salomō Dominū, ambu-
lās in præceptis David patris sui, excepto quod in
excelsis ~~immolabat, & accendebat thymiama~~. Hoc
igitur in facto, Salomonē cōtra præcepta patris sui,
& Dei legē, improbāda vicit cōsuetudo popularis,
cū vnus dūtaxat locus esset, in quo sacrificia offer-
re liceret. Idcirco enim & Sennacherib nō ignarus
sacrilegū illū adorādi morē populo vehemēter esse
gratū & probatum, vt hac quoque ratione Ezechias
regi cōflaret inuidiā, qui fuerat excelsa demolitus,
pronunciari per seruos iussit: Nunquid nō iste est
Ezechias, qui ~~destruxit excelsa illius & altaria~~, &
præcepit Iudæ & Hierusalē, dicēs: Corā altari vni-
co adorabitis, & in ipso cōburetis incēsum? tanquā
dice-

Lib 3. Re-
gum ca. 3.

Lib 2. pa-
ralip c 32.

diceret: Frustra in illius præsidijs poni fiduciā, frustraꝫ per illū cælestem opē expectari, qui suis sacrificijs, suoꝫ honore Deū quē colerēt, spoliasset. Itaq; Salomon populari more seductus patris hic sui præcepta neglexit, cumꝫ in cæteris laudē mereretur, hic tamē iustā scripturę reprehensionē incurrit. Atqui orās illic & sacrificās exauditus memoratur? Abijt enim in Gabaon (ait scriptura) vt immolaret ibi. Illud quippe erat excelsū maximū: mille hostias in holocaustū obtulit Salomō super altare illud in Gabaō. Apparuit autē Dominus Salomoni per somniū nocte, dicēs: Postula quod vis vt dē tibi. En largiri se quoꝫ paratū declarat quod illic petierit. Cumꝫ expleuisset orationē, audiuit à Domino: Quia postulasti verbū hoc, & nō petisti tibi dies multos, nec diuitias, aut animas inimicorū tuorū: sed postulasti tibi sapiētiā ad discernendū iudiciū, ecce feci tibi secundū sermones tuos. Exauditus est igitur Salomon etiā eo in loco, in quo quod fecit, facere nō licebat: nimirū vt intelligere mus, plus ad impetrandū valere petitionis affectū, quā petitionis locū. Quocirca etsi quisquā in memorijs hæreticorū orās exauditur, nō pro merito loci, sed pro merito desiderij sui, recipit siue bonū, siue malū. Spiritus enim Domini (sicut scriptū est) repleuit orbē terrarum: & auris zeli audit omnia, & multi irato Deo exaudiuntur. de quibus dicit Apost. Tradidit illos Deus in cōcupiscētijs cordis illorū. Præclarū igitur magis est Tobię nobis in-
 tuendū exemplū, qui (vt sacra de illo narrat historia) cū iunior omnibus esset è tribu Nephthalim, nihil tamē puerile gessit in opere. Deniq; cū irent oēs ad vitulos aureos, quos Ieroboā fecerat rex Israel, hic sol⁹ fugiebat consortia omnium, & pergebat in Hierusalē ad templū Dñi, & ibi adorabat Dñm Deū Israel, omnia primitiua sua & decimas fideliter offerēs: ita vt in 3. anno profelytis & aduenis ministraret omnē decimationē. Nō hic irridentiū

Lib. 3. re-
gum ca. 3.

Aug. lib.
de vnitatē
Ecclesia
cap. 16.

Sapiens. 1.

Roman. 1.

*Vide Au-
ca. 12. lib.
de unitate
Ecclesie.*

linguas, non reprehensionum morsus, non accu-
sationem vitiosæ singularitatis verebatur: pul-
chrè intelligens Deum quidem Israeliticas tribus
separari iussisse, non vt religio, sed vt regnum di-
uideretur, eoq; modo iustum de tribu Iuda suppli-
cium sumeretur. Non enim Deus iubet aut schis-
ma aut hæresim fieri: nec quia & modo in orbe
Christiano Dei voluntate regna diuisa sunt, idcir-
cò & in illis distracta esse debet vnitas Christia-
na. Igitur Tobias regnum sibi à tribu Iuda diuisum
arbitratus, religionem tamen cum illis, (quoniam
ea sola erat vera religio) & cordis interiore sin-
ceritate, & manifesto piæ professionis opere, vo-
luit habere communem.

*Etiam id in persecutione cauendum Chri-
stiano, ne fidem negasse aut com-
municasse videatur.*

CAPVT SEPTIMUM.

*Lib. 10. in
Lucam, de
negatione
Petri.*

NEque enim cauendum id modo est, ne vel
negemus quod in religione sumus, vel ad-
uersarijs nepharia communione sociemur:
verùm etiam ne horum alterum fecisse videamur.
Sunt enim qui arte verba componunt, pulchreq;
sibi in eo satisfaciunt, quod non negauerint, cum
opinionem interim contrariam interrogantium
animis imprimere niterentur, quo præsens pericu-
lum euitarent: Velut si Petrum quispiam excuset,
atque industriè fecisse videri velit, quia dixisset:
Non noui eum. hoc videlicet sensu: Non eum mea
cognitione comprehendo quem nequit mens hu-
mana complecti, aut cum dixit: Nescio quid dicas,
hoc est, sacrilegia vestra nescio. Sed quem hunc in
modum fortasse quispiam excusauerit, Dominus
non excusauit. Non enim satis est (inquit Ambro-
sius) inuoluta confessio confitentis lesum, sed a-
perta confessio: & quid prodest verba inuoluere,
quando

quando videri vis denegasse? Idemque est de operis
 comunione iudicandum. Qua in re præclarum extat
 exemplum Eleazari: qui in gente Iudaica unus erat
 de Scribarum primoribus, ætate prouectus, vultusque
 decorus. Is igitur cum aperto ore hians, compellere- 2. Mach. 6.
 leretur edere suillam, atque id facere constanter
 recusaret, statueretque non admittere illicita, propter
 miseram brevisque vite huius amorem, ad supplicium
 ultro præibat. Sed hi qui astabant, iniqua erga illum
 & crudeli commiseratione permoti propter antiquam
 viri amicitiam, suadebant ut alijs carnibus clam
 allatis, quibus per legem vesci phas erat, vteretur,
 quo sic imperata fecisse, & suillam māducassee cre-
 deretur: At ille, sicuti scriptum est, considerans ætatis
 ac senectutis suæ dignam eminētiā, & ingenitæ
 nobilitatis caniciem, vitæque antea actæ religiosam
 honestatem, citò respondit præmitti se in infernum
 malle, quàm id committere ut prophano pollutus
 cibo passim Eleazarus diceretur. Non enim ætate
 nostra dignum est (inquit) fingere ut multi adoles-
 centes, arbitantes Eleazarum, nonaginta annos
 natum, transisse ad vitam alienigenarum, & ipsi
 propter meam simulationem, & propter fluxum
 mortalis vitæ tempus, decipiantur, & per hoc ma-
 culam atque execrationē meæ senectuti conquirā.
 Nam etsi in præsentī tempore supplicijs homi-
 num eripiar, sed manum omnipotentis Dei nec
 viuus, nec defunctus effugiam. Quamobrem for-
 titer vita excedēdo, senectute quidem dignus ap-
 parebo, adolescentibus autem exemplum forte
 relinquam, si prompto animo ac fortiter pro gra-
 uissimis sanctissimisque legibus honesta morte
 perfungar. Quibus dictis, cōfestim ad supplicium
 trahebatur. Habuit autem vir ille cōplures postea
 fortitudinis suæ sectatores: quodque rarius sub ve-
 teri testamento fuit, ideoque magis in paucis qui-
 busdam admirabile, post Christi de mundo victo-
 riam cæpi. esse frequentius, & cum vetera (inquit

Cyprianus) exempla numeretur, exuberante postmodum copia virtutis & fidei, numerari non possint martyres Christiani: testate Apocalypsi, & dicente: Post hæc vidi turbā magnā quā dinumerare nemo poterat. Itaque Diocletiano sæuiente, cum alij discerperentur, alij foderentur, alij laminis ignitis vreretur, ex ipsis persecutoribus quidā (ait Eusebius) tanquā miseratione vsi, adhibebāt nōnullos nostrorum ad incesta sacrificia, & quasi sacrificassent, conclamabāt cū nō sacrificassent: de alijs verō cū ne appropinquassent quidē immūdis hostijs, acclamabāt ipsi quod iā immolassent: & abscedebāt quidam, in eo tantum culpabiles (inquit) quod crimen sibi obiectū cū silentio pateretur. Aliqui sane exclamabant ingenti voce, & testabantur se non sacrificasse, sed esse Christianos, tali se gaudentes confessione decorari: Nonnulli etiam maiori fiducia, neque immolasse, neque vnquā immolatu-ros esse testabatur: quibus tamē ab assistentibus militibus ora continuo atq; oculi cōtundebantur vt tacerent, & violenter expellebantur tanquam acquieuisent. ~~Tāti erat impijs~~ studij, vt propositum suum viderentur implese. Vt igitur hoc in studio primum habebat inimicus, vt vicisse videretur: ita pijs dāda fuit opera ne victi putarentur. Quod qui sic præstabant, vt licet per vim manus ad impia sacrificia admoueretur, tamē voce testificarentur se Christianos esse, nolleq; idola colere, & ægrè se pati quod fieret circa illos demonstrarent, fortitudinis & cōfessionis Christianę apud Deum gloria mininē priuabantur, etsi minus interdū apud homines esset ea decora confessio, propter metū aut suspicionē eius quo labi potuit infirmitas, vt non satis violētiæ resisteretur. Vnde illud decretū est in cōcilio Ancirano: Qui fugiētes timore persecutionis comprehēsi sunt, vel à familiaribus seu domesticis traditi, & vel bona propria amiserunt, vel sustinuerūt tormenta, vel etiam carceribus inclusi sunt,

Lib. 8. h.
 storia Ec-
 clesie. c. 3.

Capo. 3.

sunt, & tamen proclamauerunt se esse Christianos, quin etiam perseuerate violentia ad id usque perducti sunt, ut manus eorum apprehensas & violenter attractas, super sacrificia imponerent, illis licet perseuerantibus in fide, & Christianos se esse vociferantibus. Hoc ergo quod ijs inuitis & alijs cogentibus contigit, si luctu & mœrore animi acerbè se ferre demòstrent, ipsiq; humili per bonã cõuersationẽ habitu incedẽtes, dolere se quod inuiti coacti sunt, doceat: hos tãquã inculpato a cõmunionẽ non vetari. Si autẽ iam prohibiti sunt ab aliquibus a cõmunionẽ, maioris diligẽtiã & inquisitionis causa, aut per aliquorũ ignorantia, statim recipi oportet. Sed illis tẽporibus fuẽre nonnulli, qui nec sacrificabãt idolis, & id sibi non licere per susceptã religionem Christianã corã magistratu aut concussore quopiã profitebantur, sed omnẽ vexationẽ qua potuissent ad sacrificandũ cogi, prætio redimebãt. Ac fuẽre etiam Tertulliani ætate quedam Ecclesiã, quæ redimendo sese, tributum numerarunt beneficiario Cæsaris. quemadmodum ipse Tertullianus indicat in fine libri eius quem scripsit de fuga in persecutione: Parũ est (inquit) si vnus aut alius ita eruitur massaliter. Totæ ecclesiæ tributum sibi irrogauerunt. Nescio dolendum an erubescendum sit, cum in matricibus beneficiariorum (id est rationarijs) & curiosorum inter tabernarios, & lanios, & fures balnearum, & aleones, & lenones, Christiani quoque vectigales continentur. At hic videndũ ne multum nos in eiusmodi causa moueat Tertullianus: quem librum hũc scripsisse contra Ecclesiam & D. Hieronymus testis est in catalogo scriptorum ecclesiasticorum, & satis ipse liber id prodit, in quo præter magnificam paracleti montanici mentionẽ, solita etiam Christianorũ in persecutione fuga dãnatur. qua Lib. 4. 5. dere pòst suo loco. Cypriani certè iudiciũ reputare non possumus de causa Libellaticorũ, quorũ *pistolarum*
puras

puras quidē asserit esse manus, & ora feralis cibi cō-
 tagio negat esse polluta, conscientiā tamē affirmat
 pollutam esse: ideoq; flendum ijs ac lamentandum
 fuisse, quo recipi in gratiā & reconciliari Ecclesiæ
 possent. Quodnam igitur (inquis) Libellatici cri-
 men? præsertim cum eius esset istiusmodi excusa-
 tio: Ego prius legeram, & Episcopo tractante
 cognoueram, non sacrificandum idolis: nec simu-
 lachra seruū Dei adorare debere, & idcirco ne
 hoc facerem quod non licebat, cum occasio libelli
 fuisset oblata, quem nec ipsum acciperem, nisi
ostensa fuisset occasio, ad magistratum veni, vel
 alio eunte mandauī, Christianum me esse, sacrifi-
 care mihi nō licere, ad aras diaboli me venire non
 posse, dare me ob hoc præmiū, ne quod non licet
 faciā. Verū hac ratione eueniebat imprimis, vt
 cū cæteris qui sacrificare recusabāt aut trucidatis,
 aut afflictis, ipse nihil asperū pati, & sua pace frui
 videbatur, impietatis consortio crederetur macu-
 latus, atq; inter eos qui sacrificassēt, victiq; essent,
 numeraretur. Quo pertinet illa Tertulliani verba:
 Redimens non ostendi apud vnum si fortē con-
 fessus es: ergo & apud plures nolendo confiteri
 negasti: Ipsa salus iudicabit hominē excidisse dum
 euadit. Sic deinde Libellaticos egisse, vt sacrificas-
 se & acquieuisse præceptis sacrilegis videri vellēt:
 quomodo videlicet Eleazarus fecisset, si monitis
 amicorum obtemperās finxisset se suā edisse,
 alijs tamen carnibus māducatis, Diuus Cyprianus
 insinuat ca. 2. libelli de exhortatione Martyrij: Ne
 quis, ait, vel libelli, vel alicuius rei oblata sibi occa-
 sione, qua fallat, amplectatur decipientiū malum
 munus, nec Eleazarus tacendus est: qui cum sibi à
 ministris regis offerretur facultas, vt accepta car-
 ne qua liceret sibi vesci, ad circumueniēdum regē,
 simularet se illa edere quæ de sacrificijs atque illi-
 citis cibis ingerebantur, consentire ad hanc falla-
 ciam noluit, dicens nec ætati suæ, nec nobilitati
 con-

conuenire id fingere quo cæteri scandalizarentur: Sincera (inquit) prorsus fides, & virtus integra, ac satis pura non regem Antiochum cogitasse, sed Deum iudicem, & scisse proficere sibi ad salutē nō posse, si hominē derideret ac falleret, quādo Deus qui conscientię nostrę iudex est, & solus timendus est, nec derideri possit omnino, nec falli. Solitos autem gentiles ad hoc fictionis crimen sollicitare, quod Eleazarus tantopere refugit, etiā ex eo constat quod refert Augustinus de Secundi cuiusdam Tigisitani epistola, qui primas fuerat Numidiæ: Scripsit (inquit) etiā Secūdus, & ad seipsum missos à curatore & ordine centurionem & beneficiariū, qui peterent diuinos codices exurendos, eisq; respondisse: Christianus sum & episcopus, nō traditor. Et cum ab eo vellēt aliqua Ecbola aut quodcunq; accipere, neque hoc dedisse exemplo Eleazari Machabæi, qui nec fingere voluit suillam carnem se manducare, ne alijs pręberet præuaricationis exemplum. Hoc Aug. in Breuiculo cōtra Donatistas in collatione tertię diei. Itaque Libellatorum hoc fuisse videtur crimē, quod quanquam non sacrificarent, atque apud quosdam sacrificare se nolle testificarentur, tamen se apud Imperatorē & populum sacrificasse fingerent, fallerentq; isto modo semetipsos vehementer, cum fallere alios & per fallaciam euadere meditarentur. Hoc ipsum non mediocriter illustrant ea quoque Cypriani verba, quibus vsus est in Sermone de lapsis: Nec sibi (inquit) quo minus agant pœnitentiam blandiantur, qui etsi nefandis sacrificijs manus non contaminauerunt, libellis tamen conscientia poluerunt; & illa professio denegantis, contestatio est Christiani, quod fuerat, abnuentis: fecisse se dixit, quicquid alius faciēdo commisit. Cumq; scriptum sit: Non potestis duobus dominis seruire; seruiuit sæculari domino, obtemperauit eius edicto, magis obaudiuit humano imperio quā Deo

Deo, viderit an minore vel dedecore, vel crimine apud homines publicarit quod admisit, Deum tamen iudicem subterfugere & vitare non poterit. Huc etiam non parū ea conferunt quę ad Cyprianum scribunt presbyteri & diaconi Romę confiteſtētes: Hoc nos (inquiūt) non falſo dicere superiores noſtrę litterę probauerūt, in quibus vobis ſententiam noſtrā dilucida expoſitione protulimus, aduerſus eos qui ſeipſos infideles illicita nefariorum libellorū profeſſione prodiderant: quaſi euasuri irretiētes illos diaboli laqueos viderētur, quo non minus quā ſi ad nefarias aras acceſſiſſent, hoc ipſo quod ipſum cōteſtati fuerant tenerentur: Sed etiā aduerſus illos, qui acta feciſſent, licet præſentes cum fierent nō affuiſſent, cum præſentiā ſuam vbique vt ſic ſcriberentur, mandādo feciſſent. Nō eſt enim immunis à ſcelere, qui vt fieret imperauit: nec eſt alienus à crimine, cuius conſenſu licet à ſe nō admiſſum crimen, tamē publicē legitur: & cum totū fidei ſacramētum in confeſſione Chriſti nominis intelligatur eſſe digeſtum, qui fallaces in excuſatione præſtigias quærīt, negauit: & qui vult videri propoſitis aduerſus euangelium vel edictis, vel legibus ſatiſfeciſſe, hoc ipſo iam paruit, quod videri paruiſſe ſe voluit. Erat igitur in Libellaticorū crimine ea facti ſpecies vt thuriſſiſſe viderētur. Tradito namque pecunię vel alio quopiam munere, litteras accipiebant ſatiſfactionis teſtes, ne vrgerentur deinceps ad ſacrificandum, vt qui iam ijs qui ſacrificaiſſent, mandatōque paruiſſent, etiā publica nominis recitatione connumerarentur. Sublata autem hac ſpecie, cur non foret ſatius pecuniam perdere, quā in cadendī periculum ex cruciatu venire? Ideoq; Cyprianus Libellati crimē, ab eius qui ſacrificauerit crimine, multum diſtare docet: *Quin & Moechi* quā Libellati cauſam grauiorē eſſe pronunciat: Cum hic (inquit) neceſſitate, ille voluntate peccauerit: hic exiſti-

Episto. 31.

Roma. 14.

existimans satis esse quod non sacrificauerit, errore deceptus sit: ille matrimonij expugnator alieni, vel lupanar ingressus, ~~ad cloacam~~ & cœnosam voraginē vulgi sanctificatū corpus & Dei templum, detestabili colluuiōe violauerit, sicut Apostolus dicit: Omne peccatum quodcunque fecerit homo, extra corpus est: qui autem mœchatur, in corpus suum peccat. Si autem cauendum ne idolis honorem detulisse videamur, cauendum erit hoc quoque ne hæresi aut schismati: Ideoq; cum frater Satirus ad eam Ecclesiā ex naufragio appulisset, quæ se, duce quodā Lucifero, ab Episcopis Catholicis, hoc est (inquit Ambro.) ab Ecclesiæ Romanæ cō- *In libro de*
munione diuiserat, noluit, eo cognito, sacrā Eu- *excessu*
charistiam, quam in orario inuolutam gestabat, de *fratru. c. 7.*
manu illius episcopi suscipere, ne schismati detulisse & cōmunicasse videretur. Ac sic (ait Ambro- *cano. 9.*
sius) auidus fuit cælestis mysterij, vt tamē nō esset
incautus. Fuerat etiā antea multo in cōcilio Lao-
diceno decretum, ne quisquā catholicus in cœmi-
teria, vel ea quæ hæreticorum martyria diceban-
tur, orationis gratia vel petendæ curationis intra-
ret. Nec prætereūdum existimo quod de Ladislao
Bohemorum rege catholicissimo scribit Æneas
Sylvius, nūquam eum hæreticorū Ecclesias, quā-
uis rogatū intrasse, neque sacris eorū interfuisse.
Ac cum Rochesanam (erat is hereticæ factionis in
Bohemia minister) in celebritate corporis Chri-
sti, sacram eucharistiam per vrbē deferentem (nō-
dum enim eo profecerant illi heretici vt ista dam-
narent) è fenestra conspicatus esset, nullum reue-
rentiæ signum præbuit: percōtantibus amicis cur
sacramentum dehonestasset: Nō me latet (inquit)
diuinissimū Christi corpus dignius esse, quā
me satis honorari queat: verū cauendum mihi
fuit, ne dum Christū honoro, sacrilegū presbyte-
rum Rochesanā popularibus approbasse videar:
quorum plerunque mores ex principe pendent.

Et si

*Historia
Bohemica
cap. 62.*

Et si religionem negare non liceat, occultare tamen eam aliquando licere.

CAPVT OCTAVVM.

Cap. 10.

E St autem hac in re vigilanter intuendū quod beatus Augustinus tradit in eo libro quem scripsit contra mendacium, non hoc esse occultare veritatē quod proferre mendacium. Quamuis enim omnis qui mentitur velit cælare quod verum est: non tamen omnis qui vult cælare verum, mentitur: plerumque enim verū nō fallendo oculimus, sed tacendo. Nec mentitus est Dominus, cum ait: Multa habeo vobis dicere quæ non potestis portare modo; aut cum de sua potestate interrogatus respondit: Nec ego dico vobis in qua potestate hæc facio. Sic cum Abraham sororem suam dixit esse Saram, occultavit non negavit veritatem. Non enim dixit, non est vxor mea, sed soror est; quod revera tā esset propinqua genere vt soror dici posset. Soror enim erat de paterno genere, nō materno. Hoc & filius eius Isaac fecit, qui etiam propinquam suam sortitus erat vxorem. Quanquam igitur neque verbo vnquam neganda fides sit, neque facto præferenda species vlla perfidiæ vel ad breue tempus, occultare tamen ac tegere subinde liceat, quod in religione sumus. Sane cum honor Dei aut proximi salus exposcit, vt nos aperta professione prodamus, tum quidem dubium non est haud satis esse, si per fidem iungamur Deo: sed quod animo inest, Deo semper cognitum, id etiam in aliorum cognitionem lucēmque proferendum est: vt ij videlicet qui infirmi sunt, & ad ruinam penduli, propter exuperantem rurbam perfidorum, nostra confessione erigantur atque firmentur. At si semper & apud quoscunque fidem quam corde tenemus, etiam voce, vel opere proferre deberemus: cur dixisset

Roma. 14. Apostolus: Tu fidem habes? penes temetipsum habe

habe coram Deo. ~~Intempestiuam enim nec~~ satis
 opportunā damnat fidei eius testificationem, qua
 perfectiores & instructiores quidam Christiani,
 nihil iam in cibis commune aut immundum esse
 sciebāt. Quod cum tenerent, nec sese id dubitarent
 per Christum esse consequutos, inconsideratius
 atque insolentius, contempto etiam infirmorum
 offendiculo, suæ libertatis conscientiam opere
 ipso, cibusque cuiuslibet vsu declarabant. Hos igitur
 coarguit Apostolus, docetq; eiusmodi suæ fi-
 dei testificationem, non modo non fuisse laudabi-
 lē, tametsi esset fides semper ipsa laudanda, verū
 etiam vitiosam fuisse, propterea quod esset cum
 infirmorum offensione graui & ruina coniuncta.
 Etenim cum sibi persuadere nondum possent, ve-
 teris Mosaicę legis vinculum mediatoris præsenti-
 tia resolutū: quin porius vnā cum institutis Chri-
stianis, legis quoque cæremonias esse retinendas
 propter diuinam eius authoritatē & venerandam
 antiquitatem arbitrantur: si quos Christianos
 animaduertent liberius præter traditam sibi le-
gem sumendis alimentis agere, contēni Dei præ-
 ceptum rati, magis alienabātur à Christo. Et nunc
 ea quidem causa nō est, vt propter tales infirmos,
 non proferre Catholicam fidem nostram ipso o-
 pere debeamus. Nam post longissimū temporis,
 omniumq; gentium confessionem, ac tot œcume-
nicorum decreta conciliorum, quis videri possit
 ex infirmitate scandalum pati, si vel adorari Eu-
charistiam, vel preces fundi pro defunctis, vel in-
 uocari sanctos, vel aliud quidpiam fieri palam, iux-
 ta fidei Catholicę normam animaduertat? Num
 prætexere quisquam potest alterius cuiuspiam
 religionis sub nomine Christiano antiquiorem
 ritum? Num possit hic aliquē offendere nouitas,
 vti olim Iudæos, cū subrutis ueteribus institu-
tis noua placita perditissimę doctrinæ, tanta au-
 ditate suscipiuntur à multis? Veruntamē & modo

subesse interdum iusta ratio potest, quam obrem fidem nostram occultemus. Quid si enim hostes quidem tuos, nemine interrogante, moueris, bilēque ac furorem accenderis, nulla vel fidei, vel fidelium vtilitate? Nullam tum profecto laudem habitura est fidei Catholicæ vltronea professio. Quin potius huc pertinet quod à Christo Domino præceptum est: Nolite sanctum dare canibus, neque margaritas vestras spargere ante porcos: ne fortè conculcent eas pedibus suis, & conuersi dirumpant vos; id est, ne vos obtrectionibus persecutionibusque suis dilacerent. Non autem canibus aut immundis porcis porrigitur, quod profertur ac spargitur propter alios, quorum merito speratur salus atque vtilitas. Nam & Christus Dominus doctrinam sanctam disseminauit, præsentibus atque audientibus Phariseis, quorum erat odium futurum ardentius: tantum abest vt vlium ex audita prædicatione fructum reportarent: Sed nouerat ille suos in eadem auditorum turba, qui sparsas diuinissimæ doctrinæ margaritas collecturi sibi erant ad salutem. Horum igitur fructum & æternum commodum, non erat æquum interneri, propter impiorum ac perditorum quorundam cecam malevolentiam. Hinc & sanctos aliquando viros, in aulis infidelium principum constitutos, fidem Christianam, quam sub militari habitu aliquanto tempore consulto occultauerant, vltro legimus prodidisse, cum vitæ certo periculo, vt eos qui nutare in tormentis, ac prope succumbere videbantur, ad fortitudinis perseuerantiam suo hortatu confirmarent. Tale enim quiddam de B. Sebastiano memoriæ proditum est: qui dux cum esset primæ cohortis militum, imperante Diocletiano, Christianam fidem clam colebat, Christianosque & opera & facultatibus adiuuabat: Sed cum ex ijs quosdam animaduertisset cruciatus

ciatus reformidare, atq; ob id propendere ad lapsum, sic eos cohortatione roborauit, vt agonem martyrij foeliciter absoluerent: in quibus fuisse memorantur Marcus & Marcellianus fratres. Simile quiddam & Vitalis martyr fecisse videtur, qui militans cum Paulino iudice, cum medicum Vrsicinum, post multa grauique tormenta fortiter pro Christi nomine tolerata, ad mortis tamen expauisse sententiam animaduertisset, exclamauit: Noli Vrsicine medice, qui alios curare consueuisti, teipsum æternæ mortis iaculo conficere: & qui per nimios cruciatus iam prope ipsam palmam es consequutus, coronam noli perdere, tibi à Domino præparatam. Aliud est igitur malle torqueri, quam negare aut communicare, si ad id Catholicus vrgeatur: aliud, cum nulla præsertim aut iudicis, aut legis interrogatio est: neque professionem aut Dei honor aut proximi postulat salus, non se detegere, nec fidei suæ lucem inter infidelium tenebras frustra velle proferre. In illo enim martyrum innumerabilium virtus atque fortitudo varijs temporibus enituit, qui pulchrè tenentes quod ait Christus: Estote prudentes sicut serpentes; cum eorum caput, hoc est Christus, seu Christiana fides ac pietas, peteretur: ad hanc conseruandam corpus totum vitamque temporariam, vel morbo citò interituram, carnificum percussionebus & laniationibus obiecerunt. Fertur enim coluber (ait diuus Ambrosius) cum vrgetur periculo, caput semper abscondere: & in orbem se colligens, obiecta reliqua parte corporis hoc solum tueri, quod illæsa feratur membra cætera, saluo capitis vigore, reparare. Hoc tu (inquit) seruato mysticè, Mysticum caput Christus est: quia omnia in ipso constant, & ipse est caput corporis Ecclesiæ: hoc caput qui amiserit, viuendi vsu habere non poterit: Hoc solo distamus à bestiis, ad imagi-

In psalm.
118 ser-
mo. 20.

nem Dei & similitudinem virtutum vigore formati: fides nos ab irrationabilium pecudum comparatione secernit. Hoc caput humani seruate serpentes: Etiam si omnia membra cædantur, totum vratur corpus incendijs, mergatur profundo, euisceretur à bestijs, hoc tamen capite custodito, vita integra, salus tuta est. Nemo enim potest perire cui non sublatus est Christus. In altero verò multorum laudata prudentia est, sic fidem seruans illæsam & caput incolume, vt & corporis tamen vita ad longiores humanos vsus reseruaretur. Quo pertinet mutatio habitus, & siue muliebris, siue militaris vestis assumptio. Cum enim plures habeat vestis vsus, alterum primum, vt corpus tegat: alterum secundarium, vt distinguat vel ornet, siue vt sexui, vel ætati, vel ordini, officiove aptè congruat, si quispiam vitæ necessitate conseruandæ, aut vir fœmineam, aut sacerdos militarem vestem assumat propter vsu priorem, quem esse dixi primum, facti mendacio caret, sicuti & intentione fallendi, etiam si non pauci fallantur. Quod si discrepantis à sexu vel ordine vestis iusta sumendæ causa est interdum, cum (verbi gratia) nudus quispiam periclitetur è frigore: cur nō ea quoque iusta sit alieno habitu sui tegendi ratio, cum vitæ periculum impendeat ab hominis cuiusquam infestatione? Neque verò propterea vestis ad significandum instituta videri debet, quia distinguit alios ab alijs: velut clericos à laicis: mulieres à viris: à militibus mercatores. Nam quæ res non suis distinguitur coloribus ac proprietatibus? Certè & mēs ratione prædita in animo, & certa membrorum compositio ac figura in corpore, hominem secernit à brutis animantibus, neque tamen ad significandum illa homini tributa sunt, sed ad hominem constituendum. Sic & colores & proprietates aliæ quælibet non significandi gratia rebus inditæ sunt, sed

sed vt ornatum haberet quæque res suæ naturæ congruentem. Idemq; iudico de ijs ornamentis quæ arte quæsitæ sunt, vt cuiusque vel ætati, vel ordini, vel sexui conuenirent. Quæ tamen ad significandum assumi possunt, vt non in vocibus modo, verum etiam in habitu, vel vera, vel mendax esse queat religionis professio. Velut si quis sacerdos in persecutione habitu ipso profiteri se velit sacerdotem esse: aut si quispiam paganus & infidelis inter Christianos, vt mortem effugiat, veste clericali significare se velit Christianū: Quomodo cum Romam Gotthi diriperent Ariani, multi se Gentiles, quos adhuc Roma habebat, & factis Christianos esse & vocibus loquebantur: propterea quod hostis, quamuis Barbarus, sed tamen professione Christianus, ea moderatione sequeret, vt templis sacris, memoriisque martyrum, & his qui se Christianos esse dixissent, præcipue parceret: Hac igitur significandi fallendiq; intentione, non modo religionem seu veram, seu falsam: sed neque ordinem, neque sexum, neque vitæ genus mentiri habitu licet. Quamobrem hoc improbens D. Ambrosius, legemque producit ex Deut. cap. 22. Non induetur vir stolam mulie-

Epist. 15.

brem; Si verè discutias (inquit) incongruum est, quod ipsa abhorret natura. Quare enim homo nō videri vis quod natus es? Cur alienam tibi assumis speciem? Cur mentiris fœminam, vel tu fœmina virum? Quia vnumquemque sexum induit natura indumētis suis? Cum verò nō significandi causa sumuntur, sed tegendi atque occultandi sui, cum res postulat, id profecto mendacio caret: Sicuti nec Iosue mentitus est, cum propugnatores vrbs Hai, terga vertendo protrahere longius ab oppido niteretur, quo facilius vtrinque cædi & opprimi possent. Terga enim vertit, non volens significare fuga metum, sed occultare cōsiliū. Sic olim quod erat, nō negare, sed tegere voluit Eu-

Lib. 7.
Hijl tripar
titie ca. 16.

Lib. 6. Tri.
bist ca. 33.

Lib. 2. de
vi. a & h
vestite cle-
ricorum.
cap. 2.

Eusebius Samozatenus. Deportatus enim in ex-
ilium, multas Ecclesias suis pastoribus destitutas
 & desolatas esse conspiciens, habitu (vti Theo-
 doretus scripsit) militari sumpto, thiarâq; operto
 capite, Syriam & Phœnicem & Pataëstinam per-
 agrabat, presbyteros ordinans atque diaconos, &
 alia Ecclesiæ peragens officia. Sic & illa mulier
 septies icta, ne forte (quemadmodum ait D. Hie-
 ronymus) creber medici ad Ecclesiam commea-
 tus suspicionis panderet viam, cum quibusdam
 virginibus ad secretiorem villulam, secto cri-
 ne transmissa est, ibique paulatim virili habitu
 veste mutata, in cicatricem obductum vulnus. Iu-
 liano verò imperante, quidam adolescens, Chri-
 stianus effectus, cum à patre excarnificandus que-
 reretur, schemate mulieris, periculum perse-
 quutionis effugit. Quod igitur lex improbat, si
 nulla fiat, iusta satis causa postulante, id facere li-
 cebit, si talis aliqua subfuerit. Inde etiam illud est
 in Clemētinis constitutum: Qui abiectis vestibus
 proprio congruentibus ordini, alias assumere &
 in publico portare rationabili causa cessante præ-
 sumit, professorum illius ordinis prærogatiua se
 reddit indignum. Idem quoque censemus de cleri-
 cis, sacerdotibus & religiosis quibuscumque, vestem
 simul & tonsurâ, præterquam ex rationabili cau-
 sa, publicè non deferentibus clericalē. Debet enim
 cultus corporis exterior cuiusque conditioni, iu-
 xta probatum populi morem, qui pro lege habē-
 dus est, aptè congruere. Cæterum si quid erit in
 habitu ad significandam duntaxat falsam religio-
 nem institutum, non autē vt homini sit congruum
 pro sua conditione tegumentum, eo prorsus vt
 haud licebit Christiano. Neque enim id iam erit
 occultare sese ac tegere, sed alienam impietatem
 habitu ipso haud secus atque vocibus profiteri:
 Imo verò etsi non esset habitus ad significandam
 religionem falsam directè institutus, puta Iudaif-
 mum,

mum, aut Turcismum, aut hæresim: si tamen ita
 peculiariter siue ex consuetudine vltronea, siue
 ex decreto superiorum, eo habitu falsæ religionis
 homines quidam vterentur (vt, verbi gratia, Iu-
 dæi non modo gente, sed etiam errore aut hære-
 tici passim censerentur, qui eo conspicerentur in-
 duci) non liceret propter offendiculum, eiusmodi
 habitum sumere Christiano. Velut cum in Late- *cano. 62.*
 ranensi concilio constitutū esset, vt Iudæi vtrius-
 que sexus in omni Christianorum prouincia, &
 in omni tēpore, qualitate habitus publicè ab alijs
 populis distinguerentur. Sicuti nec coronam ca-
 pite gestare inter Gentiles olim Christianus mi-
 les potuit, si id de more fieri solebat ad honorem
 cultūque decorum. Quod Tertullianus præten-
 dit, eum defendens ac laudans militem, qui quam
 alij coronam capite gestabant, manibus ipse com-
 prehensam detulit. Meminit & coronæ Cypria-
 nus in hanc partem, cum ait in sermone de lapsis:
Frons cum Dei signo pura, diaboli coronā ferre
non potuit. Ipsæ namq; fores, ipsæ hostiæ, & aræ,
ministri ipsi & sacerdotes idolorum coronari so-
lebant. Itaque nec militari quidē veste se conspici
 Christianus pateretur, vbi id esset à quopiam infi-
 deli principe constitutum, ne quisquam militaret
 Christianus. Quocirca cum legē tulisset Licinius
 Tyrannus, ne quis esset in suorum numero mili-
 tum Christianus, decretum fuit in Nicæna syno- *cano. 12.*
 do, vt si qui per Dei gratiam vocati, primò qui-
 dem ostendissent fidem suam deposito militiæ cin-
 gulo, post hæc autem ad proprium vomitum re-
 uersi essent, vt & pecunias darent, & ambirent
 redire rursus ad militiam, hi decem annos essent
 inter pœnitentes. Non enim (quod insulsè hereti-
 ci quidam arbitrantur) militiam damnat Nicæna
 synodus contra scripturæ diuinam authoritatem:
 sed eorum damnat Christianorum crimen, qui (vt
 se tū res habebat militaris) eo ipso se profitebātur

idololatrias, quo militiæ cingulum repetebant. Ac ubi constaret infidelium habitu non solum infideles uti, verum etiam ~~Catholicos & Christianos~~: ideoque non passim ex habitu religio cuiusque æstimaretur, nihil erit peccati, si quis eo fuerit usus. Vnde cum in Africa Cirila Arianorum Episcopus, Beato Eugenio Carthaginensi Episcopo mandasset, ut quoscunque mares vel fœminas in habitu Barbarico in Ecclesia conspiceret, prohiberet, ille (inquit Victor) respondit ut decuit: Domus Dei omnibus patet, intrantes nulus poterit repellere: maximè quia ingens fuerat multitudo nostrorum Catholicorum, in habitu illorum incedentiũ, ob hoc quod domui regiẽ seruiiebant. At ubi ab homine Dei tale respõsum accepit, statuit in portis Ecclesiæ collocare tortores, qui videntes fœminam vel masculum in specie suæ gentis ambulantes, illico palis minoribus dentatis iactis in capite, crinibûsque in iisdem colligatis, ac vehementius stringentes, simul cum capillis omnem pelliculam capitis auferebant. Nonnulli, dum hoc fieret, statim oculos amiserunt: alij ipso dolore defuncti sunt. Mulieres verò post hanc pœnam capitibus pelle nudatis, præcone præeunte, per plateas ad ostensionem totius ciuitatis ducebantur. Hactenus Victor Vticensis Episcopus. Quod autem suprà dictum est de legis interrogatione, ne id fortè quispiam non satis intelligat, explicandum est exemplo, quo Cardinalis Caietanus est usus. Sicubi enim lex aut consuetudo vigeat eiusmodi, ut tam incolentes quàm aduentitij Christiani, certa quapiam veste aut signo suæ religionis uti iubeantur, quisquis eiusmodi signo recusauerit uti, ne si religionẽ suam patefecerit, occidatur, crimen admisit. Tum quippe sua cuique fides aperienda est, cum fuerit interrogatus, usque adeò ut si ex taciturnitate creditur non Christianus, honorem Deo debitum subtraxisse

cen-

*Lib. 2. de
persequu-
tione Van-
dolica.*

*In 2. 2. q.
43. art. 2.*

consensus sit. Atqui hoc casu, plus etiā quiddam quā interrogatio interuenit, dum vel lege, vel consuetudine flagitatur fidei propriæ manifestatio. Nec verò quicquam obstiterit quod lex eiusmodi fuerit à tyranno lata: quoniam & à tyranno quisque de sua fide interrogatus, eam confiteri tenetur, vt Deo saltem debitum reddat honorem. Quem honorem Christiani veri semper tanti faciendum putauerunt, vt legantur se quidam ultro prodidisse, & cū laterent, suis è tenebris prodijisse, ne taciturnitate ipsa negauisse crederentur. Proinde si hic quoque veteri discrimine, & nec ipsis Grammaticis ignorato, quo cōfessio & professio distinguuntur, licebit vti, dicemus professionem quidem suæ fidei non semper Christiano necessariam esse: confessionem verò, quoniam interrogatione exigatur, nequaquam esse prætermittendam. Verū inter profiteri fidem & confiteri, non semper huius discriminis habita est ratio.

*Quā debeat cordi esse homini Christiano,
quod B. Petrus ait: Parati semper ad
satisfactionem omni poscenti
rationem.*

1. Pet. 3. 15

CAPVT NONVM.

M Agnoscere autem curādum est Christiano, vt pia quadam aueritate verbi salutaris eo proficiat, suæ vt fidei reddere queat rationem, si qua præsertim ab infideli deprecatur. Sic enim à D. Petro scriptum est: Dominū Christum sanctificate in cordibus vestris, parati semper ad satisfactionem omni poscenti vos rationem de ea quæ in vobis est spe. Qua in parte plurimorum in grege Christiano desideratur officiū ac studium, qui secularibus curis implicati, aut immersi desiderijs rerum terrenarum, fidem suam nō exercent, neque excolunt, neque quid sit quod credāt, serio

*Homil. 17.
in c. 1. 164.*

cum animis suis vnquam expendunt. Quo fit vt & hæreticorum vigilantia & acri studio facile vincantur, & eorum in cordibus mortua nimium fide torpentibus, haud ægrè locum blandiens nouitius error inueniat. Denique absurdum est (ait Chrysostomus) quod medicus, coriarius, textor, & omnes generatim opifices, quisque pro artis suæ professione pugnet: Christianus autem non possit vllam religionis suæ asserere rationem. Atqui illæ artes neglectæ, ad pecuniam damnum referunt: huius autem contemptus, ~~animæ~~ detrimentum affert: & tamen tanta miseria, tanta insania laboramus, vt in illas omnem curam cogitationemque conferamus: necessaria autem & salutis nostræ munimenta firmissima pro nihilo ducimus. Hoc non sinit Gentiles recognoscere errorem suum atque deridere. Nam cum ipsi mendacio nixi omnia faciant, vt dogmatum suorum ignominiam defendant, nos autem veritatis cultores ne hiscere quidem ad nostra tutanda possimus: quæ causa est, quin doctrinæ nostræ nimiam damnent imbecillitatem? quin fraudem & stultitiam in nobis suspicentur? quin Christo tanquam mendaci, & multitudinis stultitia fraude sua abutenti maledicant? Huius nos causa blasphemix, nos (inquam) qui nolumus pijs religionis nostræ sermonibus inuigilare, sed superuacuis & caducis rebus curam omnem adhibemus. Qui saltationis, & aurigandi, & bestias conficiendi studio delectantur, huiusmodi certaminibus totis viribus incumbunt, ne inferiores euadant, & studia sua maiorem in modum laudant, & aduersus eorum accusatores excusationem meditantur: In Christiana autem religione defendenda, nulla cura adhibita torpescimus, oscitamus, maxime ridiculi deprehendimur: & qui non summam Dei subimus in-

digna-

dignationem, cum Christum inferiore loco quam saltatorem habeamus? Credimus in patrem, & filium, & spiritum sanctum: in resurrectionem corporum, in vitam æternam. Si quis Gentilium percontaretur, quis hic pater est, quis filius, quis spiritus sanctus? tres deos asseritis; & vos plurium deorum assertores reprehenditis. Quid ad hoc dicetis? quid respondebitis? quo pacto has dissoluetis obiectiones? Quid autem, si nobis ad hæc obmutescantibus, aliam inferat quæstionem, An in hoc corpore, an in alio resurrecturi simus? Et si in hoc, quæ necessitas ut dissoluatur? Quid præterea hoc tandem & non superiori tempore Christus humanam carnem accepit? Quid si hæc & eiusmodi percontaretur? Quod si Gentiles ut contra religionem nostram loquerentur, tantopere inuigilarunt, qua nos venia dignamur, nisi huiusmodi contra nos insultus propulsare calleamus? Hoc nobis Petrus præcipit. Inquit enim: Parati *L. Petri 3.* semper ad satisfactionem omni poscenti vos rationem de ea quæ in vobis est fide ac spe, Et Paulus: Verbum Christi inhabitet in vobis abundanter. Sed quid ad hoc respondent fucis stultiores? *Coloss. 3.* Benedicta omnis anima simplex: & qui simpliciter ambulat, in fiducia ambulat. Hoc namque omnium malorum causa est, quod non multi scripturarum testimonia in opportunis rebus sciunt adducere. Non enim in eo loco simplex pro stulto, & pro eo qui nihil nouit, intelligendum: sed pro non malo, non versuto. Nam si ita intelligeretur, superuacaneum fuisset dicere: Estote prudentes sicut serpentes, & simplices sicut columbæ. Hæc D. Chrysostomi utilissima sunt monita, quæ si omnes pro suo quisque ordine sequeremur, magis multo inter persequentium hæreticorum linguas, fidei catholicæ veritas effulgeret: minus sibi tanquam de victoria multi passim sectarum

ama-

amatores applauderent, qui dum in multos incidunt imperitos, nimumque rudes, & tamen aliorum subinde pastores atque doctores, perinde ac si nemo posset fortior occurrere, de communi imbecillitate gloriantur. Non tantam denique stragem animarum istiusmodi persecutiones verborumque dimicationes facerēt, si verbi Dei gladio quisque nostrum promptius vteretur. Neque tamen ex dictis consequens esse putandum est, ut quoties quisque interroget, fideique ac spei nostrae rationem exposcat, toties eam reddere debere videamur, cum hic sedulo (quod supra quoque dixi) cauendum sit ne sanctum canibus ingeramus, aut ante porcos spargamus margaritas. Verum sic esse semper instructus Christianus debet, sic vel generales quasdam fidei speique suae tenere rationes, ut possit opportunē omni posceti, siue credenti, siue incredulo, spei Christianae proferre rationem. Cum enim persuasum habet infidelis spem Christianorum ac fidem inanem esse, neque ullam eius censet posse reddi rationem, tum pati non debet Christianus, de sua spe interrogatus, ut spem vanam & nullo nixam fundamento gerere videatur. Sin autem nō iam ut causam audiat, cuius nullam reddi posse definitum habet, sed ut irrideat magis ac blasphemet, iterum atque iterum interrogaue-rit, nemo hic necesse esse putet operam in reddēdaratione ponere, quae perdi videatur. Cauendum interim est ne silentio nostro quicquam ponderi veritatis & diuino honori decedat, ponendumque ante oculos Christi saluatoris exemplū, qui cum alias iniurias silentio praeterierit, ad eas tamē quibus patris honor lederetur, nunquam putauit esse conticescendū. Imprimis verō ij, quorum ad munus pertinet docere & tutari veritatem, cōmittere nunquam debent ut veritatem catholicam silentio suo esse patiatur indefensam. Idcirco Augustinus: Cum Deus (inquit) imperet ut loquamur & pra-

Matth. 26.

Epist. 169.

prædicemus verbum, & docentes quæ non oportet refellamus: & instemus opportunè atque importunè, nullus hominum mihi silentium de his rebus persuadendum arbitretur: violenter autem vel latrocinantes si quid audendum putauerint, non deerit Dominus ad tuendâ Ecclesiâ suam, qui iugo suo, in gremio eius toto orbe diffuso, omnia regna terrena subiecit. Ad similem modum & D. Basilius: In alijs (inquit) Præfekte, modesti sumus, & omnibus reliquis humiliores: ita enim mandatum iubet, nec solum contra tantam potentiam, sed nec contra homines viles supercilium attollimus. Vbi verò Dei periclitatur negotium, cunctis alijs contemptis ad illû solum respicimus. Itaque *in oratione* Iustiniani Augusti temporibus, cum in Africa *Naxiâreni* tholici quidam Episcopi pro auita religione *de Basilio.* fortiter starent, & nec imperanti quidem silentium regi parendum esse arbitrarentur: ne tacendo (inquit Gregorius) forsitan consensisse viderentur, *Lib. 3. dialog. ca. 32.* amputatis eam ob rem Barbari iussu linguis, singulari nihilominus Dei beneficio loquuti sunt, & nec elingues silere potuerunt, perdurauitque hoc in ijs loquendi munus, nisi quod vnus inluxuriam postea lapsus, mox dono miraculi priuatus memoretur. Porro duobus modis (ait Venerabilis Beda) de spe & fide nostra rationem poscentibus reddere debemus, vt & iustas fidei & spei nostrę causas omnibus intimemus, siue fideliter, siue infideliter requirentibus: & ipsam fidei nostrę professionem illibatam semper teneamus, etiam inter pressuras aduersantium, ostendentes per patientiam, quàm rationabiliter eam seruandam didicerimus, pro cuius amore nec aduersa pati, nec mortem subire formidemus. Præclare hoc *Lib. 9. Eclesiast. Hist. ca. 6.* præstitit Lucianus presbyter Antiochenus, vir moribus, continentia & eruditione facile præcipuus. Nimirum quoniam hoc ipsum præses postularat, eiusmodi verbis eum compellans: Cur tu vir

tu vir rationalis & prudens sequeris sectam,
cuius non potes reddere rationem? Aut si est ali-
qua, audiamus. Extat etiam apud Prudentium
præclarum admodum in Romano & fortis, &
pulchrè instituti Christiani exemplum. Cum enim
dixisset Præfectus Æsclepaides:

*Mens obstinata est, corpus omne obcalluit,
Tantus nouelli dogmatis regnat furor.
Hic nempe vester Christus haud olim fuit,
Quem tu fateris ipse suffixum cruci.
Hæc illa crux est (inquit) omnium nostrum salus.
Scio incapacem te sacramenti impiè
Non posse cæcis sensibus mysterium.
Haurire nostrum, nil diurnum nox capit,
Tamen tenebris proferam claram facem.
Sanus videbit, lippus oculos obteget.
Remouete lumen, dicet insanabilis,
Iniuriosa est nil videnti claritas,
Audi prophane quod grauatus oderis.*

Ac posteaquàm breuiter de mysterio salutis no-
stræ differuisset, ne aut sine ratione crucifixum
nos colere crederemur, aut illius honor maneret
indefensus, addit:

*Dixisse pauca sit satis de mysticis
Nostra salutis, deq; processu spei.
Iam iam silebo, margaritas spargere
Christi vetamur inter immundos fues:
Lutulenta sanctum ne terant animalia.*

*Eusebius
lib. 5. Ec-
clesiast. Hi-
storia 6. 2.*

Beatus verò Photinus Lugdunensis Episcopus,
interrogatus à præside, quis esset Christianorum
Deus, respondit: Si dignus fueris, scies. Ex quo
responso tanta cunctos rabies immensi cuiusdam
furoris inuasit, vt & qui propè astabant, pugnis,
alij calcibus subigerent senem. Illi verò quilon-
gius

gius aberant, quicquid furentibus teli venisset in manus, eminus iaciebant, ita ut quisque summi sibi esse delicti duceret, nisi aliquid in senem sceleris attulisset. Hic verò apprimè seruandum illud est quod in Euangelio Christus admonuit: Cum tradent vos, nolite cogitare quomodo aut quid loquamini. Dabitur enim vobis in illa hora quod loquamini. Non enim vos estis qui loquimini, sed Spiritus patris vestri qui loquitur in vobis. Quibus verbis non industriam humani ingenij, non orationem, non Christianæ prouidentiae studium excludi putandum est, sed anxiam sollicitudinem, quæ de propriarum virium & humanæ imbecillitatis contemplatione facile suboritur, in ijs præsertim qui in se omnem spem reponunt sui, nec cogitant à Domino & sapiētiam subministrari & sermonem aptum oportere. Vnde sic scriptū est apud Lucā hoc ipsum quod ex Matthæo cōmemorauimus: Cum inducent vos in synagogas, & ad magistratum, & potestates, nolite solliciti esse qualiter aut quid responderitis, aut quid dicatis: spiritus enim sanctus docebit vos in ipsa hora quid oporteat vos dicere.

Matt. 10:

Luc. 12:

*Integrum esse Christiano, fuga sibi consulere
ut persecutionis pericula vitet.*

CAPVT DECIMVM.

SEd iam de fuga quoque videamus, ea ne probanda sit in homine Christiano, quando religionis causa persecutione premitur. Videbor hic fortasse quibusdam perinde facere, atque si de sole quispiam, vtrum luceat meridie, disputationē introducere velit. Quis enim non protinus dixerit, cuique naturæ iure concessum, ut hostem fugiat suum, cui repugnando par esse non possit? Et tamen doctissimus Tertullianus fugam non permisit Christiano, in eo videlicet, sicuti & alijs in rebus nonnullis, grauiter impingens: Quo non

non impellit zelus malus, & contradicēdi libido? Etenim Tertullianus, cum se ab Ecclesia segregasset, atque per Montani præcipitia corruisset, vti alia quædam, ita & librum de fuga in persecutione aduersus Ecclesiā scripsit. Quam & in libro de corona militis perstringit his verbis: Plane superest vt etiā martyria recusare meditentur, qui prophetias eiusdem spiritus sancti respuerunt. (Montanicum autem paracletum significat) Musitant denique tam bonam & longam pacem sibi periclitari. Nec dubito quosdam scripturas emigrare, sarcinas expedire, fugæ accingi de ciuitate in ciuitatem: nullam enim aliam Euāgelij memoriam curant. Noui & pastores eorum in pace leones, in prælio ceruos. Sic Tertullianus. Verū tamē quid hic facere liceat, dubium esse non potest, cum & Domini præceptum teneamus, & exemplum: præceptum quidem, cum ait: Si persecuti vos fuerint in vna ciuitate, fugite in aliam. Quanquā hoc Tertullianus propriè ad personas Apostolorum, & tempora, & causas eorum pertinere defendat: omitto enim illum commentarium, nec qui refellatur dignum duco, quem in historia sequutus Socrates altero etiam improbato expressit his verbis: Illic præcipitur vt fugientes habitationem mundanam, Hierusalem requirāt supernam. Hoc igitur neglecto (vt certè minimè literalī) Tertullianus non perpetuum ad omnes pertinens, sed temporarium, Apostolos duntaxat cōcernens, de fugiendo præceptum esse contendit: nimirū quia solis ijs & alia quædam dicta sunt, quæ eodem capite præscribuntur. velut illud: In viam gentium ne abieritis, & in ciuitates Samaritanorum ne intraueritis, sed potius ite ad oues quæ perierūt domus Israël. Nobis enim & via nationum patet, in qua & inuenti sumus: nec cura nobis Israëlī peculiariter iniuncta est, nisi quatenus & omnibus gentibus prædicare debemus. Item quod cōtinuū sequi-

Mat. 10.

*Lib. 8. tri-
par. Hist.
cap. 11.*

sequitur, fugæ præceptum: Amē dico vobis, non consummabitis ciuitates Israhel, donec veniat filius hominis. Quasi non etiam nobis ad similem modum colligere liceat, ad alios quoq; fugæ præceptum pertinere, quia dicatur omnibus quod præcedit: Cum tradent vos, nolite cogitare quomodo & quid loquamini, dabitur enim vobis in illa hora quid loquamini. Non enim estis vos qui loquimini, sed spiritus patris vestri qui loquitur in vobis. & rursus: Eritis odio hominibus propter nomen meum: qui autem perseuerauerit vsque in finem, hic saluus erit. Et quod sequitur: Nolite timere eos qui occidunt corpus, animam autem non possunt occidere: sed potius timete eum qui potest & corpus & animā mittere in gehennam. Tamen si sunt igitur nonnulla, quæ Apostolos, eorumq; causas & tempora peculiariter cernant, sunt & ea tamen non pauca, quæ ex communi & ad omnes pertinente ratione omnibus præscripta noscuntur. Si enim (vbi visum est Tertulliano) fugiendum fuit Apostolis, propter profectum annunciationis, ne illis statim oppressis, euangelij quoque disseminatio perimeretur: cur non similem ob causam se fuga subinde subtrahāt ex inimicorum furoribus, quorum vitæ officia diu videantur adhuc Reipub. Christianæ profutura? quibus pares nō facile substituas? quibus oppressis, pia incepta multa interitura sentiantur? Tantum igitur de præcepto. Exemplum verò præbuit Christus fugiendi, cum Iudæis lapidare ipsum volentibus propter assertionem diuinitatis suæ, subduxit sese à templo, & abscondit. De eo quoque scriptum est, quod in Iudæam terram ire aliquādo recusauit, propterea quod eum Iudæi ad necem quærerent. Sed & post cum ad diem festum ascendisset, non id manifestè, sed quasi in occulto fecisse narratur. Est etiam apud Matthæum, Phariseos iniisse consilium, quomodo Iesum perderent:

F

Hunc

Iohannis 8.

Iohannis 7.
Matth. 12.

Matth. 4.

Hunc verò cum id non ignoraret, in desertum secessisse. Secessit idem tum quoque in desertum, cum de interfecto Iohanne Herodis iussu nūcium accepisset. Hæc verò ille ipse fecit qui palam postea loquebatur, & nec tenebatur. Quorum alterum potestatis fuit, alterum exēpli. Nam quando latuit vt homo, non potentiam perdidisse putandus est: sed exemplum nostræ infirmitati præbuisse. Ille enim quando voluit, detentus est: quando voluit, occisus est, inquit Augustinus. Sed quoniā futura erant membra eius, id est, fideles eius, qui non haberent illam potestatem, idcirco quod latebat, quod se tāquam ne occideretur occultabat, hoc indicabat factura esse mēbra sua, in quibus vtique membris suis ipse erat. Non enim Christus in capite & non in corpore, sed Christus totus in capite & in corpore. Membra igitur ipsa mihi nunc intueri: & non vulgares modo Christianos, non infirmos duntaxat aliquos è plebe promiscua, verum etiam ipsos arietes Dominici gregis Apostolos, fuga sibi consuluisse reperies. Cōsentem audiamus de semetipso gentiū Apostolum: Damasci (inquit) præpositus gentis Aretæ Regis, custodiebat ciuitatem vt me comprehenderet, & per fenestram in sporta demissus sum per murum, & sic effugi manus eius. Ille ipse cum Barnaba ex Iconio commotis aduersum eos ciuitatis principibus ad Licaoniæ ciuitates Listram & Derben profugit: Cum Sila verò ex Thessalonica, propter Iudæicos furores, nocturnis emissus tenebris, in Boerræam se contulit: Et cūm deprehēsis Iudæorū insidijs, qui deuouerant se neque manducatuos, neque bibituos, donec Paulū interfecissent, Cæsaris appellauit tribunal: nonne illorum cruentas manus hac ratione tibi videtur effugere voluisse? Vt cūq; igitur se habeat præcepti Dominici sensus: Si persequuti vos fuerint in vna ciuitate, fugite in aliam, (nam Chrysostomus quidem, non de his persequutionibus (inquit) hoc dicit,

Act. 9.

2. Cor.
vin. ca. 11.

Act. 17.

Act. 17.

Vide bla-
rim & ex-
pla Scriptu-
rarū anod
Libana, in

dicit, quæ post crucem fuerunt, sed de his quas ante
 crucem & passionem habuerunt, quod significanter
 expressit, dicens: Non enim obibitis ciuitates israhel,
 donec venerit filius hominis. Vt igitur non
 huic nos cōmentario nimium opponamus, certe
 Paulus post crucem persequutiones passus, exēplo
 suo, fugæ probauit consilium, atque etiam inter
 gentes fieri posse declarauit, quod scriptum est: Si
 persequuti vos fuerint in vna ciuitate, fugite in al-
 liam. Quod prudenti ac verè Christiano fieri con-
 silio, præsertim ab infirmis, non ægrè perspicit,
 quisquis satius esse considerat patriæ commodis
 carere, quàm inter hostium furores & cōtumelias,
 variasq; & graues iniurias, de æterna salute peri-
 clitari. Quis enim in tanta imbecillitate virium
 humanarum securus sit, fore se victorem? Quis in
 multitudine succumbentium, facile præsumat se
 futurum fortiorem? Quocirca lapsis in persecu-
 tione, non est (ait Cyprianus) iusta aliqua & grauis
 causa quæ tantum facinus excuset. Relinquenda
 erat patria, & patrimonij facienda iactura. Cui
 enim nascenti atque morienti non relinquenda
 quandoque patria, & patrimonij sui facienda ia-
 ctura est? vt Christus non relinquatur, salutis ac
 sedis æternæ iactura timeatur. Clamât ecce per
 Prophetam Spiritus sanctus: Discedite, discedite,
exite inde, & immundum nolite tangere. Exite
 de medio eius: Mundamini qui fertis vasa Domi-
 ni; & qui sunt vasa Domini ac templum Dei, ne
 immundum tangere, & feralibus cibis pollui
 violarique cogantur, non exeunt de medio nec
 recedunt? Alibi quoque vox auditur è cælo, præ-
 monens quid Dei seruos facere conueniat, di-
 cens: Exi de ea populus meus, ne particeps sis
 delictorum eius, & ne perstringaris plagis eius.
 Qui exit & cedit, delicti particeps non fit: plagis
 verò & ipse constringitur, qui socius criminis
 inuenitur. Et ideo Dominus in persequutione

in Apolo-
 gia de fuga
 sua quæ e-
 liam ex es
 cōmmento-
 rarij in
 tripartita
 historia,
 116 c. 22

Sermone 9
 de lapsis.

Isaia 52

Apoc. 18.

*Docet hoc
idem Basi-
lius in mo-
ralibus Re-
gula 62.
ca. 2. & 3.
Ad omnia
tempora re-
ferens Do-
mini de fu-
ga præce-
ptum.*

*Lib. 4. Epi-
stolarū B-
pistolæ. 6.*

secedere & fugere mandauit, atque id vt fieret & docuit, & fecit. Nam cum corona de Dei dignatione descendat, nec possit accipi, nisi fuerit hora sumendi, quisquis in Christo manens interim secedit, non fidem denegat, sed tempus expectat. Qui autem cum non secederet, cecidit, remansit negaturus. Dissimulanda fratres veritas non est, nec vulneris nostri materia & causa reticenda. Decepit multos patrimonij sui amor cæcus, nec ad recedendum parati aut expediti esse potuerunt, quos facultates suæ velut compedes ligauerunt. Illa fuerunt remanentibus vincula, illæ catenæ, quibus & virtus retardata est, & fides pressa, & mens victa, & anima præclusa, vt serpenti terram, secundum Dei sententiam, deuoranti, præda & cibus fierent qui terrestribus inhærerent. Hæc diui Cypriani verba sunt notatu dignissima: quibus non modo quid facere liceat ostendit, verum etiam vt fiat adhortatur, suiq; temporis lapsos, ex Dominici & præcepti, & exempli comparatione reprehendit. Quocirca cum nos persequitur hostis, qui animam quoque nitatur perdere, (quâquam id facere nisi consentientibus volentibusq; nobis non possit) non modo patriam fuga deserere culpa vacat, verum etiam fidei præclara virtus est, quantum alij contagia locorum, periculaq; corporum fugitant, tantum fidei corruptelam, animæq; perniciem declinare. Hinc tot sanctorum in Ecclesia, fuga laudabilis, quia patriam quam cælum relinquere, & pecuniam quam fidem perdere, & ab amicis alienari, quam à Deo, maluerunt. Non horruerunt solitudinem, quia solus non est, (ait Cyprianus) cui Christus in fuga comes est: Solus non est, qui templum Dei seruans, vbicumq; fuerit, sine Deo non est. Et si fugientem in solitudine ac montibus latro oppresserit, fera inuaserit, fames ac sitis, aut frigus affligerit, vel per maria præcipiti nauigatione properantem tempestas aut pro-

procella submerserit, expectat militē suum Christus ubicunque pugnātem, & persecutionis causa pro nominis sui honore morienti prēmium reddit, quod daturum se in resurrectione promisit. Nec minor est (inquit) martyrij gloria, non publicē & inter multos perisse, cū pereūdi causa sit propter Christum perire. Sufficit ad testimoniū martyrij sui testis ille qui probat martyres & coronat. Idcirco Paulus ille memorabilis heremicultor, cū persecutionis procella detonaret, in villam primū remotiorē (vt scriptū est ab Hieronymo) secretioremq; secessit: sed cēpit sororis maritus prodere velle, quem ~~calare debuerat~~. Non illum sororis lachrymā, nō communio sanguinis, non spectans cūcta ex alto Deus, ab scelere reuocauit. At hæc instabat crudelitas quæ pietatem videbatur imitari. Quod vbi prudētissimus adolescens intellexit, ad montium deserta confugiens, dum persecutionis finem præstolaretur, necessitatem in voluntatem vertit. Hilarionem quoque (vt ait in Tripartita Socrates) ne martyr esset, fuga prohibuit. Fugiebat enim (inquit) quia *Lib. 6. c. 13* præceptum diuinum est non expectare persecutores. Nam qui in persecutione comprehenduntur, fortiter ferre iubentur.

*Proponuntur ac dissoluntur quadam argumenta
Tertulliani, quibus probare nititur non esse
licitam in persecutione fugam.*

CAPVT VNDECIMVM.

AT Tertullianus fugiendi consiliū improbat varijs argumentis. Primū est, quia persecutio à Deo euenit. Tametsi enim præbeat ministerium suum iniquitas diaboli, Domini tamen arbitrio res geritur, à quo nisi potestas permittatur, nec homini, nec dēmoni vlla esse in pios

facultas potest. Hic est qui dicit: Ego Dominus creans pacem, & facies malū, id est bellum. Hic est qui mortificat & viuificat, deducit ad inferos & reducit: Percutiā (inquit) & ego sanabo. Vnde & in Psalmo sic loquuntur afflictī persecutionibus, & vexati Dei cultores, tanquā omnis persecutio à

Psalm. 43. Deo profecta sit: Dedisti nos (inquiūt) tanquam oves escarū, & in gētibus dispersisti nos, & iterum: Quoniā humiliasti nos in loco afflictionis, coope-ruit nos vmbra mortis. Igitur si à Deo persecutio euenit, nullo modo fugienda erit: cum quod à Deo sit, neq; euadere quisquā possit, neque euitari debeat quia bonum est. Est enim delictum (inquit Tertullianus) quod bonum sit recusare, præsertim quia Deo visum est. Quā autem bona sit ac salutaris persecutio, probat hoc modo: Quia tū magis Deus creditur cū magis timetur: maximè autē timetur in persecutione. Tum enim Ecclesia in attonito est, tūc & fides in expeditione sollicitior, & disciplinatio in ieiunijs, & stationibus, & orationibus, & humilitate, in alterutra diligētia & dilectione, in sanctitate & sobrietate. Non enim vacatur nisi timori & spei. Quod igitur tam vtile sit ac salutare, respuere ac fugere nemo debet. Verū istiusmodi primū argumentis perinde concluderis, nec pestem, nec famem, nec eluiones aquarum, nec incendia, nec quicquam talium malorum fugiendum esse: neque his malis resistendum, aut quærenda remedia quibus depellantur. Sunt enim à Deo hæc omnia, nec quicquam nisi quod bonum sit, facit Deus. Tu igitur inundantibus, cunctatq; obuia rapientibus aquis obices aut aggeres obijcies, quas Deus immisit? Tu aduersus famem quam Dei nutu pateris, alimenta conquireris? Tu ægritudinem fugare conaberis medicinæ pharmaco, quæ te nutu & voluntate Dei corripuit? quæ in te vitia carnis debilitat? quæ humiliat, & à peccatis multis abstinere cogit? Hoc si
facere

facere non liceret, non medicum Sapiens honorari iussisset, quod eum propter eiusmodi morborum necessitates creauerit altissimus. Iam bella ipsa, hostilesque inuasionem aut irruptiones, à quo, nisi à Deo, euenire dicemus? Malè igitur contra Philisthæos Iudei, cōtra vicinas gentes Paganorum Machabæi, contra irruptiones Barbaricas Romani toties arma sumpserunt. Malè & aduersum Mahometi successores, nostri maiores tot bella gesserunt, & iisdem etiam nunc, quoad fieri potest, repugnatur. Hic tamen etiam Lutherus victum sese & argumenti pondere pressum fatebitur. Nempe cuius ille est inter cæteros articulus, Præliari aduersum Turcas, esse Deo repugnare, visitanti iniquitates nostras per illos. Fortasse & castitati eiusque professioni propterea repudij libellum dedit, ne repugnaret obstinatius libidini, cuius renatis in peccati pœnam, bella intestina relicta sunt. Et tamen qui hostes immisit in Iudæos ad eorum flagellanda peccata, is Iudæ Machabæo præclare astitit ad eosdem debellandos. Dedit idem Christianis principibus, aduersus immanissimos Turcas memorabiles sæpe victoriæ triumphos, sæpiusque (vt opinor) dedisset, nisi prosperos successus, aut nostris viribus atque industriæ, quàm victrici dexteræ Dei maluissimus assignare per superbiam, aut morum inueteratis vitijs corrupissemus, aut domesticis implicati diffidijs inturbauissemus. Loth Abrahæ frater diuina dispositione per hostes captiuus abductus est, & Abrahæ tamen Deus & animū & vires subministravit, quibus ille captiuitate liberaretur. Cur ergo reducere voluit, quem Deus abduxerat? cur aggressus est eos bello, quos victoria donauerat Deus? Si autem fugere non licet persequentem, quoniam à Deo persequutio est, nec igitur repugnare bello licet persequenti, ne Deo repugnari, à quo immissa persequutio est, videatur.

Quid? si quos Sathanæ tradiderit Deus exagitan-
 dos pro suorū meritis delictorum, non illū extur-
 bare licebit? An frustra exorcismos, quibus spi-
 ritus immundus abigeretur, Ecclesię donauit suæ?
 Nec licet potestati resistere, cum scriptum sit: Qui
 potestati resistit, Dei ordinationi resistit. Sed licet
 ei potestati, qua quisque præficitur alijs, non sit re-
 sistendum à subditis, ei tamen potestati, quæ no-
 cendi duntaxat permissionem facit, de cuiusmodi
 potestate scriptū est: Non haberes potestatem in me
 ullam, nisi tibi datū esset desuper; huic (inquam)
 potestati, alia simili diuinitus quoque cōcessa po-
 testate, rectissimè resistitur. Porro utilis sæpe
 multis persecutio est, quis negat? hoc & D. Cy-
 prianus confitetur. Quia traditam (inquit) nobis
 diuinitus disciplinā pax longa corruperat, iacentē
 fidem & penè dixerim dormientem censura cæle-
 stis erexit. Idcirco etiam gaudere & exultare nos
 voluit Dominus, si propter eum odio sæculi labo-
 remus, persecutionesq; patiamur: quia quando
 persecutiones fiūt, tunc datur coronæ fidei, tunc
 probantur milites Dei, tunc martyribus patent
 cæli. Magnæ igitur utilitates, persecutionū de-
 trimenta sequuntur: verū hæ non persecutio-
 nibus, quæ malę sunt per seipsas, atq; infirmis præ-
 fertim periculosam afferunt tentationem, verū
 gratiæ Dei tribuendæ sunt, qua fit vt diligentibus
 Deum omnia etiam quæ mala sunt & noxia, coo-
 perentur in bonum, his qui secundum proposi-
 tum vocati sunt sancti. Hinc & multis sæpe tenta-
 tiones profunt, quando facit Dominus cum tenta-
 tione prouentū, vt queant sustinere; & tamē quia
 per seipsas noxiæ, periculum nobis afferūt in hac
 imbecillitate naturæ, precamur quotidie vt à ten-
 tatione & à malo, siue, (vt Tertullianus legit) à
 maligno liberemur. Tentationē enim venire non
 cupimus, aut si venit, adiuuari petimus, ne lan-
 guore nostro concidamus. Et quāquam sic quos-
 dam

*Serm. 5. de
lapis.*

*Lib. 4 Epi-
stolarum,
Epistola 6.*

*Lib. de su-
ga in perse-
cutione.*

dam à tentationis hora liberat, vt eos fortes efficiat ac inuictos: hoc tamen etiam modo multi liberantur, si fuga subtracti, in tentationis periculum venire non sinuntur. Et primus quidem ille victoriæ titulus est (ait D. Cyprianus) Gentilium manibus apprehensum Dominum confiteri. *Serm. 5. de lapsis, ininitio.* Secundus verò ad gloriam gradus est, cauta secessione subtractum, Domino reseruari. Illa publica, hæc priuata confessio est. Ille iudicem sæculi vincit: hic contentus Deo suo iudice, conscientiam puram cordis integritate custodit. Illic fortitudo promptior, hic sollicitudo securior. Ille appropinquante hora sua, iam maturus inuentus est, hic fortasse dilatus est, qui patrimonio derelicto idcirco secessit, quia non erat negaturus: confiteretur vtique, si fuisset & ipse detentus. In quibus Cypriani verbis notandum est etiam in fuga confessionem esse. Nam & hoc Tertulliani fuit argumentum, si confitendum sit, fugere non licere. Quanta (inquit) inæqualitas sententiarum iubentis fugere, & inuitantis ad passionem contrariam fugæ? Qui confessus (inquit) fuerit me, & ego confitebor illum coram patre meo. Quomodo cōfitebitur fugiens? quomodo fugiet confitens? At ipsa (inquam) fuga confessio quædam est. Qui enim se subtraxit etiam patrimonio derelicto, tam se quod credit negare & deferere nolle declarat, vt temporaria malit quàm fidem perdere. Quale verò est quod adiungit? Fœlices (inquit) qui persecutionem passi fuerint *3. argumentum.* causa nominis Christiani: Infœlices ergo, qui fugiendo ex præcepto, non erunt passi. Primum enim an non persecutionem patitur, qui patriam, qui domum, qui parentes & amicos, qui facultates, propterea quod Christianus est, deferere cogitur? si patitur, beatus igitur is quoque est qui fugit, quoniam beati qui persecutionem patiuntur propter iustitiam. Sed, quemad-

modum Diuus Cyprianus ait : Inferior hic gloriæ gradus est , cauta secessione subtractum Domino reseruari. Non est autem consequens vt infœlix esse debeat , quia summum non est gloriæ gradum consequutus. Ridet deinde quod à Catholicis dicebatur , Christum Dominum infirmitatem quorundam prospicientem , pro sua humanitate nihilominus & fugæ portum demonstrasse. Non enim idoneus erat (inquit) sine fuga tam turpi , & indigno , & seruili præsidio saluos facere in persecutione , quos sciret infirmos . Potest ille (inquam) varijs modis infirmorum saluti consulere . Nam & vnus est ille de quo scriptum legitur : Raptus est , ne malitia mutaret intellectum , & ne fictio deciperet animam illius. Hic quoque rideat Tertullianus , & dicat : Non enim idoneus erat in persecutione saluos facere quos sciret infirmos , nisi eos ex hac mortali vita subtraheret : planè idoneus erat ex infirmis , fortes & infractos efficere . Ipse est enim qui dat lasso virtutem , & robur ad vincendum subministrat. Cæterum placuit ei quosdam etiam in sua hic infirmitate relictos , & , si tentatio inuolueret , præ imbecillitate cessuros , ad salutis portum prouehere , vel ex hac vita rapiendo , vel fuga subducendo.

*Serm. 4.
Sap. 4.
Serm. 21.
in 1^a ad Cor. 118
ad illud cā
vicorum 8.
Fuge fra-
ter meum.*

Hinc enim Christus fugit (inquit Ambrosius) propter infirmos qui tentamenta grauiora ferre non possunt . Ideo scriptum est , vt de ciuitatibus ad ciuitates fugiamus , & si nos in hac ciuitate fuerint persecuti , fugiamus in aliam. At verò grauius est quod adiungit Tertullianus : Atqui (inquit) non fouet , sed recusat semper infirmos ; primùm docens non fugiendos esse persecutores , sed potius non timendos. Nolite timere eos qui corpus occidere possunt , animæ autem nihil valent facere : sed timete eum qui corpus & animam perdere potest in gehennam.

Eousque

Eousque superbit hæresis, ut infirmos non admittat. Aliter verò Paulus: Infirmum (ait) in fide suscipite. Sed quod non ferendæ infirmitatis argumentum? Si timeant eos qui corpus occidunt. At quinam illi qui hos timere censendi sunt? qui fugiunt. Est enim fuga timoris indicium. Hæc ergo Tertulliani ratiocinationibus conficitur: Non licet timere, non licet ergo fugere. Sed mirum si ea debeat esse Christiani fortitudo, ut mortem non liceat formidare, quam & Christus naturæ impulsu formidauit. Est enim mors inimica naturæ: & sicuti naturalis inest amor vitæ, ita insitum est nobis odium metusque mortis. Si mortem igitur, quoniam ea natura est, timere licet, profecto & eos qui mortem inferunt, naturaliter timebimus: quare etiam naturaliter fugiemus. Num Christus igitur in suis discipulis damnauit naturæ motus, quos in seipsum, ut naturæ similis veritas probaretur, admisit? minimè verò. Sed quoniam metus omnis ex amore nascitur, sicuti est amor quidam vitæ vitiosus, quo plus amatur temporaria hæc vita, quam veritas atque iustitia: ita est vitiosus quidam metus, si mors ista corporis, plusquam æterna damnatio timeatur. Ex hoc enim metu negatur veritas, iustitia violatur, prophanatur religio, occiditur anima ne pereat corpus, offenditur Deus, ut hominis ira vitetur, nec enim de nihilo scriptum est: Qui timet hominem, citò corruet. Hunc ergo metum prohibet Christus, Hunc metum fortiter mittit charitas, quanquam & æterni supplicij diuinitus infligendi metum eo minuat magis, quo fuerit ipsa perfectior. Hoc metu ne in persecutione caderemus, sed libera constantia cum Apostolis dicere possemus: Obediendum esse Deo potius quam hominibus; Christus Dominus mortis metum in sua carne susce-

*Vide Aug.
lib. de gra-
tia & li-
bero arbi-
trio ca. 18.
& ca. 17.
circa imi-
tium.
Prov. 29.*

*Vide Athe-
nassiu Ser-
4. contra
Arianos.*

*Apoc. 2.**Prone. 23.*

fuscepit, atque ad illius aduentum expauescere voluit. Huius denique metus non fuga est argumentum, sed fidei negatio. An non timet eum qui potest corpus & animam in gehennam perdere, qui propterea fugit ne cogatur admittere, quod eum traheret in gehennam? qui propterea nullā viarum, nullā solitudinis, nullā ferarum pericula reformidat? Num hic ex illis est timidis, de quibus scriptum est in Apocalypsi: Timidis autem & incredulis, & execratis, & homicidis, & fornicatoribus, & veneficis, & idololatrīs, & omnibus mendacibus, pars illorum erit in stagno ardenti igne & sulphure, quod est mors secunda? Quin hic potius ille est iustus, quem sic in Prouerbijs Sapiens discreuit ab impio, vt diceret: Fugit impius nemine persequente. Iustus autem quasi leo confidens, absque terrore erit. Quod ne sic acciperes, tanquam iustum nunquam fugam arrepturum esse scriptura significasset, in eiusdē capituli fine etiam hoc addidit Sapiens: Cum surrexerint impij, abscondentur homines: cum illi perierint, multiplicabuntur iusti. Exigit postea Tertullianus imitationem Christi, qui translationem calicis sic à patre petijt, vt tamen acquiesceret in Domini cognita sibi voluntate. Veruntamen, inquit, non sicut ego volo, sed sicut tu. Nec verò dubitandum est, quin cognitæ nobis diuinæ voluntati, sicuti cognita Christo fuit, semper sit obediēter acquiescendum. Idcirco beatus Gentium Apostolus, cum ex Agabo propheta quæ Hierosolymis passurus esset, didicisset, de diuina voluntate satis iam edoctus, non fugam illorum malorum, quæ suggereretur ab amicis, meditatus est: sed potius, Quid facitis (inquit) lachrymantes & cōturbantes cor meum? Ego enim non modo vincula pati optauerim, sed etiā mori Hierosolymis pro nomine Domini mei Iesu Christi. Quod cæteri cum audissent, aierunt: Fiat voluntas Domini. Quod igitur adhuc

adhuc fugisset Paulus, si Domini nescisset voluntatē, id iam non fugit, sed offert sese ultro, ut cognitam impleat Domini de se sententiā. Fecit hoc ipsum & beatus Petrus Dominici pastor ouilis. Cum enim passionis esset cupidus, tamen rogatus ut ad instituendum cōfirmandumq; populum sese reseruaret, contemplatione populi precātis inflexus est: Nocte muro egredi cōepit (inquit Amb.) & vidēs sibi in porta Christū occurrere, urbemq; ingredi, ait: Domine quō venis? Respondit Christus: Venio iterum crucifigi. Intellexit Petrus ad suam crucē diuinū pertinere respōsum, quoniam videlicet Dominus iterum crucifigendus esset in seruulo. Itaque sponte remeauit; interrogantibus Christianis responsum reddidit, statimque correptus, per crucem suam honorificauit Dominum Iesum. Parendum est igitur cognitæ Dei volūtatī. Sed hanc quibusdam priusquam caperentur patefecit, nec tamen ne caperentur effugerunt, quod scirent diuinum impleri decretum oportere. Fugerat enim quondam (ait Tertullianus) quidam animosus propheta Dominum: traiecerat ab Ioppem Tharsum, quasi & à Deo transfretaret, sed illum non dico in mari & in terra, verū in vtero etiā bestię inuenio: in quo nec mori per triduum potuit, nec vel sic Deum euadere. Pertinent sanē hæc eo, ut intelligamus perstultū esse, id effugere niti, quod decreuisse Deum nouerimus. Sed plerique quid sit de ipsorum morte diuinitus constitutum ignorant, priusquam iam comprehensi videant inuitabiliter sibi esse moriendum. Itaque priusquam in hostilē potestatem inciderint, tanquam quid decreuerit de eorum exitu dominus vitæ & mortis incerti, neque sibi facilē ac temere martyrij coronam præsumentes, quæ de Domini dignatione descendat, vitam hanc temporariam prudenti atque securiore fugiendi ratione conseruant: quos si postea capi contigerit, viderintq; moriendi

Lib. 5. Epistolarū in oras. cōtra Auxentiū.

*Pontius
diaconus
in passione
B. Cypria-
ni.*

moriendi sibi tempus diuinitus constitutum, fortiter pro Christi nomine mortem excipiunt. Sic ergo quisquis ille est Rutilius (cuius Tertullianus meminit) cum toties fugisset persecutionem de loco in locum, atque etiam periculum (ait Tertullianus) nummis redemisset, post totā securitatem quā sibi perspexerat, ex inopinato apprehensus & præsidi oblatus, tormentis dissipatus (credo, inquit, pro fuge castigatione) dehinc ignibus datus, passionem quam vitarat, misericordia Dei retulit. D. quoque Cyprianus cum moriendi horam adesse vidisset pro Christi confessione, prolata sententia, Status Cyprianus gladio feriat; respondit: Amen. prompto videlicet animo excipiens mortem, quam in hoc tempus videbat diuinitus esse dilatam. Non enim suo quisque, sed diuino consilio moritur. Itaque mortem quidam fugerunt atque supplicia, & in ea, cum sic esset prouisum, inciderunt, coronamque martyrii quam non querebant, Dei miseratione reppererunt. Alij cum ad mortem pro Christi nomine subeundam magnis votis anhelarent: ideoque ab officij sui ratione propter hostium minas atque insidias nec latum vnguem discederent, non sunt tamen quod cupiebāt cōsequuti. Ego (inquit Ambrosius,) nōne quotidie visitandi gratia prodibam, vel pergebam ad martyres? non regiam palatij pretegebam eundo atque redeundo? Et tamē nemo me tenuit, cum exturbandi me haberent, vt prodiderunt postea, voluntatem, dicentes: Exi de ciuitate, & vade quod vis. Expectabam (fateor) magnum aliquid, aut gladium pro Christi nomine, aut incendium: at illi delicias mihi pro passionibus obtulerunt. Sed athleta Christi non delicias, sed passiones suas exigit. Quin etiam miraculo quodam significat, cum quæreretur in basilica, se fuisse conseruatum: Nōne ante biduum (inquit) vt meministis, etiam illud repertum est, quod à parte leua basilicæ, ingressus

gressus quidam peruius fuit, quem putabatis clau-
 lum esse atque munitum? Sepserunt nempe ar-
 mati basilicam: explorabant hos atque illos a-
 ditus: cæcitate perfusi sunt, vt quod apertum
 erat, videre non possent. Itaque per plurimas
 noctes, quod apertum fuit, non ignoratis. De-
 finite ergo sollicitari, quia hoc erit quod Chri-
 stus iubet, & hoc esse expedit. Denique exem-
 pla vobis legis proferam. Helisæus quærebatur
 à Rege Syriæ, missus erat exercitus qui eum ca-
 peret, circumuallatus erat vndique: cœpit ti-
 mere eius seruulus, quia seruulus, hoc est, non
 erat liberæ mentis & liberæ potestatis: petiuit
 aperiri eius oculos sanctus Propheta, & ait: Re-
 spice & vide quanto plures sint pro nobis quàm
 contra nos: respexit & vidit angelorum milia.
 Aduertitis igitur, quod seruulos Christi custo-
 diunt magis qui non videntur quàm qui viden-
 tur? At (inquis) hoc illud est propter quod non
 videatur esse fugiendum, sed confidendum de Do-
 mini tutela? Est (inquam) cum huius tutelæ fi-
 delis consideratio munit atque armat remanen-
 tes, si videlicet officij ratio retinet: si nulla via de-
 monstratur humanitus, qua prudenter euitari pe-
 ricula posse videantur: vbi firma fide vsurpandum
 est illud cum pio Propheta: Esto mihi in Deum
 protectorem & in locum munitum. Sic enim fit
 quod B. Petrus ait: Vt qui patiuntur secundum
 voluntatem Dei, non secundum suum arbitrium,
 fideli creatori commendent animas suas in bene-
 factis. Cæterum cum suppetat euadendi via, si te
 confidas diuinis præfidijs inter hostium gladios
 & tela seruandum, quid aliud quàm id sequeris,
 quod veteri (illa Sathanæ tentatione suggestum
 est: Mitte te deorsum? scriptum est enim: Quoniam
 angelis suis mandauit de te, vt custodiant te in
 omnibus vijs tuis? Ideoque vt illi dictum est, sic
 tibi quoque ne in re dicatur, caue: Non tentabis
 Domi-

1. Pet. c. 4.

Lib. 12.
citra Fan-
sum ca. 36

Dominum Deum tuum. Pertinet ad sanam doctrinam (inquit Augustinus,) vt quando habet quod faciat homo, non tentet Dominum Deum suum. Neque enim & ipse saluator non poterat tueri discipulos suos, quibus tamen ait: Si vos persecuti fuerint in vna ciuitate, fugite in aliam. Cuius rei prior exemplum præbuit. Nam cum potestatem haberet ponendi animam suam, nec eam poneret nisi cum vellet, in Ægyptum tamē infans portantibus parentibus fugit, & ad diem festum non euidenter, sed latenter ascendit, cum aliās palam loqueretur Iudæis irascentibus, & inimicissimo animo audientibus, nec tamen valētibus in eum mittere manus. Qui ergo palam docendo & arguēdo, & tamen inimicorum rabiem valere in se aliquid non sinendo, Dei demonstrabat potestatem, idem tamen fugiendo & latendo hominis instruebat infirmitatem, vt Deum tentare non audeat, quando habet quod faciat, vt quod cauere oportet euadat. Neq; enim & Apostolus Paulus desperauerat auxilium, protectionemq; diuinā, fidemq; perdiderat, quando per murum in sporta submissus est, vt inimicorum manus effugeret. Non ergo in Deum nō credendo sic fugit: sed Deum tentaret si fugere nolisset, cum sic fugere potuisset.

Liceatne aliquando Christiani populi pastoribus fuga sibi consulere, aut onium sibi creditarum curam deferere, propter pericula persecutionum.

CAPVT DVODECIMVM.

Est autem hoc loco peculiaris quædam & propria causa pastorum seu episcoporum, & ea sanē grauis: vt quibus sit pro alijs peruigilandum, tāquam ducibus atque custodibus Domini gregis, ideóque cauendum, ne conspecto lupo fugiant, pecoraq; diripienda & lanianda relinquunt.

Non

Non enim leue est si Dominus conqueri & deplorare cogatur: Dispersæ sunt oues meæ, eo quod non esset pastor: & factæ sunt in deuorationem omnium bestiarum agri: & dispersæ sunt. Errauerunt, errauerunt greges mei in cunctis montibus, & in vniuerso colle excelso, & super vniuersam faciem terræ. Dispersi sunt greges mei, & non erat qui requireret. Mercenarium esse non pastorem Christus in Euangelio pronunciat, qui videt lupum venientem & fugit: eo quod non pertineat ad illum cura de ouibus, satisque esse putet si lac de grege colligat, & lanis operiatur, tanquam videlicet propter sua commoda præfecturam gereret, nō propter aliorum vtilitatem & salutem. Talis igitur, cui nihil est in studio potius, quàm vt semetipsum pascat, & ea quæ sua sunt quærat, non quæ Iesu Christi, haud mirandum est si commota persecutione, per quam illi sua commoda periclitentur, aut ouilis sui locum deferat, aut præsens etiam corpore, fugiat animo, curam pascendi, lupinósque morsus propulsandi relinquens: Vereri autem debent istiusmodi pastores quod ait Cyprianus, ne ijs vel negligentia segnis, vel duritia crudelis adscribatur in die iudicii, quod sibi creditas & commissas oues nec curare in pace, nec in acie armare & tueri voluerint. Verum reperiuntur meliore mente nonnulli, quibus curæ est aliena salus, nec temporaria sua commoda vt prima consecretantur: sed eos propriæ salutis pericula terrent, verenturq; ne sibi consulant malè, dum alios conseruare nitantur. Itaque hi subinde tanquam impares oneribus sustinendis, quæ redduntur persecutionum periculis grauiora, deferre quod susceperant meditantur, & in aliquam solitudinem abdere sese, non tam studio quietis, quàm officij rectè faciendi quadam desperatione. Qui profecto cum pericula fugiunt, in grauiora imprudentes incurrunt, Si enim quemadmodum

G

ait

Lib. 1. Epl.
Solariū 8.
pistola 2.

*Lib. 1 de
vita con-
templatiua
cap. 16.*

98

DE OFFICIO

ait D. Prosper, periculosum est, nauim inter fluctus
cautè non regere: quanto periculosius est, eam
vndis intumescens fluctuantem, in tempesta-
te relinquere? Ad quam sicut satius est non ascen-
dere, ita semel susceptam conuenit fluctuantis pe-
lagi proiecta formidine, ac spe perueniendi con-
cepta vsque in portum, sine vlla mercium iactura
perducere. Et idcirco Ecclesia (inquit) quæ velut
nauis per mare mundi huius enauigat, quæ diuer-
sis tentationum fluctibus in hac vita contunditur,
quæ immundorū spiritūū persecutionibus, velut
quibusdā procellosis fluctibus, in diuersa iactatur,
quæ scandalorū cautibus vadosis illiditur, quæ ve-
lut aggere arenæ grauantis cingitur, non relinquē-
da est, sed regēda: quæ sicut omnes quos vehit per-
ducit incolumes, gubernatoris vigilantia guber-
nata, ita non solum omnes quos habet, sed etiam
ipsum gubernatorē perdet, submersa fluctibus aut
soluta. Hac ipsa fluctuātis nauis vsus similitudine
Nicolaus Pontifex eius nominis primus, porrectę
sibi consultationis decisionem eiusmodi, sua inter
rescripta reliquit: Sciscitaris vtrum cum à Normā-
nis de Episcopo depellaris, debeas de cætero in
monasterio cōuersari. In quo scias, charissime fra-
ter, quod si perniciosum est proretam in trāquilli-
tate nauim deferere, quāto magis in fluctibus? Vbi
non dicimus (inquit) quod persecutorū non fu-
giamus, maximeq; Paganorū insidias, cum ad tem-
pus sæuiūt, & ob multitudinē delictorum nostro-
rum, nocendi facultatē diuinitus assequūtur: præ-
sertim cum eis vltro prodire non debeamus, &
multos prophetas & Apostolos, ipsum quoq; Do-
minū huiusmodi fugisse insequutores, luce clarius
cōstet: Sed quod præcipuè nos, qui tanquā arietes
ducatum gregibus præbemus, imo qui & horum
pastores sumus Deo authore, cum eis in periculis
pro viribus persistere pro certo cōueniat. Et cum
tranquillitas reddita diuina fuerit pietate, sopitāq;
furen-

parentium infestatio, mox gregem perquirere, & in vnum colligere, & eius animos cœlestis patriæ pace ac potissimum securitate prædicata sursum erigere debemus. Hoc igitur in persecutione munus episcopi est, Nicolai paucis verbis luculenter expressum: quibus non dissimilia reperiās apud Leonem, in ea epistola quæ scripta est ad Rusticum Narbonensem Episcopum: Quem al-

loquens, Miror (inquit) dilectionem tuam intantum scandalorum quacunque occasione nascentium aduersitate turbari, vt vacationem ab Episcopatus laboribus optare te dicas, & malle in silentio atque otio vitam degere, quàm in his quæ tibi commissa sunt permanere. Dicente verò Domino: Beatus qui perseuerauerit vsque in finem; vnde beata erit perseuerantia, nisi de virtute patientiæ? Nam secundum Apostolicam prædicationem: Omnis qui voluerit piè viuere in Christo Iesu, persecutionem patietur. Quæ non in eo tantum computanda est, quod contra Christianam pietatem aut ferro, aut ignibus agitur, aut quibuscunque supplicijs, cum persecutionum seuitiam suppleant & dissimilitudines morum, & contumaciæ inobedientium, & malignarum tela linguarum: quibus conflictationibus cum omnia semper Ecclesiæ membra pulsentur, & nulla piorum portio hic à tentatione sit libera, ita vt periculis nec otia careant, nec labores, quis inter fluctus maris nauem diriget, si gubernator abscedat? Quis ab insidijs luporum oues custodiet, si pastoris cura non vigilet? Quis denique latronibus obisset & furibus, si speculatorem in prospectu explorationis locatum ab intentione sollicitudinis, amor quietis abducat? Hæc Leo. Quod si non & inter hostes suos periculâque persecutionum stare fortis ac perseuerare cum grege deberet Episcopus, non sic Angelo Pergami ecclesiæ in Apo-

Epistola 93

Apocal. 2.

sedes est Sathanæ, & tenes nomen meum, & non negasti fidem meam: Et in diebus illis Antipas testis meus fidelis, qui occisus est apud vos, ubi Sathanas habitat. Quàm autem & in sede sathanæ constitutus vigilare debuerat, consequentibus ostèditur: Habeo (inquit Dominus) aduersum te pauca, quia habes illic tenentes doctrinam Balaam, qui docebat Balac mittere scandalum coram filijs Israël, edere & fornicari, ita habes & tu tenentes doctrinam Nicolaitarum. Similiter pœnitentiam age: si quo minus veniam tibi cito, & pugnabo cum illis in gladio oris mei. Ne verò quiscum hęc sic à nobis dici miretur, quasi nunquam pastoribus fugam licitam arbitremur, adhibenda est ea consideratio, cuius nos D. Augustinus prudentissimè doctissimèque simul admonuit, in ea Epistola quam scripsit ad Honoratū Episcopum: Cùm enim hic impendente Vandalica persecutione, litteris quæsiisset, essetne recedendum Episcopis & clericis, diligenter hoc imprimis commendauit Augustinus, ne plebs vnquam sine ministerio necessario relinqueretur. Namque (vt ait) an non cogitamus cum ad istorum periculorum peruenitur extrema, nec est potestas vlla fugiendi, quantus in Ecclesia fieri soleat ab vtroque sexu, atque ab omni ætate concursus, alijs baptismum flagitantibus, alijs reconciliationem, alijs etiam pœnitentiæ ipsius actionem, omnibus consolationem, & sacramentorum confectionem & erogationem? Vbi si ministri desint, quantum exitium sequatur eos, qui de isto sæculo vel non regenerati exeunt, vel ligati? Quantus etiam est luctus fidelium suorum, qui eos secum in vitæ æternæ requie non habebunt? Quantus denique gemitus omnium, & quorundam quanta blasphemia de absentia minorum & ministrorum? Vide (inquit) quid faciat malorum temporalium timor, & quanta in eo sit acquisitio malorum æternorum.

Si au-

*Possid-
mus in vi-
ta Aug.*

Si autem ministri adsint, pro viribus, quas eis Dominus subministrat, omnibus subuenitur: alij baptizantur, alij reconciliantur, nulli Dominici corporis cōmunionē fraudantur: omnes cōsolantur, ædificantur, exhortantur, vt Deum rogent, qui potens est omnia quæ timentur auertere, parati ad vtrumque, vt si non potest ab eis calix iste transire, fiat voluntas eius, qui non potest mali aliquid velle. Hoc igitur cōstituto, vt necessario ministerio, sine quo viuere nequeunt, fideles non fraudentur, quos suo Christus sanguine comparauit: si quisque ministrorum specialiter quæritur à persecutoribus, huic omnino permittitur fugere de ciuitate in ciuitatem. Tunc (inquit) de locis in quibus sumus, præmente persecutione, fugiendum est Dei ministris, quando ibi aut plebs Christi non fuerit cui ministretur, aut etiam fuerit, & potest impleri per alios necessarium ministerium, quibus non est eadem causa fugiendi. Sicut in sporta submissus fugit Apostolus, cum à persecutore propriè ipse quæreretur, alijs vtique necessitatem similem non habentibus, à quibus illic ministerium absit vt defereretur Ecclesiæ. Sicut fugit sanctus Athanasius Alexandrinus Episcopus, cum eum specialiter apprehendere Constantius cuperet Imperator, nequaquam à cæteris ministris deserta plebe Catholica, quæ in Alexandria commanebat. Cum autem plebs manet & ministri fugiunt, ministeriumque subtrahitur, quid erit nisi mercenariorum fuga illa damnabilis, quibus non est cura de ouibus? Veniet enim lupus non homo, sed diabolus, qui plerumque fideles apostatas esse persuasit, quibus Dominici corporis quotidianum ministerium defuit: & peribit infirmus in sua non scientia sed ignorantia frater, propter quem Christus mortuus est. Quod autem ad eos attinet, qui in hac re non falluntur errore, sed formidine

superantur , quare non potius contra suum timorem Domino miserante atque adiuuante fortiter dimicant , ne mala sine comparatione grauiora , quæ multo amplius sunt tremenda , contingant ? Fit hoc vbi Dei charitas flagrat , non mundi cupiditas sumat. charitas enim dicit : Quis infirmatur , & ego non infirmor ? Quis scandalizatur , & ego non vrer ? Sed charitas ex Deo est. Oremus ergo vt ab illo detur à quo iubetur : & per hanc magis timeamus ne oues Christi spiritualis nequitiae gladio in corde , quàm ne ferro in corpore trucidentur . Magis timeamus , ne sensu interiori corrupta pereat castitas fidei , quàm ne foeminae violenter constuprentur in carne : quia violentia non violatur pudicitia , si mente seruetur . Magis timeamus ne lapides viui extinguantur deferentibus nobis , quàm ne lapides & ligna terrenorum ædificiorum incendantur præsentibus nobis . Magis timeamus ne membra corporis Christi destituta spiritali victu , necentur , quàm ne membra corporis nostri , oppressa hostili impetu , torqueantur . Non quia ista non sunt vitanda cum possunt , sed quia potius ferenda sunt , quando vitari sine impietate non possunt . Vnde illud , quod Episcopum quendam dixisse audierat Augustinus : Si Dominus nobis imperauit fugam in persecutionibus , vbi potest fructus esse martyrii , quanto magis debemus fugere steriles passiones , quando est Barbaricus & hostilis incursus ? Hoc (inquam) verum quidem esse fatetur & acceptabile , sed his quos Ecclesiastici officij non tenent vincula . Rectè proinde & Tertullianus cleri fugam reprehendit , quando per eam sic deseritur Ecclesia , vt grex derelictus præda fiat bestiarum agri , dum non est pastor illis . Verum quod eo statuatur nec cuiquam de grege fugere licere , quia non liceat pastoribus , nulla id om-

nino

nino consequutionis necessitate concluditur. Atque si grex fugere deberet, (inquit) nec deberent præpositi stare, sine causa staturi ad tutelam gregis? Sanè, vti antea dictum est ex Augustino, foret ea clero vniuerso ad alia loca commigrandi iustissima ratio, si grex nullus, qui pascendus ac protegendus esset, remaneret. Sed quàm multi plerumque, quod licet, facere non possunt? Quia manet igitur grex, quæriturque totus, manere quoque debent illi per quos est Ecclesiastica supplenda necessitas, ne vigilijs custodiisque remotis, caulæ Dominicæ spiritualium bestiarum pateant incurfibus: manere ipsi præcipuè pastores ac duces debent, qui ad confessionis arma sumenda & faciendam martyria, non verbis plebem (vt ait Cyprianus,) sed factis cohortentur: & imminente Antichristo, parent ad prælium milites, non solum sermonis & vocis incitamento, sed fidei & virtutis exemplo. Dixerit hic quispiam, Diuum Cyprianum, cum peculiariter ipse tanquam Christianorum Papa quæreretur, & latebras inuenire, sicuti cæteri presbyteri, quos Valerianus imprisonis inquiri iusserat, facile potuisset: non tamen latuit, aut fugam meditatus est, sed in hortis suis, sese continuit, tanquam vt comprehenderetur expectans. Sed cum quid detinuerit, Diuus Augustinus ostendit in eo sermone, quem scripsit de sancto Cypriano: Cum (inquit) Cyprianus Sanctus Martyr, de ciuitate Tiburitana, in quam exilio, præcepto Aspasij paterni præconsulis, missus fuerat, regrederetur, in hortis suis manebat. Et inde quotidie sperabat venire ad se, sicut ostensum erat illi. Quid iam fremeret persecutoris impetus, aduersus cor semper paratum, accedente etiam Domini reuelatione firmatum? Quando enim desereret patientem, qui non est passus præocupari

Lib. 1. Epistolæ.
Epistola 1.
ad Lucium
Papam.

Lib. 4. c. 15

cupari nescientem? Simile quiddam de Beato Polycarpo Ecclesiastica Eusebij historia commemorat. Is enim populi furentis acclamatione petitus, tanquam dux & conseruator cæterorum, cum in ciuitate vellet interritus permanere, acquiescens tamen deprecantibus se familiaribus suis, in agrum quempiam ciuitati proximum secessit. Illic autem in oratione positus, triduo antequam comprehenderetur, videt per quietem cervical sui capitis flammis esse consumptum: cumq; euigilasset, interpretatus est astantibus somnium, asserens se propter Christum per ignem vitæ exitum sortiturum esse. Incertus tamen de tempore, hoc quoque tribuit votis amicorum, vt alium in locum commigraret. Sed cum illic quoque per iudicium cuiuspiam ad id coacti verberibus fuisset deprehensus, etsi erat ei perfacilis ex ea domo ad alteram transitus, mouere se tamen loco, & iterum latebras quærere noluit, dicens: Domini voluntas fiat. Quin etiam cum suos comprehensores adesse comperisset, progressus in occursum, læto admodum vultu ac placido viros compellauit. Fugam igitur vltiorem in illis viris inhiuit certa expectatio passionis, de diuina reuelatione descendens, qua tempus adesse diuinitus constitutum admoniti, promptam ad patiendum pro Christi nomine exhibuere volūtatem: quam auidam martyrij & prius habuerant, nec id tamen tanquam sese ingerendo quæsierunt. Quod ipsum si nonnullos fecisse legimus, mirandum id magis quàm passim imitandum esse videtur, & raræ cui-dam subministrationi spiritus assignandum. Exemplum habet D. Ambrosius beati Sebastiani, vbi in Psalmum 118. commentatur: Si multę persecutiones (inquit) multæ probationes; vbi multæ coronæ, multa certamina. Tibi ergo proficit quod multi persecutores sunt, vt inter multas persecutiones facilius inuenias quomodo coroneris.

Vtatur

Vtatur (inquit) exemplo beati Sebastiani Martyris, cuius hodie natalis est. Hic Mediolanensis oriundus est: fortasse aut iam discesserat persecutor, aut adhuc non venerat in hæc partium, aut mitior erat. Aduertit hic aut nullum esse, aut tepere certamen: Romam profectus est, vbi propter fidei studium persecutiones acerbæ feruebant: Ibi passus est, hoc est, ibi coronatus. Si vnus persecutor fuisset, coronatus hic martyr vtique non fuisset. Quærebat tum beatus ille vir certamina, & occasionem pro Christo moriendi venabatur. Quale quiddam & de beato Francisco memoratur, qui martyrij cupidus, ad Solthanum se contulit, vt cruce prædicata, daretur occasio quæpiam eandem per mortem illustrandi. Memorabilis verò hic fuit beatus martyr Gordius, D. Basilij litteris celebratus: qui cùm prius furente persecutione Gentilium fugisset, seque in solitudinem abiecto baltheo militari contulisset, postea spiritualibus exercitijs, diuinisque meditationibus insuperabilis factus, & ad martyrium obeundum diuinitus incitatus, redijt: eoque potissimum tempore, quo equestri spectaculo omnium oculi tenebantur, ex eminentiori theatri parte clarè illud pronunciauit: Ecce inuentus sum ab ijs qui me non quærunt: his qui me non interrogant palam apparui. & postea iudici: Reuersus sum (inquit) palam ostendens quod tua edicta nihil curo. Quæ magis instinctu diuino facta credenda sunt, quàm ordinaria sibi bene consulendi ratione.

Non debere quenquam temerè sese in persecutionum pericula conijcere.

CAPVT DECIMVM TERTIVM.

Q Vippe nostram infirmitatem semper debemus habere suspectam, ex qua non in gra-
uibus

nibus modò, verùm etiam leuioribus tentationibus deficiamus, nisi diuina manu sustentemur. Ideoque monet Apostolus, vt cum timore & tremore nostram salutem operemur, quia Deus est qui operatur in nobis velle & perficere pro bona voluntate. Quod piissimus Propheta cum aliquando non aduerteret, dixit in abundantia cordis sui: Non mouebor in æternum. Sed quid euenit? quãve ratione tam securi cordis est castigata præsumptio? Auertisti (inquit) faciem tuam à me, & factus sum conturbatus. Sed ecce tamen & alterum: Domine (inquit Petrus) etiam si oportuerit me mori tecum, non te negabo. Feruebat illi pro Christo animus, seque posse putabat quod velle sentiebat: verùm labentem infirmitatem nõ multo post ruina manifestat. Ideoque promptis quibusdam & quodam martyrij desiderio feruentibus Dominus misericorditer subtrahit occasiones, ne suos supra id quod possunt, tentari permittat. Certè D. Ambrosius de semetipso loquens & confitens, quid pluribus diuina miseratione præstetur ostendit: Peto (inquit) mihi passionem martyrij: spiritus promptus est, sed videns infirmum carnis meæ, ne dum maiora cupio, minora amittam, dicit: Non potes hæc accipere. Quales (ait) occasiones habui? & de ipso prope fine reuocatus sum. Nouit enim bonus medicus, quæ esca cui apta sit infirmitati, & cui tempori ad profectum valetudinis. Interdum opportunitas escæ, sanitatem reddit: quod si importunè aliquis accipiat, aut non conuenienter, implicatur periculo. Quia ergo nescimus (inquit) quid oremus, & quomodo oportet, spiritus postulat pro nobis. Narrat quendam Corinthium Ecclesiastica historia, ex epistola Smirnenfis Ecclesiæ, exemplo aliorum accensum, dum & ipse fortiter facere statuisset, turpiter in tormentis, quæ sibi temerè accersierat, defecisse: Quæ res (inquit) cum ad martyrium pro-

Epist. 13.

*lib. 4. eccl.
lib. cap. 15*

procacia potius & temeritate, quàm deuotione
 profilijsse declarat. Ipse namque se iudicijs inges-
 serat. Victus itaque exemplum euidens omnibus
 dedit, cautius in rebus talibus & circumspectius
 agendum, quia non temeritas, sed fides & mode-
stia coronatur. Hęc memorata epistola, & quidem
 rectissimè. Etenim orare nos Dominus iubet ne *Matth. 26*
 intremus in tentationem: propterea etiam Chri-
 stum (ait Chrysostomus) non vltro isse in ere- *Homil. 13.*
 mum, sed à sancto Spiritu ductum esse Matthæus *in Matth.*
 commemorat: per ista nobis clam suggerēs, quod
 non spontè nos ipsos in tentationes oporteat in-
 silire, sed si tracti fuerimus, viriliter stare. Idemque
 alio loco: Oremus (inquit) Deum, ne intremus
 in tentationem. Si autem intrauerimus, feramus
 fortiter. Illud quidem temperantium hominum
 est, vt seipsos in pericula non præcipitent; hoc
 autem fortium & Philosophorum. Non itaque
 nosmetipsos præcipitemus quomodolibet, te-
 meritatis quippe esset: neq; iterum aduersis iacta-
 ti, & rebus sic vocantibus, cedamus, timoris nam-
 que hoc esset. Sed siquidem prædicatio verbi nos
 vocauerit, non renuamus: temerè verò, neque
 existente causa, neque vtilitate aliqua, neque ne-
 cessitate quæ ad pietatem pertinet, vocante, non
 irruamus: ostentatio quippe esset & ambitio ho-
 noris superflui. Si autem aliquid eorum quæ læ-
 dunt pietatem contingat, etiamsi mille mortes
 sustinere nos oporteat, nihil renuere debemus.
 Non prouoces tentationes, quando tibi ea quæ
 ad pietatem pertinent, pro voto procedunt: vt
 quid superflua tibi accerferes pericula nullum lu-
 crum habentia? Hęc dico (inquit) volens vos
 custodire leges Christi, iubentis orare, ne intre-
 mus in tentationem, & iubentis vt crucem no-
 stram tollamus, ipsūque sequamur: hæc quippe
 non sunt contraria, sed valde conuenientia. Tu
 quidem esto præparatus sicut miles fortis, in ar-
 mis

*Vide etiam
 homil. 67.
 ad populū
 Antiochenū*

mis perpetuò sobrius, vigilans, semper hostem expectans: bella sanè non excites; hoc quippe militis non est, sed seditiosi. Si verò tuba pietatis vocauerit, confestim procede, & contemne animam, & ingredi cum multa alacritate in agonem: rumpe aciem aduersariorum, concide faciem diaboli, statue trophæum. Si autem pietas nihil leđitur, neque depopulatur aliquis nostra dogmata, dico autem ea quæ ad animam pertinent, neque cogit aliquid facere quod Deo non placeat, noli esse superfluus. Hæc Chrysostomus. Quibus iungendum est quod D. Cyprianus admonuit in eo libro quem scripsit de singularitate clericorum. Quia sunt enim qui prætextu gratiæ auxiliatricis, quam sibi temerè præsto affore pollicentur, minus tentationum pericula refugiunt: Accipimus (inquit) fortitudinem spiritualem, per quam substantiæ nostræ fragilitas roboretur: sed ita nobis spiritualis fortitudo collata est, ut prouidos nos, non præcipientes tueatur. & rursus in eodem libro: Ordine suo, non nostro arbitrio, virtus Spiritus sancti ministratur, & secundum institutum eius, prælia prosperantur, nunquam nisi præcipitatus exercitus cecidit, qui auidus facere ducis vel imperatoris sui dispositiones, irrupit: multo magis per perituram erogat fortitudinem, qui sine armis doctrinæ magistrî spiritus, præsumpserit triumphare, cum dicat: Veh qui per præsumptionem suam aliquid faciunt, non per Deum. Sic eo libro Cyprianus. Sed erunt etiam fortasse, qui propter continentiam & vitæ sublimius aliquod institutum, plus quiddam se in persequutione præstare posse putabunt, quàm inferiores alij, quos certasse fortiter & vicisse cognouerint: ideoq; tanquam securiores de victoria, periculorum esse volent contemptores. Hic verò prudèter Augustinus virginem admonuit, ne tale quid sibi temerè arrogaret, quale fortes nonnullos etiam coniugatos fecisse vidisset vel a^m ^{isset}, verum

*Lib de san
cta virgi-
nitate c. 47*

rdm submissè potius de semetipsa, suaq; firmitate sentiret. Habet virgo quod cogitet (inquit) vt non infletur, non æmuletur, ita se videlicet bonum virginalè bono coniugali multo amplius & melius profiteri, vt tamen nesciat, vtrum illa vel illa coniugata iam pati pro Christo possit, adhuc verò ipsa non possit, & in hoc ei parcatur, quia infirmitas eius tentatione nō interrogatur. Fidelis enim Deus (inquit Apostolus) qui vos non permittit tentari supra id quod potestis, sed faciet cum tentatione etiam exitum, vt possitis sustinere. Fortassis illi vel illæ, coniugalis vitæ retinentes in suo genere laudabilem modum, iam possint contra inimicum ad iniquitatem cogentem, etiam laniatu viscerum & effusione sanguinis dimicare. Illi autem vel illæ, à pueritia continentes, scq; castrantes propter regnum cœlorum, nondum tamen valent talia vel pro iustitia, vel pro ipsa pudicitia sustinere. Aliud est enim pro veritate ac proposito sancto, non consentire suadenti atque blandienti, aliud non cedere etiam torquenti atque ferienti. Latent ista in facultatibus & viribus animorum: tentatione panduntur, experientia propalantur. Haftenus Aug. Idcirco & beatus Gregorius: Cum *1. Corin. 10* persecutionis apertè (inquit) tempus ingruit, *Lib. 3. dia.* sicut plerique martyrium subire possunt qui in pace *logorum* ecclesiæ despicabiles esse videtur, ita nonnūquam *cap. 28.* ~~in debilitatis formidinem corruunt~~, qui in pace ecclesiæ fortiter prius stare videbantur. Rectissime proinde Tuitiensis Rupertus admonuit his verbis, scribens in decimum Matthæi caput: Non præsumas de spiritu fortitudinis, non cito te ipsum præcipites in caminum tentationis, sed timens ne fortè martyrio dignus non sis, fuge, quia non est volentis, neque currentis, sed misipientis Dei. Et iustius necessitas quàm voluntas coronam parit. Verū tamen si expertus es veraciter quod donum habeas supernæ fortitudinis, & hoc tibi Spiritus sanctus

sanctus aliquo modo reuelauit, laudabile est ut vexillum crucis ultro arripias, & procurrens contra hostem, in procinctu fidei confirmes infirmos, & sperandæ à Deo fortitudinis exemplum præbeas. Sic Rupertus. Quia scriptum est igitur, Qui stat videat ne cadat; parumque voluntatis nostræ vires habemus exploratas, nec raro pium desiderium, perficiendi facultas destituat: plerique tentationem non aduocare, sed fugere debemus, ne si periculum quæsisse videamur, in eo implicati pereamus. Est interim verum quod Augustinus dicit alio in loco: Sicut se infirmitas eorum firmitasque habuerit, metuent sancti tentari, cupiunt tentari: dolent in tentationibus, gaudent in tentationibus; ut enim metuant tentari, audiunt: Si præoccupatus fuerit homo in aliquo delicto, vos qui spirituales estis, instruite huiusmodi in spiritu lenitatis, intendens te ipsum ne & tu tenteris. Ut autem cupiant tentari, audiunt quendam virum fortem ciuitatis Dei dicentem: Proba me Domine, & tenta me, ut renes meos & cor meum: ut doleant in tentationibus; vident Petrum flentem: ut gaudeant in tentationibus. audiunt Iacobum dicentem: Omne gaudium existimate fratres mei, cum in varias tentationes incideritis. De iusto quoque perfecto & exercitato cum D. Ambrosius loqueretur: Iustus (inquit) optat probari, tentari non timet. Qui enim statuit custodire iudicia Dei, non timet tentationes. Talis nimirum est qui dicit: Iuravi & statui custodire iudicia iustitiæ tuæ. Stat David mentis statione fundatus, nec timet ne in his mundi tenebris possit errare. Si enim metueret, non iuraret. Est autem hic luculenta prorsus nec prætereunda nobis D. Athanasij inuictissimi Alexandrinorum præsulis oratio. Is in Apologia qua suam fugam tuetur, aduersus maledicos Arianos, qui eum vitiosæ timiditatis accusabant, posteaquam exemplis compluribus & scriptura-

rum

lib. 14. de
ciuit. cap. 9

Galat. 6.

sermo. 14.
in psal. 118

rum testimonijs ~~licitam esse~~ docuisset in persecutione fugam, eruditissimè commōstrat, quemadmodum & vitanda sit temeritas, ne nos in pericula præcipites ingeramus, & diuinæ voluntati, simulatque patefacta fuerit, obedienter acquiescendum. Hoc enim imprimis constituit, cuique suæ vitæ tempus diuinitus esse mensuratum, nec longiorem cuiusquam aut breuiorem, quàm ille dominans in nobis Deus voluerit, vitæ cursum futurum esse. Id autem vt norūt sancti, ita eosdem ignorare subiungit terminos præfixi sibi temporis. Idcirco enim à ~~Dauid~~ peti: Paucitatem dierum meorum nuncia mihi. Hoc ipsum Ecclesiasten quoque disertis verbis expressisse, cum diceret: Et ~~non nouit homo tempus suum~~. Propterea quoque dixisse patriarcham Isaac filio suo Esau: Ecce consenui, & ignoro diem finis mei. Hinc iam docere pergit, neminem ingerere sese in mortem debere, vt tanquam sibi ipse definiat tempus moriendi, quod Deo soli perspectum est, sed quoad ille permiserit, vitam eius munere concessam, conseruandam esse fuga & latebris: vbi autem horam ipse ostenderit, tum minimè repugnandum esse. ~~Vt~~ ut exemplo Christi: Qui sciens (inquit) quot cuique annos ad mensus esset, neque ignorans quod tempus ad patiendum suo corpori præfinisset, vbi propter nos homo factus esset, cæteris diebus, qui hoc tempus antecedeabant, nostro more, cum quæreretur, sese occultabat, & cum eum persequerentur, effugiebat: insidiâsque deuigans, per medios illos transibat. Quum autem tempus à se definitum ipse sibi adduxisset, in quo corporaliter pro hominibus pati volebat, tunc alloquutus est his verbis patrem: Pater venit hora, clarifica filium tuum; nec iam inde se quærentibus subduxit, sed volens comprehendi substitit ac remansit, atque ita eis qui aduersus se tendebant, loquutus est: Quem quæritis? Illisque respon-

respondentibus, Iesum Nazarenum, dixit: Ego sum. Neque semel duntaxat, sed secundo id fecit, atque ita postmodum eum abduxerunt ad Pilatum. Neque ante tempus permisit se capi, neque cum tempus adesset sese occultauit, sed seipsum obtulit insidiatoribus. Deinde adiungens exempla sanctorum: Sancti verò (inquit) pro formula accepta, utpote à Domino eruditi, & priscis olim & sequentibus temporibus, in certamine quod illis erat cum persecutoribus, & fuga se instantibus eripiebant, & quærentibus sese per latebras subducebant: quippe (ut homines) ignari erant temporis sibi à diuina prouidentia constituti, ac proinde minimè sese insidiatoribus ingerebant, cum non ignorarent quod scriptum est: In manibus Dei esse sortes hominum, & Dominum occidere & viuificare: atque ideo vsque ad decursum sui temporis expectare maluerunt: oberrantes interim (ut Apostolus dixit) in melotis & renonibus per solitudinem defraudati, afflictique, & in speluncis foraminibusque terræ latitantes, donec aut mortis definitum tempus superueniret, aut quoadusque definator temporis Deus ipsis hoc indicaret, vel persecutores inhibens, vel persecutoribus eos tradens. Quod aliquando inter fugiendum conuerso itinere se in aduersarios intulere, non temerè hoc ab illis neque inconsultè factum est. Admoniti enim à spiritu, sese persecutoribus obuios ferebant, etiam tum quoque suum obsequiū promptitudinemque declaraturi: Qualis erat Helias à spiritu hoc audiens, & apparens corà Achab. qualis & Michæas propheta, ad Achab accedens. Et post multa concludit: Vtilis igitur (inquit) & non infructuosa populis fuga sanctorum, etiamsi id Arianis non videatur. Quapropter sancti (quemadmodum dictum est) fugientes sese occultabant, & per dispensationem ut medici in usus indigentium reservabantur. Reliquis autem
& in

& in vniuersum omnibus, ea lex proposita est, vt fugiant dum in persecutionibus appetuntur, & occultent sese dum quærentur, neque præcípites temerarijque sint in tentando Domino, sed expectent donec definitum moriendi tempus adueniat, aut iudex ille aliquid de ijs quod sibi rectum videatur, constituerit. Sed tamen nos semper paratos esse voluit, vt vel vocante tempore, vel apprehensi pro Ecclesia vsque ad mortem dimicemus. Hoc & beati martyres temporibus persecutionum obseruauerunt, iidemque quamdiu in latebris erant sese obturabant: vbi autem inuenti essent, martyrium obibant. Quod si quidam ex ijs se persecutoribus dediderunt, non temeritate eo rapiebantur, sed passim apud omnes profitebantur à Spiritu sancto hanc promptitudinem, sui que oblationem profectam esse. Et ad hunc quidem modum B. Athanasius prudenter considerateque perfecit, ne quisquam illi vitium meticulositatis obijciendum putet. Nā cum pastoralis memor officij, cauere id maximè ne populum gregemque suum prodidisse videretur, non prius sese fuga subduxit, quàm & à suis vt id faceret monitus esset, quem vnum quæri non ignorabant, & diuino esset miraculo, quo liberet id magis, confirmatus. Sicuti & sæpè aliàs (vt est apud Theodoretum in Tripartita) diuino nuntio pericula multa fertur effugisse. Sic autem de se scribit in fine Apologię: Nox erat, multi que ex populo ad proximam synaxim in orationibus peruigilabant, cum dux exercitus Syrianus ingressus se pluribus quàm quinque milibus, quorum alij arma, alij strictos gladios gestabant, alij arcus, iacula, fustes: & Ecclesiam, militibus propè inter se conseratis manibus, ne quisquam inde exiret aut elaberetur, cinxit: Ego autem cum in tanta tribulatione populos deferere absurdum putarem, & rectius esse vt pro alijs pericula susciperem, manebam

nebam sedens in cathedra mea, diacono iussu
 ut Psalmum recitaret: Quoniam in sæculum mi-
 sericordia eius; & post recitationem quisque do-
 mum abiret: ubi cum dux istarum cohortium vi-
 in templum irrupisset, militesque sacrarium, ad
 me intercipiendum, obsiderent, quotquot ex cle-
 ro, populo ve residui erant, clamitare, obsecrare,
 ut me subducerem: ego contra, nisi omnibus ad
 vnum digressis, me recessurum pernegabam: qua-
 propter relictæ cathedra, iniunctisque precibus
 obsecrabam, ut abitum maturarent: melius enim
 esse iudicabam si ipse in periculum venire, quam
 ut quisquam illorum acciperet. Digressis igitur
 plerisque, cæterisque eos subsequenter, mona-
 chi mei & nonnulli ex clericis inter abeundum
 me secum abstraxerunt. Atque ita (testor verita-
 tem) per milites, quorum alij sacrarium cingebat,
 alij per templum oberrabant, inoffensè transiui-
 mus: Domino duce & protectore, nihilque ipsis
 sentientibus elapsi sumus, Deum interim magni-
 ficè glorificantes, quod neque populum prodidis-
 semus, & quod ijs prius sine noxa dimissis, qua-
 rentium manus effugissemus. Quum igitur di-
 uina prouidentia nos ita mirabiliter ex hoc peri-
 culo eripuerit, quis mihi id iure vitio verten-
 dum putet, quod non ultro me in manus qua-
 rentium reiecerim, aut remenso itinere, me eorum
 oculis ingesserim? Hæc igitur Athanasius. Quod
 verò D. Cyprianus permittit quibusdam, taci-
 tèque hortatur, ut repetant agonem martyrij,
 ad eos referendum est qui lapsi fuerant prius.
 Quorum tamen delictum poterat pœnitentiæ
 satisfactione purgari, tamen id quoque restabat,
 quod merito facerent, ut diuinum honorem repa-
 rarent confitendo, cui negando labem intulerant.
 Si nimium (inquit) properant, habent in sua po-
 testate quod postulant: largiter acies adhuc geri-
 tur, & agon quotidie celebratur; Si commisi verè
 & si-

*Lb. 3. H-
 pistolarum
 Epist. 18.*

& fideliter pœnitet, & fidei calor præualeat, qui differri non potest, potest coronari. Denique notandum est quod idem ait Cyprianus in eo sermone quem scripsit de mortalitate, nō esse martyrium in nostra potestate, sed de Domini dignatione pendere. Cū enim grassante peste, multosq; cum Gentilibus Christianos quoque rapiente, non deessent qui se quereretur morte præueniri, qui tamen sese ad tolerantiam passionis toto corde & plena virtute deuouissent, hunc quoque impatientioris animi motum sedare volens Cyprianus: Primo in loco (inquit) ~~non est in tua potestate~~, sed in Dei dignatione martyrium: nec potes te dicere perdidisse, quod nescis an merearis accipere. Deinde Deus scrutator renum & cordis, & occultorū contemplator & cognitor, videt te, & laudat, & comprobatur. Et qui perspicit apud te paratā fuisse virtutem, reddet pro virtute mercedem. Nunquid Cain cum Deo manus offerret, iam peremerat fratrem? & tamen parricidium mente conceptū Deus prouidus ante damnauit. Vt illic cogitatio mala & pernicioſa conceptio, Deo prouidente prospecta est: ita & in Dei seruis, apud quos confessio cogitatur, & martyrium mente concipitur, animus ad bonū deditus, Deo iudice coronatur. Aliud est martyrio animum deesse, aliud animo defuisse martyrium. Qualem te inuenit Deus cum vocat, talem pariter & iudicat. Et ad istum quidem modum Cyprianus.

*Cauendum esse Christiano, ne incauta temeritate
persecutionem vel excitet, vel exacerbet.*

CAPVT XIII.

NEc prætereundum est, quod D. Ambrosius, cum de officijs scriberet vitæ Christianæ, his verbis scriptum reliquit: Cauendū reor (inquit) ne dum aliqui nimia gloriæ ducuntur cupiditate, insolentius abutātur potestatibus, & ple-

*Lib. 1. offi-
ciorū: 42.*

*Theodore-
tus lib 5.
cap. 39.
Habet simi-
le quiddā
de Marco
Arethufio-
rum Epif-
copo: qui
templū eo-
rum pro-
phanum,
quod euer-
serat sub
Constantio,
iussus re-
dificare aut
impensas
dare, nec o-
bulum qui-
dem datu-
rum se con-
stantissime
respondit.
lib 6. Tri-
partita ca.
12.*

runque auersos à nobis animos Gétilium in studia
persequutionis excitent, atque inflamment ad ira-
cundiam. Itaque vt illi perseuerare possint, & sup-
plicia vincere, quantos perire faciunt? Et erunt ta-
men fueruntq; semper, qui zelo pietatis hoc se fa-
cere arbitrantur, & fortasse etiam facerent zelo
quopiam religioso incitati, sed non circumspectè
satis prudenterque suscepto: velut qui dominante
adhuc per Imperatores ac Reges Gentilitatis er-
rore, aut deorum inflammabant dēlubra, aut in ijs
idola conterebant. Nam in Perside quidem fuit a-
liquando hæc grauissimæ persequutionis occasio,
quod Pyrrhæum, id est, ignis templum, intempe-
stiuo cuiusdā Abdę calore fuisset incensum. Quod
non rectè factum, ille postea constantissimæ pie-
tatis firmitate correxit. Templum enim reædifi-
care iussus, noluit, ne diuinos honores creaturæ
detulisse videretur. Sicuti nec synagogam Iudai-
cam reædificare licuisse, declarat Ambrosius E-
piscopo, etiam si illam ipse feruentior exuri iussis-
set. de quo scriptum sic habet Epistola 29. quę scri-
pta est ad Theodosium Imperatorem, vindicari
iubentem in Episcopum & Christianos, quod sy-
nagogam Iudæorum incenderant. Relatum est
(inquit) à comite Orientis militarium partium,
incensam esse synagogam, idq; authore factum E-
piscopo: Iussisti vindicari in cæteros: synagogam
ab ipso ædificari Episcopo. Non astruo expectan-
dam fuisse assertionem Episcopi. Sacerdotes enim
turbarum moderatores sunt, studiosi pacis, nisi
cum & ipsi mouentur iniuria Dei, aut Ecclesiæ
contumelia. Sit aliquis iste Episcopus feruentior
in exustione synagogæ, timidior in iudicio: non
vereris Imperator ne acquiescat sententię tuæ? ne
præuaricetur non times? non etiam vereris quod
futurum est, ne verbis resistat comiti tuo? Necesse
erit igitur vt aut præuaricatorem, aut martyrem
faciat: vtrumq; alienum tēporibus tuis, vtrumq;
perfe-

persequutionis instar, si aut præuaricari cogatur, aut subire martyrium. & infra: Quid? si alij timidiore, dum mortem reformidant, offerant ut de facultatibus suis reparetur synagoga? aut Comes ubi hoc comperit primo constitutum, ipse de Christianorum censu exedificari iubeat? Hæbis Imperator comitem præuaricatorem, & huic vexilla committes victricia? huic labarum? Quia verò zeli istiusmodi imprudentis opera, Christianæ modestiæ & patientiæ labem sæpenumero grauem inferebant, decretum fuit, ne qui in templis idolorum, propterea quod illa demolirentur, fuissent à Gentilibus interfecti, martyrum honores acciperet. Nec immerito etiam displicuisse videntur Mensurio Ecclesiæ Carthaginensis ante Cæcilianum Episcopo, ab ijsq; honorandis Christiani prohibiti, qui se non comprehensi offerebant persecutionibus, & vltro dicebant se habere scripturas, quas non traderent, cum hoc ab eis nemo quæsiisset. Quid enim hoc erat aliud, quàm persecutionem prouocare? & bilem mouere Tyranno? Fuerunt igitur, qui ea facerent vel imprudentes & temerarij, vel gloriæ cupidi. Quidam etiam erant facinorosi fisci debitores, qui occasione persecutionis, vel carere volebant onerosa multis debitis vita, vel purgare se putabant, & quasi abluere facinora sua, vel certè acquirere pecuniam, & in custodia delitijs perfrui de obsequio Christianorum. Scribit Eusebius quendam Nicomediæ virum nobilem & illustrem sæculi dignitate, simul ut vidisset aduersus Dei cultores in foro crudelia edicta pendere, calore nimio fidei ignitum, publicè populo inspectante, iniecta manu, librum iniquæ legis detraxisse ac minutatim discerpisse, Augusto, id est, Diocletiano, & Cæsare Maximiano in eadem vrbe constitutis. Ex quo factò quid consequutum sit, non difficile fuerit diuinare. Ira namque

Conc. Elibert. can.

60.

In breuiculo contra Doctores collocatione 3. dici.

Vide hoc ipsum in dicto breuiculo Aug. ex epistola Mensurij.

lib. 8. ecclesiast. hist. cap. 5.

principum, & rabies Gétilitatis irritata in supplicia necésque piorum passim ruit. Quanquam ille confractor iniquissimorum edictorum, cum admiratione omnium fortem se & alacrem in cruciatibus perferendis, veréque martyrem Christi præstiterit. At Diuus Cyprianus istiusmodi persecutionum occasiones & incitamenta sic vitauit, docuitque vitanda, vt nec tum cum vrgentibus negotijs vocaretur, eo concesserit, vbi grauiores motus eius conspectus atque præsentia concitasset. Quod ipse declarat Epistola 8. lib. 1. Accessit hinc (ait) tabescenti animo nostro dolor maior, quod in tanta sollicitudine ac necessitate excurrere ad vos ipse non possum, dum per minas & insidias perfidorum cauemus, ne aduenientibus nobis tumultus illic maior oriatur: & cum paci & tranquillitati Episcopus prouidere in omnibus debeat, ipse materiam seditioni dedisse, & persecutionem denuo exacerbasse videatur. Et rursus Epistola decima lib. 3. Quanquam (inquit) causa compelleret, vt ipse ad vos præperare & venire deberem, primò cupiditate & desiderio vestri, quæ res in votis meis summa est: tum deinde vt ea quæ circa Ecclesiæ gubernaculum utilitas communis exposcit, tractare simul & plurimorum consilio examinata delinire possimus: tamen potius visum est adhuc interim latebram & quietem tenere, respectu utilitatum aliarum, quæ ad pacem omnium nostrum pertinent & salutem: quarum vobis à Tertullo fratre nostro charissimo ratio reddetur, qui pro cætera sua cura, quam impensè diuinis operibus impartit, etiam huius consilij author fuit, vt cautus & moderatus existerem, nec eis locis in quibus toties flagitatus & quæsitus fuisset, me temerè committerem. Epistola quoque libri tertij quinta: Sicut Domini mandata instruunt (inquit) statim turbationis impetu primo, cum me
cla-

clamore violento frequenter populus flagitasset, non tam meam salutem, quàm quietem fratrum publicam cogitans, interim secessi, ne per inuerecundam præsentiam nostram, seditio quæ cæperat, plus prouocaretur. Absens tamen corpore, nec spiritu, nec actu, nec monitis meis defui, quo minus secundum Domini præcepta fratribus nostris, in quibus possem, mea mediocritate consulerem. In hac autem prudentissima sui moderatione, beatum Gentium Apostolum imitatus est Cyprianus. Ille enim excitata per Demetrium de via Domini turbatione, confusioneq; Ephesinæ ciuitatis, & discipulis suadentibus, & amicis rogantibus, acquieuit ne se daret in theatrum: *Altorum cap. 19.* propterea quod eius præsentia non modo non sedasset populi furorem ipsius prædicatione commotum, sed magis etiam vehementiusque prouocasset. Sic, ne vetera prætereamus, subtraxit Iacob, consilio prudentissimæ matris, sui conspectum Esau fratri, vt explendi huius in illum odij nulla remaneret occasio. Saulem quoque Dauid quoties fugit? quoties ne sua ille præsentia exacerbaretur, euitauit? Christus certè ipse suorum in se inimicorum studium prouocare noluit, ideoque cum se ad necem quæri sciret, pessimasque Phariseorum voluntates cognosceret, alio se contulit, tametsi nec præsentem quicumque officere potuisset, nisi voluisset. Ideoque & Athanasius in eiusmodi periculis prudentia Christiana circumspectus, per quattuor mensium spatium in sepulchro paterno delituit, ne quemadmodum historia Tripartita significat, per- *Lib. 7. c. 27* trandorum malorum causa esse videretur.

*Nephas esse mortem sibi consciscere ad effugien-
da persequutionum pericula.*

CAPVT XV.

VT autem sunt, qui temerè sibi pericula persequutionum accersunt: ita reperti sunt fideles, qui eousque refugerent persequen-
tium manus, vt eorum se crudeli nequitiae, mor-
tem sibi met afferendo, subtraherent. Hoc verò in
alteram est peccare partem, grauitèrque delin-
quere: seposita tamen Dei iussione, de qua post
dicetur. Si enim ~~proximum etiam~~ Reipub. no-
xium, authoritate priuata, non licet interfice-
re: multo minus cuiquam liceat extorquere sibi
met vitam, authoritate priuata. Ac si illud id-
circo vitiosum est, quia sit & iniustum, & ab-
horrens ab officio charitatis: quantum crimi-
nis habeat necesse est id factum, quo & grauif-
simum nulla potestate legitima proprio corpo-
ri nocumentum infertur: & maior illa quam si-
bi quisque debet, charitas violatur? Non est
quisquam sui corporis membrorumve suorum
dominus, vt horum aliquid perdere suo arbi-
tratu & iudicio possit. Vnde & illi Philosophi,
qui animas corporibus veluti carceribus inclu-
serunt, nephas tamen esse iudicarunt, iniussu
dominantis in nobis Dei, ex hac vita migrare,
& vincula rumpere carceris, id enim vetare le-
ges: sed tanquam à magistratu, aut ab aliqua po-
testate legitima, sic à Deo euocari atque emitti
oportere. Interest etiam Reipublice, cuius singuli
membra sumus, quomodo, quæue ratione suarum
quicquam partium amittat. Cui proinde fieri con-
stat iniuriam, si nullo publico iudicio, sed priuato,
aut alium quisquam è medio sustulerit, aut se-
ipsum. Denique diuinæ legis præceptum est: Non
occides; vbi additum non est, proximum tuum,
vt diceretur: Non occides proximum tuum. Quod
et si

*Cicero in
somnia Sci-
pionis, li. i. Tu cu-
lanarum
questionū.*

et si dictum reperiretur, tamen consequens esse
 cuius intelligeret, sui quoque cædem prohiberi,
 si proximi prohibita legeretur: Sicuti cum prohi-
 betur falsum testimonium aduersus proximum,
 eo ipso illius ostenditur crimen, qui aduersus se-
 ipsum dixerit. Quippe regulam diligendi prox-
 imum, à seipso dilector accepit, quando scriptum
 est: Diliges proximum tuum sicut teipsum. Id-
 circo Augustinus ad Dulcitium scribens tribu- *epistola 61.*
 num: Quia (inquit) omnis qui sine vlla legiti-
mae potestatis autoritate hominem occidit, ho-
 micida est: quisquis seipsum occidit, non sit ho-
 micida, si non homo est. Verum diuersæ causæ
 existunt, propter quas hominibus interdum, nec
 ijs quidem omnino malis aut insulsis, nequaquam
 alienum ab officio videatur, si mortem sibi ipsi
 consciscant. Velut ea imprimis quæ mouit Ra-
 zium, virum inter Iudæos primarium, de quo scri- *cap. 14.*
 ptum est libro Machabæorum secundo: quod do-
 mi comprehensus ab impijs Iudaicæ religionis &
 gentis persecutoribus, gladio se petijt: eligens
 (ait scriptura) nobiliter mori potius quàm sub-
 ditus fieri peccatoribus, & contra natales suos
 indignis iniurijs agi. Sibi ergo ille nobiliter fa-
 cere visus est, quod summi probri loco duceret,
 ab incircuncisis hominibus, indignis tractari mo-
 dis. Atque hoc quod ei sic visum fuerat, simpli-
 citer & nihil dissimulans, scripturæ sacræ nobis
 author expressit. Verum hoc illius viri iudicium,
 si ad diuinæ legis regulam reuocetur, deprehen-
 detur non Dei, sed mundi fuisse iudicium: quod-
 que fortis ac generosi animi censebat esse, ad fra-
 cti languorem debilitatémque pertinebat. Cum
 etiam (vt ait D. Augustinus) multum in Iudaismo *epistola 62*
 profecisset, quæ sibi in comparatione iustitiæ
 Christianæ, damna & stercora fuisse dicit Apo-
 stolus, & propter hoc idem Razius Iudæorum
 pater appellaretur: quid mirum est si tanquam

homini elatio superba subrepsit, vt mallet manu propria perimi, quàm post illam in suorum aspectibus celsitudinem, sustinere indignam in hostium manibus seruitutem? Solent in literis Gentilium ista laudari. In his autem Machabæorum libris, quamuis homo fuerit ipse laudatus, factum tamen eius narratum est, non laudatum, & iudicandum potius quàm imitandum, quasi ante oculos constitutum: non sanè nostro iudicio iudicandum, quod nos quoque vt homines habere possemus, sed iudicio doctrinæ sobriæ, quæ in ipsis quoque libris veteribus clara est. Longe quippe fuit iste Razius à verbis illis, vbi legitur: Omne quod tibi applicitum fuerit accipe, & in dolore sustine, & in humilitate tua patientiam habe. Non ergo fuit iste vir eligendæ mortis sapiens, sed ferendæ humilitatis impatiens. Scriptum est quod voluerit nobiliter & viriliter mori: sed nunquid ideo sapienter? Nobiliter scilicet, ne libertatem sui generis captius amitteret: Viriliter autem, quod tantas vires animi haberet, quibus idoneus esset, vt se ipse perimeret: quod gladio cum implere non posset, de muro se præcipitem dedit, & sic adhuc viuus abruptam cucurrit ad petram, atque ibi exanguis intestina sua produxit, quæ vtraque manu dissipata spargebat in populū, ac deinde postea defessus occubuit. Magna hæc sunt, nec tamen bona. non enim bonum est omne quod magnum est, quoniam sunt magna etiam mala. Deus dixit: Innocentem & iustum ne occidas. Si ergo iste innocens & iustus non fuit, cur proponitur imitandus? Si autem innocens & iustus fuit, quare interfecto innocentis & iusti, id est ipsius Razij, insuper putatur esse laudandus? Hæc de Razio. Inter Gentiles verò Cato reperitur multum semper à constantia & morum granitate laudatus, qui ne in Cæsaris victoris conspectum veniret, Vtice sibi vitam

vitam ademit: quod eius factum frustra Cicero, proposita naturarum diuersitate, commendat: Hæc enim (inquit) differentia naturarum, tantam habet vim, vt nonnunquam sibi mortem aliquis consciscere, sed non alius, debeat. Non enim alia in causa Marcus Cato fuit, alia cæteri, qui se in Aphrica Cæsari tradiderunt. At qui cæteris forsitan vitio datum fuisset, si se interemissent, propterea quod eorum vita lenior, & mores fuerant faciliores. Catoni autem cum incredibilem tribuisset natura grauitatem, eamque ipse perpetua constantia roborasset, semperque in proposito, susceptoque consilio permansisset, moriendum potius, quam tyranni vultus aspiciendus fuit. Quod naturæ ille concedit graui & constanti, hoc propter superbiam vitium Christiana doctrina condemnat: quo vitio perdere maluit proprijs manibus vitam, quam pro eadem illi, cui semper resistiterat, supplicare. Iustior interimendi sui causa videatur, peccandi periculum. Cum enim pluris facienda sit iustitia quam vita corporis, magisque cauendum ne anima quam ne corpus intreat, non absurdè fortasse fieri videbitur, si iustitiæ violatio & animæ mors grauissima, corporis aduocata morte, caueatur. Ita sane, si vnquam esset ad peccati declinationem, hoc est, ad animi vitandam pestem, sui interfectio necessaria. Sicuti ad conseruationem reliqui corporis, ne qua morbi perniciēs totum corripiat, membri vnus aliquando necessaria præcisio est. Nunc verò, cum ad euitandum in huius vitæ periculis peccatum, ordinatissimum orationis remedium non desit, facit perinde qui se propterea interimit, atque si quispiam descendere volens, relictis gradibus ad id præparatis, sese ex alto præcipitem daret. Proinde si quisquam est ea

præ-

*Officium
lib. 1.*

præditus animi fortitudine, vt vitam hanc perdere satius esse ducat, quàm Deum offendere, iustius has conferet animi vires ad obeundam fortiter mortem alterius illatam iniuria, ne illi ad peccatum consentiat. Cur enim si vitam & sanguinem profundere pro iustitia paratus es, non tibi illam manibus alienis eripi malis quàm tuis? Nec magna profectò iudicij absurditate carere videtur, qui semetipsum tortorem sibi malit esse, quàm hoste. At reperiuntur quarundam exempla virginum atque matronarum, quæ tempore persecutionis, rapidis se fluminibus mandauerunt, vt corporis integritatem tutarentur. De quibus scriptum sic est apud Eusebium: Alij cum ad sacrificandum quærentur, sacrilegam pollutionem vitantes, vitam præcipitio finierunt, minore quidem tolerantiae fiducia, sed conseruandæ fidei maiore cautela. In quibus admirabilis quædam & veneranda foemina, pulchritudine pariter & pudicitia formosa, genere nobilis & copiosa facultatibus: cui erant duæ filiae virgines, honestæ satis, & ad maternæ pudicitiae regulam nutritæ, specie simul & moribus æmula sibi probitate certantes, quas religiosa mater secundum præceptum diuinum in timore Domini æducauerat. Sed pro his quæ supra diximus, vel naturæ, vel institutionum bonis, prauorum hominum multa erga virgines, earumq; matrem contentio exagitabatur, & summo studio, summaq; vi perquirebantur. Cùmque declinandi turbinis gratia sui absentiam procurassent, agitur omni intentione, vt earum præsentia fieret: missi in hoc ipsum milites, repertas eas venire Antiochiam cogunt. Sed cum perurgentibus militibus, vehiculo impositæ iter agerent, talibus religiosa & pudica mater ad filias vtitur verbis: Scitis dulcissimæ mihi filiae, quomodo vos in disciplina Dei æducauerim. Scitis quod à paruulis Deus vobis pater, Deus nutritor, Deus institutor extiterit, & quòd

lib. 3. c. 12.

quod pudicitiae & castitatis bonum ita mecum pariter dilexistis, ut nec oculus quidem vester unquam, (sicut vobis conscia sum) lasciuiore fuerit maculatus aspectu. Quid igitur nunc agimus? Videtis quod ista omnis vis aut à Deo nos studet aut à pudicitia separare. Prostituentur ergo publicis lupanaribus membra, quæ aër pene ipse publicus habuit incognita? Ne quæso filiae, quia nec tam parua nobis in Deo fides est, ut mortem pertimescamus: nec tam despecta pudicitia, ut viuere etiam cum turpitudine cupiamus. Quin potius, si placet, quod in omnibus tenetis, etiam in hoc sequimini matris exemplum. Præueniamus impuras carnificum manus, & impudicorum præripiamus incursum, mundumque hunc, qui nos ad impuram & impudicam compellet ac pertrahet vitam, pura & pudica morte damnemus. Cumque talibus adhortationibus filias ad simile propositum videret accensas, ad fluuium quendam in itinere positum venerunt, ubi cum se humanæ necessitatis causa descendisse simulassent, & paululum custodes cogente naturali reuerentia secessissent, adductis diligentius hinc inde vestibibus, minacis se fluuii rapidis iniecerunt fluentis. Sed & aliæ duæ virgines per omnia insignes sorores, genere nobiles, vita mirabiles, primæ adhuc ætatis specie pulchræ factis, sed anima pulchriores, ornatae moribus magis quam monilibus, studiis apprimè probabiles, non ferentes violari publicis edictis ac legibus castitatem, marinis se fluctibus demersere. Narrat idem *lib. 8. c. 17.* Author de Sophronia, hunc in modum: Cum enim de huius sceminae pulchritudine cognouisset Maxentius (ut ei mos erat) stuprorum ministris deduci ad se sceminam iubet. Illa rem ad maritum detulit. Qui cum comperisset, multa secum voluens, ad vltimum altius ingemiscens: Et quid (inquit) faciemus? quibus aut hæc toleranda sunt, aut anima ponenda. Tum illa ut maritum vidit metu mortis perter-

Lib. I. de
ciuit. Dei,
cap. 26. &
27.

perterritum, prodidisse pudicitiam suam: Paululum (ait his qui missi fuerant) expectate, donec composita (vt decet) & adornata procedam. Dehinc ingressa cubiculum, cum prius defixis genibus orasset, tanquam pudicitiam suam immolatura Deo, pectus ac viscera correpto mucrone transuerberat: Extremos huiusmodi nuntios ad tyrannum per adstantes famulas mittens, Tales (ait) magis placeant Christianæ sceminae tyranno. Hæc igitur apud Eusebium scripta reperiuntur. Verum de istiusmodi factis quid Augustinus senserit, audiendum est potius, ne temerè nos de illis quicquam diuinasse videamur. Cum igitur is ostenderet inferre sibi necem licere nemini, argumenta nonnulla, ad quæ respondeat, sibi ipse proponit. Sed quedam (inquiunt) sanctæ sceminae tempore persecutionis, vt insectatores suæ pudicitia deuitarent, in rapturum atque necaturum se flumen proiecerunt: eoque modo defunctæ sunt, earumque martyria in Catholica Ecclesia ueneratione celeberrima frequentantur. De his nihil temerè audeo iudicare. Verum enim Ecclesiæ aliquibus fide dignis testificationibus, vt earum memoriam sic honoret, diuina persuaferit autoritas, nescio, & fieri potest, vt ita sit. Quid si enim hoc fecerunt non humanitus deceptæ, sed diuinitus iussæ: nec errantes, sed obediens: sicut de Sampson aliud nobis fas non est credere? Cum autem Deus iubet, seque iubere sine vllis ambagibus intimat, quis obedientiam in crimen vocet? quis obsequium pietatis accuset? Sed non ideo sine scelere facit, quisquis Deo immolare filium decreuerit, quia hoc Abraham etiam laudabiliter fecit. Nam & miles cum obediens potestati, sub qua legitime constitutus est, hominem occidit, nulla ciuitatis suæ lege reus est homicidij: imo nisi fecerit, reus est imperij deserti atque contempti.

Quod

Quod si sua sponte atque autoritate fecisset, in crumen effusi humani sanguinis incidisset. Itaque unde punitur si fecerit iniussus, inde punitur nisi fecerit iussus. Quod si ita est iubente imperatore, quanto magis iubente creatore? Qui ergo audit, non licere se occidere, faciat si iussit, cuius non licet iussa contemnere. Tantummodo videat, vtrum diuina iussio nullo nutet incerto. Nos per aurem conscientiam conuenimus, occultorum nobis iudicium non usurpamus. Nemo scit quid agatur in homine, nisi spiritus hominis qui in ipso est. Hoc dicimus, hoc asserimus, hoc modis omnibus approbamus, neminem spontaneam mortem sibi inferre debere, velut fugiendo molestias temporales, ne incidat in perpetuas. Neminem propter aliena peccata, ne hoc ipso incipiat habere grauissimum proprium, quem non polluebat alienum: neminem propter sua peccata præterita, propter quæ magis hæc vita opus est, vt possint pœnitendo sanari: neminem velut desiderio vitæ melioris, quæ post mortem speratur: quia reos suæ mortis, melior post mortem vita non suscipit. Restat vna causa de qua dicere cæperam, qua vtile putatur, vt se quisquam occidat, sed ne in peccatum irruat, vel blandiente voluptate, vel dolore sæuiente. Quam causam si voluerimus admittere, cōsque progressa perueniet, vt hortandi sint homines, tunc se potius interimere, cū lauacro sanctæ regenerationis abluti, vniuersorum remissionem acceperint peccatorum. Tunc enim tempus est cauendi omnia futura peccata, cum omnia sunt deleta præterita. Quod si morte spontanea rectè sit, cur non tunc potissimum sit? Cur baptizatus sibi quisque parcat? Cur liberatum caput tot rursus vitæ huius periculis inserit, cum sit facillimæ potestatis illata sibi nece omnia deui-

deuitare, scriptumque sit: Qui amat periculum, incidit in illud? Cur ergo amantur tot & tanta pericula, vel certe etiam si non amantur, suscipiuntur? Cur manet in hac vita, cui abscedere licitum est? An verò tam insulsa pueritas cor evertit, & à cōsideratione veritatis auertit: vt si se quisquam interimere debeat, ne vnus captiuantis dominatu corruat in peccatum, viuendum sibi existimet, vt ipsum perferat mundum per omnes horas temptationibus plenum, & talibus qualis sub vno Domino formidatur, & innumerabilibus cæteris, sine quibus hæc vita non ducitur? Quid igitur causæ est, cur in eis exhortationibus tempora consumemus, quibus baptizatos alloquendo studeamus accendere, siue ad virginalem integritatem, siue ad continentiam vidualem, siue ad coniugalem fidem, cum habeamus meliora, & ab omnibus peccandi periculis remota compendia: vt quibuscunque post remissionem receptam peccatorum, ad arripiendam mortem, sibi que ingerendam persuadere potuerimus, eos ad Dominum saniores purioresque mittamus? Porro si quis hoc aggrediendum atque persuadendum putat, non dico desipit, sed insanit. Qua tandem fronte homini dicit: Interfice te, ne paruis tuis peccatis adijcias grauius, dum viuis sub domino Barbaris moribus impudico, qui non potest nisi sceleratissime dicere: Interfice te, peccatis tuis omnibus absolutis, ne rursus talia vel etiam peiora committas, dum viuis in mundo tot impuris voluptatibus illecebroso, tot nephandis crudelitatibus furioso, tot erroribus & terroribus inimico? Hoc quia nephas est dicere, nephas est profecto se occidere. Nam si hoc faciendi vlla causa iusta esse posset, proculdubio iustior quàm ista non esset. Quia verò nec ista est, ergo nulla est. Non itaque omnibus vobis, o fideles Christi, sit tædio vita vestra, si ludibrio fuit hostibus castitas vestra. Habetis magnam

gnam veramq; consolationem, si fidam conscientiam retinetis, non vos consensisse peccatis eorum qui in vos peccare permisi sunt. Haftenus Augustinus.

Qui fiat vt oborta persecutione tam multi cadant.

CAPVT XVI.

Quoniam autem oborta persecutione magnus & ingens esse solet cadentium numerus, quid in causa sit, quidve Christiani hominis animum firmare in persecutione possit, dicendum est. Cadunt igitur sepe multi vnus persecutionis terrore prostrati, propterea quod nec pacis tempore stabant satis, à domesticis videlicet hostibus, id est, vitijs superati, atque in ipsa tranquillitate rerum molliter & deiectione viuentes. Nempe cedunt, cum nemo hostiliter persequatur, cumque nemo fuget, funduntur atque dissipantur, per varia vitiorum diuerticula oberrantes. Non euadunt igitur in bello victores, qui nec media in pace salui consistere potuerunt. Et quia tempore pacis, nullum fidei robur collegerant, nulla ad repugnandum arma parauerant, de improviso occupati sternuntur. Faciendum enim fuit quod eiusmodi carmine commonuit beatus Prosper Regiensis Episcopus:

Dum non perturbant animum discrimina mundi,

Dumq; diem pacis praelia nulla mouent:

Exercere fidem diuinis conuenit armis,

Consilioq; omnes anticipare minas.

Tranquillam, & curis vacuam sapientia mentem

Imbuet, & placidi pectoris hospes erit.

Nam quod non fuerit conceptum corde quieto,

Acquiri in saeuo turbine non poterit.

Itaque si acciderit (ait Chrysostomus) quod Deus auertat, neque permittat vnquam euenire, bellum

Epigrammate 91.

Huc refert

Aug. illud

Sapientis

de formica

praeceptum:

Vade ad

formicam &

piger, quae

in aestate

colligit cibum sibi.

ca. 24. lib.

contra Ad-

mantum.

Homil. 34.

in ca. Mat-

thai 10

Ecclesiæ ac persecutio, cogita quantus oritur risus, quàm magna erunt nostra opprobria. Meritò id quidem, nam cum nemo in arena seipsum exerceat, quomodo aliquis in certamine insignis erit atque cōspicius? Quis vnquam athleta non ab incunte adolescentia in palæstra corroboratus, potuit in Olympicis excelso ac magno animo aduersarium aggredi? An non oportet quotidie luctari ac currere? Nōne videtis eos quos quinque certaminum athletas appellant, cum nullum fortè luctatorem repererint, ad saccum arena plenum vires suas excitare? Iuniores verò his cum iunioribus, quasi cum aduersarijs, pugnam & exercitationem inire? Hos imitari stude, ac ipse tecum altioris philosophiæ instituta meditare, ac reipsa plerumque confirma. Sunt enim multi qui ad iras nos rabiem incitant; multi qui concupiscentiæ flammam incendunt. Insurge igitur contra passiones, vincas animi labores, vt corporis quoque labores possis perferre. Nam & beatus Iob ille, nisi antea præmeditatus fuisset, non ita in certamine refulsisset. Nisi certè crebro cogitasset, qua ratione moerorem omnem superaret, dixisset omnino aliquid moestum cum repente obisse filios rescisset. Nunc verò ira exercitatus præmeditatusque fuerat, vt ad omnia ingenti animo perstiterit, ad totius substantiæ, & tam multarum rerum iacturam, ad filiorum amarissimum obitum, ad vxoris affectum, ad acerba corporis vlcera, ad iniusta amicorum opprobria, ad ancillarum contemptum atque seruorum. Quod si eius mirabilia gesta cupis inspicere, ipsum audi, ab eo ipso discere, qualiter vniuersam spernebat pecuniam. Si lætatus sum (inquit) multis mihi affluentibus vndique diuitijs, si recondidi aurum sicut puluerem, si spem in lapidibus pretiosis habui, Hæc ille. Propterea neque cum erepta quidem omnia subito essent, turbatus est, quippe qui præ-

senti-

sentibus non delectabatur. Cum igitur tanta facilitate (ait alibi idem Chrysostomus) carnē exueri debeamus, quanta vestimentum, id præstiterimus, si non fuerimus pecuniæ dediti, si non domibus, si non affectioni; si ab omnibus fuerimus separati: proptereaque multi, ut carnem pro Christi confessione deponant, adduci non possunt, sed vel negant impiè, vel timide dissimulant, vel ipsi adiuncti persecutoribus, eorum etiam promouent conatus, quod vitijs antè corrupti, nullum sibi pro iustitia certamen ineundum putent. Igitur sicut in aream, spirante vento violentius, paleæ quidem mox auolant & mouentur loco leuissimè, grana verò suo pondere eodem in loco consistunt, remanentque in area: Ita in Ecclesia, quæ dominica est quædam area, cum eam ille cœperit ventilare persecutionibus, continuò carnalium hominum tanquam palearum conspicitur leuitas. Nam tranquilla quidem Ecclesia, bonis adherescunt ut granis: in eiusdem professione doctrinæ, & eorundem sacramentorum communione persistunt. Cæterum simulatque cœperit tanquam vento agitante turbari, raptantur mali huc & illuc persecutionis turbine: quiduis annuunt, cunctaque & probant, & confitentur pro victorum libidine, salua modo esse possint ea quæ carnali amore concupiscunt. Vnde fit etiam ut Christi ventilabro iactati, qui prius disiuncti fuerant moribus & affectibus, separètur & locis, in æternum quandoque firmissima & incommutabili separatione segregandi. Quanquam & ij sunt qui idcirco se ad omnem victoriæ partem celeriter accommodent, quod nullam animo veraciter teneant religionem: similes Ecebolo cuidam Constantinopolitano Sophistæ, qui mores imperatorum sequens, sub Constantio quidem (ait Socrates in Tripartita) feruentissimum se finxit Christianum: Sub Iuliano Paganus celeriter effectus est; & rursus post Iulianum

Homil. 5.
in Epist. ad
Hebr.

Lib. 6. 118.
part. c., 8.

volebat esse Christi onus: prosternens etenim se-
 metipsum ante ianuas Ecclesiæ prouum, magna
 voce clamabat: Conculcate me sal infatuatum.
 Pertinet huc, quod D. Augustinus scribit in eo
 sermone qui habitus est de duabus piscationibus
 & centum quinquaginta piscibus: Aliquando (in-
 quit) venti qui tollunt paleam de area, iterum
 flant à sepe ubi hæserat palea, & eam reuocant in
 aream. Sicut verbi gratia (inquit) nescio quis ho-
 mo in Catholica constitutus, passus est aliquam
 tentationem tribulationis, videt sibi carnaliter
subueniri posse in negotio suo apud Donatistas:
 dictum est illi, non tibi subuenietur, nisi hic com-
 municaueris, flauit ventus, proiecit in spinas. Si
 contingat illi negotium sæculare habere rursus,
 quod non possit finiri, nisi in Ecclesia Catholica,
 non attēdens ubi sit, sed ubi negotia sua commo-
 dius explicet, quasi flante vento ab altera parte se-
 pis reuocatur ad aream Domini. Est id quidem ve-
 rum, & nostris quoque probatum temporibus,
 quod apud D. Cyprianum reperitur in libro de
 singularitate clericorum, interdum & mœchos, &
 sanguinarios, & ebriosos, & omnium scelerum
 reos, reperta pugne occasione, conuersos meruisse
 ad martyrii palmā peruenire: Ideo enim martyriū
 (inquit) appellatur tā corona quā baptismus, quia
 baptizat pariter & coronat. Sed verū est etiā quod
 apud eundem legitur in libro de laude martyrii, ad
 huius nominis titulum fide nobiles venisse ple-
 rosque, vt deuotionis obsequium mors honesta-
 ret. Martyres igitur plerunque fuerunt, quorum
 extiterat vita digna martyrio: & in confessione
 fortes plerunque & insuperati manserunt, qui pa-
 cis tempore, quæ vsui in bello forent, parauerant:
 hostemq; aperto Marte terrentem atque sæuien-
 tem debellare potuerunt, qui eius occultas fre-
 quenter insidias & in pace prouidi frustraauerant.
 Si quid præter hanc rationem mirabiliter inter-
 dum

dum euenerit, non ad perniciosæ securitatis ac præsumptionis defensionem trahendum est, sed commendationem gratiæ Dei, quæ cum nullis præcedentibus meritis bonis, sed malis multis datur, euidentissimè exemplis istiusmodi demonstratur.

Cuiusmodi cogitationibus & armis instructum ac munitionem esse debeat Christiani pectus, ut perstare inuictum in persecutione possit.

CAPVT XVII.

MAgnum verò præstat adiumentum ad quæcunque persecutionis tela repellenda, si nos imprimis peregrinos super terram esse cogitemus. Nam si nostra hæc ciuitas esset ac patria, in qua nobis fœlicitatem quærere & constituere deberemus, intollerandum videri posset, exagitari persecutionis turbinibus: vbi enim quies erit atque securitas, si in patria nulla erit? At nunc, cum velut per aliena, præcipiti cursu vitæ huius, iter agamus, cælestem patriam repetentes, haud sanè mirum, si inter extraneos, faciliè inimicos inueniamus, si nostrum iter latrunculi quidam obsideant, ac cœptam fœliciter profectionem interrumpant. Hac armati cogitatione, non franguntur aduersis, non debilitantur desperatione quietis: quia quod inter externos & alienos non obtinent, sua in patria atque inter suos ciues expectât. Exultât imo (inquit Cyprianus) semper in Domino, & lætantur, & gaudet in Deo suo, & mala atque aduersa mundi fortiter tolerant, dum bona & prospera futura prospectant. Exilia non timeant, quibus est totus hic mundus exilium, & habitatio ac ciuitas perditorum. Adhuc ne igitur nocere se putat inimicus, si de natali solo fidelem expulerit? O stulta (inquit August.) infidelitas

*Tractatus
contra De-
metrianum.*

*In sermo.
de sancto
Cypriano.*

persequentis, si quæris exiliū quo Christianus co-
gatur exire. De patria sua in alienam te arbitraris
excludere hominem Dei, in Christo nūquā exu-
lem, in carne ubique peregrinum? Nihil interest,
vbi sit in sæculo, qui extra sæculum est cordis vo-
to. Confert deinde plurimum inenitabilis mortis
variorumq; morborum, quibus ad mortem trahi-
mur, frequens consideratio, præsertim cum semel
morituro, cum gloria etiam moriendi tribuatur
occasio: nec minora interdum sint tormēta mor-
borum aut medicamentorum quàm cruciatus car-
nificum. Reperimus sane Romanum, fortissimum
Christi Dei assertorem, eiusmodi se contēplatione
confirmasse. Sic enim loquitur apud Prudentium:

*Nam membra parvipenda quomodo cadant,
Casura certè lege natura sue.*

Instat ruina, quod resoluendum est, ruas.

Nec distat ignis & fidicula sauiant,

An corpus agrum languor asper torqueat:

Quum sepe morbos maior armet sauitia,

Non ungularum tanta vis letus fodit

Mucrone, quanto dira pulsat pleuresis.

Nec sic iniusta laminis ardet cutis,

Ut febris atro felle venas exedit:

Vel summam pellis ignis obductus coquit,

Papulasq; feruor astuosus excitat.

Credas cremari stridulis cauteribus.

Miserum putatis quod retortis pendeo

Extentus vlnis, quod reuellantur pedes,

Compago nervis quod sonat crepantibus?

Sic eiulantes ossa clamant diuidi,

Nodosa torquet quos podagra & arthrosis,

Horretis omnes hasce carnificum manus,

Num mitiores sunt manus medentium,

Laniena quando sanat Hippocrasica?

Vinum

*Vinum secatur viscus, & recens eror
 Scalpella tegit dum putredo abraditur:
 Putate ferrum triste chirurgos meis
 Inferre costis, quod secat salubriter.*

Tertiò, permagno adiumento est ad mortem incunctanter subeundam, ipsius causæ contemplatio. Quid enim dubitandum est pro Catholica veritate aut iustitia sanguinem fundere? Pertulere quidam sancti graues cruciatus, ne amicorum suorum secreta nudarent: quanto maiorem adhibendam putarunt animi constantiam, ut suæ fidei sacramenta munirent? Adduci non potuit B. Cyprianus comminatione tormenti, ut presbyteros, qui se abdiderant metu persecutionis, proderet, & dubitasset mortem suscipere, ne religionem impio sacrificio violaret? Ideoque cum dixisset ei Procòsul: Vitæ tuæ doleo, & vellē consulere tibi. Sanctus Cyprianus respondit: Consultum mihi melius esse non quæro, quàm ut Deum meū adorans, ad ipsum tota mentis aueritate festinē: quoniam non sunt condignę passionēs huius tēporis, ad superuenturam gloriā, quæ reuelabitur in nobis. In re (inquit) tam iusta nulla est consultatio Non adhuc consulo, quia nō adhuc dubito. Abstulit enim mihi dubitationem ipsa iustitia. Iustus autem ut securus moriatur in carne, certus viuit in fide. Sic enim B. August. Cypriani responsum accepit. Clara igitur atque indubitata causa est, pro iustitia & religione moriendi: eaque prudens & ordinata, ideoq; vera & Christiana fortitudo est, vitæ corporis, iustitiam ac pietatem, Christumque ipsum antepone, & illam malle quàm hunc perdere. Idcirco illos quadraginta milites sic facit Basilius se inuicem cohortantes: Quot nostri com-

*Victor Vell-
 censis lib. 3.
 Hist. Vandalica.*

*Sermon. de
 sancto Cy-
 priano.*

Homil. 17.

homines mortem tulerunt in scelere deprehensi, nos verò pro iustitia mortem non subeamus? Nec igitur deliberare licebit, si id fortè aut iusserit aut permiserit iudex, vtrum sacrificadum aut negandum potius, an verò fortiter pro pietate moriendum putemus. Ex quadam etenim infidelitate proficiscitur ea deliberatio, cum fides non dubitet potius esse mortem oppetendam, quàm negatione vel sacrificio violandam pietatem: aut si nulla est ignoratio non satis instructæ mentis, ipsa profectò ad lapsum volûtas nimium pendula conuincitur, quæ nec puncto temporis esse debet à peccato non auersa. Et tamen scriptum est apud Eusebium de Marino quodâ milite, cum se Christianum esse fuisset confessus, tres ei horas ad deliberandum à iudice decretas esse, vt eligeret malèrne immolare dijs & imperatori parere, an Christianus interimi. Cùmque à tribunalibus fuisset egressus, Theotecnus Episcopus loci, apprehensa manu eius, perducit eum ad Ecclesiam, ibique multis verbis in fide confirmans, ad vltimum in interiora perducit altaris, gladiumque suum, quo præcinctus erat, ostendens ei, & rursus offerens euangelium, quid è duobus mallet, interrogat: Marinus verò promptissima fide cum manum ad euangelium tetendisset; Obtine (inquit Theotecnus) quod elegisti ô fili, & contemnens præsentem vitam, æternam sperato, confidens perge, & suscipe coronam quam tibi Dominus præparauit. Basilium certè, cum præfectus abire iussisset, vt quid facere deberet cogitaret, sententiàmque suam altero die depromeret: ille non tanquam deliberaturus discessit, sed moriendi etiam constantiam pro fide, alacritatèque præ se ferens, dixit: Etiā cras ipse regrediar, dummodo tu sententiam non permutes, sed vttere minis tuis. At verò pecuniam vel sanitati ipsi aut integritati corporis præponere, cruciarique malle, quàm illa perdat, præ-

*lib. 7. bist.
trip. ca. 12.*

*bist. trip.
lib. 7. c. 36.*

præposterum est. Ideoq; beatus Paulinus Episcopus Nolenis, quâdo & ipsam Nolam Barbari vastauerunt, cum ab eis teneretur, sic in corde suo precabatur: Domine, non excrucier propter aurum & argentum, vbi enim sint omnia mea tu scis; hoc ab eo postea se nouisse D. August. testatur li-^{cap. 10.} bro primo de ciuitate Dei. Et quidam tamē etiam Christiani tormentis interdum excruciatī sunt, vt bona sua hostibus proderent: Qui si torqueri (inquit August.) quā māmona iniquitatis proderemaluerunt, boni non erant. Admonendi autē fuerant qui tanta patiebantur pro auro, quanta sustinenda essent pro Christo, vt eum potius diligere discerent, qui pro se passos æterna fœlicitate dītare, non aurum & argentum, pro quo pati miserimum fuit, seu mentiēdo occultaretur, seu verum dicendo proderetur. Nāque inter tormenta nemo Christum confitendo amisit, nemo aurum nisi negando seruauit. Sed quidam etiam non habentes quod proderent, dum habere credūtur, torti sunt? Et hi fortē habere cupiebant, nec sancta voluntate pauperes erant, quibus demonstrandum fuit, nec facultates, sed ipsas cupiditates talibus dignas esse cruciatibus. Si verō melioris vitæ proposito reconditum aurum argentumq; non habebant, nescio quidē vtrum cuiquā talium acciderit, vt dum habere creditur, torqueretur. Veruntamen etiamsi accidit, profecto qui inter illa tormēta paupertatem sanctam confitebatur, Christum cōfitebatur. Quapropter etsi nō meruit ab hostibus cædi, non potuit tamen sanctæ paupertatis confessor sine cælesti mercede torqueri. Hæc August. Nec illud prætereundū est, quā erubescendum erit pro iustitia pati noluisse, quæ pro suis iniquitatibus fortiter sæpe multi pertulerunt. Contēpserunt latrones ipsi cruciatus, eousq; vt mutuis inuicē torquerent officijs, eousq; modo se perferendis supplicijs assuefacerent, ne his victi aliquādo, quæ designa-

*Libello ad
maritum.*

sunt scelera faterentur. Quid memorem Gentiles? qui acerba multa aut æquo animo exceperunt, aut ultro etiam appetiuerunt famæ & gloriæ causa? Longum est (inquit Tertullianus) si enumerem singulos qui se gladio cōfecerint animo suo ducti. De fœminis ad manum est Lucretia, quæ vim stupri passa est: Cultrum sibi adegit in conspectu propinquorum, ut gloriam castitati suæ pareret. Mutius manum suam dexteram in ara cremauit, ut hoc factum eius fama haberet. Minus fecerunt philosophi? Heraclitus, qui se bubalo stercore oblitum exussit? Itē Empedocles, qui in ignes Ætnæ montis dissiliit? Et Peregrinus, qui non olim se rogo emisit? Cum fœminæ quoque contempserint ignes: Dido, cum post virum dilectissimum nubere cogeretur. Item Asdrubalis vxor, quæ iam ardente Carthagine, cum maritum suum supplicem Scipionis videret, cum filiis suis in incēdium patriæ deuolauit. Regulus dux Romanorum, captus à Carthaginensibus, cum se vnum pro multis captiuis Carthaginensibus compensari noluisset, maluit hostibus reddi: & in arcæ genus stipatus, vndique extrinsecus clauis transfixus, tot cruces sensit. Bestias fœmina lubens appetiit, & utique horridiores aspides serpentes, tauro vel vrsō, quas Cleopatra immisit sibi, ne in manus inimici perueniret. Addam & illud ex Plinio Cæcilio, eius qui mundi scripsit historiam nepote. Cum matrona quæpiam, Arria (ni fallor) nomine, cuius maritus fœdo atque insanabili vlcere cruciabatur, ex medicis cognouisset, nullam esse vitæ spem reliquam: ad mariti lectulum astans, gladium adegit pectori: atque in medio vulnere ad illum conuersa: Non sentio, (inquit) non dolet, iuuat etiam mori tecum. Sed mortis metus non tantus est (inquis) quantus tormentorum. Itaque celsit carnifici scilicet meretrix Atheniensis, quæ conscia coniurationis, cum propterea

cor.

torqueretur à tyranno, & non prodidit coniuratos, & nouissimè linguam suam comestam, in faciem tyranni expuit. Nam quod hodie (inquit Tertullianus) apud Lacædemonas solemnitas maxima est Diamastygogis, id est, flagellatio, non latet. In quo sacro ante aram nobiles quique adolescentes flagellis affliguntur, astantibus parentibus & propinquis, & vti perseverarent adhortantibus. Suo quoque tempore Cicero, quod habuit exploratum, id mandandum literis existimauit: Spartæ pueri (inquit) ad aram sic verberibus accipiuntur, vt multus è visceribus sanguis exeat, nonnunquam (vt cum ibi adessem audiebam) vsque ad necem: quorum non modo nemo exclamauit vnquam, sed ne ingemuit quidem. Ad feras quoque milites affectatione descendunt, & de morsibus & de cicatricibus formosiores sibi videntur. Iam & ad ignes quidam se anthorauerunt, vt certum spatium in tunica ardente conficerent: alij inter venatorum taureas, scapulis patientissimis inambulauerunt. Hæc autem non sine causa Dominus in sæculum admisit, sed ad nos & nunc exhortandos, & in illo die confundendos, si reformidauerimus pati pro veritate in salutem, quæ alij affectauerunt pro vanitate in perditionem. Iam si humanam conditionem spectaueris, quàm multa vel inuitis euenire consueuerunt? Quoties enim incendia viuos cremauerunt? quoties feræ & in syluis suis, & in medijs ciuitatibus elapsæ caueis, homines deuorauerunt? quot à latronibus ferro, ab hostibus etiam cruce extincti sunt torti prius, immo & omni contumelia affecti? Nemo non etiam hominis causa pati potest, quod in causa Dei pati dubitat. Et sine fructu illic sæpe passio est ac sterilis afflictio: hic cruciatibus enecatam, refrigeria & gaudia æterna suscipiunt: Beati qui persecutionem patiuntur propter iustitiam, quo-

Lib. 2.

Tuscul.

- quoniam ipsorum est regnum cœlorum. Illic dignitas nulla passionis, hîc ex ipsâ causa patiendi ingens honos accedit. Idcirco enim Apostoli gaudentes recedebant à conspectu concilij, quoniam digni habiti essent pro nomine Iesu contumeliam pati. Si exprobramini (ait Petrus) in nomine Christi, beati eritis, quoniâ quod est honoris, gloriæ & virtutis Dei, & qui est eius spiritus, super vos requiescit. Nemo autem vestrum patiatur vt homicida, aut fur, aut maledicus, aut alienorum appetitor: Si autem vt Christianus, non erubescat, glorificet autem Deum in isto nomine. Et rursum:
1. Petri 4. Hęc est (inquit) gratia, si propter Dei conscientiam sustinet quis tristitias patiens iniuste. Quæ enim est gratia, si peccantes & colaphisati suffertis? Sed si beneficientes patienter sustinetis, hæc est gratia apud Deû. In hoc enim vocati estis, quia & Christus passus est pro nobis, nobis relinquens exemplum vt sequamini vestigia eius. Quoniam igitur & exempla vim habent ad permouendum maximam, ipsum ante omnia Christi præclarissimum exemplum ante oculos cordis assidue ponendum est. In hac enim militia primus ambulauit Dominus, humilitatis & tolerantiae, & passionis magister, vt quod fieri docuit, prior faceret: & quod pati hortatur, prior pro nobis ipse pateretur. Huius
1. Petri 4. (inquit Petrus) passionibus communicantes gaudete, vt & in reuelatione glorię eius gaudeatis exultâtes. Capitis verò passionem tam multa membrorum exempla & præcesserunt & sequuta sunt, vt verè dicere possimus, nihil esse nouum pro iustitia pati, sicut nihil mirum esse docuimus. Exemplum (ait Iacobus) accipite fratres mei exitus mali laboris & patientiæ prophetas, qui loquuti sunt in nomine Domini. Ecce beatificamus eos qui sustinuerunt. Imitemur ergo (inquit Cyprianus) Abel iustum, qui initiauit martyria, dum propter iustitiam primus occiditur, Imitemur Abraham Dei
- amicum,
- lib. 4. epistolarum e-
pistola 6.

amicum, qui ~~non est cunctatus~~ filium victimam
suis offerre manibus, dum Deo fide deuotionis
obsequitur. Imitemur tres pueros, Ananiam, Aza-
riam & Misahalem, qui nec ætate territi, nec cap-
tiuitate fracti, Iudæa deuicta & Hierosolymis cap-
tis, in ipso regno suo regem fidei virtute vicerunt.
Qui adorare statuam quam Nabuchodonosor rex
fecerat iussi, & minis, rogis, & flammis fortiores
extiterunt, proclamantes, & fidem suam per hæc
verba testantes: Nabuchodonosor Rex, non opus
est nobis de hoc verbo respondere tibi. Est enim
Deus, cui nos seruimus, potens eripere nos de ca-
mino ignis ardentis, & de manibus tuis, Rex, libe-
rabit nos (et si non) notum sit tibi, quia dijs tuis nō
deseruimus, & imaginem auream quā statuisti non
adorabimus. Credebant illi secundum fidem se
posse euadere, sed addiderunt: (Et si non) vt sciret
Rex illos propter Deum, quem colebant, & mori
posse. Hoc est enim robur virtutis & fidei, credere
& scire quod Deus à morte præsentē liberare pos-
sit, & tamen mortem non timere, nec cedere vt
probari potius fides possit. Erupit per os eorum
Spiritus sancti incorruptus & inuictus vigor, vt
appareat vera esse quæ in Euangelio suo Dominus
edixit, dicens: Cum autem vos apprehenderint,
nolite cogitare quid loquamini: non enim vos e-
stis qui loquimini, sed spiritus patris vestri qui lo-
quitur in vobis. Sic & Daniel, cum compelleretur
adorare idolum Bel, quem tunc & Rex & populus
colebant, in asserendo Dei sui honorem, plena fi-
dei libertate prorupit, dicens: Nihil colo ego nisi
Dominum Deum meum, qui condidit cælum &
terram. Quid in Machabæis beatorum martyrum
grauia tormenta, & multiformes septem fratrum
pœnæ, & confortans liberos suos mater in pœnis,
& moriens ipsa quoque cum liberis? Nōne mag-
næ virtutis & fidei documenta testantur, & nos ad
martyrij triumphum suis passionibus adhortatur?
Quid

Matth. 10.

Dan. 14.

Quid Prophetæ, quos ad præscientiam futurorum spiritus animauit? quid Apostoli, quos Dominus elegit? Nonne cum iusti occiduntur propter iustitiam, mori nos quoque docuerunt? Christi natiuitas à martyrijs infantum statim cœpit, vt ob nomen eius à bimatu & infra qui fuerant necarêtur. Ætas necdum habilis ad pugnam, idonea extitit ad coronam. Ostensum est neminem à periculo persecutionis immunê, quando & tales martyria fecerunt. Hos verò tam ingens postea sequutus est martyrum numerus, exuberante postmodum virtutis & fidei gratia, vt numerari non possent, ne deesse nobis exempla quereremur. Quorum pia recordatio & virtutem auget ad imitandum, & rebus afflictis mirificè consolatur, dum plerunque pios persecutionem passos esse reperimus. Quid igitur animum despondeas, si aduersum te mundus insurgit? Socius tum maxime efficeris Apostolorum, imo Christi ipsius Apostolorum domini. Socius autem passionum effectus, particeps efficeris & gloriæ. Sed cum disertissimus sit hæc in parte D. Chrysostomus, præclarèque admodum vtilitatem exempli prosequatur, existimaui fore commodum, si fusius eum hoc in loco differentem audiremus.

Demonstratur Chrysostomi verbis quàm utile sit superioris temporis persecutionum meminisse, & adduntur alia quedam in persecutione meditanda.

Homil. 9.

In dictu 4.

postoli: Habentes eundem spiritum fidei, 2. Corinth. 6. 4.

CAPVT XVIII.

TRactans igitur ille verba Apostoli ex posteriore ad Corinthios, quibus ait: Habentes eundem spiritum fidei; Magnum bellum (inquit) circumsteterat fideles dum hæc dicebantur: bellum (inquam) graue & absque vllis inducijs. Nam

Nam & ciuitates integræ, & populi vndique in eos insurrexerant, & tyranni omnes insidiabantur, & reges contra eos armabantur: & arma mouebantur, & gladij acuebantur, & exercitus adornabantur, & omnia genera pœnarum ac suppliciorum excogitabantur. Inde facultatum rapinæ & confiscationes, & carceres ac mortes quotidiana, tormenta, vincula, ignis, ferrum, bestię, patibula, rotæ, baratra, præcipitia, & quicquid in perniciem fidelium excogitari poterat. Ac ne intra hos quidem fines bellum se continuit. Non solum enim ab inimicis excitabatur, sed ipsa etiam natura contra seipsam irritabatur. Etenim liberis insidiabantur patres, & filiæ parentes exosos habebant, & amici amicos auersabantur, & in cognationes ac familias bellum hoc latenter se insinuat, magnusque tumultus erat per vniuersum orbem habitabilem. Et sicut naus vndis insurgentibus, nubibus concurrentibus, elisis tonitribus, caligine vndique nautas cingente, mari furente, beluis sæuientibus, piratis oppugnantibus, ipsis vectoribus inter sese dissidentibus, haud quaquam euadere potest, nisi cœlestis dextera magna illa ac potens, discusso periculo & sedata tempestate, in tranquillitatem reducat nauigantes: ita etiam tunc inter initia prædicationis accidit. Non solum enim externa tempestate pulsabantur, sed intus etiam plerunque seditione laborabāt. Quis hoc dicit? Paulus ipse sic scribens: Foris pugnæ, intus timores. Et quod verum sit, quodque doctores pariter ac discipuli innumeris septi fuerint malis, & per omnes ex æquo bellum hoc fuerit grassatum, eundem Paulum iterum testem adduco: Vestrae autem partes, meminisse omnium horum quæ dico, vt cognitis periculis ac tentationibus, omnibusque aduersitatibus, quas eius temporis fideles perferebant, tanto maiores gratias agatis Deo, qui omnibus illis calamitatibus finem
impo-

imposuit, & tranquillissimam pacem nobis confecit, vt nemo vel socordiae poenam effugiat, vel ob vitæ rectè actam extollatur. Neque enim perinde, si vndequaq; oppugnatus, & innumeris aduersitatibus obrutus, generosè subsistas, ac si in portu nūc sedens, & in summa securitate eundem animum præ te feras. Illorum enim conditio nihilo melior erat, quàm eorum qui turbato mari iactabantur: nos verò securius agimus, quàm qui portum deuecti incolumes, iam per otium se reficiunt. Quapropter neque propter bonam viuendi rationem extollamur, neque tentationibus cedamus, neque securitate Ecclesiae nostram ad segniciam abutamur: quin potius sobrij simus ac vigilemus. Nam nobis quoque est lucta aduersus cunctas concupiscentias: non insurgunt contra nos homines, sed insurgunt carnales voluptates: non impugnant nos reges atque tyranni, sed impugnat ira, vanæ gloriæ cupido, inuidia, æmulatio, atque id genus alij affectus innumeri. Quādo igitur illas tentationes euasimus, ne vel ab his vincamur operam demus. Ideo enim vobis in memoriam reuocaui illius temporis calamitates, vt nunc & qui affligitur, idoneam inde consequatur consolationem: & qui in securitate agit, in vicem illarū conflictationum acre contra absurdas cogitationes certamen suscipiat. Propter nostram enim admonitionem, & consolationem, ac tolerantiam illa omnia sunt scripta. Quæ quidem necesse habemus nunc apud vos eloqui, & docere quantis aduersitatibus eius temporis fideles obsessi fuerint, non doctores solum, verum etiam discipuli. Audi igitur quid dicat Paulus ad Hebræos scribens: Memores estote priorum dierum, in quibus illuminati multum certamen afflictionum sustinuistis. Non enim ad breue tempus, sed mox ab ipso exordio prædicationis & doctrinae insurrexerunt aduersus eos tētationēs, & mox à suscepto baptismo pericu-

periculis erant obnoxij. At quomodo, audi. Probris & afflictionibus velut in theatro expositi. Omnes enim despuebant eos, contumelijs afficiebant, deridebant, vituperabant, fatuos vocabant ac insensatos, quod deserta patria viuendi formula, noua placita suscepissent. Quæ quidem non parum valent ad commouendam animam, nisi fides profundè sit radicata. Nihil enim æquè animam mordet ac improprium, nihil æquè tabefacit mentem ac diæteria & conuitia. Nam multi viri per conuitia sunt sæpe subuersi. Hæc autem loquor nunc, vt cum fiducia fidem teneamus. Si enim illi totius orbis conuitio non sunt subuersi, multo magis nostra ætate fides magna confidentia retinenda est, quando totus orbis ad nostras partes defecit. Quod autem illi non intra calumnias *Hebr. 10.* tantum, & opprobria, conuitiæque rabiem suam continuerint, audi quæ sequuntur: Nam & direptionem (inquit) facultatum vestrarum cum gaudio pertulistis. Vides quòd & bona eorum confiscabantur olim, & omnibus præda erant expositi, qui eos lædere cupiebant. Atque hæc quidem ad Hebræos scribit. De Theſſalonicensibus verò *1. Theſſ. 2.* rursum aliud quiddam tale testatur: Vos (inquit) imitatores facti estis Domini nostri, qui suscepistis sermonem hunc cum afflictione magna. Vides etiam hos affligi, neque simpliciter, sed afflictione magna. Vehemens tētatio, continuum periculum nec minimam quidem respirandi facultatem concedebat eis qui tunc temporis in certamine erant: attamen cum hæc tolerarent, non iniquè ferebant, neque animum despondebant, imò gaudebāt etiam. Unde hoc apparet? ex verbis ipsius Pauli. Dicit enim; *ibidem.* in afflictione magna cum gaudio spiritus sancti. Nam tentatio pariebat afflictionem, gaudebant tamen, reputantes quare tentarētur. Idonea enim erat consolatio, quod conscijs sibi essent propter Christum se hæc pati. Quapropter non tam demi-

ror quod illo tempore affligebantur, quàm quod affligi se propter Christum lætabantur. Hoc enim generosæ ac Deum amanti animæ officium est, nimirum afflictiones & aduersitates ferre: atque insuper gratias agere ei qui se tentari permittit; id demum summæ fortitudinis meritò videri potest, animæq; vigilantis, & quæ omnibus humanis afflictibus sit superior. Nec hic tantum, sed & alibi docens quanta mala paterentur eius temporis fideles à familiaribus ac propinquis (hoc enim erat grauissimum) in hunc modum loquitur: Vos enim fratres, imitatores facti estis Ecclesiarum Dei quæ sunt in Iudæa. Qua in re imitatores? quoniam & vos eadem perpessi estis à contribulibus vestris, sicut & illi à Iudæis. Ecce bellum, sed bellum ciuile, quod maiorem facit indignationem. Si enim inimicus exprobrasset mihi, tulissem. Tu autè (inquit) vnanimis meus. id quod tum in figura contingebat. Quapropter non mediocri opus habebant consolatione. Quod quidem Paulus cum videret, eosq; qui ad suam curam pertinebant, laborare ac sudare animaduertit, quod cõtinuis calamitatibus degrauarentur, & alias super alias plagas ægrè sustineret, vide quàm varijs modis eorū animos excitet, nūc quidem his verbis: Siquidem iustum est apud Deum affligētibus vos reponi afflictionem. Nunc verò his: Dominus non longe abest, ne sitis solliciti. ac rursus: Cauete, abijciatis fiduciam vestrā, nam patientia opus habetis vt facientes Dei voluntatē, promissa bona reportetis. Deinde ad patientiam eos confirmans, subinfert: Adhuc enim minimū quiddam superest dū veniat qui vêturus est, & non diu moratur. Quemadmodum puerulū plorantem & molestè ferentem, matremq; suam requirentē assidens aliquis sic cõsolatur: Paulisper adhuc expecta, & omnino tua mater aderit. Ita etiā Paulus videns ægrè ferētes, cõquerentes, aduentū Christi requirētes, eius temporis

1. Thess. 4.

Psal. 53.

2. Thessa. 1.
Hebr. 10.

poris fideles propter intolerabile malorum vim, consolaturus illos dicit: Adhuc minimū quiddam superest dum veniat qui venturus est, & non diu moratur. Itaq; quod discipuli affligebantur, & plurima mala patiebantur, nec aliter quā agni destituti in medio luporū vndiq; persecutionē sustinebant, per hæc satis apparet. Vt autē sciatis quod etiam doctores non minora, imò verò multo graviora sustinebant (nam quo magis inimicos veritatis contristabant, hoc plures eos infestabant) hoc quoque ab eodem qui superiora nos docuit audietis. Corinthiis enim scribens sic loquitur: Nemini vllam impingendi occasionem dantes, ne reprehendatur ministerium nostrum, in tolerantia multa, in afflictionibus, in necessitatibus, in angustiis, in plagis, in carceribus, in vagationibus, in laboribus, in vigiliis, in ieiuniis. Vidisti quantum certaminum enumerauerit, quā crebras tentationes? Rursum eisdem scribens: Ministri Christi sunt (inquit) vt insipiens loquor, excellentius ego. Deinde volēs nobis persuadere quod multo præstantius sit propter Christum affligi, quā prodigia facere, & probationem adferens, quod germanus sit Apostolus, & præferendus alijs non Apostolis, sed pseudoapostolis, non à miraculis per se editis argumentatur, sed à continuis periculis in quibus versabatur, in hunc modum scribens: In laboribus copiosius, in verberibus supra modum, in carceribus abundantius, in mortibus frequenter. A Iudæis quinques quadragenas plagas vna minus accepi: ter virgis cæsus fui, semel fui lapidatus, ter naufragium feci, noctem ac diem in profundo egi: in itineribus sæpe, in periculis fluminum, periculis latronum, periculis ex genere, periculis ex gentibus, periculis in ciuitate, periculis in deserto, periculis inter falsos fratres: in labore & molestia, in vigiliis sæpe, in fame & siti, in ieiuniis sæpe, in

2. Cor. 6.

2. Cor. 11.

frigore & nuditate, propter ea quæ extrinsecus
 accidunt. Hi sunt veri Apostolatus characteres:
 prodigia siquidem & alij sæpe fecerunt, nec eis fe-
 cisse profuit, sed post omnia illa audierunt: Abite,
 non noui vos. Nemo verò eorum qui eadem quæ
 Paulus commemorare possunt, vocem illam vn-
 quam est auditurus, verum cum magna fiducia
 cælum conscendet, bonisque cælestibus perfrue-
 tur vniuersis. Fortasse prolixior vobis visus est
 sermo noster: Sed ne sitis solliciti, non sum obli-
 tus promissionis, & statim ad illam reuertar. Hæc
 autem non temerè longiore oratione prosequuti
 sumus, sed vt prolixiore verborum apparatu cer-
 tius ac clarius doctrinam nostram approbaremus,
 simulq; afflictorum animas cōsolaremur: vt quot-
 quot in periculis versantur & tentationibus, ido-
 neam nacti consolationē discendant, scientes quod
 socij Pauli per has afflictiones efficiantur, imò ve-
 rō ipsius Christi angelorum Domini. Qui autem
 afflictionum eius particeps est in hoc sæculo, in
 illo particeps erit etiam gloriæ. Ait enim: Siqui-
 dem simul patimur, vt simul glorificemur. ac rur-
 sum: Si sustinemus, vt simul etiā regnemus. Om-
 nino enim necesse est vt fidelium genus afflictio-
 nibus prematur. Omnes enim qui volunt piè in
 Christo viuere, persecutionem patientur. ac rur-
 sum: Fili, dum accedis ad seruiendum Domino,
 præpara animā tuam ad tentationem. Rectè fac, &
 perdura. Bella verò promissio, statim ab exordio
 in tētationes incidere: egregia verò consolatio &
 exhortatio, eius seruitutis pericula confestim de-
 gustare. Planè egregia simul, & admiranda, & ma-
 ximum lucrū adferens. Quodnam illud? Audi quæ
 sequuntur: Sicut enim in igne probatur aurū, sic
 homines accepti in fornace tentationis. Quod au-
 tem dicit, sic accipe: Sicut aurum igne examina-
 tum purius redditur, pari modo etiam anima, quæ
 inter afflictiones versatur ac pericula, hilarior ac
 splen-

Roma. 8.

Ecclesi. 2.

splendidior per illa euadit, omnemque periculorum maculam abstergit. Hinc est quod ad diuitem illum dicebat Abraham: Lazarus recepit mala sua, hic autem consolationem recipit. Ac rursus Corinthiis scribens dicit: Propter hoc inter vos multi imbecilles & inualidi, & dormiunt multi. Etenim si nos ipsos diiudicassemus, haudquaquam iudicati fuissetus. At cum iudicamur à Domino, corripimur, ne cum mundo condemnemur. Quin & fornicatorem illum hac de causa tradidit in interitum carnis, ut spiritus saluus fiat, ostendens quod tentationes & pericula salutem his qui cum gratiarum actione illa perferunt afferant, purgationemque animæ minimè vulgarem. Itaque quod afflictiones & innumeras calamitates pertulerint fideles, tam discipuli quàm doctores, ac ne minimum quidem respirauerint, varijs omnium generum bellis vndeque circundati, satis hic noster sermo declarauit: & plura etiam de hoc è sacris literis studiosi colligere possunt. Haftenus Chrysostomum audisse sit satis, de exemplo & eius utilitate, alijsque nonnullis rationibus, quæ animum queant fidelis hominis persecutione deiectum erigere. Accedat his & ea perferendæ persecutionis ratio, quæ posita est in agnitione sui, & humili confessione peccatorum. Est enim patientia firmior, si nos persecutione dignos arbitremur: lætior quoque & alacrior est, si perferendis persecutionibus aboleri peccata & remitti persuasum habeamus. Quàm verò (inquit Cyprianus) grauis causa sit hominis Christiani serui pati nolle, cum passus sit prior Dominus? & pro peccatis nostris nos pati nolle, cum peccatum suum proprium non habens, passus sit ille pro nobis? Idcirco is qui apud Machabæos sexto loco patiebatur, hac se contemplatione confirmauit, quod se peccatis digna pati fateretur. In quo proinde martyre non virtus sola (inquit Cyprianus) sed humilitas præ-

I. Cor. II.

I. Corin. 5.

Lib. 4. Epi-
stolarum
Epistol. 6.Cap. 11.
Lib. de ex-
hortatio-
ne martir.

dicanda est, nihil sibi eum vendicasse, nec confessionis suæ honorem superbis vocibus ventilasse, peccatis suis potius adscripsisse quod persecutionem à Rege pateretur, Deo verò dedisse, quod postmodum vindicaretur: Noli (inquit) frustra errare, nos enim propter nos ipsos hæc patimur, peccantes in Deum nostrum. Quæretibus autem quibusdam de pressuris persecutionum, atque dicentibus: Si nos peccatores ista meruimus, quare & serui Dei ~~Barbarorum ferro percipiti sunt?~~ & ancillæ Dei captivæ ductæ sunt? humiliter & veraciter & piè responderi iubet Augustinus. Quantamlibet enim iustitiam seruemus, quantamlibet Domino obedientiam exhibeamus, nūquid meliores esse possumus illis tribus viris, qui in caminum ignis ardentis pro conseruanda lege Dei proiecti sunt? Et tamen lege quid illic dicat Azarias vnus ex tribus: Quoniam in veritate & in iudicio intulisti nobis omnia hæc, propter peccata nostra, quoniam peccauimus, & legi tuæ non paruimus, & mandatis tuis non obediimus, vt bene nobis esset: & omnia quæ intulisti nobis, iudicio vero intulisti, & tradidisti nos in manus iniquorum, inimicissimorum transfugarum, & regi iniusto, & pessimo vltra vniuersam terram. Daniel quoque: Propter peccata nostra & iniquitates patrum nostrorum, Hierusalem & populus tuus venit in confusionem omnibus qui circum nos sunt. Si ergo ista dicunt qui excellentissima sanctitate ignes & leones circa se innoxios habuerunt, quid nos oportet dicere in humilitate nostra, qui tam longe illis impares sumus, quātamcunque iustitiam seruare videamur? Non negligenda est etiā consideratio futuri supplicij & ignis æterni, quem Dominus fidem violentibus comminatur. Confirmauit hæc eum cuius in Psalmis vox est: Principes persequuti sunt me gratis, & à verbis tuis formidauit cor meum. Tametsi igitur grauem Christianus perse-

Lib. 1. Mathab. ca. 7.

Epist. 122.

Daniel. 3.

Daniel. 9.

persequutionem patiatur, & inextricabilibus periculis, qualia esse solent à principibus, circumualletur, perstat nihilominus verbo Dei corroboratus, quo dixit: Nolite timere eos qui corpus occidunt, sed cum timete qui potest corpus & animam mittere in gehennam. Inde licet immanitas bestiarum ad incutiendum terrorem infremat, aliunde stridor candentium laminarum & flamma fornacis ardentis exæstuet: ex parte alia personent tractus granium catenarum, hinc carnifex cruentus adsistat. Quamuis igitur omnia circumspectet plena supplicij, tamen illum ignem cogitans perpetuum, illud sine fine incendium perfidorum, illam pœnæ recrudescentis ærumnam, corde trepidat, & negare formidat, ne dum præsentibus cedit, perpetuis sese dedat exitijs. Refugit atque perhorrescit adorare bestiam & imaginem eius, quoniam scriptum est: Si quis adorauerit bestiam & imaginem eius, & accipiet notam in fronte aut in manu, bibet ipse de vino iræ Dei, & punietur igne & sulphure, sub oculis sanctorum angelorum, & sub oculis agni, & fumus de tormentis eorum in sæcula sæculorum ascendet: nec habebunt requiem die ac nocte quicumque adorauerint bestiam & imaginem eius. Istiusmodi meditationibus qui sese exercebit, mota qualibet persecutione, poterit victor euadere, præsertim si humanis viribus diffusus, spem consequendæ victoriæ in Christi cruce & auxilio ponat, dicatque cum Beato Apostolo: Absit mihi gloriari, nisi in cruce Domini nostri Iesu Christi, per quem mihi mundus crucifixus est, & ego mundo. Non enim Christus tanquam spectator tantummodo cogitandus est, verum etiam tanquam adiutor implorandus, qui in suis & luctatur & vincit, & coronat pariter & coronatur. Adest ille prorsus suo certamini, & præliatores atque assertores

*Vide Amb.
in psal. 118*

Apocal. 14.

Galat. 6.

Cyp. lib. 2.
Epistol. 6.
Epistola 6.

Psalm. 59.

ib. de ex-
t. mar-
tyrij c. 12.

nominis sui erigit, animat, corroborat. Et qui pro omnibus mortem semel vicit, semper vincit in nobis. Huic igitur pia prece dicendum est quod Psalmus habet: Da nobis auxilium de tribulatione, quia vana salus hominis. In Deo faciemus virtutem, & ipse ad nihilū deducet inimicos nostros. ac rursus: Non timebo mala, quoniam tu mecum es. & : Dominus mihi adiutor, non timebo quid faciat mihi homo. Possim & cum diuo Cypriano dicere: Has cogitationes quæ potest persequutio vincere? quæ tormenta superare? Durat fortis & stabilis religiosis meditationibus fundata mēs, & aduersus omnes diaboli terrores & minas mundi animus immobilis perstat, quem futurorum fides certa & solida corroborat. Clauduntur oculi in persequutionibus terræ, sed patet cælum. Minatur Antichristus, sed Dominus Christus tuetur: mors infertur, sed immortalitas sequitur: occiso mūdus eripitur, sed restituto paradysus exhibetur: vita temporalis extinguitur, sed æterna reparatur. Quanta est dignitas & quanta securitas, exire hinc lætum, exire inter pressuras & angustias gloriosum, claudere in momento oculos quibus homines videbantur & mundus, & aperire eosdem statim, vt Deus videatur & Christus? Hæc Diuus Cyprianus.

Quantopere fugienda sit elatio his quos in persequutione semel aut iterum fortiter facere contigerit.

CAPVT XIX.

SEd his qui sequentis persequutionis ferociam, istiusmodi cogitationibus instructi & armati, semel iterumque superarunt, magnopere cauendum est elationis periculum, omnique studio modestia conseruanda, ne dum sibi de præterita fortitudine complacent, martyrijq; nomine blan-

ſuntur, ſuæ poſtea infirmitati iuſto iudicio relin-
 quantur. Nulla enim hic ſecura victoria eſt: nec
 martyrij gloria ſatis integra cuiquam cõſtat, priuſ-
 quam calcato ſeculo ex hac vita migrauerit. Ideo-
 que notanda ſunt, quæ ex epistoſa Lugdunenſium
 & Vienneniſium ad Aſiaticos Phrighioſque fratres *Libro 5.
 Hiſtoria
 Eccl̃e. ca. 3.*
 commemorat Eusebius: Referuntur (inquit) in
 ipſa epistoſa quædam, etiam de humanitate &
 manſuetudine beatorum martyrum, quæ dignum
 puto ad hæc ſuis ſermonibus ſicut cætera ſociari.
 Qui (vt aiunt) ad imitationem Chriſti, qui cum in
 forma Dei eſſet, non rapinam arbitratus eſt eſſe ſe
 æqualem Deo, in tâta gloria poſiti, & ſemel atque
 iterum ac frequentius martyres facti, poſt beſtias,
 poſt ignes, & laminas, neque ſe ipſi martyres di-
 cebant, neque alijs ita ſe appellantibus indulge-
 bant: ſed ſi fortè aliquis noſtrum vel in epistoſa,
 vel in ſermone eos martyres nominaret, increpa-
 bant acrius, dicentes quod hæc appellatio ſoli
 Chriſto debetur, qui ſolus fidelis veritatis eſt mar-
 tyr, & qui primogenitus eſt ex mortuis, & author
 vitæ æternæ: vel certe illis ſolis aptū hoc eſſe vo-
 cabulum, qui poſt bonam confeſſionē de hac vita
 diſcedere & pergere meruerunt ad Deū. Nos autē
 (aiobant) humiles & egeni, optamus vt ipſa ſaltem
 in nobis confeſſio tuta permaneat. In quod etiam
 cæteros fratres cum lachrymis obſecrabāt, vt pro
 eis Dominū precarētur, quo perfectę confeſſionis
 ſignaculum martyrio mererētur accipere. Et tan-
 ta in eis humilitas erat, vt cum rebus ipſis eſſent
 iam martyres, nominis tamen iactantiam fugerēt.
 Apud Gentiles verò cum omni fiducia conſiſte-
 bant, nobilitatem animæ per contemptum iniu-
 riæ & ſuppliciorum demonſtrantes. Erant ergo
 inter fratres humiles, inter perſequentores elati,
 ſuis mites, aduerſarijs terribiles, Chriſto ſubiekti,
 diabolo erecti. Sunt & ea quæ apud Cyprianum
 hæc ipſa de re leguntur, notatu digniſſima: Neque

enim (ait) confessio immunem facit ab insidijs Diaboli, aut contra tentationes, & pericula, & incursus atque impetus sæculares adhuc in sæculo positum perpetua securitate defendit: cæterum nunquam in confessoribus fraudes, & stupra, & adulteria postmodum videremus, quæ nunc in quibusdam videntes ingemiscimus & dolemus. Quisquis ille confessor est, Salomone maior, aut melior, aut Deo charior non est. Qui tamē quamdiu in vijs Domini ambulauit, tamdiu gratiam, quam de Domino fuerat cōsecutus obtinuit: postquam dereliquit Domini viam, perdidit & gratiā Domini, sicut scriptum est: Et excitauit Dominus satanam ipsi Salomoni. Et ideo scriptum est: Tene quod habes, ne alius accipiat coronā tuam. Quod vtique Dominus non minaretur, auferri posse coronam iustitiæ, nisi quia recedente iustitia, recedat necesse est & corona. Confessio exordium gloriæ est, non meritum iam coronæ; nec perficit laudem, sed initiat dignitatem. Cūque scriptum sit: Qui perseuerauerit vsque in finem, hic saluus erit; quicquid ante finem fuerit, gradus est quo ad fastigium salutis ascenditur: non terminus, quo iam culminis summa teneatur. Confessor est, sed post confessionem periculum maius est: quia plus aduersarius prouocatus est. Confessor est, hoc magis stare debet cum Domini Euāgelio, per Euangelium gloriam consequutus à Domino. Ait enim Dominus: Cui multum datur, multum quaeretur ad eo: & cui plus dignitatis adscribitur, plus de illo exigitur seruitutis. Nemo per confessoris exemplum pereat, nemo iniustitiam, nemo insolentiam, nemo perfidiam de confessorum moribus discat. Confessor est, sit humilis & quietus, sit in actu suo cum disciplina modestus; vt qui Christi confessor dicitur, Christum quem contitetur, imitetur.

Frastu

*Frustra sperari de persecutione gloriam apud
Deum, si quis eam & propter fidem Chri-
stianam in schismate patiatur.*

CAPVT XX.

FAllitur tamen quisquis in schismate constitu-
tus, & ab Ecclesiæ Catholicæ castris suo iudi-
cio & voluntate segregatus, gloriâ sibi apud
Dominum de sua passione promittit, non modo
si propter suam separationem & obstinatæ mentis
errorem infestas sibi sentiat mundi potestates, ve-
rùm etiam si propterea quod nomen Christianum
proficitur, ab huius nominis inimicis persecu-
tionem patiatur. Verissima enim Apostoli senten-
tia est: Si quis etiam tradiderit corpus suum ita ut
ardeat, charitatem autem non habuerit, nihil id ei
profuturum esse. Nullum igitur sine charitate vel
esse vel nominari martirium potest (inquit Op-
tatus) sine qua maxima & imperiosa virtus caret
effectu, sine qua nihil valet omnium scientia lin-
guarum, sine qua nihil potest etiam societas ange-
lorum: Habere autem non potest charitatē, qui tan-
to scelere diuidat vnitatem. An aliud grauius esse
delictū potest, quàm aduersus Christū stare? quàm
Ecclesiā eius, quā ille suo sanguine parauit & con-
didit, dissipare? quā Euangelicæ pacis ac dilectio-
nis oblitū, contra vnanimē & concordē Dei popu-
lū, hostilis discordiæ furore pugnare? Huius igitur
maculæ summa deformitas, nullā superesse patitur
afflictionis dignitatē: & gloriā quæ apud Deū spe-
rari de tolerata persecutione potuerat, intercipit
& abolet. Ac beati quidē sunt qui persecutionē
patiuntur, sed propter iustitiā. Iustus autē ex fide vi-
uit; quæ fides, ut mortua non sit, & credentem vi-
uificare possit, per dilectionem operatur. Vnde
conficitur, cum qui fidem aut dilectionē non ha-
beat, iustitiā habere non posse. Quocirca nec pro-
pter iustitiam patitur quā non habet, nec propter
opus

1. Cor. 13.

Optatus
Milenita-
nus lib. 3.

*Sic Aug.
de sermon.
Domini in
mōte. lib. 1.*

*Lib. de pa-
sientia ca.
26. qui D.
Aug in/crī-
bitur.*

opus vllum iustitiæ ipsi inhærentis, cuius **expers** esse comprobatur. **Multi hæretici** (inquit August.) nomine Christiano animas decipiētes, multa cum exultatione patiuntur, sed **ideo carent mercede**, quia non patiuntur propter iustitiam: quia vbi fides sana non est, non potest esse sana iustitia. Iustus enim **ex fide** viuit. Neque mercedem aliquam sibi promittant schismatici, quia similiter vbi non est charitas, ibi non potest esse iustitia. Neque tamen existimandum est; vituperandam eorum semper esse patientiam: Si quis enim (vt scriptū est in lib. de patientia apud Augustinum) **nō habens** charitatem, quæ pertinet ad **vnitatem** spiritus & vinculum pacis, quo catholica Ecclesia congregata conuertitur, in aliquo schismate constitutus, ne Christum neget patitur tribulationes, angustias, famem, nuditatem, persecutionem, pericula, carceres, vincula, tormenta, gladium, vel flammæ, vel bestias, vel ipsam crucem timore gehennarum & ignis æterni, nullo modo ista culpāda sunt: imo verò & hæc laudanda patientia est. Non enim dicere poterimus; melius ei fuisset vt Christum negando, nihil eorum pateretur, quæ passus est confitendo: sed existimandum fortasse tolerabilius ei futurum iudicium, quàm **si Christum** negando cuncta illa vitaret: vt illud quod ait Apostolus: Si tradidero corpus meum vt ardeam, charitatem autem non habeam, nihil mihi prodest; nihil prodesse intelligatur ad regnum cælorum obtinendum, non ad extremi iudicii tolerabilius supplicium subeundum. Consequentibus autem verbis, sic astruit non esse illam damnandam schismaticorum patiētiā, vt etiam Dei donum esse declaret. Scire vti pertinet ad Dei gratiā, quod in Christum adhuc credunt, sanamq; retinent Catholicæ fidei, magna sæpe ex parte, doctrinam: ita numerandum est in Dei muneribus, quod pro ea decertare non dubitent, vsque ad sanguinis profusionem. Sed
sicut

sicut negandum non est hoc esse Dei donum, ita intelligendum est (inquit August.) alia esse Dei *cap 17 lib. de patricia* dona filiorum illius Hierusalem, quæ sursum libera est mater nostra. Hæc sunt enim quodammodo *cap. 28.* hæreditaria, in quibus sumus hæredes Dei, cohæredes autem Christi. Alia verò eiusmodi, quæ possint accipere etiam filij concubinarum, quibus ludæi carnales & schismatici vel hæretici comparantur. Quamuis enim scriptum sit: Enice ancillam & filium eius: neque enim erit hæres filius ancillæ *Galat. 4.* cum filio meo Isaac; tamen filios concubinarum, quando à filio suo diuisit Abraham, nonnulla eis *Genes. 25.* etiam largitus est munera, ne omnino relinquerentur inanes, non ut tenerentur hæredes. Sunt autem heredes, quibus dicitur: Non accepistis spiritum seruitutis iterum in timore, sed accepistis spiritum adoptionis filiorum, in quo clamamus Abba pater. Charitas igitur quæ Dei filios facit, ipsa eadem est quæ hæredes constituit. Quod etsi non habent hæretici & schismatici, ideoq; ad hæreditatem peruenire non possunt, tamē dona Dei quædam habent, veluti munuscula, quæ vituperanda non sunt, quia Dei sunt: nec tamen ad consequendum regnum cælorum, in quo beata est illa hæreditas, cuiquam sufficiunt. In his igitur illa ponenda est hæreticorum & schismaticorum pro Christi confessione patientia. Nam quando pro suo errore falsoque dogmate patiuntur, si (ut fit) fortiter & alacriter etiam perferre tormenta videntur, non hoc Dei munus vllum facit, sed cæcamentis obstinatio: quæ sensu proprio superbè delectata, & ab erroris ac superbiæ spiritu ludificata & possessa, vel stupore vel animositate quadam tormenta contemnit. Vnde & pro apertis sceleribus, non ut ea puniant, sed ut perpetrent, multa homines grauissima perferunt. Nōne de quodam nobilissimo patriæ parricida, sæcularium literarum loquuntur authores, fuisse eum patientem

Aug. serm.
13. de ver.
bi apo-
stoli.

Vide Aug.
lib de pa-
tientia c. 5.

Canonic. 8.

2. Cor 13.

Canon. 17.

tem inediæ, alioris, vigiliæ, suprà quàm cuiquam
credibile est? Quid de latronibus dicam? qui cum
insidiantur viatoribus, noctes perpetiuntur insom-
nes, atque vt transeuntes excipiant innocentes,
sub qualibet asperitate cœli nocentem animum
còrpusque defigunt. Quidam verò (quod & antea
memorauimus) inuicem torfisse perhibentur, ita
vt exercitatio còtra pœnas, nihil distaret à pœnis.
Nec tantum fortassis excruciabantur à Iudice, vt
à dolentibus veritas exprimeretur, quantũ à suis
socijs, vt à patiētibs non proderetur. Et tamē in
his hominibus miranda est potius quàm laudanda
patiētia, imò nec mirāda nec laudāda, quę nulla est,
sed mirāda duricia, negāda patiētia. Cũ ergò vide-
ris quempia aliquid ferre patienter, noli continuò
laudare patientiā, quam laudandā non ostēdit nisi
causa patiēdi. Quando enim hæc bona est, tunc illa
vera est: quando nō polluitur hæc cupiditate, tunc
illa à falsitate discernitur. Sicuti enim sanctos cha-
ritas fortes efficit (fortis enim vt mors dilectio: &
aquæ multę non potuerunt extinguere charitatē,
nec flumina obruent illā) sic & cupiditas obfirmat
animos ad dura quæq; perpetiēda falsa quadā spe-
cie patiētię. Quantoq; maior est in sanctis charitas
Dei, tanto magis pro eo quod diligitur: & quanto
maior est in peccatoribus cupiditas mundi, tanto
magis pro eo quod còcupiscitur, omnia tolerātur.
Denique sicuti charitas diffusa est in cordibus no-
stris, nō ex nobis, sed per spiritũ sanctum qui datus
est nobis, & idcirco vera fortitudo & patientia ex
Deo est quam gignit charitas, quæ magnanima est
iuxta Apostoli testimonium, & omnia tolerat: ita
falsa fortitudo, vt & ipsa cupiditas, ex nobis est, &
ex mundo, non ex patre, à quo est omne donũ op-
timum & datum perfectum. Fortitudinē Gentiliũ
(ait Consilium Arausicanum) mūdana cupiditas,
fortitudinē Christianam Dei charitas facit, quę dif-
fusa est in cordibus nostris, non per volūtatis arbi-
trium,

trium, sed per spiritum sanctum qui datus est nobis, nullis meritis gratiam preuenientibus. Quapropter qui mirantur & quaerunt: Si voluntas hominis sine ullo Dei adiutorio, viribus liberi arbitrii tam multa grauias & horrenda perfert, siue in animo, siue in corpore, ut mortalis vite huius & peccatorum deletionem perfruatur, cur non eadem ipsa voluntas, naturali sibi possibilitate & robore sufficiens, sine Dei adiutorio quicquid laboris vel doloris ingeritur, pro iustitia & vita aeterna patientissime sustinet? Hoc (inquam) qui quaerunt & mirantur, non attendunt de ipso quoque amore, ex quo vera vel falsa oritur fortitudo: Similiter quaeri posse: cur cum hanc vitam aut eius comoda tanto ex nobis amore concupiscamus & prosequamur, non etiam ex nobis Deum praecunctis rebus creatis amare queamus? Vbi in promptu ratio est, quia per unum peccatum quod intrauit in mundum, corrupti & deprauati sumus, ut tanquam febricitantes noxia quidem quaeque delectent, salubria vero velut insipida respuantur. Ex hoc vitio, quo omnium infecta & debilitata natura est, valemus in malis, & in iis ardemus quae mundi sunt: in bonis vero & iis quae ad pietatem salutemque aeternam pertinent frigemus, languemus, atque deficimus. Itaque vndecunque perditii homines pro sua iniquitate cuncta minantia & aduersantia perferant, vera certe patientia & fortitudo, quae recta est atque laudabilis, & vocabulo digna virtutis, non nisi ab illo est cui dicitur: Deus meus, eripe me de manu peccatoris, & de manu contra legem agentis & iniqui, quoniam tu es patientia mea Domine, spes mea a iuuentute mea, & iterum: Fortitudo mea & laus mea Dominus, & factus est mihi in salutem. Nostra enim ipse patientia est atque fortitudo, quia suos cultores facit quaelibet huius mundi terriculamenta & tormenta mirabiliter tolerare, adeoque inuicta protectione contra omnia vitia corroborat, ut animum nec blanda dissol-

*Vide &
Prosperum
lib. 3 de vi-
ta contempla-
tiua
cap. 20.*

*Psal. 70.
Isaie 12.
Prosper lib.
2. de vita
contempla-
tiua c. 20.*

*Vide Bernardum,
serm. 66.
in cantica.*

diffoluant, nec aduersa deiiciant. Sicut immundus spiritus, Dei semper superbus æmulator, ut suos & ipse martyres habeat, eos quos possederit, aduersus quoscunque dolores & labores obdurat: nec mirandum est si tantum in ijs valeat, tantumque sit efficax, ut ab alio mortem illatam alacri vultu & lætis animis excipiant, cum nonnullos etiam huc ~~malorum impellat~~, ut mortem sibi met ipsi consciscant, tanta prorsus obstinatione moriendi, ut secretiora quoque loca petant, vbi remotis & inscijs omnibus, non absit qui propositum crudelissimæ voluntatis impediatur. Persuasit olim quoque Platonis discipulis, ut quoniam legerant immortales animos, beatiùsque illos extra corpora, quam in corporibus agere, præcipitio sibi finirent hanc vitam, animosque suos carnis custodia & carcere liberarent. Persuasit hoc & Circumcellionibus, schismatico Donatistarum spiritu furentibus, qui (ut Optatus ait) vel sibi percussores sub cupiditate falsi martyrij in suam perniciem conducebant, vel ex ~~alterorum~~ montium cacuminibus viles animas proijcientes, se præcipientes dabant. Omitto huius generis alia quedam, quæ huc conferre possemus, nisi satis demonstrasse videremur, non esse mirandam hæreticorum & schismaticorum patientiam, si quando contigerit eos pro suo errore vel schismate asperos tolerare dolores, aut ipsam etiam vitam profundere. Sicuti nec Philosophorum patientiam Cyprianus est admiratus, tametsi hanc illi prædicare & tanquam admirabilem ostentare solerent: quoniam apud illos tam falsa (inquit) patientia, quam falsa sapientia est. Duritia igitur hæc aut pertinacia, non fortitudo est, & Diaboli sunt non Christi martyres, tanto profecto nequiores, quanto minus ab iniquitate aut errore potuerint iusta seueritate vel terrente, vel torquente reuocari. Si verò, ut initio propositum est, hæreticis atque schismaticis causa moriendi

*Vide Augustinum lib. 1.
de ciuitate
Dei per aliquot capitula.
Et. 11. in
Ioannē, &
lib. 2. contra
secundam
Epistolam
Gaudenlij
cap. 28. &
Epistol. 50.
lib. 2. contra
literas
Petilianij
19. & 99.
Lib. 3.
Serm. de
patientia.*

riendi sit Christianę religionis inter eius inimicos
 Iudæos vel Paganos libera professio (quanquam
 non est ea uti prior obstinatio sceleratę mentis,
 nec vituperanda patientia) nec sic tamen Christi
 martyres sunt, à cuius familia & corpore recesserunt:
 nisi quos forte in ipsa mortis expectatione
 recessisse ab Ecclesia & catholica religione pœni-
 tuerit. Namque iure inter Christi martyres beatus
 Hippolytus celebratur, qui (ut ait Prudentius:)

Quondam schisma Nouati

Presbyter attigerat, nostra sequenda negans.

Hic igitur munere Catholicę fidei reddito,

Quum iam vesano victor raperetur ab hoste,

Exultante anima carnis ad exitium,

Plebis amore sua multis comitantibus ibat,

Consultus quam secta foret melior.

Respondit: fugite, ô miseri, execranda Nouati

Schismata, catholicis reddite vos populis.

Una fides vigeat, prisco qua condita templo est,

Quā Paulus retinet, quamq; cathedra Petri.

Quæ docui, docuisse piget, venerabile martyr

Cerno quod à cultu rebar abesse Dei.

Est etiam apud Eusebium ex quodam Apollonio Lib. 5. eccl.
hist. ca. 16.
 de Martyribus ab hæresi Montanistarum resipis-
 centibus scriptum his verbis: Sancti martyres, qui
 pro vera fide martyrium ducunt, cum de Ecclesia
 procedentes ad passionem ducuntur, si qui fortè
 inuenti fuerint de heresi Phrygum, secernunt se ab
 ijs, & respuunt eorum societatem, nec vllò genere
 cum iam martyrii palmam teneant, spiritui Mon-
 tani & Maximillę acquiescendum putant. Sicut &
 nostris temporibus apud Apamiam, quę est supra
 Meandrum posita, gestum scimus à Gaio & Ale-
 xandro, qui de Eumenia martyres extiterunt. Bu-
 syrim quoque narrat Tripartita historia, cum de
 heresi esset Abstinētium, clarissimā fortissimamq;

*Tripart. lib.
 stor. lib. 6.
 cap. 13.*

L

con-

confessionem habuisse, sed acta postea de hæresi
 pœnitentia, in Ecclesia catholica esse conuersatū.
 Sic igitur immutatis & pœnitētibus macula schis-
 matis sanguine deletur: sic diuulsum prius à cor-
 pore membrum suo rursus capiti, membrisq; cæ-
 teris copulatur: sic cum venia & plena remissione
 delicti, corona datur martyrij. De his verò qui ob-
 firmatum in finem vsque gerunt animum, loqui-
 tur Cyprianus, & dicit: Tales si occisi in confes-
 sione nominis fuerint, macula ista nec sanguine
 abluitur, in~~expiabilis~~ & grauis culpa discordiæ
 nec passione purgatur. Esse martyr non potest, qui
 in Ecclesia non est: ad regnum peruenire non po-
 terit, qui eam quæ regnatura est derelinquit. Pa-
 cem nobis Christus dedit: concordēs atque vna-
 nimes esse præcepit: dilectionis & charitatis fœ-
 dera incorrupta atque inuiolata seruari mandauit.
 Exhibere se non potest martyrem, qui fraternam
 non tenuit charitatem. & infra: Cum Deo (in-
 quit) manere non possunt, qui esse in Ecclesia
 Dei vnanimes noluerunt: ardeant licet flammis, &
 ignibus traditi vel obiecti bestiis, animas suas po-
 nant, non erit illa fidei corona, sed pœna perfidiæ,
 nec religiosæ virtutis exitus gloriosus, sed despe-
 rationis interitus: Occidi talis potest, coronari
 non potest. Similiter August. Si aliqua ingruen-
 te persecutione, tradant ad flammās nobiscum
 corpus suum pro fide, quam pariter confitentur,
 tamen quia separati hæc agunt, non sufferentes
 inuicem in dilectione, neque studentes seruare
 vnitatem spiritus in vinculo pacis, charitatem
 vtique non habendo, etiam cum eis omnibus quæ
 nihil eis profunt, ad æternam salutem peruenire
 non possunt. De confessione quoque Cyprianus
 idem significans esse iudicium: Nicostratus (in-
 quit) desertor Ecclesiæ, confessorem se vltro ia-
 ctat & prædicat, cum Christi confessor nec dici,
 nec esse iam possit, qui Christi Ecclesiam negauit.
 Nam

*Lib. 1. con-
 tra Donat.
 cap. 9.*

*Li. 2. epist.
 epistola 8.
 Item lib. 4.
 epi. epist. 2.
 & li. 1. ep.
 epistola 1.*

Nam cum Paulus Apostolus dicat: Propter hoc relinquet homo patrem & matrem, & adhærebit uxori suæ, & erunt duo in carne vna. Sacramentum istud magnum est, ego autem dico in Christum & in Ecclesiam. Cum hoc (inquā) beatus Apostolus dicat, & Christum pariter atque Ecclesiæ unitatem, indiuiduis nexibus cohærentem, sancta sua voce testetur, quomodo potest esse cum Christo, qui cum sponsa Christi atque in eius Ecclesia non est? Frustra igitur hæretici & schismatici de persecutione sibi blandiuntur, præsertim cum eam propter suæ separationis aut pestiferæ seminationis merita patiuntur. Nec propterea iusti sunt, quia patiuntur persecutionem, sicuti nec semper iniqui sunt, qui eam inferunt. Itaque D. August. Donatistas suas persecutiones, quas à catholicis se perpeti querebatur, assidue iactantibus, tanquā propterea boni essent ac iusti: illi verò qui eos persequerentur iniqui, pluribus locis respondisse reperitur: velut in eo libro quem scripsit contra Donatistas post collationem: Et facere (inquit) persecutionem non est iniquitatis indicium, quia & boni faciunt malis, & mali bonis: & pati persecutionem non est iustitiæ documentum, quia eam non soli boni pro pietate, sed mali pro iniquitate patiuntur. Cum enim dixisset Dominus: Beati qui persecutionem patiuntur; ne inde se iactent hæretici, addidit, propter iustitiam. Nam quantamala nostris fecerint furiosissimi clerici & circumcelliones partis Donati, nostis & vos. Incensæ sunt Ecclesiæ, missi in flammæ codices sancti, incensæ etiam priuatæ domus, rapti homines de sedibus suis, & omnibus quæ inerant ablati aut perditis, ipsi etiam laniati & excæcati. Nec ab homicidio potuit temperari, quamuis sit mitius huic luci mori, quàm istam lucem auferre viuenti, ventum est ad homines: non ut retenti aliquò ducerentur, sed tamen ut ista

paterentur. Nec tamen ideo nostros iustificamus, quia ista perpessi sunt: sed quia pro Christiana veritate, pro Christi pace, pro Ecclesiæ vnitatē perpessi sunt. Illi autem sub tam multis, sub tam seueris legibus, & sub tāta Ecclesiæ catholicę, quam Dominus ei tribuit, potestate quid tale patiuntur? Si quando enim morte mulctantur, aut ipsi se occidunt, aut eorum cruentæ violentiæ dum resistitur, occiduntur: non pro communione partis Donati, nec pro errore sacrilegi schismatis, sed pro apertis facinoribus & sceleribus suis, quæ more latronum ruentes furore & crudelitate cōmittunt: pro parte autem Donati vix aliquid tale patiuntur, quale Cecilianum Donato instante passum esse dixerunt. Aut ergo persecutio non omnis iniusta est, aut non est persecutio dicenda cū iusta est. Quapropter aut persecutionem pars Donati patitur iustam, aut persecutionem nō patitur, quia patitur iustē. Non autem iustē passus est Cæcilianus, quia innocens probatus & absolutus est. Hætenus Aug. Quibus similia reperies apud eundem Epistola 50. quæ scripta est de moderatē coercendis hæreticis. Reperiuntur & Mōtanistæ sua olim iactasse martyria, aduersus quos scribens Apollinaris: Cum (inquit) in omnibus conuicti, nihil respondere potuerint, ad martyres confugiunt, dicentes multos se habere martyres, & hoc esse indicium quod verus sit apud eos propheticus spiritus. Quid ergo? Quia multi alij hæretici plurimos martyres habēt, ideo acquiescendum est eis, quod etiam veritas apud ipsos sit? Nam primi qui dicuntur Marcionistæ, habent plures martyres: sed quæ esse poterit apud eos martyrij veritas, vbi Christi veritas non est? Possumus & nos ad similem modum respondere ætatis nostrę sectarijs. Ad suos enim martyres sæpe Calvinistæ confugiunt, atque hoc veritatis argumentum non infirmum censent. Quid ergo? num acquiescendum sectis

con-

Apud Eusebium, li. 5. ca. 16. eccl. histor.

contrarijs, quia plurimos & ipsæ martyres habent? Nam ipsi quidem, qui dicuntur Anabaptistæ, maiore multo martyrum numero triumphare videntur. Sed quæ possit apud eos esse martyrij veritas, ubi Christi veritas non est? Tenendumq; illud omnino quod ex diuo Augustino tritum iam *Epist. 50.* est: Martyrem non poenam facere, sed causam.

*Adhibendum esse interdum Christiano
defensionis officium.*

CAPVT XXI.

Postremo in loco attingendum nobis est piæ defensionis officium: quo (quoad fieri potest) à sacerdotio, à clero, à templis, sacrisque omnibus persequentium sacrilegæ propulsantur iniuriæ: Hic enim se quoq; pietatis zelus vehementer exerit, ne res eæ quibus honoratur Deus & colitur, à prophanis hominibus conculcentur, aut certe in vsus alienos & prophanos rapiantur. Contra verò, quæ maior ac fædior esse queat irreligiøsæ mentis ignauia, quàm pro domibus, pro thesauris, pro agris suis stare: pro ministris verò Dei, pro templis, pro sacris altaribus & imaginibus nolle repugnare? Atqui Machabæorum in hoc *Lib. 2. Machab. 5. 13.* præclara virtus & immortalis gloria cognoscitur, quod pro lege præcipuè & patrijs institutis, templisq; sancto fortiter steterint, impijsq; & blasphemis gentibus, quarum erat summum studiũ vnus veri Dei cultum euertere, ferro & armis restiterint. Quorum pro pietate conatus non solum Deus non neglexit, verum etiam mirabiliter adiuuit, seq; ipsum ducem præbens, cum illis & pugnauit, & vicit. Fuit ijs temporibus genti illi, curæ maximæ templi honor & dignitas, quod & tum cum eos Heliodori non expectatus in templum terruisset ingressus, magnopere declararunt. Alij enim gregatim de domibus confluebant, publica

*Lib. 2. Ma-
hab. ca. 3.
& Ambro.
lib. 2. offic.
cap. 29.*

supplicatione obsecrâtes, pro eo quod in contem-
ptu locus esset vêturus. Accinctæq; mulieres cili-
cijs pectus, per plateas confluebant: Sed & virgi-
nes, quæ conclusæ erant, procurrebant ad Oniam,
aliæ autem ad muros, quædam verò per fenestras
prospectabant: vniuersæ autem protendentes ma-
nus in cœlum deprecabantur. Erat enim miseræ
commixtæ multitudinis, & magni sacerdotis in
agone constituti expectatio. Et hi quidem inuo-
cabant omnipotentem Deum, vt credita sibi, his
qui crediderant, cum omni integritate conserva-
rentur. Nondum periclitabatur ciuitas, non do-
mus ciuium: non facultates, non sanguis peteba-
tur, sed templo Dei, & his qui sua illi deposita cre-
diderant, fieri non ferebant iniuriam. Decipi
enim eos qui credidissent loco & templo, quod
per vniuersum mundum honorabatur, pro sui
veneratione & sanctitate, aiebat Onias omnino
impossibile esse. Idcirco etiam Deus in Heliodo-
ri sacrilegam violentiam magnificè sane vindica-
uit. Equus enim terribilem habens sessorem, op-
timis operimentis adornatus, cum impetu Helio-
doro priores calces illisit: alijq; duo iuuenes vir-
tute decori circumsteterunt, atque ex vtraque
parte flagellantes, verberibus multis & plagis af-
fectu reddiderunt exanimem. Posterioribus quo-
que temporibus, frequens in Ecclesia Christi pius
eiusmodi pro Dei domo, rebusque sacris zelus ap-
paruit. Namque vt bella pijs ab imperatoribus
aut populis contra hostes religionis, pro ipsius re-
ligionis defensione suscepta præteream, impio-
rum quoque iudicum aut præfectorum prophana
temeritas, sacris ab ædibus aut Dei ministris Chri-
stiano legitur feruore repulsa. Sæuiente quippe
Galerio, præfectus Asclepiades Antiochiæ tem-
plum cogitauit irrumpere, sancta sanctorum dissi-
pare, altaris aram funditus euertere. At quemad-
modum est scriptum à Prudentio:

*Vide apud
Eusebium
quædamo-
dum Arme-
nij Christi-
ani effecti
pro sua re-
ligione tuæ
da aduer-
sus Roma.
Imp. Maxi-
mianum
arma sum-
psit, ac
bella intin-
derint.*

Præ-

*Præcurrit index his repente cognitis
 Romanus, sacra heros excellentia,
 Venire in armis perduelles nunciat,
 Animos paudentum præstruens hortatibus
 Stent ut parati, neue cedant turbini.
 Conspirat vno fœderatus spiritum
 Grex Christianus, agmen imperterritum
 Matrum, virorum, paruulorum, virginum
 Fixa & statuta est omnibus sententia:
 Fidem tueri, vel libenter emori.
 Refert repulsus miles ad subsellia,
 Plebis rebellis esse Romanum ducem,
 Flagrare cunctos pernicipi audacia.*

Romanus autem tanquam dux Christianorum in hac templi defensione, ad Iudicis tribunal protractus, facti sui rationem in hanc sententiam reddidit:

*Intrare seruis idolorum ac demonum
 Sanctam salutis non licet nostra domum,
 Ne polluat purus orandi locus:
 Confido sancto spiritu, nunquam tibi
 Dandum ut beatum limen attingas pede,
 Nisi forte noster factus, in nostrum gregem
 Mereare summi, quod Pater faxit Deus.*

Cum etiam imperante Apostata Iuliano, præfatus Orientis nomine Iulianus, Ecclesiam ingressus, sacra prophanaret, consueque ut & impudenter contra sacrum altare mingeret, (quemadmodum author est in Tripartita Theodoretus) Euzoius quidam, pio zelo succensus, prohibere conatus est, proptereaq; ab illo fuit in capite percussus. Atque ut intelligas quàm sit officiũ hoc piæ defensionis rationi consentaneũ, Gentiles ipsi pro suis qualibuscũq; sacris, natura duce propugnandũ sibi esse

Lib. 9. con-
 sist cap. 8.
 Et constā-
 tinus cont.
 Maximianus
 cap. 9.
 Prudentius
 describens
 martirium
 monachi
 Anisobent,

cum certo vitæ periculo putauerunt. Vnde cum Maximinus Imperator (vt est apud Herodianum lib. 7.) præter communes opes, templorum quoque donaria statuasque deorum sibi adiudicauisset, ausi sunt quidam è populo contra resistere, templaque tueri, & cadere etiam ante aras deorum immortalium. Nihil proinde iam mirum, si in Aphrica quoque aduersus furores Donatistarum, à pijs catholicis templa clausa sint, & quoad potuit defensa. Quod cum fieret, narrat Optatus Mileuitanus illos ascendisse culmina, nudasse tecta, tegulasque iactasse, iisdemque catholicos diaconos, cum altare defenderent, plurimos cruentatos, duos etiam occisos fuisse. Quid autem pius eiusmodi feruor Christianorum catholicorum, & pro sui præsulis tanquam Dei ministri defensione præstiterit, scriptum est à Gregorio Nazianzeno, in oratione funebris, qua Basilij laudes commemorat. In hunc enim cum Ponti præfectus grauius exarsisset, maximè quidem propter religionem, sed alio tamen (vt fit) quæsito colore: ciuitas cognito communi periculo, suique præsulis iniuriam, suam deputans, tota, inquit Nazianzenus, incendebatur: & veluti cum apum examē fumo commouetur, ita alius ab alio concitabatur, & insurgebat omne hominum genus, ætas omnis: præcipuè verò ij, qui Regi, texendo & arma faciendo, operam impendebant. Hi enim in talibus feruentiores sunt, audaciam enim ex libertate habent. Arma verò vnicuique erant singula quæ ex artis obueniebant instrumentis, aut si aliud quid fortè casu obuenisset, faces erant ad manus, lapides ad iactum expediti, fustes parati, cursus omnium vnus, clamor idem, alacritas communis: Ira dux grauis, aut miles: sed nec mulieres armistum carebant, cum eas tempus exaucisset: Radios enim habebant fraxineos, zeloque roborabantur, ac in audaciâ vertebantur virilem: & (vt breuiter dicam) pietatem diuidi arbitrabantur, si

tur, si hunc inter se partiti fuissent: isq; magis pius
 censebatur, qui prius manus præfecto talia auso
 intulisset. Quid igitur faciebat iudex seuerus &
 audax? Supplex erat, miserabilis, ærumnis plenus:
 & cui non humilior? donec illustris ille sine san-
 guine martyr, & sine plagis coronatus, populi cõ-
 pescuisset violentiam, illumque sui conhibuisset re-
 uerentia, sicq; supplicem suum & offensorem sal-
 uasset. Sic de Basilio Gregorius. Iam plebs Me-
 diolanensis tum erga suum Episcopum Ambro-
 sium, tum erga sacram Basilicam, ne in hæretico-
 rum Arianorum manus veniret, ardens studium,
 ex ipsius Ambrosij litteris abundè cognoscitur.
 Illius enim peruigiles, noctes dièsque, custodias si-
 gnificat extitisse. Augustinus quoque: Excubabat *In oratione*
 (inquit) in Ecclesia pia plebs, mori parata cum E- *contra Au-*
 piscopo suo. Quod si ita semper faciendum, cum *xentiū, li. 5*
 fieri posset, Christiani putauerunt, & si prohiben- *epistolarum*
 das pro cuiusque virili ab Ecclesijs, Deiq; mini-
 stris iniurias existimauerunt, grauis esse debet eo-
 rum præsertim culpa, qui cum authoritate arcere
 potuissent atque debuissent, non tamen vllum
 adhibere defensionis officium. Quo loco notan-
 da est epistola D. Augustini, quam scripsit ad Ne-
 ctarium Episcopum, quæ est numero 202. In qua
 ostendit, in ea ciuitate, cuius ille ciuibus parci vo-
 lebat, difficile potuisse reperiri omnino innocen-
 tes, quod illatam per idololatrias Ecclesiæ & clero
 nõ prohibuissent aut submouissent iniuriam, cum
 id haud ægrè fieri potuisset: Accipe (inquit) bre-
 uiter quæ commissa sint, & noxios ab innocentibus
 ipse discerne. Contra recentissimas leges Ca-
 lendis Iunijs, Paganorum sacrilega solennitas agi-
 tata est nemine prohibète, tam in solenti ausu, vt
 quod nec Iuliani temporibus factum est, petulan-
 tissima turba saltantium in eodem prorsus vico,
 ante fores transiret Ecclesiæ. Quam rem illicitissi-
 mam atque indignissimam, clericis prohibere ten-

rantibus, Ecclesia lapidata est. Deinde post dies ferme octo, cum leges notissimas Episcopus ordini replicasset, & dum ea quæ iussa sunt velut implere disponunt, iterum Ecclesia lapidata est: postridie nostris ad imponendum perditis metum, quod videbatur apud acta dicere volentibus, publica iura negata sunt. Eodémque ipso die, ne vel diuinitus terrentur, grando lapidationibus reddita est, qua transacta, continuo tertiam lapidationem, & postremo ignes Ecclesiasticis tectis & hominibus intulerunt: vnum seruorum Dei, qui oberrans occurrere potuit, occiderunt, cæteris partim vbi potuerant latitantibus, partim quo potuerant fugientibus: cum interea contrusus & coarctatus aliquo loco se occultaret Episcopus, vbi se ad mortem quærentium voces audiebat, sibi que increpantium, quod eo non inuento gratis tantum perpetrassent scelus. Gesta sunt hæc ab hora ferme decima vsque ad noctis partem non minimam. Nemo compescere, nemo subuenire tentauit illorum, quorum esse gratis posset autoritas, præter vnum peregrinum, per quem & plurimi serui Dei de manibus interficere conantium liberati sunt, & multa extorta prædantibus: per quem clarum factum est, quam facile illa vel omnino non fierent, vel cœpta destiterent, si ciues maximè primates ea fieri perficere vetuissent. Proinde in vniuersa (inquit) illa ciuitate, non innocentes à nocentibus, sed minus nocentes à nocentioribus poteris fortasse discernere. Nam in paruo peccato illi sunt, qui metu deterriti, maximeque ne offenderent eos, quos in illo oppido plurimum posse & inimicos Ecclesiæ nouerant, opem ferre non ausi sunt: Scelerati autem omnes, quibus etsi non facientibus neque immittentibus, tamen volentibus ista commissa sunt, sceleratiores qui commiserunt, sceleratissimi qui immiserunt. Hæc Augustinus,

Non

Non esses sacras prophanatoribus tradendas, etiam si mortis periculum impendeat.

CAPVT XII.

NVnc verò si persequentibus impijs sacra, quoad fieri potest, defendenda sunt, ne ab illis polluantur atque prophanentur, quantum esse debet eorum crimen, qui poscentibus inimicis ea ipsa tradunt? Sacrilegium enim committunt, eoque ipso quæ sacra sunt prophanant, & Christo, cui fuerant dedicata, faciunt iniuriam. Denique illa non tradenda, sed custodienda, cum Christi & Ecclesiæ sint, acceperunt. Hinc Diuus Ambrosius: Cum esset (inquit) propositum vt Ecclesiæ vasa iam traderemus, hoc responsi reddidi: *Me si de meis aliquid posceretur, aut fundus, aut domus, aut argentum, aut aurum, id quod mei iuris esset, libenter offerre: templo Dei nihil posse decerpere, nec tradere illud, quod custodiendum, non tradendum acceperim. Deinde consulere me etiam imperatoris saluti, quia nec mihi expediret tradere, nec illi accipere. Accipiat enim vocem liberi sacerdotis, si vult sibi esse consultum, recedat à Christi iniuria. Cum & basilica peteretur, respondit: Templum Dei tradi à sacerdote non posse. Et rursum: Si imperator (inquit) à me peteret, quod meum esset, id est, fundum meum, argentum meum, ius huiusmodi meum, me non refragaturum esse, quanquam omnia quæ mea sunt, essent pauperum, verum ea quæ diuina, Imperatoriæ potestati non esse subiecta. In eadem quoque ad Marcellam sororem Epistola, his sese verbis ad populum vsum fuisse scribit: Aduertitis quid iubeatur cum mandatur, Trade basilicam? Hoc est, dic aliquod verbum in Deum, & morere; nec solum dic aduersus Deum,*

*Li 5. epist.
in Auxenti
de basilicis
tradendis.*

*Epist. 33.
ad Marcel
lam jeror.*

Deum, sed etiam fac aduersus Deum. Mandatur, Trade altaria Dei; urgemur ergo præceptis regalibus, sed confirmamur scripturæ sermonibus. Quæ respondit: Tanquam vna ex insipientibus loquuta es. Et infra: Mandatur denique, trade basilicam. Respondeo: Nec mihi fas est tradere, nec tibi accipere Imperator expedit. Domum priuati nullo potes iure temerare, domum Dei existimas auferendam? Allegatur, Imperatori licere omnia, ipsius esse vniuersa. Respondeo: Noli te grauare Imperator, vt putes te in ea quæ diuina sunt imperiale aliquod ius habere, Noli te extollere: sed si vis diutius imperare, esto Deo subditus. Scriptum est: Quæ Dei, Deo: quæ Cæsaris, Cæsari. Ad imperatorem palatia pertinent, ad sacerdotem Ecclesiæ: publicorum tibi mænium ius commissum est, non sacrorum. Ad similem modum D. Chrysostomus

*Lib. 10. tri
par. bis. c. 6
& Theodo.
bisto. lib. 5
cap. 32.*

Gainæ magistro militum Barbaro & Ariano restitit, ne Ecclesiam, quam posceret, obtineret: Theodosioq; suadenti Ecclesiæ traditionem quam iam Gainæ promiserat, quod illius potentiam & tyrannidis meditationem vereretur, respondit: Noli ô Imperator hæc promittere, neque sanctum canibus dare. Non enim potero Deo benedicentes expellere, & sanctum templum blasphemantibus iniuste contradere. Ex his Ambrosij & Chrysostomi verbis haud obscure colligitur, quàm graue sit traditionis crimen, quod ne cõmitterent Christiani homines, manifestis sese mortis periculis obijcere non dubitauerunt. Quin & excruciat multi, vt traderent, verbi gratia, codices sacros, & quia tradere nolissent, occisi sunt, iureq; optimo pro martyribus habiti. Codices enim Dominicos persequutoribus dare, vtique indignum esse, ait Augustinus. Tametsi pro sua peruersitate dicerent quidam: Cum hoc fecit traditor, non habet crimen, quia iusserat Imperator. sicuti eodem loco Augustinus commemorat: *Istæ res sunt* (inquit Opta-

*Lib. contra
Donat. post
collat. ca. 1.*

Optatus) quæ solent martyria generare, si Christiano dicatur, Nega Deum; aut, Incède testamentum, thus pone, aut basilicas dirue. Quapropter in concilio Arelatensi primo, quod tempore Constantini Imperatoris & Sylvestri Papæ primi celebratum est, eiusmodi canon reperitur: De his qui scripturas sanctas tradidisse dicuntur, vel vasa Dominica, vel nomina fratrum suorum, placuit nobis, vt quicumque eorum in actis publicis fuerit detectus, vel verbis nudis, ab ordine clerici moueatur. Hoc crimen est, quod tantopere Donatistę ventilarunt aduersus Catholicam Ecclesiam, cuiusq; prætextu cõmunicare sibi cum ea phas non esse, aut cum Episcopis catholicis conuenire docuerunt, vsurpantes illud non sine intollerando supercilio: Indignum est, vt in vnum conueniant filij martyrum & progenies traditorum: cum nec ipsi tamen hac in parte reperirentur inculpati. Nã vt est apud Augustinũ, Siluanus Circensis Fœlici curatori sacramenta tradidit: Marianus ab aquis Tribilitanis Romano curatori tres codices obtulit: Victor Rufficaziensis quatuor Evangelia veluti delecticia combussit. Et hi tamen Cecilianum absentem damnare ausi sunt innocentem: Omninoq; vt Optatus Mileuitanus ostendit, qui traditores in persecutione fuerant, iidem postea schismatis authores extiterunt: In Aphrica (inquit) duo mala & pessima esse constat, vnum in traditione, alterum in schismate. Sed vtraque mala & vno tempore, & iisdem authoribus videntur esse commissa. & paulò post: Ipsi (inquit) apices & principes omnium, aliqui Episcopi, illis temporibus, vt damno æternæ vitæ, istius incertæ lucis moras breuissimas cõpararent, instrumenta diuinæ legis impiè tradiderunt. Ex quibus erat Donatus Masculitanus, &c. Aliquot enim traditores Episcopos recenset, qui fuerunt iidem principes schismaticæ factionis: vltro quippe recesserunt, qui pro admissa tradi-

Lib. 3. ad
Parmenianum.

Canon. 13.

In initio lib.
cont. Donatistas post
collationem.

In libello
cõtra Fulgentium Donatistam.

Libro 1. ad
Parmenianum.

Libro 7.

traditione abijci debuerant, pellendi fuerant (atque Optatus) post traditionem, de qua sibi in concilio Numidiæ confessi sunt. Sed ne inuidiæ essent, excusata est iudicandi seueritas, dum maiores vestri ultro inuenerunt de reatu consilium, ut cooperto crimine suo, quasi superbi discederent, quibus & dolere & erubescere debebatur. Non autem effugere videntur traditionis crimen, qui cum sua præsentia & debuissent, & potuissent conseruare Dei sacras domos & altaria, fuga se subtrahunt ac deserunt, atque in potestatem sacrilegorum res Deo dicatas venire patiuntur. Itaque cum Imperator Valentinianus denunciaisset Ambrosio, ut quò vellet iret: respondit dici sibi à sacerdotibus suis: Non multum interesse vtrum volens relinqueret, an traderet altare Christi. Cum enim reliqueris (aiebant) trades. Atque vtinam liquido (inquit) mihi pateret, quod Arianis Ecclesia minime traderetur, sponte me offerrem tuæ pietatis arbitrio. Sed si ego solus interstrepo, cur etiam de alijs omnibus inuadendis est præceptum? vtinam confirmetur, ut Ecclesijs nullus molestus sit, opto ut de me qualis videtur sententia proferatur. Hæc Epistola 32. ad Valentinianum imperatorem. In oratione quoque ad populum, quàm deserendam Ecclesiam minimè putauerit, cum hoc ne faceret aliqui metuissent, manifestè declarauit: Video vos (inquit) præter solitum esse turbatos atque asseruantes mei. Miror quod hoc fit, nisi fortè, quia per tribunos me vidistis aut audistis imperiali mandato esse conuentum, ut quo vellem abirem hinc, & si qui vellent, sequendi potestatem haberent. Metuistis ergo ne Ecclesiam desererem, & dum salutis meæ timeo, vos relinquerem. Sed quid & ipse mandauerim, potuistis aduertere, deserendæ Ecclesiæ mihi voluntatem subesse non posse: quia plus Dominum mundi, quàm sæculi huius imperatorem timerem. Sanè si me vis

me vis aliqua abduceret ab Ecclesia, carnem meam exturbari posse, non mentem: paratum me esse, vt si ille faceret, quod esse solet regiae potestatis, ego subirem quod sacerdotis esse consuevit. Quid ergo turbamini? volens ius nunquam deseram, coactus repugnare non noui: Dolere potero, potero flere, potero gemere: aduersus verò arma, milites, Gotthos quoque, lachrymae meae arma sunt. Talia enim munimenta sunt sacerdotis: aliter nec debeo, nec possum resistere, fugere autem & relinquere Ecclesiam non soleo. Hæc D. Ambrosius de suo erga res sacras officio: quod ad alios quoque, præcipuèque sacerdotes, pertinet, vt neque tradant ipsi quæ Dei sunt, neque id committant, vt deserendo tradidisse videantur. Iustinæ quoque Augustæ, cum fugere & basilicam relinquere iuberetur, respondit: Hoc ego sponte non faciam, ne lupis ~~ouium~~ *Tripart. li. flor. lib. 9.* *cap. 20.* ~~cap. 20.~~ contradere videar, aut Deum blasphemantibus cedere: hîc si placet occide, hoc loco mortem prona voluntate suscipiam. Hæc igitur diuî Ambrosij virtus inuicta fuit. Nec verò diuus Athanasius huic putandus est ita fuisse dissimilis, vt id faciendum existimauerit quod ille ne faceret, tantum periculum, tantumque regiae iræ suscepit. Est quidem scriptum in Tripartita *Li. 4. c. 30.* historia, Athanasio Constantium Imperatorem sic dixisse: Sedem tuam decreto concilij nobisque consentientibus recepisti. Sed quia sunt aliqui in Alexandria populi, tuam declinantes communionem, vnâ eos in ciuitate Ecclesiam habere permitte. Ad hanc verò propositionem istiusmodi verbis D. Athanasium occurrisset: O Imperator, habes potestatem iubere simul & agere, quæcunque volueris. Ruffinus verò addit eum, Deo suggerente, paratum habuisse consilium vt sic responderet: Quid est Imperator, quod poscenti tibi liceat denegari, qui pote-

potestatem omnium habes iubendi? Sed num quia id dixit tradidit, aut iuris imperialis esse, quibus liberet Ecclesias tradere, declarauit? non tanto (ut arbitror) vir ille placendi & adulandi studio tenebatur, ut abs iure sacerdotali, cuius tantam rationem habuit Diuus Ambrosius, omninoque ab ipsa veritate discederet. Mirum itaque potius esse significauit, id ab Episcopo peti, quod faceret imperator si vellet, qui iam hoc ipsum alijs locis copluribus fecisset, usque adeo ut plerisque Ecclesijs Arianorum factionibus occupatis, vix vnam per singulas ciuitates ~~Catholici Ecclesiam~~ retinerent, vnde non ait hoc se concedere, sed magis petitione sua illius ~~petitionem elusit~~. Etiam ego (inquit) beneficium abs te deponco, quod mihi concedi precor. Principe vero continuo se daturum esse pronunciante, ~~subiunxit Athanasius, idem~~ beneficium sibi dari petens, quod quærebat imperator accipere: vnam enim & ipse Ecclesiam postulabat dari per singulas ciuitates declinantibus Arianorum communionem. Igitur, ut memorata continet historia, Athanasij sententiam inutilem sibi cognoscentes Ariani, hoc quidem differendum esse dixerunt, & agendum quod placeret Imperatori. Quod si Marcellinus quidam cognitor ab imperatore datus in causa quæ inter Catholicos & Donatistas versabatur, basilicas reddidit Donatistis, vnde fuerant antea pulsi, nullum id officio sacerdotali præiudicium facit: nec propterea licuit, quia fecit. Tamen si hoc ille magni boni contemplatione ac spe fecerit, quo videlicet possent Donatistæ hoc beneficio ad conferendum cum Catholicis Episcopis inuitari. Quod si fieret, non parua spes affulgebat illos in concordiam reuocandos esse. Caietanus autem ~~cenfer malum~~ quodpiam tolerari posse, non solum ad impediendum maius malum, verum etiam ad obtinendum magnum quodpiam bonum. Quo si referre D. Athanasij atque

*Aug. initio
collationis
prime diei
in breuicu-
lo cōtra Do-
natistas.*

atque Marcellini memorata quispiam facta velit,
 non deerit quamobrem rectè prudenterq; fecisse
 videri possint. Fortasse & huc pertinet quod scrip-
 tum est in libro Pontificali, Ioannem primum
 eius nominis pontificem, impetrasse ab Iustino
 Imperatore, vt Arianis Ecclesiæ in Orientis parti-
 bus redderentur, ne Theodoricus Arianus Ita-
 liam ferro flammâque vastaret. Nullò verò modo
 hæc ijs patrocinantur, qui nulla etiam tantarum
 necessitatum habita ratione, nullis pressi talibus
 angustiis, sic instituendam Ecclesiam putant, vt
 libera cuique sui erroris professio, liberâque sectæ
 cuilibet sua templa tribuâtur: quos refellere, per-
 niciosamq; eorum sententiam (quæ Babylonicam
 nobis inuehat confusionem, non Ecclesiæ modo,
 verum etiam regni commodis & tranquillitati
 nocentissimam) non est huius instituti prolixius
 confutare. Porro hoc loco mirandum nobis oc-
 currit illius exemplum virginis, de qua scriptum
 sic est apud Orosium: Discurrentibus per urbem *Libro 7.*
 Barbaris (inuaferat enim Romanam urbem Ala-
 ricus Gotthorum rex) fortè vnus Gotthorum,
 idemque potens & Christianus sacram Deo vir-
 ginem iam ætate prouectam in quadam Ecclesia-
 stica domo reperit: cùmque ab ea aurum argen-
 tumq; honestè exposceret, illa fidei constantia esse
 apud se plurimum & mox proferendum respon-
 dit, ac protulit. Cumq; expositis opibus attonitū
 Barbarum magnitudine & pondere ac pulchritu-
 dine, ignota etiam vasorum qualitate intelligeret,
 virgo Christi ad Barbarū ait: Hæc Petri Aposto-
 li sacra ministeria sunt, præsume si audes, de facto
 tu videris: ego quia defendere non valeo, neque
 tenere audeo. Et ad hunc quidem illa modum
 egisse memoratur: diuinitus (vt arbitror) inspira-
 ta fiducia nullam prophanationem sequuturam
 esse, sed honorem potius ac venerationē. Id quod
 etiam euenit. Nam re perlata ad Alaricum, iussit
 M sic ea

hic ea cum pompa reportari ad beati Petri basilicam, & relata sunt magna cum veneratione, hymnos Romanis pariter ac Barbaris concinentibus. Potuit verò beatus Laurentius providentissimæ sapientiæ consilio efficere, ne thesauri Ecclesiæ in manus persecutoris venirent: Aurum Ecclesiæ (inquit Ambrosius) maluit erogare pauperibus quàm persecutori reseruare: & idè pro singulari suæ interpretationis viuacitate sacram martyrij accepit coronam: cùmque ostendisset consequentibus verbis quando quibûsque casibus liceat vasa Ecclesiæ confringere, conflare, vendere, subiungit: Opus est, vt de Ecclesia mystici poculi forma non exeat, ne ad vsus nepharios sacri calicis ministerium transferatur. Cauendum hoc omnino est, præsertim cum & illud grauiter legamus reprehensum, si contracta ab schismaticis atque in massas redacta sacra vascula, sine discrimine personarum & delectu venderentur. Hoc (inquit Optatus) immane facinus geminatum est. Dum fregistis etiam calices Christi sanguinis portitores: Quorum species reuocastis in massas, mercem nepharijs nundinis procurantes: ad quam nec emptores eligere voluistis, sacrilegi, dum inconsideratè vendidistis. Emerunt forsan in vsus suos sordidæ mulieres. Emerunt Pagani, facturi vasa in quibus incenderent idolis suis. O scelus nepharium! ô facinus inauditum! Auferre Deo, quod idolis præstes: subducere Christo, quod proficiat sacrilegio. Pietatis igitur hosti, & per sacrilegium contaminaturo, sacra vasa tradere non licet: Si verò nec occultari possunt, nec defendi, neque in alios vsus impendi, per quos sacrilegorum manibus subtrahantur: quid superest, nisi vt malum euenisse lugeamus, quod tolerare cogamur? Frequenter autem hoc quidem malum Ecclesia perpeffa est: Sed intolerabilius ab hæreticis profec-

*Lit. 1. offi-
nori 6. 28.*

*Lit. 6. con-
tra Parme-
nium.*

profectum, quàm à Gentilibus fuit. Et Ariani quidem, imperante Constantio (quem alterum propterea Balthasarem appellare liceat, cuius ex Daniele notum sacrilegium est) grauissimas ac *Daniel. 5.* cerbissimásque hac in parte persecutiones reddiderunt. Exturbatis quippe catholicis Episcopis, inhumanissiméque ~~tractatis~~, passim Arianis & impuris ac sceleratis hominibus traditæ sunt Ecclesiæ. Ex quo illa sunt in Epistola ad solitariam vitam agentes: Ecce nunc denuo Alexandria & in Ægypto, & per vniuersam Lybiam Ecclesias turbauit Constantius, & propalam edixit, vt catholicæ Ecclesiæ, eiectis piæ religionis Episcopis, in vniuersum Arianicæ opinionis hominibus tradantur. Hoc & dux exercitus facere incepit, & iam inde Episcopi, presbyterique *Epistola ad solitariam vitam agentis inter opera Diu Athanasij,* & monachi, ferro-vincti, plagis vsque ad mortem caesi, alio atque alio transmittuntur, omniæque in singulis locis tumultibus agitantur, Ægyptus & vniuersa Lybia in periculum venit, populis rerum iniquitatem indignè ferentibus, quum ante oculos suos videant Antichristo viam præparari, sua sibi eripi, eaque hæreticis dari. Quando igitur vnquã audita est tanta iniquitas? quando tale malum vel in persecutione visum fuit? Ethnici erant, qui prius persequebantur, sed tamen in Ecclesias idola non inferebant. Zenobia Iudæa erat, & protectrix Pauli Zamozenensis, sed tamen Ecclesias Iudeis in synagogas non tradidit. Nouum istud odium est, neq; simplex persecutio, sed immanitas quædam omni persecutione plena, procæmium & præparatio Antichristi. Quin, vt eadem narrat Epistola, concitabantur idolorum cultores, qui ex præcepto Imperatoris inuaderent Ecclesias & populos lapidarent: per hos igitur cædes primum factæ, subsellia deinde, thronus, mensa lignea, tabulæ Ecclesiæ, & cetera quæ efferri poterent, foris tradita flammis & corrupta sunt. Inter

hæc idola sua laudibus ferebant, dicebantq: **Con-**
stātius ethnicus factus est, & Ariani nostra agno-
 scunt. **Sed cum** inter cæteros vnus magna vi thro-
 num conuellens, ad se distraheret, fragmento li-
 gni inde in eius ventrem resiliente, & quasi ab ipsa
 ultione impacto, intestina sua perforauit, & eadem
 vi, qua folium dirumpere conabatur, rupto aluo,
 sua intestina profudit: Nimirum vlticem Dei ma-
 num cum Azotijs sensit, qui olim ausi sacram ar-
 cam attingere tractareq: irreuerentius, diuina vl-
 tione perierunt. Non dissimilia scribit de Vanda-
 lis Victor Vticensis. Nam accēsus aduersus Eccle-
 siam Gensericus mittit Proculum quendā in pro-
 uinciam Zengitanam, qui coarctaret (inquit) ad
 tradendum ministeria diuina, vel libros, cunctos
 Domini sacerdotes: vt primò armis nudaret, & ita
 facilius inermes hostis callidus captiuasset. Qui-
 bus se non posse tradere clamantibus, ipse rapaci
 manu cuncta populabatur, atque de pallis altaris,
 proch nefas, camisas sibi & femoralia faciebat.
 Qui tamen Proculus huius rei exequutor, frustra-
 tim sibi comedens linguam, in breui turpissima
 consumptus est morte. Hæc Victor lib. 1. de perse-
 quutione Vandalica. Neque verò nostri huius est
 instituti demonstrare prolixius quàm malè & aliàs
 cesserit sacrilegis: vt palam fieret, quanta venera-
 tione & fide seruanda sunt ea, quæ Deo fuerint se-
 mel ad eius cultum honorémque dedicata & con-
 secrata.

*vide lib. 6.
 v. par. bist.
 cap 32.*

*Quibus argumentis palliari posse videatur tra-
 ditionis crimen, & ad ea brevis responsio.*

CAPVT XXIII.

SI quis autem videre vult, quibus modis per-
 suadere queat, nullum aut exiguū in traditio-
 ne crimen esse, legat septimum Optati librum
 aduersum Parmenianum Donatistam: In quo ar-
 gumenta colligit, plausibiliterq: prosequitur qui-
 bus

bus Donatistarum patres suam traditionem excusare potuissent, si ad Ecclesiam pœnitentes redire, quàm ab ea per superbiam resilire maluissent. *Primum argumētum.* Primum illud est, quod Moyses populo indignatus tabulas quas digito Dei gerebat inscriptas, vltro nemine cogente proiectas fregerit. Si frangere licuit, neque id sacrilegij quicquam habuit aut iniuriæ in res sacras, cur non liceat tradere ei qui sit confracturus, præsertim vrgēte mortis metu? Nec tam est sacer codex humana manu conscriptus, quàm ille Dei digito lapis exaratus. Secundū, quod arcam, in qua lex erat Dei, presbyteri, cæterique Israelitæ fugientes tradiderūt inimicis Philistæis. Tertium, quod Baruch librū tradidit, quem postea rex impius minutatim concidit & combussit, illo interim qui tradiderat fuga sibi consulente. Nec tamen aut Moyse Dominus iratus legitur ob id factum, nec aut Israelitas arca relicta hostibus sacrilegis, aut Baruch, quia libro tradito fugerat, vlla vindicta sequuta est. Quartum, non magnum est quid scriptum sit in charta aut membrana, aut lapide, nec ea legis inscriptio magni facienda est, sed ea qua scribitur lex in corde per gratiā noui testamenti: non ergo multum interest quid in libro aut membrana tradatur, modo lex in corde salua permaneant: nec damnum vllum accipit Ecclesia, quando adhuc libris plenæ sunt omnium manus, eadēque omnia quę prius & docentur & discuntur. Ergo si nullo Ecclesiæ damno potest quibusdam libris traditis vita seruari, quid necesse est sine causa, ne liber tradatur, occidi? Rursum, si membranæ aut libri quibus diuinæ res conscriptę continentur, deberent illæsi & inuiolati seruari: tunc damnandi essent etiam vt sacrilegi, ij qui libros sacros negligenter abijciunt aut collocant, aut in ignes vel aquas excidere patiuntur. Vnde fit vt pereant omnino, aut corrosi à muribus, vel carie dimiuenti, non illæsi recipiantur. Postremò An-

II.

III.

IIII.

V.

VI.

VII.

rochi tēporibus Iudei coacti sunt libros in incen-
 dium dare. Quo factū est vt de scriptura diuina ne
 apex quidē vnus remaneret, libris omnibus tradi-
 tis: nec de Iudæis tamē quispiā est ob id damnatus.
 Ad hæc verò atque huius generis argumenta non
 difficile est respondere ei qui attenderit quid petat
 inimicus religionis, quando sacros codices postu-
 lat. Petit enim Christi iniuriam, petit extinctio-
 nem diuinæ legis, petit sacrorum cōculationem.
 Qui proinde petenti vel metu acquiescit, hoc pro-
 fecto quod ille petierit, facit. Quod igitur aliās li-
 ceret vitæ causa conseruandæ: verbi gratia: Si
 onusta librorum sacrorum pōdere nauis mergen-
 da videretur, nisi libris in mare proiectis, hoc cum
 inimicus ad Christi petierit ac religionis iniuriam,
 facere omnino non licebit. Sicuti etiam Christia-
 no liceret carne vesci ieiunij tempore, si nullus
 alius cibus suppeteret, essetque nisi manducaret
 fame periturus: tamen si hoc inimicus Ecclesia-
 sticæ & Apostolicæ legis postulet, facere non li-
 cebit, nec siquidem in discrimen vita vocetur:
 petit enim bonæ legis violationem & contem-
 ptum, quem ne Christianus admittat, ordinatissi-
 mē religiosissimēque temporaria vita contem-
 nitur. Possit verò cuiuspiam Optatus ipse talibus
 argumentis animi sui probasse videri sententiam,
 quod sepius repetat, si talibus argumentis vsi fuisset
 Donatistæ traditores, non eos inre potuisse
 à communione repelli. Item quod dicat id solum
 prohiberi à Deo quod voluntate fit, non quod sit
 necessitate. ait enim: Quicquid Deus fieri noluit,
 ore suo prohibuit, quomodo dixit: Non occides,
 non mœchaberis. Potuit etiā hoc prohibere quod
 à parentibus vestris admissum est, sed quoniam
 aliud est quod operatur euentus, quicquid de vo-
 luntate potest ab homine fieri, hoc meruit pro-
 hiberi: quicquid necessitas peccat, non potest ma-
 gnis viribus accusari. & infra: Ideo prohibita
 dum

dum geruntur, iudicio destinantur: non interdum aliqua necessitate fiunt, fortè facile dignetur ignoscere qui noluit prohibere. Verum de Optati sententia constat ex ijs quæ superius commemorata sunt ex eodem. Ostendit autem quàm multis de causis potuissent excusabiles videri, atque ad veniam pertinere, nisi maluissent per superbiam schisma facere. Quod autem metu perterritus & turbatus necessitate cogente quis facit, nemo existimare debet non id fieri voluntate. Est enim minus quidem voluntarium quàm si abesset metus, sed tamen cum quis faciat, non is potest videri nisi voluntate facere. Non solet (inquit Augustinus) dici quisquam voluntate fecisse quod fecit inuitus. Quamquam si subtilius aduertamus, etiam quod quisque inuitus facere cogitur, si facit, voluntate facit: sed quia malit aliud, ideo inuitus, hoc est, nolens facere dicitur. Malo quippe aliquo facere compellitur, quod volens euitare vel à se remouere facit quod cogitur. Nam si tanta voluntas sit vt malit hoc non facere quàm illud non pati, cogenti proculdubio resistit, nec facit: ac per hoc si facit, non quidem plena & libera voluntate, sed tamen non facit nisi voluntate. Cum igitur per quendam sathanæ satellitem nomine Magnum, qui Valenti imperatori comes largitionum & dux militum fuerat, hæc atque eiusmodi serpens antiquus sibilaret, quo Dei famulos vel ad simulatam pertraheret schismatis Ariani societatem: Flectimini, & finite vos moueri vt Ariano dogmati accedatis: veniam quidem vobis numen (etiamsi vestra sit vera religio) facile daturum est, ignoscetque diuinitas, quod non vestra sponte, sed vi coacti feceritis. Coactioni enim semper relinquitur defensio, necessitatiue satisfactio adest: spontaneam vero voluntatem digna accusatio subsequitur.

His igitur cum ille vocibus sollicitaret ad nephas, nihil persuasit catholicis ac probè instructis hominibus, sed nec perterrefecit ac fregit adiunctis minis, vllâue commemoratione tormentorum. Quin hoc potius responsum accepit fortissimis dignum pectoribus: Desine de cætero, desine huiusmodi nos territare sermone, desine verba inania profundere. Quantumlibet enim fremas, & tanquam procellosus ventus irrumpas, nos tamen de pietatis via non depellemur, sed pro orthodoxis dogmatibus ad mortem vsque decertabimus.

*Tripart. bi.
stor lib. 7.
cap. 40.
Et Ibeodo.
li. 4. ca. 22*

Summaria comprehensio rationum earum quibus officium catholici hominis continetur in schismatica communione vitanda persequutionis tempore.

CAPVT XXIII.

HOc igitur Christiani hominis officium est, quod animo sententiæque de religione tenetur, id obseruatione quoque præ se ferre: cum sit religio Christiana non in solo posita de rebus diuinis recto iudicio, sed in ipso præcipuè opere, certæque & colendi & viuendi ratione: neque vsquam omnino nisi in Ecclesiæ catholicæ communionem teneatur: vsque adeo vt qui se ab ea seiunxerunt, vel seiunctis communicant, etiam si neque doctrinæ aduersitate, quod ad tempus fieri potest, neque sacramentorum diuerso ritu separantur, tamen veram non sequantur religionem. Non enim vlla in societate vera est, nisi in qua Deus fide, spe & charitate colitur: neque ibi charitate coli potest, vbi nefario schismate vnitas violatur, & animi bene prius iuncti diuiduntur, & altare sacrilegæ separationis, contra altare pacificæ vnitatis erigitur. Sic enim creditur & docetur (inquit Augustinus) quod est humanæ salutis caput; non aliam esse philosophiam, id est, sapientiæ studium, & aliam religionem; cum ij quorum doctrinam

*Lib de ve
ra relig. c. 5*

nam non approbamus, nec sacramenta nobiscum communicant. Quod in illis minus mirandum est, qui eorum quoque sacramentorum ritu dispares esse voluerunt, sicut nescio qui serpentini qui appellantur Manichæi, sicut alij nonnulli. Sed in illis magis animaduertendum hoc, magisque prædicandum, qui paria sacramenta celebrâtes, tamen quia sententia dispares sunt, & errores suos animosius defendere, quàm cautius corrigere maluerunt, exclusi à catholica communione & à participatione quamvis parium sacramentorum, propria vocabula propriosq; conuentus non in sermone tantum, sed etiam in superstitione meruerunt: vt Photiniani, Ariani, multiq; præterea. Nam de ijs qui schismata fecerunt, alia quæstio est. Posset enim eos area Dominica vsq; ad tempus vltimæ vtilitatis velut paleas sustinere, nisi vento superbiam nimia leuitate celsissent, & sese à nobis vltro separassent. Iudæi verò, quamuis vni omnipotenti Deo supplicent, sola tamen temporalia & visibilia bona de illo expectantes, rudimenta noui populi ab humilitate surgentia, in ipsis suis scripturis nimia securitate noluerunt aduertere, atque ita in veteri homine remanserunt. Quæ cum ita sint, neque in confusione Paganorum, neque in purgamentis hæreticorum, neque in languore schismaticorum, neque in cæcitate Iudæorum querenda est religio, sed apud ~~eos~~ solos qui Christiani catholici vel orthodoxi nominantur, id est, integritatis custodes & recta sectantes. Hæc enim Ecclesia catholica per totum orbem valide latèque diffusa, omnibus errantibus vtitur ad profectus suos, & ad eorum correctionem cum euigilare voluerint. Hactenus D. August. Cum igitur hæc ita se habeant, quisquis veram & illibatam tenere vult religionem, non id arbitrabitur sat esse, si probè calleat quid de Deo sit rebúsque diuinis omnibus sentiendum; verum etiam omnem imprimis cum

Paganismo & Iudaismo communicationem vitabit, ne recta licet sentiens, impia tamē superstitione maculetur. Deinde operam dabit ne vlli schismaticæ factioni communicet verbo factōne: quoniā & hoc modo falsa religione polluitur necesse est. Hoc ei præterea magnopere est considerādum, quod sicut vnus est Deus omnium effector & Dominus, atque vnus Dei hominūque mediator Christus Iesus: ita vnica sit in terris Ecclesia, sub Imperatore Christo militās: quæ & eius est familia quam pascit, & spōsa quam diligit, & corpus quod animat ac vegetat spiritu suo sancto: vt si crimen esse perspicit, alterum Deum præter eum qui solus est, verbo vel opere profiteri, non dubitet etiam graui scelere inquinari, quotquot alteram similiter Ecclesiam, præter eam quæ sola vera est, verbo factōve præ se ferant. Est enim hoc diuellere ac distrahere Christum, cum dicat Apostolus contra schismaticos: Nunquid diuisus est Christus? Est hoc alteram ei sponfam & amicam adiungere, cum scriptum sit: Vna est columba mea, perfecta mea. &: Sicut lilium inter spinas, sic amica mea inter filias. Est hoc corpus eius dilacerare atque discerpere, quod malum in sui diuisione vestimēti propheticis verbis deplorauit ipse, cum ait: Diuiserūt sibi vestimenta mea. Hoc deniq; est tollere membrum Christi & facere membrum meretricis, quæ suo viro derelicto, & eius castissimo cubili contempto, nouis amatoribus, hoc est, nouitiorum errorum magistris, sese turpissimè perniciosissimèque prostituit. Itaque si nefaria fuit inter Gentiles in ipsa Gentili superstitione communicatio, fieri non potest vt non inter hæreticos atq; schismaticos plurimū sit criminis habitura: quod illic quidem (vti antea quoque significauimus) apertè & sine fūco Regi Christo renūciatur: hic verò sub professione Christiani nominis Christus ipse deseratur & negetur, illic irrogetur iniuria Deo præter

1. Corin. 1

Cantic. 2.

6.

Psalm. 21.

ter quem adoratur alius: hic Ecclesię pientissimę
 matri, cuius sic inimica & æmula honoretur. Illic
 ineatur cum diabolo societas, cui honos defertur
 in idolo: hic eidem quoque iungatur tanquā prin-
 cipi ac moderatori, qui in eam se societatem infi-
 nuet: in qua Christus capitis loco non habetur. Ac
 ne sine luculentiore scripturę testimonio rem tan-
 tam asseri quisquā putet, cur se dixit Dauid odisse *psal. 25.*
 Ecclesiam malignantiū, & nolle cum iniqua gerē- *& 140.*
 tibus introire? Cur sic ~~abhorruit~~ ab ijs qui operā-
 tur iniquitatem, & communicare recusauit cum
 electis eorum? An esse potest nō grauis iniquitas,
 qua amplissimū pacis & vnitatis ~~munus dirūpitur~~?
 qua princeps ipsa & vita virtutū charitas, quam B. *coloss. 3.*
 Apostolus perfectionis vinculū appellauit, perni-
 ciosissima hominū distractione violatur? qua fu-
 rialis odijs Christiani in Christianos, hoc est in
 fratres suos, incitatur? qua pietas omnis extingui-
 tur, exuitur humanitas, & tanquā effractis portis,
 inuehitur omniū officina vitiōrum? At qui hęc tam
 grauis in Deū & homines iniquitas, cētus schisma-
 ticos cogit atq; cōglutinat; hęc vt Deū seorsim co-
 lāt, vel iisdē vel alijs pro arbitratu ritibus surroga-
 tis, impellit. Ideoq; cum colere se pulchrē putant,
 offendūt: dūq; precātur, dānantur: & fit eis propria
 ipsorū oratio in peccatū. Neq; igitur scripturę de-
 sunt, & ratio ipsa perspicuo sui lumine cōmonstrat
 eorum crimē, qui schismati vel hæreſi communi-
 cauerint. Quid iam vel exempla maiorū, vel docu-
 menta requirantur? Sunt enim plurima. Hinc nēpe
 D. Cyprianus ~~suos est exebrio~~ literis ac monitis ad-
 hortatus, ne cōmunicarent cum Nouatianis. Hinc
 D. Ambrosius fratrem laudat suum, quod cōmuni-
 care noluerit cum schismaticis Luciferianis. Hinc
 Diuo Leoni curę fuit, ne qui suorum nocturnis
 polluerentur cœtib; Manichæorū. Quanta verō
 piorum pastorum semper vigilantia fuit, ne com-
 municaretur cum Arianis? Et quis D. Augustini
 salu-

In oratione
 funebri de
 fratre Sa-
 tiro.

Serm. 4. de
 Epiob. Do-

mini.

saluberrimam doctrinam ignoret, qua frequenter ostendit nullam esse debuisse communicationem cum schismaticis Donatistis? Et sciebat ille quidem sacramenta Christi, vbicunque acciperentur, per se ipsa sancta semper esse: probè tenebat, quod suis litteris frequenter inculcauit, sacratissima illa diuinæ operationis instrumenta, nullius aut impietate aut impuritate pollui posse: Et idem tamen scribere non dubitauit, eos schismatis sacrilegio ~~vulnerari~~, qui eligerent extra communionem corporis Christi, baptismi sacramentum accipere, ad eandem licet communionem cum eo quod alibi acceperant continuo redituri. Sicuti & beatus martyr Ermigildus non ignorauit sanctum per se ipsum fore quod Episcopus Arianus consecratum porrigeret, & is maluit tamen fortiter mortem oppetere, quàm accipiendo schismatica communione maculari. Bona sint igitur ea quæ traduntur in schismate: salutaria sint multa quæ illic audiuntur: potest quod bonum est accipi non bene. Vti profecto non bene, sed sceleratè prorsus accipitur, si vel cum offendiculo & ruina fratrum, vel cum ipsa participatione detestandæ diuisionis accipitur. Bona per se ipsa & sancta sunt sacramenta quæ Christus instituit: sed cum eadem vnitatis & vincula & signa sint, tu in his tibi cum illis communicare licere censebis, cum quibus vnum esse non possis? Diuina prorsus & salutaria sunt Christi sacramenta; quis id Christianus ignoret? Sed cum Ecclesiæ tradita soli, foris nullo iure, sed cum iniuria graui teneantur atque tractentur, tu in hoc quod tam malè foris & contra Ecclesiam geritur, te ipsum adiungere socium & cooperatorem non reformidabis? Quod si in ijs rebus quæ sanctæ per se ipsas diuinæq; sunt, & ritè ab hominibus susceptæ salutem afferunt, fugienda cum hæreticis & schismaticis communio est: multo sane magis in ijs erit declinanda, quæ non tradita diuinitus, sed huma-

humanae praesumptionis errore conficta sunt, ad unicam illam & pristinam Dei colendi rationem euertendam. Nec verò quisquam audiendus erit qui dicat: Nouit Dominus quid secretius corde credas ad iustitiam, nouit quæ templa & sacra voluntate venereris, quā vnitatem & societatem intimis votis amplectare. Ream nō tenebit voluntatem in opere communicationis, quod non ipsa produxerit, sed metus persecutionis extorserit. Primum enim ridiculū est, si quis putet placere Deo cuiusquam posse cor, cuius voluntarie manus aut lingua blasphemet; estq; hoc stultè niti, sic hominem vnum in duos distrahere, vt interior Deo, exterior diabolo seruiat: interior fidem seruet, exterior perfidiam exerceat: occultet interior pietatem, vnde non glorificetur apud homines Deus, exterior impietatem proferat atque manifestet, vnde etiam dedecoretur: atque isto scilicet modo corde quidem credatur, non tamen ad iustitiam, & ore vel opere ipso confessio fiat, sed ad perditionem. Deinde quæ fuerit laudatissimi illius senis Eleazari virtus, cum suillam contra legem edere iuberetur? quæ martyrum innumerabilium gloria, cum dijs alienis sacrificare cogerentur, si ad purgationem communicationis, eiusmodi suscipienda sit oratio? Nōne & illi dicere hunc in modum potuerunt? Nouit Dominus quem Deum mente colamus, ~~Nouis~~ cuius implendam & amandam legem non dubitemus: ream non tenebit voluntatem in opere impietatis, quod non ipsa produxerit, sed metus extorserit. Denique sicut ab inuitis facta iure multa laudatur, quoniam prudenti voluntate minora profundere bona maluerunt, quā perdere potiora: sic & ab inuitis admissa quædam meritò vituperantur, quod præpostera voluntate, maiora quæ cupissent bona perdiderunt, vt longe minoribus fruerentur. Semper igitur hereticorum fraudes & imposturas suspectas habebit

Chri-

Christianus catholicus: quorum huc omnis vigilantia spectat, ut cum opprimere orthodoxos non possunt, illos habere videantur suis à partibus consistentes. Honorari namque schismata cupiunt ab ea maximè Ecclesia, cuius esse non ignorant primariam in terris auctoritatem. Ideoque modis omnibus societatem expetunt, eamque aut eliciunt fraudibus, aut minis vel tormētis extorquent. Porro quanti sæpe negotij sit omnem maculam effugere, ut saltem nec communicasse videamur, exemplo sunt Ariminensis concilij patres. Qui ut fuerint dolis Arianorum Episcoporum circumuenti, prolixè est à Seuerò Sulpitio commemoratum. Tametsi autem illi reuera cum Arianis in sensu non communicauerint, tamen communicasse sunt visi, propter concordiae speciem in fide ab Arianis ipsis concepta atque præscripta: ut mēte licet animiq; sententia non essent Ariani, speciem tamē Arianismi neutiquam effugerent. Propter quam diuus Hieronymus dixisse videtur: Tunc orbis ingemuit, & Arianum se esse miratus est. Ait idem quoque de Ariminensis concilij patribus, quod sine conscientia hæretici ferebantur. Nam Constantius quidem imperator Ariminum conuenire iusserat Episcopos vndecunque ascitos, Tauróque præfecto imperauerat ut collectos in vnum non ante dimitteret, quàm in vnam fidem consensissent, promisso eidem consulatione, si rem effectui tradidisset: Eo factum, ut post multas concertationes & luctas paulatim plerique nostrorum, partim imbecillitate ingenij, partim tædio peregrinationis euicti, dederent sese aduersarijs. Et in magnis quidem persecutionum periculis non instructissimo homini facile quælibet ratiuncula communicationem persuaserit, externi saltem verbi vel operis quadam simulatione fallentem. Nam & illud quod supra protulimus de simulatione Iehu, quibusdam im-

fuisse

*Lib. 2. sa
tra histor.*

*Hieron in
dialogo cō.
tra Lucife.*

fuisse non procul ab orbe nostro constitutis accepimus: sicuti & id quosdam ~~fefellit~~ quod scriptum est in Epistola Hieremiæ, quam scripsit ad Iudæos in Babylone captivos: Visa itaque turba de retro & ab ante adorantes, dicite in cordibus vestris: Te oportet adorari Domine. Vnde confici quidam putant nihil fore peccati, si media in turba adorantium, vel alioqui impiè quiddam & contra Christi vel sponsæ eius honorem agentium constitutus Christianus, quod more cæterorum facere videatur, tacitis cogitationibus & secretioribus animi motibus detestetur, illud identidem secum reputans: Te oportet adorari Domine. Cui errori se mox opponit legio sanctissima Thebeorum. Nam cum in Galliam Maximianus Imperator venisset, atque in Sedunorum finibus sacrificij causa constitisset, Thebeorum legio, ne impiorum societate sacrorum contaminaretur, ab reliquis sese copijs seiunxit. Quam ob causam immissa exercitus parte, decimum quemque sacrilegus imperator iussit occidi. Quod martyrium cum sua sponte, tum duce & hortatore Mauritio suscipere maluerunt, quàm imperata facere nepharij Imperatoris, qui eos, cum discessissent, ad sacrificij communionem sæuo imperio reuocarat. Quid igitur sibi vult propheta Hieremias? Rudes & crassos Iudæos instruit ac præmonet, ne multitudine adorantium & publica solemnique veneratione idolorum permoti, diuinitatem inesse ligno aut lapidi putent, atque in communem cæcæ gentilitatis errorem rapiantur, in quem tum populus ille admodum propendebat. Sed si adorantium turbis circumfundi contigerit, neque omnis fortè possit idololatrarum societas euitari: saltem adorent Deum vnum mente, neque conceptam de eo fidem elabi sibi patiantur. Itaq; consequentibus Epistolæ verbis id agit magno molimine rationum, vt persuadeat miseris illis, idola quæ

Baruch. 6.

Ibidem.

mani-

manibus conficerentur humanis, Deos non esse. Nos verò hoc opusculo non id egimus, neque in eo elaborauimus, vt fides Catholica teneretur firmo semper animorum assensu: aut vt ignaros hæreseôn vel schismatum, rudésque doctrinæ Christianæ homines quid illa sint doceremus: sed homini Christiano, iamq; cognitione catholicæ veritatis illustrato, tuendæ proferendæq; suæ religionis, etiam inter aduersarios, officium pro concessa nobis facultate præscripsimus. Quod vt faceremus, nostra nos tempora commouebât. In quibus is est rerum status, vt non modo in area dominica ingens palea granis adhærescat, nec malos tantummodo cum bonis pisces euangelica sagena complectatur, aut in agro Domini cum tritico zizania permista cernantur (quippe hæc omnium fuere temporum, locorúmque omnium) verum etiam premantur & concutiâtur vehementer castra sanctorum ab Antichristi ministris, tantumque horum non paucis in locis valeat vis atque authoritas, vt Ecclesiæ catholicæ pristinus ille decor ac propemodum vultus ipse conciderit. Videre est omnino hoc infœlicissimo tempore, miserabili fœditate Christianas domos familiasq; turbatas. Nempe mariti & vxores de suo inter se lecto consentiunt, & de Christi altari dissentiunt: per illum sibi iurant vt inter se pacem habeant, & in illo pacem habere non possunt: filij cum parentibus vnâ domum habent, & domum Dei non habent vnâ: succedere in eorum hæreditatem gestiunt, cum quibus de Christi hæreditate rixantur. Serui & domini communem Deum diuidunt, qui serui formam accepit, vt omnes seruiendo liberaret. Quoniam igitur pijs sæpenumero hominibus, non inter malos modo catholicos, verum etiam inter hæreticos & schismaticos, qui de nostra quotidie palea generantur, cum luctu viuendum est, neque euitari omnis cum ijs societas potest,

est nisi de hoc mundo exeat, non ignorandum fuit quonam modo inter eos vera pietas non solum cognitione & assensu integra, sed etiam observatione & factis inuiolata atq; inoffensa teneatur. Quod si fortè cuipiam minus accuratè, minisque plenè omnia quæ huc pertinebant exequi videbimur, is velim rationem habeat rerum nostrarum afflictissimarum, quo tempore labor à nobis hic susceptus est. Circumuallantibus enim vndique malis, sæpenumero vel metus, vel moeror obturbabant. Namque in hosce tristissimos dies, non vnum duntaxat genus cladis incidit, sed simul & hæresis in perniciem grassatur animarum, & bello, fame, peste cuncta vastantur. Iam illis possum versibus mala nostra lamentari:

P R O S P E R.

*Qui centum quondam terram vertebat aratris,
 Estuat, vt geminos possit habere bones.
 Vectus magnificas Carpentis sæpe per vrbes,
 Rus vacuum fessis ager adit pedibus.
 Non idem status est agris, non vrribus vllis,
 Omniaq; in finem præcipitata ruunt.
 Ferro, peste, fame, vinclis, algore, calore,
 Mille modis miseros mors rapit vna homines.
 Impia confuso sæuit discordia mundo,
 Pax abiit terris, vltima quæq; vides.
 Et si concluso superessent tempora sæclo,
 Ut posset longos mundus habere dies:
 Nos tamen occasum nostrum observare deceret.
 Et finem vita quemq; videre sua.
 Nā mihi quid prodest, quod longo flumina curso
 Semper inexhaustis prona feruntur aquis?
 Multa quod annosa vicerunt sæcula sylua,
 Quòdque suis durant florea rura locis?*

*Ista manent, nostri sed non mansere parentes,
 Exigui vitam temporis hospes ago.
 Non ergo sumus hic nequicquam in sacula nati,
 Qua percutunt nobis, & quibus occidimus.
 Sed vitam aeternam vita ut mereamur in ista,
 Ut subeat requies longa labore breui.*

F I N I S.

ERRATA.

Pagina 17. in margine pro Cap. 17. Lege 7.
 Pagina 47. L. 1. etiam si assumpserit.
 Pagina 69. L. 29. Quia vnumquemque.
 Pag. 110. L. 8. perficiendi facultas.

ANNO.

ANNOTATIONES

in librum præcedentem.

Pagina 23. De Sancto Eusebio.

Error vel potius mendacium eius qui callide sua verba inseruit sermoni Catholico sub nomine Ambrosii, beatum Eusebium asserens martyrem, vel ex eo coarguitur, quod ipse Ambrosius serm. 82. & alij quidam Eusebium hunc Vercellensem confessorem appellant, non martyrem.

Pagina 30. De Philosophis cum populo sacrificantibus.

Quod de philosophis generatim hic dicimus, habet idem August. lib. de vera religione cap. 1. & 2. de ipso quoque Socrate speciatim mentionem faciens: Satis (inquit) quantum mihi videtur, apparet aliud eos in religione suscepisse cum populo, & aliud eodem ipso populo audiente, defendisse priuatim. Socrates tamen audacior ceteris fuisse perhibetur, iurando per canem quemlibet & lapidem, & quicquid iuraturus esset in promptu, & quasi ad manum occurrisset. Credo intelligebat qualiacunque opera natura, quæ administrante diuina providentia gignerentur, multo quàm hominum & quorumlibet opificum esse meliora, & ideo di-

ANNOTATIONES.

vinis honoribus digniora quàm ea quæ in tem-
plis colebantur. Et infra: Postea suauius ad le-
gendum quàm potentius ad persuadendum scri-
psit Plato. Non enim sic nati erant isti, id est,
Socrates & Plato, ut populorum suorum opinio-
nem, ad verum cultum veri Dei à simulachro-
rum superstitione, atque ab huius mundi vani-
tate conuerterent. Itaq; & ipse Socrates cum
populo simulachra venerabatur, & post eius
damnationem mortemq; nemo ausus est iurare
per canem, nec appellare quemcunque lapidem
Iouem. Sic August. eo loco. Ipse quoque Seneca
nobilissimus ætatis suæ philosophus, atque illu-
stris populi Romani senator, sicuti suis ipse ver-
bis declarauit, hoc colebat quod reprehendebat,
agebat quod arguebat, quod culpabat adorabat:
Quia videlicet magnum aliquid eum philoso-
phia docuerat (inquit Augustinus) ne supersti-
tiosus esset in mundo: sed propter leges ciuium
morésque hominum non quidem ageret fingen-
tem Scenicum in theatro, sed imitaretur in
templo: eo damnabilius, quod ea quæ mendaciter
agebat sic ageret, ut eum populus veraciter a-
gere existimaret.

Lib. 6. de
ciuit. Dei
cap. 10.

Pagina 32. De sententia Caietani.

Non abs re Caietanus, Non enim argu-
mento leui mouebatur. Nam si est idolo-
latra censendus, qui externo cultu desert ho-
norem

ANNOTATIONES.

norem idolo, ei sacrificando, hoc ipsum interim
 animo secretius improbante, sicut Socrates fe-
 cisse videtur: ergo cum in Christianum idolola-
 tram excommunicatio profertur, etiam is qui
 hoc metu finxerit videatur innodatus. Ad si-
 milem modum si excommunicetur confractor
 sacrarum imaginum, aut conculcator augustis-
 simi Eucharistia sacramenti, aut qui fuerit in
 sanctos cum Christo regnantes verbo facti-
 onis iniurius: etiam is videtur esse comprehensus,
 qui hoc contra conscientiam sociorum metu una
 cum ipsis peregerit. Si autem excommunicetur
 hareticus, non est consequens ut is incurrisse
 videatur censuram, qui solam protulerit vocem
 fidei contrariam sine mentis assensu; non enim
 est heresis sine errore mentis, & eo quidem cum
 quo pertinacia coniuncta sit. Adiungam hic
 & Nauarri censuram, quod ex eius verbis Cap. 11.
numc. 25
 quam ex meis fieri quis fortasse possit instru-
 ctior: Tertio (inquit) qui ex metu vel aliam ob
 causam dicit ex animo aliquid contra fidem,
 vel consensit in aliquod opus infidelitatis ex-
 terius, etiam si intra se & in corde suo opposi-
 tum crederet, sicut Marcellino Papa legimus
 contigisse, cap. Nunc autem, 21. distin. qui non
 solum est excommunicatus in foro exteriori,
 sed etiam in foro conscientia, secundum Cae-
 tanum, 2. sec. q. 94. art. 1. Sed huius oppositam
 sententiam olim pro responso dedimus, interro-

ANNOTATIONES.

gati de certis casibus, qui cuidam religioso societatis Iesu, apud Sarracenos agenti occurrerunt, erga Christianos quosdam, qui timore percussi, & propter alias causas se esse Sarracenos finxerant: & sequuti sumus eum qui repertorium Inquisitorum composuit in verb. *hareticus*, col. 24. Quod nunc quoque verius arbitramur, quam quod Caietanus asseruit. sic enim Sylvest. verb. *hæresis*, q. 9. & 10. Tabiensi verb. *hareticus*. nu. 2. & verb. *Apostasia*. nu. 3. visum est. Et profecto etiamsi hoc nullus assereret, nos eandem sententiam teneremus. Quoniam huiusmodi homo non est verè hareticus, quamvis gravissimè peccet, secundum Alex. Halensem 2. par. tit. 183. membr. 2. Et Ocham. 2. par. Decalog. cap. 6. id quod ex haretici hæresisq. definitione, quam in repet. c. Novit. de Iudic. notab. 3 num. 41. adduximus, comprobatur. Et excommunicatio illa iuris, quæ continetur in bulla cana Domini, solum infertur contra hæreticos credentes, vel contra fautores, & receptatores hæreticorum, quorum de numero non est censendus is, de quo modo loquimur, nisi quando aliquod opus exterius hæreticum commisisset, alicui hæresi auxilium præstando: in quo casu excommunicatus remaneret, non quia hareticus, sed quia fautor hæreticorum.

V Bi positum Marcellus pro Marcellinus.
 Hic enim Marcellinus conuictus est thurificasse in templo Isidis & Vesta. Ideoq; in synodo 300. Episcoporum & 30. presbyterorum caput cinere conuolutum habens, voce clara clamans, dixit: Peccaui coram vobis, & non possum in ordine esse sacerdotum. Post autem ab ipso Diocletiano pro fide Christi cum Claudio, & Cyrino, & Antonino capite truncatus est, martyrioque coronatus.

Pagina 41. De schismatici sacerdotis absolutione.

Quod dicitur & à schismatico separato absolui posse pœnitentem in casu necessitatis extrema; consentaneum est decreto Tridentinae synodi, in quo eiusmodi verba sunt: In articulo mortis omnis sacerdos quoslibet pœnitentes à quibuslibet peccatis & cēsuris absolvere potest, sess. 14. cap. 17. Ex quibus verbis non dubitavit Nauarrus dicere quod sacerdos etiam excommunicatus & denūciatus potest hodie absolvere licetē fidele constitutū in prædicto articulo necessitatis, sicut non excommunicatus. Tum quia conciliū vniuersaliter, nullum excipiendo, sequitur: tum quia nō obstat quod per excommunicationem tollatur, vel certē suspendatur iurisdictio, quam

ANNOTATIONES.

saltem habitualem habet iure diuino, & c. Cap. 27. Cum igitur ait D. Thomas in tertia parte quest. 82. art. 7. ad 2. Solus baptizatus permittitur ratus esse hæreticis, quia periculum licitè baptizare in articulo necessitatis, in nullo autem casu licitè possunt Eucharistiam consecrare, vel alia sacramenta conferre; aut sub baptismo penitentia sacramentum intelligendum est, quod illi in necessitate correspondet, aut quod dicit probabile non est.

Pagina 44. De Origene.

EST scriptum de Origene apud Nicephorum lib. 3. Eccl. hist. cap. 32. quod ad euitandum corporis stuprū & impuri Aethyopis libidinem, fidem negauerit. Verū in eo haud dubiè impiè fecit, sicuti & perperam aliās, quod semetipsum castrauerit. Magis imitandus in eo, quod iunior noluit cum hæretico vel in oratione consistere. Sic enim se habebat Ecclesiastica regula: Vnde est inter Apostolicos canones 63. Si quis clericus aut laicus synagogam Iudeorum aut hæreticorum conuenticulum ingressus fuerit, ut preces cum illis coniungat, deponitor, & à communione secluditor. Est etiam Laodicensi conciliū canon 33. non oportere cum hæreticis vel schismaticis orare, & conciliū Chartaginensis quarti canon 72. cum hæreticis nec orandum, neque psallendum. Cæpit igitur melius Origenes quàm desyr:

ANNOTATIONES.

desit : ultima primis cesserunt; dissimiles hic vir & ille puer : usque adeo ut diuus Hilarius scripserit Origenem non fuisse hominem Ecclesia . Plura videre licebit apud Vincentium Lirinensem.

Pag. 54. de facto Salomonis.

Mirum cuiusquam videri possit cur peccauerit Salomon immolans in excelsis , praesertim cum in excelsis Gabaon , quo se contulerat , esset tabernaculum foederis Domini , quod fecit Moyses; & altare aeneum , quod fabricatus fuerat Beseleel , ibi erat coram tabernaculo Domini : atque in eo mille hostias obtulit Salomon Domino , 2. Paral. cap. 1. In tabernaculo autem ubicunque esset offerre licebat , nondum praesertim adificato templo. Respondendum est , popularem consuetudinem immolandi in excelsis fuisse improbandam , quod non ad tabernaculum ea respiceret , sed ad ipsa excelsa : in quibus , cum plura essent , etiam sine tabernaculo Domini sacrificabatur à populo. Hanc consuetudinem & sequutus est Salomon , & exēplo suo confirmavit.

Pag. 59. De Libellaticis.

ERasmus in annotationibus ad Cyprianum sic dicit: *Qui non incendiissent thura idolis , sed per libellos tantum dedissent nomina , Libellatici vocabantur. Est interim manifestum*

ANNOTATIONES.

ex D. Cypriano, quod idem libellos accipiebant. Vtrum igitur ab accipiendis, an verò à dandis libellis Libellatici vocarentur, quari potest.

Pag. 61. De Ecbolis.

Dictio Græca apud Strabonē significat argenti purgamentū, id videlicet, quo reiecto atque secreto ipsum argentum redditur purgatius ac purius. Vnde non improbabile videtur translatam hanc vocem ~~ad ea~~ munera, quæ dabantur ijs qui sacrificare vel tradere cogeantur res sacras. Illis enim abs se muneribus secretis traditisq; purgabantur Christiani apud principem ac populum, tanquam qui obedienter mandata fecissent: istoque modo viri boni ab impijs & iam puri habebantur. Tales frustra sibi blandiebantur de confessione fidei. Vnde Themisius (inquit Apollonius) qui apud Montanistas nomine tantum confessionis inflatus est, vera confessionis fructibus caret: quoniā quidē per multam pecuniā vincula deposuit. Apud Eusebium lib. 5. Eccl. hist. c. 18. Horū interim crimen fuisse lenius eorum crimine qui sacrificassent, declarat etiam canō tertius cōcilij Elibertini, qui sic habet: Flamines qui nō immolauerunt, sed munus tantū dederunt, eo quod se à funestis abstinerūt sacrificijs, placuit in fine eis præstari cōmunionē factā tamē legitima pœnitētia: De his verò qui immolauerant seuerior multo præcedit canon.

Pagina

ANNOTATIONES.

Pag. 17. De habitu & signo falsæ religionis.

Contra praeceptum de colendo peccat mortaliter (inquit Nauarrus) qui aliquem habitum vel signum Iudæi vel Saraceni deferat in loco, ubi in veste vel quouis alio charactere, unusquisque suæ legis professionem indicat, Angel. verb. Infidelitas. §. 9. Syluester in Summa, verbo Habitus omisio. Id enim facere, perinde est ac præ timore se Iudæum esse aut Sarracenum confiteri. Non autem peccaret propter solam omissionem signi vel habitus Christianismi, dummodo signa Iudæorum aut Sarracenorum non acciperet, sicut recte docuit Caietanus 2. 2. q. 3. art. 2.

Pagina 76.

Imprimis verò illorum a munus pertinet docere & tutari veritatem, &c.) Huc pertinet illud Innocentij: Error cui non resistitur, approbatur: & veritas cum non defensatur, opprimitur. Nec enim caret scrupulo societatis occulta, qui manifesto facinori desinit obuiare. Rursum quis aut tolerare possit errantem, aut non recipere corrigentem? nam ut durum arbitror conuenientiam præbere peccantibus, ita impiū iudico manū negare cōuersis. Itaque horum silētio multos sapenumero perire cōtingit, quos tanquā simplices oues lupi rapiant ac laniāt, nemine obsistēte. Qui autem non remouet, cū possit iniuriā & dānum, tam est in vitio, quā ille qui facit, inquit Ambr lib. 3. officiorum cap. 36. Proinde si princeps quispiam
 silen-

ANNOTATIONES.

*silentium imperet catholicis pastoribus, meminisse hi debent Apostolorum: quibus cum esset non sine graui interminatione mandatum ne ultra de Christi nomine loquerentur, dixerunt: Si iustum est in conspectu Dei vos potius audire quam Deum iudicare. Non enim possumus quae vidimus & audiuiimus non loqui, Actorum 4. Itaque & diaconus quidam nomine Beniamin, ut est in Tripar. lib. 10. cap. 33. cum ab impio rege dimissus esset, ea lege ne deinceps Christi doctrinam predicaret, impossibile esse respondit, ut non communicaret alijs lumen quod ipse percepisset. Refugiebat illud quod & Gentiles execrabile esse indicabant: Erranti nolle com-
monstrare viam |*

Pagina 110.

T*Alis nimirum est qui dicit; Iuravi, &c. Aliter hoc alij acceperunt, velut D. Gregorius 4. par. Pastoralis cap. ult. Nempe ut hoc dictum sit à Davide, quemadmodum & illud dixerat in abundantia cordis sui: Non mouebo in aeternum. Quia (inquit) virium eius non erat manere in custodia quam iurabat, debilitatem suam protinus turbatus inuenit. Unde & ad precis opem repente se contulit, dicens: Humiliatus sum usquequaque Domine, visita me secundum verbum tuum. Psal. 98.*

INDEX

INDEX CAPITVM

LIBRI HVIVS

H Omini Christiano præter interiorem fidem, etiam fidei professionem suo tempore necessariam esse, non obstante persecutionis metu. Cap. I. pagina 11.

Non licere Christiano homini aut suam negare fidem, aut profiteri alienam. Cap. II. 16.

Argumenta quædam partim ex scriptura de Iehu, partim ex D. Ambrosio petita solvuntur.

Cap. III. 21.

Nefas esse per fictam venerationis simulationem, infidelium sacris interesse. Cap. IIII. 30.

Quod Christus Dominus etiam si assumpserit similitudinē carnis peccati, non se tamen simulaverit, aut mentitus sit peccatorē. Cap. V. 47.

Solvitur obiectio de Naaman Siro & Salomone.

Cap. VI. 52.

Etiam id in persecutione cauendum Christiano, ne fidem negasse aut communicasse videatur.

Cap. VII. 56.

Et si religionem negare non liceat, occultare tamen eam aliquando licere. Cap. VIII. 64.

Quàm debeat cordi esse homini Christiano quod B. Petrus ait: Parati semper ad satisfactionem omni poscenti rationem. Cap. IX. 73.

Integrum esse Christiano, fuga sibi consulere ut persecutionis pericula vitet. Cap. X. 79.

Proponuntur ac dissolvuntur quædam argumenta Tertulliani, quibus probare nititur non esse licitam in persecutione fugam. Cap. XI. 85.

Liceâtne aliquando Christiani populi pastoribus fuga sibi consulere, aut ouium sibi creditarum curam deferere, propter pericula persecutionum. Cap. XII. 96.

Non debere quenquam temerè sese in persecutionum pericula conijcere. Cap. XIII. 105.

Gauc-

INDEX CAPITVM.

Cauendum esse Christiano, ne incauta temeritate
persequutionem vel excitet, vel exacerbet.

Cap. XIII. 115.

Nephas esse mortem sibi consciscere ad effugien-
da persecutionum pericula. Cap. XV. 120.

Qui fiat vt oborta persecutione tam multi ca-
dant.

Cap. XVI. 129.

Cuiusmodi cogitationibus & armis instructum
ac munitum esse debeat Christiani pectus, vt
perstare inuictum in persecutione possit.

Cap. XVII. 133.

Demonstratur Chrysostomi verbis quam utile sit
superioris temporis persecutionum meminisse;
& adduntur alia quædam in persecutione
meditanda.

Cap. XVIII. 142.

Quantopere fugienda sit elatio his quos in perse-
cutione semel aut iterum fortiter facere con-
tigerit.

Cap. XIX. 152.

Frustra sperari de persecutione gloriam apud
Deum, si quis eam & propter fidem Christianam
in schismate patiatur.

Cap. XX. 155.

Adhibendum esse interdum Christiano defensionis
officium.

Cap. XXI. 165.

Non esse res sacras prophanatoribus tradendas,
etiãsi mortis periculum impendeat.

Cap. XXII. 171.

Quibus argumentis palliari posse videatur tradi-
tionis crimen, & ad ea brevis responsio.

Cap. XXIII. 180.

Summaria comprehensio rationum earum, qui-
bus officium Catholici hominis continetur in
schismatica communione vitanda persecutio-
nis tempore.

Cap. XXIV. 184.

C E N S V R A.

Liber doctus & officio hominis Christiani, tempore potissimum persecutionum, multum utilis & accommodus.

XV. Augusti, LXXVIII.

Ioh. Molanus censor.

S V M M A P R I V I L E G I I.

PHILIPPI Dei gratia, Regis Hispaniarum, &c. Ducis Burgundiæ, Brabantia, &c. Priuilegio cautum est, ne quis citra voluntatem Petri Zangrij libellum, cui titulus est; *De officio hominis Christiani in persecutione committenti*: Authore D. IOANNE LENSÆO BELLIOIANO, &c. ante annos sex, quocunque modo vel forma imprimat, vel alibi impressum importet, venalemve habeat sub graui multa, vt latius patet in literis eidem Petro Zangrio datis & concessis, Louanij in Consilio Brabantia XIX. Augusti LXXVIII.

Signat.

Berwouts.

L O V A N I I,

Excudebat Ioannes Masius.

M. D. LXXVIII.

1805. Vaut. 5.